

SOCIÉTÉ
DES
ANCIENS TEXTES FRANÇAIS

MÉLIADOR

II

MÉLIADOR

PAR

JEAN FROISSART

ROMAN COMPRENANT LES POÉSIES LYRIQUES

DE

WENCESLAS DE BOHÈME, DUC DE LUXEMBOURG ET DE BRABANT,

PUBLIÉ POUR LA PREMIÈRE FOIS

PAR

AUGUSTE LONGNON

TOME II




PARIS

LIBRAIRIE DE FIRMIN DIDOT ET C^{ie}

RUE JACOB, 56

M DCCC XCV



APR 17 1936
8692

Publication proposée à la Société le 20 juin 1894.

Approuvée par le Conseil dans sa séance du 21 novembre 1894,
sur le rapport d'une Commission composée de MM. Gaston Paris,
Raynaud et Roy.

Commissaire responsable :

M. G. RAYNAUD.



MELIADOR

- 9365 **D**E Melyador laisserons *f. 69 b*
A parler, car bien nous savons
Qu'i[l] ne se poet ores armer.
Entrues poons nous bien parler
D'autres aventures nouvelles
- 9370 Qui avinrent d'armes moult belles
Ou paÿs de Northombrelande.
Et toutes fois une moult grande
Aventure y avint ce terme
Que Melyador ens ou ferme
- 9375 De Montgriès illuec reposoit,
Et me semble que ce fu droit
A .iiii. lieues dou chatiel
Dessus dit, et fu de nouvel
Quatre jours après ce, pour voir,
- 9380 Que Melyador son devoir
Eut fait, ensi c'on puet escrire,
De ce dit Camel desconfire.
Vous savés que tout chevalier,

Qui se voloient avanchier,
 9385 Les armes partout demandoient
 Et l'un l'autre point n'atendoient,
 Mais estoient moult desirant
 De travillier. Et en errant
 Toutdis, au renom de proece,
 9390 Doy frere plain de gentillece,
 Vaillant homme, preu et honneste,
 Se furent bouté en le queste
 Et avoient a leur partir
 De l'ostel pour yaus mieus couvrir
 9395 Eü colation ensamble
 Que nulz de ces .ii., ce me samble,
 Ne se devoit faire cognoistre
 Pour son pris amenrir ne croistre,
 Et de blasons si differroient,
 9400 Et nouviaux varlès prenderoient
 C'onques il n'aroient veü,
 Ne pour l'un l'autre cogneü.
 Il eurent moult bien ce couvent
 Qu'il jurerent, ch'ai je en couvent,
 9405 Et que vous en sachiés les noms
 Tantost nous vous les nommerons.
 Li uns fu Savare nommés
 Et Feughins estoit li mainsnés.
 Messire Savare et Feughins
 9410 Prisent ou partir .ii. chemins,
 Et ne savoient .i. ne el,
 Quant il partirent de l'ostel,
 L'un de l'autre dont il s'armoient,
 Ne quels parures il portoient.
 9415 Savare s'armoît tout premiers,
 Qui fu moult vaillans chevaliers,
 De blanch et de vert mi parti;
 Et sus son blason, tout en mi,
 Avoit une harpe vermeille.

f. 69 c

- 9420 Et Feughins, dont point n'ay merveille,
 De blanch et de bleu cilz s'armoit,
 Mais dessus sa targe il portoit
 .I. capelet de rouges roses.
 Or dirai pour quoi de telz coses
- 9425 Commencié en ay a parler.
 Cil doy frere peurent aler
 Tant que sus les camps se trouverent,
 Et d'aventure s'encontrerent
 Ou pays de Northombrelande,
- 9430 Au departement d'une lande
 Et d'un bois moult grant et plenier. *f. 69 d*
 Ensi comme bon chevalier
 Et qui acquitter se voloient,
 De si tres lonch comme il se voient,
- 9435 Cescuns demande ou prent sa lance.
 Si se mettent en ordenance
 Pour joster, et puis esporonnent
 Les chevaus qui grans saus lor donnent,
 Car il estoient viste et fort.
- 9440 Cil doi frere, plain de confort,
 Et de grande chevalerie
 Et de bonne bachelerie,
 Des lances as bons fers agus
 Se fierent dessus les escus
- 9445 Telement et si roidement
 Que il samble, tout proprement,
 Qu'il doivent en l'un l'autre entrer.
 De ce cop se vont arrester
 Et jetterent leurs lances jus.
- 9450 Point ne se sont retrait en sus,
 Mais tirent errant les espées
 Qui d'achier sont envolepées,
 Et viennent l'un l'autre requerre
 Pour faire mortel fait de guerre.

- 9455 E^N cel estat se combatirent
 A l'un l'autre nulle parolle.
 Messires Feughins, qui escole
 Peuist tenir de bien jouter,
 9460 Va son escuier appeller
 Et dist bas : « C'or me rent ma lance. »
 Quant Savare en vit la samblance,
 A son varlet dist : « Ça, le mienne. »
 Cescuns d'yaus .ii. reprist le sienne
 9465 Et se joignent en leurs escus. *f. 70 a*
 Or se doublera leurs agus,
 Car il sont forment escauffé.
 Li cheval, ensi que mauffé,
 S'en viennent fort arandonnant.
 9470 La se vont si grans cops donnant
 Li doi chevalier, ce me samble,
 Car, quant les lances sont ensamble,
 Proprement ce samble .i. tempeste.
 Messires Feughins en la teste
 9475 Consieui Savare, son frere ;
 La pointe de la lance clere
 Li bouta parmi en cousant,
 Et l'abati jus en passant
 Par la force de bien bouter.
 9480 Peut la la glave tronçonner :
 Se li demora ou hÿaume.
 Chilz chiet jus, qui pot une psaume
 Recorder assés merveilleuse,
 Car la plaie est moult perilleuse.
 9485 Ses escuiers est la venus,
 Qui sault lors de son cheval jus
 Et tire le tronçon, pour voir ;
 Aultrement ne peuist ravoïr
 Le hÿaume hors de son chief.

- 9490 Sachiés qu'il le trest a meschief;
Tant fist toutes fois qu'il le reut.
Messires Feughins ne se veult
Astenir qu'il ne venist la.
Quant venus fu, il s'abaissa
- 9495 Et li sambla a son avis,
Quant il regarda ens ou vis
Le chevalier qui la gisoit,
Que Savare ses freres soit :
Adont li est li sans cangiés.
- 9500 Tantost est jus sallis en piés
Et vient erranment sus Savare,
Sans querre empeschement ne bare,
Et voit clerement que c'est il,
Et que navrés est en peril :
- 9505 Lors cuide moult bien foursener.
Son hÿaume fait lors oster,
Et puis dist : « Savare, biau frere,
« Ceste cose m'est moult amere,
« Quant je vous voi en ce parti. »
- 9510 Et quant Savare devant li
Voit son mainsnet frere Feughin,
Si parolle et li dist, a fin
Que il ne soit trop destourbés :
« Feughin, Feughin, ne vous doubtés,
- 9515 « Je croi que garde n'ai de mort
« Et, se je moroie, a mon tort
« Est, voir, quant a vous jousté ay
« Et vostre nom ne demandai.
« Se je muir, je le vous pardonne. »
- 9520 A ces parlers, Feughins ordonne
Comment il en sera portés,
Et s'est .i. peu reconfortés
De ce qu'il l'a oÿ parler.
Bien dist qu'il l'en convient aler
- 9525 A .i. chastiel bien priés de la.

f. 70 b


A ces cops illuecques passa
 La litiere, parmi les bois,
 Qui revenoit droit de Camois
 Ou on avoit porté Camel,
 9530 Et s'en raloit a son hostel,
 Le droit chemin, droit a Montgriès;
 Et quant Feughins les voit la priès,
 Si les appella doucement *f. 70 c*
 Et leur pria courtoisement,
 9535 Pour bien desservir et paiier,
 Qu'il portaissent ce chevalier :
 Jamais refusé ne l'eussent.
 Adonques Savare la misent
 En la litiere incontinent,
 9540 Et l'aportèrent doucement
 A Montgriès; Feughins vint avec.
 Quant il furent venu illuech,
 Forment en fu esmervilleie
 Florée, a la premiere fie;
 9545 Mais, a ce que Feughins compta,
 Elle dou tout se rapaisa,
 Et furent, dedens le chastiel,
 Receti moult bien et moult biel
 Li chevalier, il n'est pas doubte,
 9550 Et le fuissent avoech leur route
 Et euissent .iiii. tant de gens,
 Car li affaires biaux et gens
 Estoit lors tels, et li usages,
 Que les dames vaillans et sages
 9555 Faisoient a estragniiers
 Honneur et a tous chevaliers,
 Et plus en .i. paÿs qu'en aultre;
 Et principaulment ne voel d'aultre
 Paÿs parler que d'Engleterre.
 9560 Car, qui en vorroit bien enquerre,
 La sont les dames gracieuses,

Lies, plaisans et amoureuses,
 Et qui sevent gens honnorer
 Trop mieulz c'ailleurs, au vrai parler ;
 9565 En ce point sont elles nouries,
 Escolées et ensegnies.

FLORÉE, la pucelle gente, *f. 70 d*
 Mist adont grandement s'entente
 A honorer tous chevaliers.
 9570 Savare, ossi ses freres chiers,
 Demorerent ens ou chastiel
 De Montgriès, la ou bien et biel
 On leur fist ce qu'il demandoient
 Et plus avant, car cil estoient
 9575 De laiens si tres bien nourri,
 Si vaillant et si signouri
 Qu'il faisoient sans demander.
 Assés bien se prist a saner
 Messire Savare, pour voir,
 9580 Car grant cure en pooit avoir
 Feughins, qui avoit grant desir
 Qu'en bon point le peüst veir.
 Lansonnés ossi, d'autre part,
 9585 Avoech Florée, que Diex gart,
 A Melyador entendirent
 Grandement, car forment desirent
 Qu'il soit garis bien et a point,
 Par quoi il ne sejourne point.
 Tant fu poursongniés sagement
 9590 Et medecinés doucement,
 Qu'il fu gari bien et a droit,
 Et dist certes qu'il soufferoit
 Bien ses parures a porter,
 Et souffera bien le jouter,
 9595 Le combatre et le tournoiier:

Moult s'en poeent esleecier
 De ces parolles, ou chastiel.
 Quant Melyador bien et biel
 Fu sanés, si va congiet prendre
 9600 Et dist qu'il ne voet plus attendre
 Ne la demorer en prison, *f. 71 a*
 Mais voelt emploier sa saison
 Et chevaucier dessus la lande.
 Quant ceste de Northombrelande
 9605 Voit que cilz de la partir volt,
 .I. aniel que pourveü ot
 Et fait faire ens ou nom de li,
 A carnieres biel et joli,
 C'on ouvroit moult soutieusement,
 9610 Mais elle ne dist pas comment
 A Melyador on l'ouvroit.
 Dedens l'aniel escript avoit :
 « Ciz sui qui le soleil d'or porte,
 « Par qui Oultrecuidance est morte » ;
 9615 Ensi y eut ne plus ne mains.
 Elle le prist entre ses mains,
 Et se s'en vint au chevalier,
 Qui se pooit apparillier
 Pour monter et aler sa voie.
 9620 Florée s'est mise en sa voie
 Et dist : « Sire, parlés a moy. »
 — « Volentiers, belle, par ma foy.
 « Or me dittes que volés dire. »
 — « Au partir je vous pri, chier sire,
 9625 « Que vous prendés cest anelet,
 « Il n'i a mies jeuilet
 « Si grant qu'il apartient a vous,
 « Mais je vous pri, chiers sires doulz,
 « Que vous le portés, pour m'amour
 9630 « Et en mon nom, jusques au jour
 « Que bien le porés emploier. »

MELIADOR



Chilz le prist, ne s'en fist priier,
 Car il li souvint d'Ermondine
 A qui Florée estoit cousine,
 9635 Et dist : « Belle, tres grant mercis. *f. 71 b*
 « Pour vostre amour le voel toutdis
 « Porter, car moult bien le valés. »
 Adont est li preus avalés
 Les degrés dou chastiel d'amont :
 9640 La damoiselle et ses gens l'ont
 Convoïiet tout jusques a la.
 Ses chevaus fu près, il monta :
 A Dieu, a Dieu les recommande
 Au partir. Mies ne demande
 9645 Quel chemin tendra, ne quel voie.
 La damoiselle le convoie
 De ses yex, et sachiés, pour voir,
 Si lonc qu'elle le peut veoir,
 Et, quant veoir ne le peut plus,
 9650 Des degrés qui sont bas la jus,
 Elle monte hault ou chastiel
 Et si s'apoie a .i. crestiel.
 Si le voit encor chevaucier
 Et une valée approcier
 9655 Par quoi tantos le perdera.
 Et adonques s'en retourna
 Par dedens sa cambre Florée,
 Qui s'est a par soy avisée
 Que la mort monsieur Camel,
 9660 Et de l'estat de son hostel,
 Escrira devers sa cousine
 D'Escoce, ma dame Hermondine.
 Si escrii ne plus ne mains,
 Si con ci s'ensieut, de ses mains :

- 9665 « **T**RES chiere et amée cousine,
 « **V**raie amour, qui toutdis m'encline
 « A vous amer et honnourer,
 « Voet que je vous voelle moustrer
 « De mon estat trestout le voir. *f. 71 c*
- 9670 « Cousine, vous devés savoir
 « Que fortune et bonne aventure,
 « Par la proece et la grant cure
 « Dou chevalier au soleil d'or,
 « Que pas ne sçai nommer encor,
- 9675 « Nous ont de Camel apaisié,
 « Dont j'en senc mon coer mieus aisié,
 « Plus liet et en plus grant reviel.
 « Ossi font cil de mon chastiel,
 « Et pour tant le vous segnefie,
- 9680 « Ma chiere cousine et amie,
 « Que j'ai espoir que ces nouvelles
 « Vous seront voir plaisans et belles,
 « Et ensi en est avenu
 « Que pluseurs fois en ay tenu
- 9685 « Parlement a vous et a moy.
 « Cousine, sachiés par ma foy,
 « Cilz chevaliers qui conquis l'a,
 « C'est cil qui a la Garde ala
 « Et qui y conquist l'esprivier,
- 9690 « Pour avoir corps de chevalier,
 « Si preu que onques n'i eut tel.
 « Chiere cousine, en mon hostel,
 « L'ai eü environ .i. mois,
 « Car Camelz c'on dist de Camois
- 9695 « Le navra moult grief par bataille,
 « Mais onques je ne vi, sans faille,
 « Nul chevalier de tel arroi.
 « Certes, ma cousine, je croi
 « Qu'il passera des aultres route,

- 9700 « Car en li est proece toute,
 « Sens, honneur, courtoisie et biens.
 « En ses estas sur toute riens
 « Je le recommande et honneure, *f. 71 d*
 « Et croi, quant son estat saveure,
- 9705 « Qu'il soit de bon ostel issus.
 « Cousine, je n'en escripc plus;
 « Je m'en passe moult sobrement,
 « Mais je vous verai temprement,
 « S'il plaist Dieu, a tres grant loisir :
- 9710 « Si vous en dirai mon desir
 « Et tout ce, de voir, qu'il m'en samble.
 « La Sainte Trinités ensemble
 « Vous ait en garde et vous maintiegne
 « En toute joie qui vous viegne.
- 9715 « Escript ou castiel de Montgriès,
 « Douse jours en may, ou la priès.
 « Et pour ce, ma chiere cousine,
 « Que vous estes de coer encline
 « A lire joieuses cançons
- 9720 « Et toutes coses de telz noms,
 « Je vous tramec presentement,
 « Fait de mon rude sentement,
 « Une balade. A vous en soit
 « Dou jugier dou tort et dou droit;
- 9725 « Vous me dirés, quant vous verai,
 « S'il vous plest, comment ouvré ay.

Balade.

- 9730 **Q**ui voet avoir joie se viegne a moy,
 Car je n'ai doel, tristrece ne dolour,
 Mais j'ai plaisance et solas sans anoi,
 Joie et liece en mon coer nuit et jour

Qui me tiennent compaignie,
 Sans riens penser fors a joieuse vie,
 Car mes amis aime l'onneur de mi,
 Dont je le doi bien tenir pour ami.

9735 **E**T si fai jou, et l'ainme en bonne foy,
 De coer loyal, sans penser nul faus tour *f. 72 a*
 Et plus que tout le monde, je le croi
 Certainnement, et aim de boine amour.
 Sans faire ja departie,
 9740 Se li serai ferme et loyal amie.
 Faire le doy, car tout bien sont en li,
 Dont je le doy bien tenir pour ami.

CE me fait vivre en liece et en foy,
 Ce me fait vivre en joie et en baudour,
 9745 Ce me fait vivre en espoir sans anoi,
 Dont je fais en plaisance mon demour,
 Par doulz voloir qui me lie
 De bien amer, voir, coi que nulz en die,
 Mon doulz ami qui m'a toutdis servi,
 9750 Dont je le doi bien tenir pour ami.

QUANT Florée la damoiselle
 Eut escript ceste baladelle,
 Elle le ploia en biaux plois
 Et en la lettre, ce fu drois,
 9755 Le mist, et laiens l'encloÿ,
 Et puis si le perça parmi,
 Et frema tout a son devoir
 Et seela, sans lui mouvoir
 De sa cambre, bien et a point.
 9760 Quant la lettre fu en ce point,

9738 aim, *B* ains. — 9750 bien tenir, *B* bien pour tenir.

- Elle appella .i. escuier
 Et dist : « Il te fault chevaucier
 « En Escoce, vers ma cousine,
 « Et li porteras cesti signe,
 9765 « Ceste lettre avoec .c. salus. »
 Cilz respont : « Ma dame, au sourplus,
 « Ferai vostre commandement. »
 Adont se parti erranment
 De Montgriès et s'est mis a voie
 9770 Viers Escoce. Diex le convoie! *f. 72 b*
 De li tant qu'en present lairons,
 Et au chevalier revenrons
 Que j'appelle Melyador.
 Vous n'avés point de li encor
 9775 Oÿ nulle cançon nouvelle,
 Depuis que de la damoiselle
 De Montgriès ilz s'estoit partis.
 Il chevauce plains et lairis
 Ou pays de Northombrelandè.
 9780 Il a traversé une lande
 Et s'adrece devers .i. bois.
 Adont s'esmut a haute vois
 De chanter .i. seul rondelet,
 Et croi qu'il le fist tout a fet
 9785 Qu'il le canta, car il fu cours,
 Mais uns grans sentemens d'amours
 Estoit ou rondelet entés.
 Ce sera bien li volentés
 Dou chevalier de Cornuaille,
 9790 Que vous l'oiiés, vaille que vaille.
 Toutes fois, il vault bien c'on l'oe
 Et qu'en escoutant on le loe.

Rondel.

MAIS que m'aiiés en vostre souvenance,
Certes, dame, trestous bien m'avenra ;

9795 DÉ ce sui je et serai sans doubtance,
Mais que m'aiiés, etc.

CÂR en vous est ma parfaite fiance,
Dont, je sai bien, riens ne me grevera,
Mais que m'aiiés, etc.

9800 TOUT ensi s'esbat au chanter
Melyador, qui hault et cler,
Avoit chanté son rondelet.
Et puis demande a son varlet : *f. 72 c*
« Lansonnet, di moy, que t'en samble ?
9805 « Ces parolles que je rassamble,
« Qui ne sont mies de grant coust,
« Te viennent elles bien a goust ?
« C'est tout pour l'amour de ma dame. »
Et Lansonnés respont : « Par m'ame,
9810 « Sire, oïl, haro, et quoi dont ?
« Toutes ytelz coses me font
« Resjoïr bien et grandement. »
Adonques li conte erranment
Melyador, de mot a mot,
9815 Comment l'autrier jalousie ot
Dou chevalier qu'il desconfi,
Et dist : « Lansonnet, je t'afi,
« Je le conchieu, ne sai comment
« Par oïr parler seulement.

- 9820 « Florée, qui tant le prisoit
 « En li honnourant, bien disoit
 « Que cilz chevaliers l'amoit tant
 « De coer, d'esperit, de samblant,
 « Qu'elle n'en savoit par raison
 9825 « Faire nulle comparison.
 « Et me disoit bien que la feste
 « Estoit emprise et ceste queste
 « Par ce Camel et par ses fais.
 « Quant ce oÿ, telz et si fais
 9830 « En fui, et si tres fort jalous,
 « Et si tres merancolious,
 « Si pensieus et si debatus :
 « Se je me fusse combatus
 « Ce soir, je n'euisse riens fait
 9835 « Et tant seulement pour ce fait.
 « Est dont jalousie tel cose? »
 Et Lansonnet, qui moult bien ose
 Parler a son mestre a son gré,
 S'arreste tous quois sus .i. pré
 9840 Ou il chevaucoient andoi
 Et dist : « Sire, oïl, par ma foy.
 « Jalousie est un mauvais visces,
 « Et toutes fois c'est un offisces
 « En vraie amours grans et entiers,
 9845 « Et qui enflame volentiers
 « Les amans qui sur lui s'arrestent,
 « Et qui tant li donnent et prestant
 « Dou leur qu'il le loent et croient ;
 « Siques bien ressongner le doient
 9850 « Tout amoureux vrai et entier,
 « Car, puis qu'il voet acompagnier
 « .I. coer, il gist en grant peril.
 « Mais vous l'avés noble et gentil,
 « Et chevauciés par les contrées,
 9855 « Siques j'espoir que telz pensées

f. 72 d

- « Ne vous poent longues durer.
 « Voelliés ent vostre coer oster,
 « Et pensés toutdis tant a faire
 « Que la belle et la debonnaire,
 9860 « La fille au roy Hermont d'Escoce,
 « Bonnes nouvelles de vous ot ce.
 « Ou cas qu'a li volés entendre,
 « Ne vous ne devés a el tendre
 « Ne aultres pensées avoir. »
 9865 Dist Melyador : « Tu dis voir. »

- E**NSI chevaucent tout parlant
 Li doi, et chevaucierent tant
 Qu'il sont venu a la Saverne,
 Une riviere qui gouverne
 9870 ' Tout le royaume de Norgalles.
 Melyador, qui en ses gales
 Estoit la grignour part dou jour,
 S'en chevaucé sanz nul sejour.
 Tout encontremont la riviere,
 9875 Jusques a basse remontiere
 Chevaucierent, je le vous di.
 Il regardent devers midi :
 Une nef voient, non pas grande ;
 Tout quoi se tiennent sus la lande
 9880 Pour savoir se la nef vient la.
 Elle venoit, ce leur sambla,
 Aval vent, et fu la tantos.
 C'estoit uns petis hokebos
 Qui menoit une damoiselle
 9885 Gente de corps, plaisans et belle,
 Qui de Galles estoit issue.
 Tost sarés par quele avenue

f. 73 a

Elle voloit terre et port prendre,
 Ensi que je l'oÿ reprendre,
 9890 Et pour quoi estoit messagiere
 A une damoiselle chiere
 Qui n'avoit mies ses solas
 En Galles ; mes estoit es las
 D'une forte guerre accueillie,
 9895 Et sa terre toute essillie.

MELYADOR, qui dou cheval
 Estoit et descendus aval,
 Par les resnes errant le baille
 A son varlet, et dist sans faille :
 9900 « En cel estat chi demorrai
 « Jusques a tant que jou orrai
 « Nouvelles. » Lors vient sus le rive.
 Es venu la nef qui arrive
 Coiteusement, ne plus ne tarde.
 9905 Melyador adont regarde :
 Si voist ens une damoisselle.
 Pensa lors que quelque nouvelle
 Aroit lors, si tost que le voit.
 Par dedens ceste nef avoit
 9910 Palefrois amblans et sommiers,
 Et varlès assés coustumiers
 De telz harnois mener par terre,
 Soit en temps de pais ou de guerre,
 Et tout ordonné comme sage
 9915 Pour bien exploitier .i. message.
 Tant s'est la tenus sus le place
 Melyador, qui se solace
 A considerer l'ordenance,
 Que la damoiselle s'avance.

f. 73 b

9890 Et pour quoi, *B* Et pour qui.

- 9920 Jusques a la rive est venue
 Et sus la terre descendue.
 Melyador contre li vint,
 Qui mies trop mus ne se tint :
 Si le salua en venant
- 9925 Et ceste, par bon couvenant,
 Ne fu mies trop esbahie
 Dou salu rendre a ceste fie :
 Viers Melyador s'enclina.
 Adont aultre cose dit n'a,
- 9930 Fors : « Tant pleuist a Dieu, biau sire,
 « Que, de ce que mon coer desire,
 « Vous me peussiés apaisier. »
 Melyador s'ala baissier
 Et respondi a ce parler :
- 9935 « Belle, vous poés commander
 « Sur moy, si com sur vo servant.
 « Je sui uns chevaliers errant
 « Et ne demande c'aventures.
 « Pour ce porte mes armeüres
- 9940 « Et chevauce ensi que veés ;
 « Si vous pri, ne vous effreés.
 « Mais dittes moy, sans couroucier,
 « Dont je vous poroie adrecier
 « Et de cuer y entenderai,
- 9945 « Et, si avant que je porai,
 « Conseil y metterai, par m'ame. »
 — « Lors », dist elle, « j'ai une dame,
 « Qui me nourist et me gouverne,
 « Qui d'autre part ceste Saverne
- 9950 « Tient grant terre et grant hyretage.
 « Elle est auques de mon eage,
 « Elle n'a ne pere ne mere,
 « Ne nul confort tant fors .i. frere,
 « Qui est encores moult petit,
- 9955 « Quoiq' il soit ables et fetis,

f. 73 c

« Pour furnir une tel besongne
 « C'a ma chiere dame besongne. »
 Melyador, qui dou savoir
 Fu engrans, n'en cuida avoir
 9960 Jamais le fin pour demander;
 Si dist : « Belle, voelliés oster
 « Vostre coer de merancolie,
 « Et me dittes, je vous en prie,
 « La besongne qui vous empece
 9965 « Et qui si vostre coer courece. »
 Et la damoiselle li conte,
 Si com vous en orés le conte.

« CHEVALIERS, vous devés savoir
 « C Que ma tres chiere dame, voir,
 9970 « Grant terre a dela le riviere,
 « Dont elle se tient hiretiere.
 « Mais, de son chastel de Montrose,
 « Nullement partir elle n'ose,
 « Tant li est destrois li dangiers,
 9975 « Pour .iiii. freres chevaliers
 « Qui l'ont accueilliet a la guerre
 « Et tous les hommes de sa terre,
 « Et claiment droit et avantage
 « Sus lui et sus son hyretage,
 9980 « Et se n'i scevent raison dire,
 « Fors tant par orgueil et par ire
 « Li font il ce tort a plains bras.
 « Elle n'a homme de ses draps
 « Qui s'ose contre chiaus bougier,
 9985 « Et pour ce qu'en si grant dangier
 « Ma dame maintenant se voit,
 « Ensi com celle qui doit

f. 73 d

9883 Elle, B Ella.

- « Deviers le roy Artus aler
 « Pour ses besongnes remoustrer.
 9990 « Ja en fu toute appareillie.
 « Mais de nouviel est conseillie
 « Que presentement m'i envoie,
 « Car on l'en a mis a le voie
 « Que la sont li homme vaillant,
 9995 « Li preu et li bien travillant,
 « Li quel, quant ma requeste oront,
 « Je croy qu'il s'i enclineront
 « Et qu'il venront sur ce parti;
 « Pour quoi, her soir, je me parti
 10000 « De ma dame gentil et chiere.
 « Ançois que je retourne arriere,
 « Se je puis elle ara conseil;
 « Si ne plains mies mon travail,
 « Se je vois ores jusc'a la. »
 10005 Adont Melyador parla
 Comme sages et avisés,
 Et respondi : « Je croi assés,
 « Ma damoiselle, par ma foy,
 « Que toute adrece arés ou roy
 10010 « Et que vous le trouverés tel,
 « Ossi tous chiaus de son hostel.
 « A ce est enclinés sa cours;
 « Point n'en partirés sans secours,
 « Car la sont tout notoirement
 10015 « Li preu et vaillant durement.
 « Mais je vous di : je suis uns homs
 « Qui ne me tieng mies des bons,
 « Des preus, ne des entreprendans,
 « Fors que les armes aprendans
 10020 « Ensi que j'ay toutdis esté;
 « Qui suis de bonne volenté
 « D'onnouer et servir vo dame
 « Si avant que porai, par m'ame,

f. 74 a

- 10025 « Quoique fortune m'en envoie,
 « Mais que vous m'enseigniés la voie. »
 Et quant la damoiselle entent
 Melyador si faitement
 Parler, s'en est toute esjoÿe.
 Si respondi a chiere lie
 10030 Et dist : « Simple seroie
 « Et ma dame peu ameroie,
 « Sen honneur et son avantage,
 « Quant vous volés son hyretage
 « Aidier de bon coer a deffendre,
 10035 « S'a ce je ne voloie entendre,
 « Et par li je vous en merci,
 « Chiers sires. Ceste nef droit ci,
 « Sans entrer en aultre batiel,
 « Nous menra desous le chastiel,
 10040 « Ou ma dame prent son sejour,
 « Ains que demain voions le jour. » *f. 74 b*

- I L n'i ot plus dit ne plus fait,
 Mais sont arresté sur ce fait
 Et sont entré la de recief,
 10045 Dedens la nef, tout a nu chief,
 Melyador et la pucelle,
 Qui moult estoit courtoise et belle,
 Et Lansonnés et leur harnois.
 La n'estoit courous ne anois
 10050 En Melyador le vassal,
 Mais estoit par especial
 Reconfortés et plains de joie.
 Ewireus se tient sus la voie
 De la belle et bonne avenue,
 10055 Qui li est en le main venue;
 Ne ressongne peril ne painne.
 Si com li maronniers les mainne

- Et que son gouvrenal gouverne,
Singlent contremont la Saverne,
10060 Une riviere grosse et bonne,
Qui depart, ensi c'une bonne
Est sus la marce d'une terre,
Depart Galles et Engleterre.
Ce soir furent en .i. isliel,
10065 Vert, gracieus, joli et biel,
Seant droit en mi la riviere.
La souperent a lie chiere
Et jusqu'adont s'i esbatirent
Que la mers revint. Lors partirent ;
10070 Si rentrèrent en leur vaissiel.
La estoient cil doulz oisiel,
En ces isliaus sus ce rivage,
Qui n'estoient pas trop ramage
De chanter moult joieusement,
10075 Ensi que costumierement *f. 74 c*
Il cantent sans avoir esmay
Ou doulz mois et joli de may,
Et ce resjoïssoit trop fort
Melyador en son confort
10080 Et y prenoit tant de deduit.
Onques il n'eut en celle nuit
Nulle affection de dormir,
Mais maint biel et bon souvenir
A ses amours qu'il ne vit onques.
10085 Melyador une heure adonques
Demanda a la damoiselle,
Et dist ensi : « Par ma foy, belle,
« Trop volentiers vous prieroie
« D'une cose, voir, se j'osoie. »
10090 Et la damoiselle respont :
« De quoi ? » Meliador adont
Li dist : « D'avoir sus no chemin
« Une cançonnete, a le fin

10095 « Que mains nous anuie la voie,
 « Et je vous di : se j'en savoie
 « Nulle, sans moi faire prier,
 « Le diroie sans detriier. »
 Adont la pucelle s'avise,
 Qui prestement a la devise
 10100 De Melyador voet entendre,
 D'une vois joliete et tendre
 Au chanter illuech s'avança,
 Et dist quant elle commença :

Virelay.

10105 **T**OUTE ma vie sans partir
 Vous amerai,
 Ne pour aultre ne vous lairai,
 Je vous le jure sans mentir.

10110 **C**AR mieus ne puis, a mon plaisir,
 Mon coer avoir mis, sans faillir
 Que ou je l'ay.

f. 74 d

DONT je vous voel sans repentir
 Toutdis aimer, c'est mon desir
 De voloir vrai.

10115 **N**E ja ne m'en quier departir.
 Tant com vivrai,
 Tous jours loyauté vous tenrai,
 Viegne ce qu'il en poet venir,
 Toute ma vie,

10120 **E**T me vodrai toute esjoir,
 Mon doulz amis, ou souvenir
 Que je vous ay,

EN mon coer de vous bien tenir
Entiere foy, sans alentir,
Ja n'en faurai.

10125 **E**T se ne me poés veïr,
N'aiiés esmay,
En compagnie vous metrai
Mon coer, sans jamais retollir,
Toute ma vie, etc.

10130 **H**ARO! com fort se resjoÿ
Melyador, quant il oÿ
Chanter d'une vois clere et douce,
Et issir de si belle bouce
Comme portoit la damoiselle,
10135 Le virelay. « Lors », dist il, « belle,
« Je ne vous adiroie pas
« Le grant bien et le grant solas,
« Que vostre cançon m'a ci fait.
« Li parler en sont tres parfait,
10140 « Et dame, qui ensi s'avance
« A parler, par bonne ordenance,
« Reconforte moult son ami. *f. 75 a*
« Jamais je ne cuidaïsse en mi
« Qu'en ce divers paÿs de Galles,
10145 « On y euïst solas ne galles,
« Ne sentemens de cançons faire. »
Et ceste qui fu deboinaire,
Li respondi tout en riant :
« Pourquoi, sire, saciés ent tant.
10150 « Que nous avons assés paÿs
« Ou il y a des resjoÿs
« Et des resjoïes souvent,
« Par le tres doulz commandement

- « Qui vient et qui descent d'Amours.
 10155 « Li chastiaus ma dame, et sa cours,
 « Fu joieuse et nous tous joieus,
 « Se ce ne fust cilz anoieus
 « Fais, qui nous touce sus le cuer,
 « Et dont ne poons a nul fuer
 10160 « Avoir fin ne apaisement,
 « Se ce n'est par le hardement
 « D'un chevalier tel que vous estes.
 « Mais il y a voir .iiii. tiestes
 « Et se sont tout bon chevalier
 10165 « Qui font forment a ressongnier.
 « Ne sçai comment on les poroit
 « Mettre a fin, car qui les oroit
 « Parler, il samble a leur la[n]gage
 « Qu'il aient partout avantage,
 10170 « Car tant sont de fier couvenance
 « Qu'il ne criement homme vivant;
 « Contre yaus ne s'ose mettre nulz. »
 La damoiselle ne dist plus,
 Mais Melyador, qui parolle,
 10175 Reprint erramment le parolle,
 Et dist : « Belle, plus n'i pensés. *f. 75 b*
 « Diex a encores plus assés
 « De tous biens qu'il ne vous couviegne.
 « Des bons chevaliers vous souviegne
 10180 « Qui issent de la court dou roy.
 « Il y en a de telz, je croi,
 « Qui s'oseroient bien aherdre
 « A yaus, et deussent tout perdre.
 « Je ne sçai qu'il m'en avenra,
 10185 « Mais, voir, mon corps s'esprouvera
 « A yaus, au fer et a la lance.
 « Or issons de ceste ordenance,
 « Damoiselle, je vous en pri,
 « Et voelliés encores droit ci

- 10190 « Canter aucune cançonnete.
 « C'est la cose qui plus me hete
 « Et qui le plus me resjoïst. »
 Et la pucelle, qui pas n'ist
 De faire au chevalier a gré,
 10195 Li dist : « Sire, j'ai en secré
 « Lonch temps eü une balade.
 « Or ay je le coer ferme et sade
 « De recorder a vo plaisir,
 « Mais que le voelliés oïr. »
 10200 — « Jou », ce respont Melyador,
 « Jamais je n'en venrai a cor
 « D'estre tanés par nulle voie.
 « Or le dittes, que Diex vous voie! »
 Et la damoiselle erranment
 12205 Le commença moult doucement
 A canter et par belle vois.
 Et entrues s'en aloit envois
 Li hokebos ou il estoient,
 Ne mies pour ce il s'arrestoient,
 10210 Que la damoiselle en chantant *f. 75 c*
 Les alast illuech esbatant.

Balade.

- PAR souffissance sont riche mainte gent,
 Car qui qui l'ait il a joieuse vie,
 Et je l'ay avoecques moy, vraiment,
 10215 Et dou tout l'ay mis en ma compagnie
 Pour les biens qu'en mon ami voi,
 C'amer je voel bonnement et en foy,
 Toute ma vie, sans ja faire retour,
 Quant des tres bons il est tout le millour.

10220 **B**IEN le poet dire par tout, seürement,
 Car en li est honneur et courtoisie
 Et toute grasse si enterinement
 Qu'il ne poroit penser a villonnie,
 Et, pour ce, chier tenir le doy.
 10225 Car se je l'aim loyaument, et il moy,
 Avoir n'i puis blasme ne deshonneur,
 Quant des tres bons il est tout le millour.

AMOURS m'a bien enrichi poissamment,
 Et souffissance et poissance la lie;
 10230 Si les en mercie tres purement
 Et voel estre a celi loyal amie,
 Por cui sui hors de toute anoi :
 Porter li voel tous jours tres bonne foy.
 Avoir i puis bons los et toute honnour,
 10235 Quant des tres bons il est tout le millour.

OR mettons chi .i. peu de pause.
 Par ma foy, il y a bien cause
 Se Melyador s'esjoïst.
 Quant de bouche d'une dame ist
 10240 Parlers si doulz et si tretttables,
 Li cuers ne seroit pas estables,
 Ne a bonne Amours bien entiers,
 S'il ne les ooit volentiers.
 Ensi en tel esbatement,
 10245 Et en tous joieus parlement,
 Nagierent la riviere amont
 Et tant exploitierent adont
 Que, environ soleil levant,
 Il vinrent droitement devant
 10250 Le chastiel ou estre il voloient.
 Les gardes, qui lors entendoient
 A leur forterece garder,

f. 75 d

- Prendent en bas a regarder,
 Et voient leur nef revenue
 10255 Et au piet dou pont descendue.
 Celle part viennent sans attente
 Et mettent dou tout lor entente
 A conjoïr et recueillier
 La pucelle et le chevalier,
 10260 La quele demande entreset
 Quel cose la dedens on fet
 Et se le dame est descoucie.
 On li respont, a ceste fie :
 « Nenil, mais tost se levera. »
 10265 Entre ces parolles on a
 Le vaissiel qui estoit a port
 Atachiet as cordes au bort ;
 Si en sont bellement issu
 Chil qui la furent descendu.
 10270 La fu Melyador moult biel
 Recheüs de chiaus dou chastiel,
 Et menés jusques la dedens.
 Lors revinrent nouvelles gens
 Qui de rechief le conjoïrent.
 10275 De sa venue s'esjoïrent
 Cil de Montrose a ceste fois.
 Melyador qui fu courtois
 S'acointa d'yaus, et biel et bien,
 Tantost ; n'i couvint nul moiien.
 10280 Dedens une cambre parée,
 Freschement joncie et arrée,
 En est Melyador menés
 Et illuecques s'est ordenés,
 Ensi qu'il li vient a plaisance.
 10285 Entrues qu'il reprist ordenance,
 La damoiselle s'en ala
 Vers sa dame, et le salua
 Humlement et de bon afaire,

f. 76 a

Ensi que moult bien le sceut faire.
 10290 A ceste heure elle se levoit :
 Si s'esmerveille quant ja voit
 Sa damoiselle revenue,
 Mais celle, qui ne fu pas mue,
 Li recorda sans nulle ensongne
 10295 L'ordenance de la besongne ;
 Comment elle avoit exploitié.
 Pas n'en a conté la moitié
 Quant sa dame fu toute preste :
 « Alons », dit elle, « trop arreste,
 10300 « Quant ne voi vers le chevalier
 « Qui tant se voet or travillier,
 « Quant pour moy aidier et debate
 « Mon droit, se voet ceens embatre. »

Li hyretiere de Montrose
 10305 **L** Se part tantost, c'est vraie cose,
 Et s'en vient vers Melyador
 Qui estoit en sa cambre encor ;
 Moult liement sur li s'en vint.
 Or vous di que pas ne couvint
 10310 Aler ailleurs pour emprunter
 Honneurs, pour la bien honnorer *f. 76 b*
 Le chevalier de Cornuaille.
 Cascune et cascuns la li baille,
 De tous lieus et de tous costés,
 10315 Salus, honneur et amistés ;
 Et ils, qui tout ce bien conçoit,
 Liement les rent et reçoit,
 Et tres sagement au voir dire.
 La dame dou chastiel qui tire
 10320 A compter a Melyador
 Sa besongne de cief en cor,
 Et en quel parti gist et est,

- Si tost qu'elle voit qu'il se test,
 Elle li revient par devant,
 10325 Et puis se li remet avant
 Ses complaints presentement
 De si gracieus sentemens,
 Que Melyador d'otel cuer
 Les entent con ce fust sa suer,
 10330 Et dist : « Dame, ci sui venus,
 « Et en vostre hostel descendus,
 « Pour vous reeonforter, sans doubte.
 « De ce ferai ma painne toute;
 « Et, se faire ne le volsisse,
 10335 « Si avant parlé n'en euisse.
 « Escus vous serai et amis
 « Encontre vos .iiii. ennemis.
 « C'est bon que on leur laist savoir
 « A quel tite il voelent avoir
 10340 « Calenge sus vo signourie
 « Et le lieu ou estes nourie :
 « Il ne sont pas bien avisé.
 « Or leur soit ensi devisé
 « Qu'il se traient tout .iiii. avant ;
 10345 « Il trouveront qui au devant *f. 76 c*
 « Leur ira, quoi qu'il en aviegne
 « Et soit que mourir l'en conviegne. »

- E**T quant la dame dou chastiel
 Ot ensi parler bien et biel
 10350 Melyador, si s'en contente,
 Et met moult grandement s'entente
 A li en tous cas d'onnourer.
 On fist tantost, a brief parler,
 .I. des varlès la traire avant,
 10355 Qui emprist par bon couvenant
 A trop bien faire ce message,

- Car il avoit assés usage
 De soutieusement langagier.
 On li va moult bien encargier
 10360 Qu'il dira a ces chevaliers :
 Il leur dira ensi premiers
 Qu'il traient avant sans attendre
 Et qu'il doivent, pour voir entendre,
 Sans faulte, il seront combatu.
 10365 Enfourmés dessus tel argu,
 Se part li messagiers errant.
 En Galles a exploitié tant
 Qu'il est venus jusques a chiaus
 C'on tient pour hardis jovenciaus.
 10370 Entre yaus .iiii., tout frere estoient
 Et chevaliers que moult doubtoient
 Chil qui manoient la entour.
 Il estoient en une tour
 Grande, et forte et bien batillie,
 10375 Et vivoient de pillerie
 Qu'il prenoient sus le paÿs,
 Dont cascuns estoit tant haÿs
 C'on volsist qu'il fuissent pendu.
 Il demanderent : « Que dis tu? », *f. 76 d*
 10380 Au varlet qui leur aportoit
 Les nouvelles et qui venoit
 Dou castiel c'on dist de Montrose.
 « Seigneur », dist il, « c'est vraie cose,
 « Ma damoiselle est pourveüe
 10385 « D'un chevalier qui vous salue,
 « Et dist c'a vous se voet combatre
 « Et vos grans ponées abatre,
 « Ou il demorra en le painne. »
 — « Et es çou dont cose certaine? »
 10390 Respondirent li chevalier.

- « Oil, signeur, mentir n'en quier.
 « Hui a ce matin est venus
 « Et a Montrose descendus.
 « De li je ne sçai plus avant,
 10395 « Fors tant qu'il est de couvenance
 « Bel et bon, a ce c'on y voit. »
 Cilz respondirent . « Or, telz soit.
 « Il sera combatus demain.
 « Di a ta dame, pour certain,
 10400 « Que nous nous traïrons sus la place. »
 Li varlès se parti a ce
 Darrain parler qu'il respondirent.
 Je ne sçai pas quel cose il dirent
 Depuis, mes li varlès revint
 10405 A Montrose, et bien li souvint
 Des parolles qu'il ot oÿes.
 Si les a toutes publiies
 A sa dame, sans plus d'arrest,
 Et li dist bien qu'il sont tout prest
 10410 A combattre demain matin.
 La dame, qui ot ce latin,
 Se tient moult bien assecurée
 Qu'il venront a le matinée,
 Et tout ce dist elle, sans faille,
 10415 Au fil le duch de Cornuaille
 Qui s'en conforte bellement.
 Or vous nommerai voirement
 Le nom des .iiii. chevaliers :
 Madrigais eut nom li premiers,
 10420 Et l'autre appeloit on Balastre
 Et le tierch monsieur Cobastre ;
 Griffamons eut a nom li quars,
 Qui ne fu mies trop cowars,
 Mais hardis et entreprendans.
 10425 Li plus ainnés n'a que .xx. ans.
 Si sont il fort et de grant taille

Pour bien furnir une bataille :
 A ce gist leur affection,
 Pour avoir le perfection
 10430 D'armes et de bacelerie,
 Et le nom de chevalerie.

CEPSTO est uns chastiaus en Galles,
 Ou moult y a cambres et salles;
 Jules Cesar le fist fonder
 10435 Et moult voet le lieu amender.
 Il siet sus .i. brach de Saverne,
 Qui de bons saumons le gouverne,
 Et l'appella, c'est vraie cose,
 Jules Cesar adont Montrose.
 10440 De puis li fu cilz noms mués :
 Cepsto est cilz chastiaus nommés.
 Laiens estoit Melyador,
 Qui porte le biau soleil d'or,
 Par differense en ses parures.
 10445 Or li faudra ses armeüres
 Qu'elles soient teles trouvées,
 Que tres bonnes et esprouvées ;
 Durent seront, par ma semblance,
 Se pointe d'espée ou de lance
 10450 Ne les poet rompre ou empirier.
 De tant m'i ose jou fier,
 Que elles sont dures et rices,
 Et Melyador preus et frices,
 De bon affaire et de bon tour
 10455 Pour bien maintenir .i. estour.
 La dame, qui est hiretiere
 Dou chastel, li fait bonne chiere
 Et ossi font cil de l'ostel.
 On li porte laiens los tel
 10460 C'on doit porter a chevalier,

f 77 b

- Ou quel il se couvient fier .
 Li .iiii. frere plus n'atendent,
 Mais au bon matinet entendent
 A yaus armer et mettre a point,
 10465 Et se sont parti sus ce point
 Que pour venir devant Montrose.
 La sont venu, c'est vraie cose;
 La s'arrestent devant le porte
 Dou chastiel, qui est bonne et forte,
 10470 Et la demainnent grans posnés,
 En disant : « Or tos sus levés,
 « Dans chevaliers, et issiés hors,
 « Qui vous vantés et faites fors
 « De vous combatre contre nous!
 10475 « Issiés hors, nous disons a vous
 « Et a vo damoiselle ossi
 « Que, comme nous soions, droit ci,
 « Venu tout .iiii. en mi la place,
 « Ja au dieu d'armes il ne place
 10480 « C'a une heure nous nous mettons
 « Contre vous, ne nous combatons. *f. 77 c*
 « Nennil. Pas ne seroit proece,
 « Ne nostre honneur, ne gentillece,
 « Et pour tant en arés vous hui
 10485 « L'un de nous ; n'aiiés cure qui.
 « Et se vous le poés conquerre,
 « Par bataille et par fait de guerre,
 « Demain rarés vous le secont ;
 « Et se vostres proeces sont
 10490 « Teles que vous le conquerés,
 « Au tierch jour le tierch vous arés,
 « Et ensi l'autre au jour quatrime.
 « Siques, chevaliers, on vous rime
 « Et taille on a point vos journées ;
 10495 « Teles les avons aournées,
 « A fin que n'en n'aions reproce

- « Et que nouvelles en Escoce
 « En voisent, ne dedens Bretagne.
 « Or issiés hors, on vous ensengne
 10500 « Le lieu ou vous devés campir ;
 « Vous ne nous poés escampir,
 « Puis que vous estes la enclos. »
 Adont retournent les galos
 Et se traient moult lonc arriere
 10505 Dou chastiel et de la riviere
 Sus .i. camp, et, droit ou moilon,
 Ont fait la tendre .i. pavillon.
 Si se sont li .iii. desarmé
 Et le quart ont laissié armé :
 10510 Ce fu messires Griffamons,
 Qui estoit grans, et fors et lons ;
 Plus fier de lui on ne savoit.
 A ses freres priet avoit
 Que devant se peüst combatre ;
 10515 Siques li troi, pour lui esbatre, *f. 77 d*
 Li avoient ce acordé.
 Or ot on dit et recordé,
 Au chevalier de Cornuaille,
 Comment cil, par devant le baille,
 10520 Avoient moustré leur emprise.
 Melyador, qui peu les prise,
 S'armoit entrues. Lors c'armés fu,
 A cheval et au col l'escu,
 S'en est issus hors de le porte :
 10525 Lansonnès sa lance li porte,
 Qui mies ne le siert envis.
 Venu s'en sont, par droit devis,
 La ou la bataille doit estre.
 Ce dist Lansonnès a son mestre :
 10530 « Monsigneur, or vous souviagne hui
 « De la belle et bonne pour qui
 « Vous estes entrés en la queste ;

« Car voir, le hÿaume en la tieste,
 « Il vous en doit bien souvenir
 10535 « S'a bon coron volés venir. »
 Et Melyador li fait signe
 Que sa lance, sans nul termine,
 Li baille, car jouster vorra :
 Or en soit ce qu'estre pora.
 10540 Et Lansonnès li baille errant ;
 Cilz le prent par bon couvenant,
 Qui le vodra au chevalier,
 Ce pense il, tantost emploïier.

10545 **O**R sont li chevalier armé,
 Au dehors d'un vert bois ramé
 Qui leur fait grant aise et grant ombre.
 Nulles riens n'est qui les encombre,
 Ne les grieve, ne ensonnie.
 La place estoit belle et onnie, *f. 78 a*
 10550 Ossi plainne c'un parchemin.
 Espouronnant tout le chemin
 S'en viennent li un dessus l'autre,
 En portant leurs lances sus fautre.
 Et quant encontrer il se deurent,
 10555 Ce sentement entre yaus bien eurent
 De l'abaissier et tenir roides.
 Les pointes agues et froides
 Font prendre dedens les escus :
 Pour ce ne fu mies vaincus
 10560 Griffamons. Se lors il cheÿ,
 Je croi bien qu'il li mescheÿ ;
 Mais toutes fois, au voir enquerre,
 Il li couvint baisier le terre.
 Melyador passa tout oultre
 10565 En faisant bellement son moustre ;
 Onques ne s'en dagna bougier.

- Les resnes va entrecangier
 De son cheval et le retourne.
 Pour faire quoi que soit s'atourne
 10570 Et voit le chevalier gisant ;
 Sur li s'arreste et en disant :
 « O, qui estes mon adversaire,
 « Je vous voel courtoisie faire.
 « Levés vous, montés a cheval! »
 10575 Et cilz qui avoit encor mal
 Ou chief, car tous fu estonnés,
 S'est bien a la grasce adonnés
 Que Melyador li faisoit,
 Qui tous cois droit la se taisoit.
 10580 Cilz est remontés a grant painne,
 Et quant il eut repris s'alainne,
 Il trait l'espée dou fouriel
 Et esporonne le moriel
 Qui li respont de saus menus.
 10585 Arreement s'en est venus
 Dessus Melyador en l'eure ;
 Et cilz qui sagement s'aheure
 Pour le peril qui poet venir,
 Ne le lait mies couvenir
 10590 Mais fait .i. tour de Cournuaille,
 Et se lance en tournant, sans faille,
 Dessus le chevalier galois.
 Son brach li lace a ceste fois
 Ou hateriel, par tel maniere
 10595 Qu'il le fait, dessus le crupiere
 De son cheval, coucier souvin.
 En cel estat, moult lonch termin,
 Le tint tant, et en touellant
 Et si durement travaillant,
 10600 Que priès il li rompoit l'esquine ;
 Avoech tout ce, en le poitrine,
 Le fiert dou pumiel de s'espée.

f. 78 b

- Ensi, par tres forte mellée
 Et par luitier, l'a il conquis.
- 10605 Messires Griffamons de puis
 Ne se pot nullement aidier,
 Ançois se laisse manoiier
 Ensi que Melyador voet.
- 10610 Quant plus deffendre ne se poet,
 Il couvient que il die voir,
 Voires, s'il voet souffrance avoir.
 Au bleu chevalier a la dit :
- « Sire, laissiés moy .i. petit
 « Ravoir mon alainne et aler. »
- 10615 Et Melyador a parler
 Commença et dist : « Bien vous oy.
 « Jusc'a tant que j'aroy vo foy *f. 78 c*
 « Que vous serés mes prisonniers,
 « N'isterés vous de mes dangiers. »
- 10620 Et cilz qui sent c'on le defroisse,
 A paour que ses maulz n'acroisse ;
 Si dist : « Sire, a vous je me rens.
 « Tenés m'espée. » — « Et je le prens »,
 Ce respondi Melyador.
- 10625 L'espée prist et, plus encor,
 La foy de ce dit Griffamont.
 Moult bien le voient cil d'amont
 Dou chastiel, qui sont as crestiaus.
- 10630 Si en parolent la, entre yaus,
 Et dient : « Nostre chevalier
 « Nous amenra .i. prisonnier,
 « Car il le tient en sa merci.
 « Ouvrés la porte, veleci ;
 « Il revient a la decouverte. »
- 10635 Adonques fu la porte ouverte,
 Et contre Melyador issent
 Chil et celles qui s'esjoissent

Que il le voient revenant,
En si biel et bon couvenant.

- 10640 **O**R ont entre yaus moult bien matere
De couroucier tout li .iii. frere,
Quant Griffamont mener en voient,
Ou quel grant esperance avoient
Que celi deuist desconfire.
- 10645 Il n'en scevent entre yaus que dire ;
A moult grant tiennent ce damage.
Entre les .iii. y eut .i. sage
Qui dist : « Seigneur, c'est nos pourfis
« Que nos freres est desconfis ;
- 10650 « Car cilz nous a pris le tour
« De la bataille et de l'estour. *f. 78 d*
« Il n'est pris, fors par barterie
« Et par soutieue luiterie,
« Car, si com nous poons compter,
- 10655 « Pour ce le fist il remonter ;
« Car jamais ne l'eüst eü
« A piet. Or nous a pourveü
« De son tour et de son malisce.
« Jewé nous a d'un vilain visce :
- 10660 « Si nous en garderons demain
« Ou apriès, s'ensi chiet a main.
« La cose pour nous est moult belle ;
« Car, en combatant no querelle,
« S'il en y avoit pris de nous
- 10665 « Jusques a .iii., si les poet tous
« Delivrer et remettre arriere
« Li uns de nous, par le maniere
« Et l'ordenance qui est faite
« Entre nous, jurée et pourtraite.
- 10670 « Or regardons li quels demain
« Prendera la lance en la main

« Pour nostre frere delivrer. »
 Adonques s'ala presenter
 Cobastres, et dist qu'il iroit,
 10675 Ne nulz devant lui ne feroit
 La bataille, et on li acorde.
 Adonc ce jour on li recorde
 Comment il se gouvernera,
 Et comment le mieus il pora
 10680 Ce bleu chevalier desconfire,
 Qui leur fait recevoir grant ire
 De leur frere qu'il a conquis,
 Qui si bien estoit d'armes duis.

10685 **M**ELYADOR est revenu,
 Qui ne s'est mies quois tenuz : *f. 79 a*
 Ou chastiel grans nouvelles porte.
 Contre lui ist hors de le porte
 La damoiselle de Montrose,
 Qui le rechut, c'est vraie cose,
 10690 Moult liement et a bon droit.
 Melyador, qui se vodroit
 Acquitter a lui et a toutes,
 Dist : « Ma dame, ostés vous de doubte,
 « Je vous amaine .i. prisonnier. »
 10695 — « Sire », dist elle au chevalier,
 « De ce remerciier vous doi.
 « Pleuist a Dieu que tous li troi
 « Fuissent au point que cilz chi est. »
 Et Melyador lors se test,
 10700 Mais, pour ce, ne pense il point mains.
 Adonc delivra, ens es mains
 De Florence, ce Griffamont.
 On le fist lors monter amont
 .i. degrés et puis un retour.
 10705 Enfremés fu en une tour;

Ne sçai quant il en istera.
 Jusc'a tant que l'en ostera
 Ses freres, il n'en poet partir.
 Tout ce jour furent sans mentir
 10710 Ou chastiel moult esleechié;
 De riens ne [se] sentent blechié.
 A l'endemain, environ prime,
 Melyador, qui bien exprime
 La journée qu'il doit avoir,
 10715 Pour faire en tous cas son devoir,
 S'est armés bien et fricement.
 Pas ne volt issir nicement,
 Ne mies n'apertient a li :
 De terre ens ou cheval salli *f. 79 b*
 10720 — Onques n'en seut gré as estriers —;
 Si estoit ce .i. moult biaux destriers
 C'on li avoit laiens bailliet.
 Le hÿaume a son point tailliet
 Li mist Lansonnés en la tieste.
 10725 De son mestre fait cilz grant feste
 De ce qu'en bon estat le voit;
 De quanqu'il li fault le pourvoit.
 Lors se departent dou chastiel.
 La dame ala a .i. crestiel,
 10730 Pour mieus veoir la contenance,
 La bataille avoec l'ordenance
 Qui se fera des .ii. vassaus,
 Si com acors va et consaulz.

10735 **U**NE espasse s'est la tenu,
 Celi attendans qui venus
 N'estoit pas sus le place encor,
 Li chevaliers au soleil d'or;
 Mais il vint tout a galopant
 Et vent a son cheval hapant,

- 10740 Par quoi il l'ait mieus a son gré.
 Quant il furent tout doi ou pré,
 Cescuns si a son glave pris.
 Les cuers de grant corage espris,
 Li .i. dessus l'autre s'en viennent,
 10745 Et de ce cop si bien se tienent
 Que onques estriers n'en perdirent.
 Nompourquant cil et celles dirent,
 Qui en joustant les aviserent
 Et qui .i. peu en deviserent,
 10750 Que la joustte fu forte et rade,
 Et se li cheval fuissent fade,
 Malagrené et mal nourri,
 Si com cil estalon pouri *f. 79 c*
 Sur quoi uns alemans tournoie,
 10755 Il feussent cheü en la voie,
 Tant furent li cop bien bouté.
 Cil qui n'ont l'un l'autre douté
 Nulle riens, pour yaus miex requerre.
 Ont jetté leurs lances a terre
 10760 Et traient les espées nues.
 Si les ont en hault estendues
 Et s'en donnent grans hatiplas.
 Melyador qui fu des bras
 Grans et fors, et bien enfourciés,
 10765 S'est dessus Cobastre adreciés,
 Qui jetté li avoit d'estoc
 Par dessus son escu .i. cop;
 Siques, ains qu'il peüst ravoïr
 Sen espée, sachiés pour voir,
 10770 Melyador si s'avança
 Qui son brac ou col li lança.
 Regardés com grant apertise
 Et comment hardemens l'atise!
 La l'estraint et si fort le tire
 10775 Qu'il li fait souffrir grant martire,

- Car desous son brach tient sa tieste,
 Dont Cobastres n'a point de fieste,
 Et l'estraint si fort par maniere
 Que le hÿaume et le baiviere
 10780 Li embare si priès des joes
 Qu'il fist la dedens bien .c. moes,
 Ne ravoir ne poet son alainne.
 « Est donc bataille si villainne »,
 Ce poet il la dire a par soy ;
 10785 « S'autre remede je n'i voi,
 « Il me faurra, voelle ou non, rendre. »
 Melyador, qui voet entendre *f. 79 d*
 A furnir ce qu'il a empris,
 Le pumiel de s'espée a pris
 10790 A l'autre main. Si en ordonne
 A celi si grans cops et donne,
 Qu'il samble c'assommer le doie,
 Et cilz qui la dedens ardoie,
 Qui ne poet parler ne riens dire,
 10795 Se lait tout ensi desconfire,
 Comme il fust mors ne plus ne mains,
 Il tent encontrement ses mains
 Et fait signe qu'il se voet rendre.
 Lors li lascia .i. peu reprendre
 10800 Li bleus chevaliers sen alainne,
 Qui sent bien comment il le mainne
 Et en quel dangier il le tient ;
 A tel ou nulz ne s'apertient.
 Se poet on bien penser et croire,
 10805 Quant cilz peut .i. peu de l'air boire,
 Si n'en fu mies si adis ;
 Mais li samble qu'en Paradys
 Fust rentrés et issus d'Infier.
 Et cilz qui le corage ot fier
 10810 Et qui trop dur l'a atasté,
 En parlant a lui l'a hasté,

- Et dist ensi : « Que voes tu dire ?
 « Rendre te fault, sans contredire,
 « Ou tu seras mors en present. »
- 10815 Cobastre, qui l'anguisse sent
 Et avoit senti en devant,
 Estent la droite main avant
 Et dist : « Sire, je me renc pris. »
 Melyador a la foy pris,
- 10820 Et le hÿaume li deslace. *f. 80 a*
 Moult tres grandement s'en solace
 La damoiselle de Montrose;
 En soy imagine et suppose
 Que ses chevaliers vaintera
- 10825 Les aultres et les mettera
 Tous desconfis en sa prison.
 Moult sont de coer en grant friçon
 Ly doy frere de ce Cobastre,
 Madrigais et ossi Balastre.
- 10830 D'iaus esjoir n'ont nul talent,
 Ançois sont en grant mautalent,
 Quant leur frere mener en voient;
 Il samble que marvoiiier doient,
 Tant sont il en coer airé.
- 10835 Arriere se sont retiré
 Vers leur logeis et leur tente.
 Courous si les enflamme et temple
 Que il ne s'en poent ravoïr,
 Et dient : « Nulz ne poet savoir
- 10840 « Les tours que cilz chevaliers scet.
 « Par lui ont estet enchantet
 « No doi frere; il n'est mies doubte.
 « Pas n'est sages qui ne redoubte
 « Au voir dire ses divers tours,
- 10845 « Quant conquis a par .ii. estours
 « Nos .ii. freres, bons chevaliers. »
 Dist Balastres : « Tous li premiers

« A qui il se combatera,
 « Vraiment mes corps ce sera.
 10850 « Je me voel a lui esprouver,
 « Se tel je le porai trouver
 « Que je l'ai veü au combatre. »
 Ensi se poeent la debatre
 Li doi frere en yaus lamentant,
 10855 Et Melyador a fait tant
 Qu'il est rentrés ens ou chastiel.
 La damoiselle en grant reviel
 L'a recheü, il n'est pas doubte ;
 Ossi a sa mesnie toute.

f. 80 b

10860 **O**R ont ou chastiel de Montrose
 .ii. prisonniers, c'est vraie cose ;
 La damoiselle tous ensamble
 Les fist mettre, si com me samble.
 Melyador se desarma,
 10865 Qui dedens une cambre entra
 Et puis se jetta sus son lit,
 Car somillier volt .i. petit.
 La s'endormi a son voloir,
 Et fu proprement jusc'au soir
 10870 Dedens sa cambre sans partir.
 Ens ou terme qu'il peut dormir
 Et qu'il fu en la cambre enclos,
 Avint une aultre cose ou clos,
 Car il couvint la porte arriere
 10875 Ouvrir et ossi la barriere ;
 Car sus la vesprée y sourvint
 Uns chevaliers errans et vint,
 Li quelz avoit moult travilliet
 Et maint chevalier resvilliet
 10880 Et porté de la joustre a terre.
 Tous propres estoit pour la guerre ;

- Mais, puis .iiii. jours en devant
 Et dedens Galles chevaucant,
 Estoit fourvoiiés telement
 10885 Que il ne pooit nullement
 Trouver ne voie ne adrece,
 Jusc'a tant que la forterece
 De Montrose vit devant li.
 A la barriere descendi,
 10890 Par dalés lui son escuier,
 Et prisent laiens a buschier,
 Tant qu'il furent bien entendu;
 Il n'ont gaires la attendu.
 Quant il furent mis en le porte,
 10895 La dame grant solas leur porte,
 Car elle les vint conjoir
 Et, sans enquerre ne oïr
 Dou chevalier nom ne sournom,
 Entre lui et son compagnon,
 10900 En une cambre les amainne.
 Messires Tangis, qui grant painne
 Avoit puis .iiii. jours eü,
 Si tos qu'il en la cambre fu,
 Ils se desarma sans attendre.
 10905 La damoiselle fait entendre
 A lui moult bien et de tous poins
 Se li compte, quant il est poins,
 De Melyador tout le fait,
 Et quel cose il avoit ja fait
 10910 Et avoit entrepris a faire.
 Quant compté en ot tout l'afaire,
 Se li dist : « Sire, vous qui estes
 « Li uns des chevaliers des questes,
 « Savés vous comment on l'appelle? »
 10915 Cilz respondi : « Ma damoiselle,
 « Nennil voir, ne pas n'est raisons
 « Que nullement nous cognissons,

f. 80 c

- « Fors seulement que par parures;
 « Onques ne vi ses armeüres,
 10920 « Se droit chi ne les me nommés. »
 — « Sire, » dist la dame, « il est telz
 « Qu'il s'arme de bleu, ce me samble;
 « Mais sa targe si se dessamble *f. 80 d*
 « D'un soleil d'or, dont il se brise. »
 10925 Lors messires Tangis li prise
 Le chevalier sur toute riens,
 Et dist : « Dame, c'est uns grans biens,
 « Quant il est ceens descendus.
 « Encontre lui ne s'affiert nuls
 10930 « De proece et chevalerie.
 « C'est cilz, ne vous en doubtés mie,
 « Qui ot le pris devant la Garde,
 « Le quel pris li rois Artus garde,
 « A ce que j'ay oÿ compter;
 10935 « Car onques ne l'en volt porter,
 « Quant au tournoy en fist conquete.
 « Et sachiés qu'en toute no queste,
 « Vous ne trouveriés le parel,
 « Pour vous pourveïr de conseil
 10940 « A ce que vous avés a faire,
 « Si com je voi en vostre afaire. »

- E**T quant la damoiselle entent
 Le chevalier qui telement
 Li prise le bleu chevalier,
 10945 Se li dist pour resleecier :
 « Sire, le volés vous veoir? »
 Et cilz li respont : « Nennil, voir,
 « Car je senc tant de son secré
 « Qu'il ne vous en saroit ja gré.
 10950 « Si ne me voel jou partir point
 « De vous, retenés y ce point

- « Jusc'a tant que veü l'arai
 « Combatant, et que je sarai
 « Comment il fera la besongne. »
 10955 Et la damoiselle, qui songne
 A ses gens qu'il soit bien servis,
 Se part de lui sus tel avis, f. 81 a
 Et dist bien que il le vera,
 Et qu'en tel lieu le mettera
 10960 Que ja riens ne sara de li.
 Ensi sus cel estat parti
 Et le lait o son escuier.
 Or parlons dou bleu chevalier,
 Qui estoit en sa chambre enclos
 10965 Et avoit tenu les esclos
 De dormir une grant espasse
 Tant c'a la vesprée bien basse,
 Et adoncques se resvilla.
 Son varlet tantost appella;
 10970 Cilz respondi : « Que vous fault, sire? »
 — « Vien avant, je le te voel dire.
 « Entrues que j'ay espasse et heure,
 « Mon esperit otant labeure
 « En dormant qu'il fait en villant. »
 10975 — « En quoi? », ce respondi errant
 Son varlet, qui voloit savoir
 De cette parolle le voir,
 Et Melyador prist a rire,
 Qui li ala erramment dire :
 10980 « En pensant a mes amouretes,
 « Je faisoie ore cançonnetes,
 « Car j'en sui si fort abuvrés
 « Que mes cuers en est aouvrés
 « Toutdis; c'est une cose fiere. »
 10985 Et Lansonnès, qui la maniere
 De son maistre bien cognissoit,
 Li dist : « Sire, et qui le vodroit

- « Oïr, le sariés vous arriere
 « Recorder en tele maniere
 10990 « Que vous l'avés fait en dormant? »
 Respont Melyador errant : *f 81 b*
 « Oïl, mais il faut que g'i pense
 « .I. peu. Or te met en l'absense
 « De moy, et t'apoie a cel huis.
 10995 « Tantost y viserai. » De puis
 Que Lansonnès y fu alés,
 Il n'i est gaires sejournés,
 Quant Melyador dist : « Vieng ça ;
 « Je te le dirai. » Adont la
 11000 Li commença Melyador
 A recorder, de cieuf en cor.
 C'estoit une balade belle
 Qui leur sembla assés nouvelle,
 Et otant bien fait elle moy.
 11005 En lisant, vous orés de quoi.

Balade.

- IL n'est nulle cose que j'òie,
 Ne qui me face tant avoir
 De tous biens, d'eür et de joie
 Que ma douce dame a veoir.
 11010 Je le desire plus c'avoir
 Nul ou monde, car par ce point
 En moy n'aroit de dolour point.

- POUR nulle riens ne m'osteroie
 De faire vers li mon devoir,
 11015 Ançois a li dou tout m'otroie,
 Et ce sace elle bien, de voir :
 Je li doi bien, par droit devoir.

11017 doi, B doit.

Se desirs n'estoit qui me point,
En moy n'aroit de dolour point.

11020 **T**RES bonne amour mon coer convoie
A lui servir sans decevoir,
Et pour ce voel jou bien c'on voie
Que je di, certes, de ce voir.
Si je pooie, de ce, voir
11025 Que toutdis feïsse a son point,
En moy n'aroit de dolour point.

f 81 c

A PAINNES peut avoir pardit
Melyador oultre son dit,
Quant evous escuiers qui viennent,
11030 Qui grans tortis en leurs mains tienent,
Desquelz resplent lumiere et feus,
La dame dou chastiel o eulz.
A l'uis de la cambre elle fait
Touchier et tout devant se met.
11035 Melyador voit la lumiere;
Lors saut sus, et piert la maniere
Et le sieute de son pourpos.
Lansonnès li jette en son dos
.I. mantel et puis keurt avant;
11040 L'uis de la cambre oevre il errant.
La dame y entre avoech ses gens
Et, si tost que elle fut ens,
Elle dist a Melyador :
« Sire, s'il vous plaisoit, des or
11045 « Il est heure d'aler souper. »
Et cilz qui li volt acorder
Li dist : « Dame, tout a vostre aise. »
Je croi c'est bon que je me taise
De ce souper, car il fu biaux.
11050 D'escuiers et de damoisiaus

Estoit Melyador servis.
 Apriès souper, il m'est avis,
 On parla d'aler reposer.

Melyador s'en puet entrer
 11055 En sa cambre ; la s'enfrema
 O son varlet qui moult l'ama,
 Et se tinrent la celle nuit,
 Sans avoir cose qui anuit.

f. 81 d

11060 **A**U matin s'en vint a la porte
 Uns hiraus qui nouvelles porte.
 Il fu liement recheüs,
 Et Melyador pourveüs
 De respondre a ce qu'il demande.
 Il fait la requeste et demande,
 11065 Et dist ensi, sus ceste voie :
 « Messires Balastres m'envoie
 « Pour parler au bleu chevalier,
 « Et se li fait segnefier
 « Que .iii. lances vorra jouter
 11070 « — Ce dist pour li mieus ragouster —
 « Et, tant que les lances durront,
 « Li .i. contre l'autre courront,
 « Sans combatre d'aultre armeüre. »
 Melyador li asseure,
 11075 Qui onques ne fu anoiïés
 Pour ravoïier les desvoïïés,
 Et dist : « Compains, je sui tous près
 « A ce qu'il voet par mos exprès,
 « Ne ja je n'en irai arriere. »
 11080 Lors fu ouverte la barriere ;
 Melyador errant s'en part.
 La damoiselle que Diex gart,
 Quant Melyador voit parti,
 Est alée sans nul detri

- 11085 Querir, fendant parmi la sale,
 Monsignor Tangis de Sormale,
 Et la en .i. tel lieu le mainne,
 Ou moult bien veront et sans painne
 La jouste des .ii. chevaliers.
- 11090 Messires Tangis volentiers
 Le vera, ce dist il, sur s'ame,
 Et otant bien fera la dame, *f 82 a*
 Qui a toute sen esperance
 En celi a la blewe lance.
- 11095 **M**ESSIRES Balastre, sans doubte,
 D'el le bleu chevalier ne doubte,
 Fors de la luite de ses bras
 Qu'il n'a mies pesans ne cras,
 Mais bien tailliés et bien fourmés.
- 11100 Pour ce est il tous enfourmés
 Que point ne s'en laisse approcier,
 Fors que dou lonch dou fer d'acier
 En .i. plançon de .xii. piés.
 Pourveüs avoit .iii. espiés,
- 11105 Fors et durs et trop bien tournés ;
 Il les a pour lui atournés
 Et bouté en cescun, sans faille,
 .i. fier. N'en y a nul ne vaille
 .C. florins pour courre une jouste.
- 11110 Melyador ossi ajouste
 Grant segurté en ses .iii. lances ;
 Car, pour furnir ces ordenances,
 La damoiselle de Montrose
 Li avoit fait, c'estvraie cose,
- 11115 Pluiseurs fiers de glave assaiier,
 De quoi il se laissa paiier
 De .iii. tres bons outre l'ensengne,
 Et encores on li ensengne

- Li quelz vault mieulz, a ce qu'il dient,
 11120 Et Melyador en affient,
 Qui s'est ja pour jouter offers.
 Il estoit fricemens couvers
 Ossi bleus qu'une violette.
 Ensi s'en vient la voielette
 11125 Jusc'au lieu ou il doit courir.
 Cilz qui pas ne le volt nourir, *f 82 b*
 Mais occire s'il puet, par force,
 De lui bien fort armer s'efforce,
 De quoi il soit mieus assecur.
 11130 Sus .i. cheval poissant et dur,
 Et bien affrenet en le main,
 Monta sans painne et sans mehain.
 Ses parures, par mes samblances,
 Estoient ce jour toutes blances,
 11135 Semées de bleues parselles.
 Certes, ce sont choses moult belles
 A veoir gens en tel affaire :
 Cascuns savoit ce qu'il doit faire.
 Ja vodront jouter assés tos,
 11140 Sans deviser plenté de mos.

- Q**UANT .i. peu furent avisé,
 Riens n'ont parlé ne devisé
 Li doi chevalier, je vous di.
 Cescuns se restraint et joindi
 11145 Dedens sa targe en lui couvrant;
 Puis vont des esporons brocant,
 Et quant li cheval le fier sentent
 Au courir radement s'assentent.
 Il n'ont mies les entrelais,
 11150 Mais s'en viennent les plains eslais.
 La se consieurent des lances,
 Par si vertueuses samblances

- Et par si hardi couvenant,
 Que de ce cop, en leur venant,
 11155 Les dittes targes pertuisierent ;
 Mais d'autres riens ne se nuisierent,
 Ne ne blecierent ne greverent.
 Les lances en trons tronçonnerent.
 Li chevalier passerent oultre,
 11160 Frichement, en faisant leur moustre. *f. 82 c*
 Leur doy varlet avant sallirent,
 Qui doy plançon leur pourveïrent.
 Lors se prennent a escauffer.
 On ne se doit mies truffer
 11165 De chevaliers qui ensi keurent.
 Sitretost que les lances eurent,
 A fiers acérés et agus,
 Si se redoubla leur vertu :
 Pour yaus aconsieuir s'avisent.
 11170 Les damoiselles en devisent,
 Qui s'apoint sus les crestiaus
 Et dient : « C'est uns solas biaux
 « De ces chevaliers regarder.
 « Diex voelle le nostre garder,
 11175 « Car faiticement se maintient! »
 Messires Tangis si se tient
 Assés priès de la damoiselle
 De Montrose, jolie et belle,
 Et prise moult le couvenant
 11180 De Melyador en venant,
 Son affaire et tout son arroy ;
 Et la sont sur la place andoy
 Li chevalier qui pas ne tardent,
 Qui bien pensent que les regardent
 11185 Chil du chastiel et cil des champs.
 Pour ce dient il : « Il est tamps
 « Que nous faisons bien la besongne. »
 Adonques, sans plenté d'ensongne,

Cescuns le cheval esporonne,
 11190 Et s'en viennent a l'eure bonne
 Et se fierent sus les escus.
 Mais de ce cop ne cheï nulz,
 Ançois passerent francement.
 Leurs .ii. lances secondement
 11195 S'en volerent en .iii. tronçons
 Et les fiers fisent il tous crons. *f. 82 d*

OR fu Melyador irés ;
 Il s'est arriere retirés.
 De mautalent li cuers li flame,
 11200 Car il li samble c'on le blasme,
 Pour .ii. lances qu'il a brisies
 Qui tant li estoient prisies,
 Et si n'a noient exploitié.
 Son escuier a moult quoitie
 11205 Et dist : « Vieng avant, si me baille
 « Ce tierch plançon. Il fault sans faille
 « Qu'il s'acquitte mieulz que li autre. »
 Et cilz, qui le portoit sus fautre,
 Li a errant ens ou poing mis.
 11210 Or se garde ses anemis,
 Car il vorra joster acertes,
 A qui que en soient les pertes.
 Il se restraint et met a point,
 Et dedens sa targe se joint
 11215 Et s'estrice sus ses estriers ;
 Ses coers li croist qui est moult fiers
 Ou cas qu'il a la tieste armée.
 Messires Balastres s'arrée
 D'autre part pour joster a li.
 11220 Or sont ensi que rafreschi,


11212 A qui que, B A qui qui.

En reprendant la tierce lance.
 De bien jouter font grant samblance,
 Et je croi que point n'en faurront
 Les chevaus esporonnés ont,
 11225 Qui eurent recouvré alainne.
 Cescuns feri a lance plainne
 Son compaignon en mi l'escu,
 Par tel force et par tel vertu, *f. 83 a*
 Sans l'un l'autre point espargnier,
 11230 Mais en desir d'yaus mehagnier.
 Il samble qu'il doivent entrer
 Dedens l'un l'autre a l'encontrer.

MELYADOR, qui fu de corps
 11235 Bien joustans et de membres fors,
 Ables, legiers et remuans,
 Tout ensi com ce fust uns vans,
 Fent la targe a son adversaire.
 Li haubregons ne li peut faire
 Nul garant qu'il ne le perçast,
 11240 Et qu'en char il ne l'atouchast
 Telement, que, dedens .iii. mois,
 Ne sera sains de ses anois,
 Car la pointe acérée et froide,
 Avoech la lance qui fu roide,
 11245 En l'espaule li met tout ens,
 Et le boute par si grant sens
 Et par ordenance si belle
 Qu'il le fait partir de la selle.
 Jus l'abat dessus la terrée :
 11250 La lance a la pointe acérée
 N'est point brisie de ce cop.
 Mes messires Balastres trop

11232 l'autre, *B* l'autrer.

- Malement est illuech cheüs.
 Au cheoir est moult esperdus,
 11255 Car li sans, qui ist de la plaie
 Et qui aval partout li raie,
 Sa cote et son haubert li soulle
 Et jusques a ses piés le moulle.
 Melyador prent son retour
 11260 Sus monsieur Balastre, pour
 Veoir comment il se maintient.
 Si le regarde qu'il se tient
 Tout quois et est de sanch couvers.
 Il ne fu mies trop divers,
 11265 Mais appelle son escuier
 Et dist : « Prent garde au chevalier
 « Qui la gist, et le met a point. »
 Lansonnés lors n'arresta point,
 Mais vint droit la, sans nulle atarge;
 11270 Se li a desbouclé sa targe
 Et son hÿaume après osté,
 Et .i. petit l'a esventé.
 Adont Melyador vint la,
 Qui moult courtoisement parla,
 11275 Et dist : « Comment vous va, biau sire? »
 Et cilz, qui a painnes peut dire
 .I. seul mot, respondi en bas :
 « Par Dieu, chevaliers, je suis mas
 « Et desconfis par men outrage,
 11280 « Et conquis par vo vasselage,
 « Je croi bien que vous m'avés mort. »
 — « De ce me desplairoit trop fort, »
 Ce dist Melyador, « par m'ame!
 « Je vous menrai devant la dame,
 11285 « Que lonch temps avés herriiet
 « Et sans ocquison guerriiet;
 « Elle vous sera humle et douce. »
 Et cils, qui vot bien c'on le couce,

f. 83 b

- N'a cure u mais qu'il soit garis ;
 11290 Respont : « Je sui ses ennemis,
 « A vous me renc et non a li. »
 Dist Melyador : « Tout ensi
 « Vous reçois, c'est bien men entente. »
 Adonques fu sans plus d'attente
 11295 Messires Balastres levés,
 Car ses varlès a l'autre lés
 Vint la, et doy aultre escuier,
 Les quelz y pooit envoier
 Madrigais, il n'est mies doubté.
 11300 Par ces .iiii. en fu, en le route
 Dou dit bleu chevalier menés,
 Jusc'au chastiel qui ordonnés
 Estoit que pour lui recevoir.
 Vous devés bien savoir de voir
 11305 Que la dame fu resjoÿe,
 Quant elle vit, la tierce fie,
 Son chevalier avoir vaincu
 Celi que, dessus son escu,
 On aportoît mat et navré.
 11310 Toutes ses gens keurent ou pré
 Encontre le bleu chevalier,
 Et le vont ensi recueillier
 Con ce fust Diex de paradys.
 Li chevaliers, qui moult adis
 11315 Estoit et pour se navreüre,
 En une cambre clere et pure
 En fu portés incontinent,
 Et la y fait moult bellement
 Li bleus chevaliers garde prendre.
 11320 De ce n'est il pas a apprendre
 Com chevaliers courtois et sages,
 En tous cas et en tous usages.

f. 83 c

- E**T quant Madrigais considere
 L'aventure, comment si frere
 11325 Sont tout troi mené ou chastiel,
 Se ne li vient mies a biel
 Encor de monsigneur Balastre,
 Auquel il fault .i. grant emplastre
 Mettre sus l'espaule navrée.
 11330 Moult grandement de li s'effrée. *f. 83 d*
 Point ne scet comment il li va,
 Se il morra ou garira.
 Il n'en scet qu'il die ne face.
 Quant on le regarde en le face,
 11335 Il samble bien plains de courous
 Et dist ensi : « Je me courous
 « Sur moi ; j'ai droit, car mon conseil
 « Mis et donnai trop en frefel,
 « Quant j'acordai, par ignorance,
 11340 « Devant hier ytele ordenance.
 « Chils chevaliers, qui nous travaille
 « Et qui a fait ja grant merveille,
 « Desconfit yaus .iii. en .iii. jours.
 « Comment scet il de vaillans tours
 11345 « En armes, par bachelerie
 « Et par sa grant chevalerie ?
 « Nous deuissions avoir esté
 « Contre lui tout .iiii. arresté ;
 « Ja n'en fust issus hors d'acort.
 11350 « Plus sont yaus .iiii. ou .iiii. fort,
 « Et de reconfort pourveü,
 « D'avis, de conseil et d'argu
 « Pour leur ennemi desconfire,
 « C'uns homs tous seulz ; ce puis je dire.
 11355 « Or me couvient demain combatre

- « Contre li. M'y porai je embatre
 « Quant je voy, et s'en sui tous fis,
 « Qu'il a mes freres desconfis?
 « Il faut bien que conseil en aie,
 11360 « Se la irai ou le delaie.
 « Verités est, se je demeure
 « Que grandement me deshonneure;
 « Et, se g'i voi oultre mon coer,
 — « Cela ne ferai je a nul fuer — *f. 84 a*
 11365 « Trop plus deshonnourés seroie,
 « Se mors ou prisons demoroie.
 « Or faut il donc que je m'avise,
 « Car ensement va li devise
 « Que me combatte ou que me rende. »
 11370 Adonc trop son conseil amende
 Cilz Madrigais, a ceste fois;
 Il dist ensi, a basse vois :
 « Se faire pooie une cause
 « Devers la dame de Montrose
 11375 « Et devers le bleu chevalier,
 « Que si bien peüsse trettier
 « Que mi trois frere revenissent,
 « Par mi tant que il le tenissent
 « Et moy a pais, a tous jours mes,
 11380 « Ce seroit li plus cortois fes,
 « Et assés li plus honnourables
 « Pour nous, et li plus amiables
 « Pour elle, c'on y puist taillier. »
 Sus ce pourpos va abillier
 11385 .I. chevalier et .I. hiraut,
 Et de tout ce que dire fault
 Pour exploitier en tel besongne
 Les charge, sans point de mençongne.
 Il se partent de Madrigai,
 11390 Qui n'a mies le coer trop gai,
 Et chevauchent vers le chastiel.

- Tant ont exploitié c'a l'estiel
 Des barrieres s'en sont venu
 Et tout doi, illuec descendu,
 11395 As gardes disent, comme sage,
 Que la venoient en message.
 Sus cel estat furent mis ens
 Et amené par bonnes gens *f. 84 b*
 Jusc'a la dame de Montrose.
- 11400 Adonques li chevaliers glose
 Ses parolles moult sagement
 Et la dame tout erranment,
 Quant elle l'ot bien entendu,
 Respondi — riens n'a attendu —
- 11405 Que de ce ne fera ja riens,
 Soit ses damages u ses biens,
 Sans le sceü son chevalier.
 Et cil qui sont la pour prier
 Venu, ne mies pour combatre,
- 11410 Ne li voellent mies debatre,
 Mais respondent : « Diex y ait part ! »
 Adont d'yaus Florence se part
 Et viers Melyador s'en vient,
 Qui dedens sa cambre se tient.
- 11415 Se li recorde bellement
 La besongne, tout telement,
 Que par devers li on trettie.
 Melyador, a ceste fie,
 Li dist : « Ma dame, en bonne pais
- 11420 « Ne gist, fors uns bien legiers fais.
 « Pour moy n'en faites tant ne quant,
 « Fors ce qui vous est mieus seant,
 « Car je sui, Dieu merci et nostre,
 « Tous près pour garder le droit vostre.
- 11425 « Mais, quant a pais poés venir
 « Et a vo plaisir avenir
 « Ossi bien ores comme après,

- « Tant vous en di par mos exprès :
 « C'est bon c'a la pais entendés
 11430 « Et que ses freres li rendés,
 « Parmi ce qu'il iront tous .IIII.
 — « De ce ne poront riens abatre — *f. 84 c*
 « En la court dou bon roi Artu,
 « Et la, si com la cose fu
 11435 « Et chiaus qui oïr les poront,
 « Service vous cognisteront,
 « Hommage et foy a tous jours mès.
 « Vous n'en ferés riens el huimès. »
 Dist Florence : « Vous dittes voir. »
 11440 Lors s'en revint par estavoïr
 La dame vers les trettieurs,
 Et dist tout, si com li teneurs
 De Melyador contenoit.
 Li chevaliers, qui demenoit
 11445 La parolle a ce Madrigay,
 Respondit et dist : « Je ferai
 « Relation de vo response. »
 La dame pas ne li esconse
 Et dist : « Bien me plaist. » A tant partent.
 11450 Si chevaucent, point ne se tardent ;
 Si sont venu au logeis
 De Madrigai, ce m'est avis :
 Si le trouverent moult pensieu.
 Adont li compterent dou lieu
 11455 Ou il avoient chevauciet,
 Comment il en ont exploitiet.
 Sur ce s'avise et considere,
 Car il faut que ilz et si frere,
 S'il voelent issir de dangier,
 11460 S'en voisent sans point atargier
 En la court dou bon roy Artu,
 Et la moustrent par quel argu
 Il ont guerriiet sans raison

- La dame qui Florence a nom ;
 11465 De quoy, en nom d'amendement,
 Il feront la presentement *f. 84 d*
 Hommage, et jurront a tenir
 A la dame et de lui servir
 En tous estas, s'il li besongne,
 11470 Et dient que sus la besongne
 Il n'ont poüt faire aultre cose.
 Messires Madrigais qui n'ose
 Combatre ne ne voet, ce dist,
 De ce pourpos nullement n'ist,
 11475 Car il voet ses freres ravoïr.
 De rechief le fait a savoir,
 Ou chastiel, par les dessus dis,
 En remoustrant que bons amis
 A la dame voet demorer
 11480 Et li en tous cas honnourer.

- ENSI fu la cose afinée.
 Melyador l'a ordenée :
 Tenir le fault, puis qu'il le voet.
 Nulz des .iiii. ne le remuet,
 11485 Mais se sont mis en l'ordenance
 De le dame courtoise et france,
 Car Madrigais s'est trais avant.
 Ilz et si frere, tout devant
 Melyador, ont cogueü
 11490 Que sans arrest, tout pourveü,
 Il iroent en le court dou roy
 Artus a Carlyon tout troi,
 Et l'afaire li compteront,
 Et de recief s'obligeront
 11495 A tenir estables et fermes
 Toutes ces choses mis en termes.
 Trop volentiers tout ce jurerent,

Car parmi tant il escaperent
 Et issirent de grant dangier.
 11500 Sans plus riens muer ne cangier, *f. 85 a*
 Ceste ordenance ensi ala.
 Sus le soir se parti de la
 Messires Tangis de Sormale,
 Qui avoit oÿ en la salè
 11505 Ces paroles presentement
 Et oÿ compter proprement
 Au bleu chevalier dessus dit.
 Sitretost que la fin en vit,
 Il entra en une nacelle
 11510 C'on li apresta bonne et belle;
 Son harnois mist ens tel qu'il l'a.
 Congiet prist a la dame la,
 Qui bellement l'eut recueilliet;
 Il ont leur voiage acueilliet,
 11515 Ils et ses escuiers errant.
 Maronnier ont a leur commant,
 Qui les conduist en la Saverne
 Et qui telement les gouverne,
 Sans ce que noient les fourmainne;
 11520 Droit par devers Bristo les mainne.
 Une aultre nef la prenderont,
 Par quoi mieus il exploiteront
 Et plus segurement ossi
 Pour estre ou il desirent si,
 11525 A ce biau tournoy de Tarbonne.
 Bien arriva a l'eure bonne
 Messires Tangis a Montrose,
 Car par terre, c'est vraie cose,
 Jamais ne fust venus a temps;
 11530 Et, pour ce qu'il estoit sentans
 Tout ce et n'i pooit venir,
 Volt les dangiers de mer souffrir.

- OR parlons de Melyador,
 Le chevalier au soleil d'or, *f. 85 b*
 11535 Qui estoit encore a Montrose,
 Quant ordonnée fu la cose
 Bien et biel, dou tout a son gré;
 Il traist son varlet en secré
 Et dist : « Frere, je voel partir
 11540 « Car aler m'en fault, sans mentir,
 « A ce tournoy qui se tenra
 « Devant Tarbonne et y sera ;
 « J'en defaurroie trop envis.
 « Pour ce te di jou mon avis,
 11545 « Que tu t'ordonnes sus ceste oevre. »
 Et Lansonnès lors li descueuvre
 Et dist : « Sire, je loeroie
 « Et si le vous consilleroie
 « Qu'en .i. vaissiel vous mesissiés,
 11550 « Puis que vous vos ahatissiés
 « D'aler la, par le roy celestre.
 « Autrement vous n'i poés estre. »
 Melyador bien s'i acorde.
 Adonc cilz Lansonnès recorde
 11555 A la dame tout leur afaire ;
 Et ceste, qui en voelt bien faire
 En tous estas sa diligense,
 Ne le met point en negligense,
 Mais une nef leur pourveï,
 11560 Et si bien adont l'en cheï
 Qu'il en y avoit une preste,
 La quele de coer on li preste
 Et met en son commandement.
 Melyador tout erranment,
 11565 Qui ne voelt la plus sejourner,
 Fait chevaus et harnas entrer
 En la nef et s'i met premiers.

- f. 85 c*
- En ceste nef ot maronniers
 Bons, et segurs et avisés,
 11570 Et qui scevent de mer assés
 Pour aler jusques en Cartage.
 Melyador, de bon corage,
 Prist congiet a la jone dame,
 Et li dist au partir : « Par m'ame !
 11575 « Dame, veci vo chevalier.
 « Se besongne vous croist arrier,
 « Soit d'empecement ou de guerre,
 « Si m'envoiiés, ou que soit, querre.
 « Je vous venrai tres liement
 11580 « Servir et aparliement :
 « De ce ne vous couvient doubter. »
 Et Florence prist a plorer
 Et dist « Sire, .v^e. mercis.
 « Je pri au vrai corps Jhesucris,
 11585 « Qu'il vous gouverne et qu'il vous ait
 « En garant. » A ces cops le lait
 Et s'en retourne tout plorant,
 Et Melyador part errant
 Dou rivage sans atargier,
 11590 Et desancrent li maronnier ;
 Si se mettent lors aval vent.
 Ce premier jour, a leur talent,
 Eurent le vent et la marée,
 Dont la Saverne grande et lée
 11595 Passerent et en mer se misent.
 Entrues que maronnier devisent
 Entre yaus et c'a leur nef entendent,
 Et que cordes tirent ou tendent,
 Melyador ailleurs entent
 11600 A faire de bon sentement
 Quelque cançon bonne et nouvelle,
 — A ce faire nullui n'appelle. — *f. 85 d*
 Ce fu uns rondelès jolis :
 Tantost fu fais et tantost dis.

Rondel.

11605 DE si tres bonne volenté
Sers ma dame jolie,

POUR ce c'a lui me sui donné
De si tres bonne, etc.,

11610 QUE ja je n'en quier estre osté.
Dou tout a lui m'otrie
De si tres bonne, etc.

ET quant Melyador eut dit
Son rondelet, par grant delit,
Il volt .i. aultre commencier,
11615 Mais il l'en couvint atargier,
Car vens commença a lever
Et ces ondes a escumer,
Et maronnier a estre en doubte,
Car li vens telement les boute
11620 Qu'il samble que tout rompre doie.
Adont se veurent sus le voie
Ancrer, pour plus a segur estre.
Mais uns vens revint a senestre,
Qui les prist moult a hustiner,
11625 Et n'oserent adont ancrer
Pour le peril dou vent contraire.
Adont se vont aval vent traire,
Ne faire il n'en oserent el;
Bien vosissent estre a l'ostel
11630 Dont au matin parti estoient.
De ce vent noient n'arrestoient,
Mais s'en aloient fort ridant;

- Toute la nuit les bouta tant
 Que droit au jour, quant il ancrerent,
 11635 Dedens Escoce se trouverent. *f. 86 a*
 Adont disent li maronnier :
 « Nous ne nos poons ravoier,
 « Se nous n'avons le vent pour nous. »
 — « Et, monsieur, qu'en dittes vous ? »
 11640 A Melyador on demande,
 Et li chevaliers leur commande
 Qu'il se traient errant a terre,
 Car il ne voelt plus avoir guerre
 A la mer qui l'a tempesté.
 11645 Et cil ont fait sa volenté;
 Terre ont pris, pas lonc n'en estoient.
 Entrues c'a la terre arrestoient,
 Lansonnès qui ne savoit u
 Il estoient, dont irascu
 11650 Avoit le coer, monte a cheval.
 Par tout keurt amont et aval,
 Ensi c'aventure l'avoie,
 Sans point trouver sentier ne voie,
 Maisons, ne logeïs ne estres,
 11655 Fors que grans bruisis et genestres.
 Quant il eut alé tout au tour
 Et ja priès c'a lewet le jour,
 Sans trouver ne femme ne homme,
 Ne riens fors ce que je vous nomme,
 11660 Il retourna sus la bruiere
 Et s'en est revenus arriere
 Ens ou lieu dont il fu partis.
 Si recorde par grant avis
 Ce qu'il a trouvé et veü.
 11665 Li maronnier n'ont riens sceü
 A consillier sus ceste entente,
 Mais dient ensi sans attente :
 « C'est bon que nous sejourbons chi,

11670 « Tant que cilz vens, qui nous falli *f. 86 b*
 « Avanthier, nous reviegne arriere.
 « Autrement, par nulle maniere
 « Ne poons nous veoir exploit,
 « Qui point pourfitable nous soit. »

11675 **C**ILS isles, que vous le sachiés,
 Ou Melyador courpuciés
 Estoit arrivés en ce jour,
 On l'appelle la, ou contour,
 L'isle del Men, qui vault otant
 A dire et expondre en rommant
 11680 L'isle de l'Homme, et ce fu cilz,
 Ensi que nous dist li escriis,
 Ou li rois des .C. Chevaliers
 Se tint qui tant fu preus et fiers,
 Mais encor de ceste ordenance
 11685 N'avoit on nulle cognissance.
 Cela avint depuis, ou tamps
 Que Lancelos li combatans,
 Messire Yewains et Perchevaus,
 Tristrans, Durmans et Gallehaus
 11690 Cerkoient partout adventures ;
 De quoi ailleurs les escriptures
 Parollent trop plus plainnement
 Qu'en ce livre presentement,
 Car il avint et fu escriis
 11695 En devant de ces dessus dis.
 Point n'estoit habités cilz isles
 Et puis y eut maisons et villes ;
 Mais cilz qui l'abita premiers,
 Il fu rois des .C. Chevaliers.
 11700 La ancrerent et prirent terre
 Li maronnier, au voir enquerre,
 Qui estoient parti de Galles ;

Mais entre yaus n'i eut nulles galles, *f. 86 c*
 Quant il ne sceürent bien a dire
 11705 En quel lieu il pooient gire.

O^R n'a ens ou bleu chevalier,
 Tant en sachiés, que courecier,
 Quant il voit que li jour en vont
 Et nul exploit par yaus ne font.
 11710 La furent .iiii. jours entiers,
 Ou fust envis ou volentiers,
 Que onques li dit maronnier,
 Pour cose c'on en puist prier,
 Ne se porent en mer retraire,
 11715 Car il avoient vent contraire,
 Mais il n'estoit mies trop fors.
 Quant li quatrimes jours fu hors,
 Et ce vint sus .i. venredi,
 Une barge illuech descendi
 11720 De pescheours apriès herens.
 Melyador, qui trop dolens
 Estoit de ce que la estoient,
 Et qu'ensi entre yaus arrestoient
 Et ne cognoissoient le lieu,
 11725 Tant parlerent, non en ebrieu,
 Mais en breton biel et a point,
 Que cil pescheour sour ce point
 Vinrent la, avoeques lor barge.
 Melyador adont leur charge
 11730 Qu'il li cognoissent verité
 Et en quel lieu sont arresté.
 Et cil erramment li recordent,
 Qui de voir dire ne se tordent,
 Et quant Melyador ot ce
 11735 Qu'il sont entre Irlande et Escoce,
 Si est plus pensieus que devant.

- Nonpourquant il s'est trais avant, *f. 86 d*
 Et moult bellement leur demande,
 Se ville y a petite u grande
 11740 Qui soit priès de la, on li die :
 « Oil, sire, a l'autre partie
 « De la mer, y a ferme terre.
 « Puis que tant en volés enquerre,
 « La y sont villes et chastiaus,
 11745 « Pays grans et manoirs moult biaux ;
 « Car on y labeure et ahane,
 « Et si y trueve on Abredane,
 « Qui siet en cest[e] aultre partie,
 « Et de la sommes nous parti
 11750 « Et retourrons demain ou jour,
 « Se Diex nous gard [de] deshonneur. »

- « **S**IGNEUR », disent li maronnier,
 « Vous alés et pour gaegnier
 « Parmi la mer, si com creons.
 11755 « Avoecques nous est uns frans homs
 « Qui vous paiera largement
 « Assés, de milleur paiement
 « Que tout li poisson ne vaurront,
 « Qui de vous pris estre poront
 11760 « En .iiii. jours, bien le sachiés.
 « Si vous prions que l'adreciés
 « Ceste part que vous dites chi. »
 Et adonques leur respondi
 Li uns et dist : « C'est bien nos grés.
 11765 « En ceste barge o nous entrés,
 « Chevaliers, puis que c'est pour vous. »
 Melyador, qui estoit tous
 Anoiens, entra en la barge.
 Tout son harnois la on descarge
 11770 Et le remet on ou vaissiel.

- f. 87 a*
- Quant tout fu fait et bien et biel,
 Li .i. a l'autre congiet present,
 Puis se desancrent et si brisent
 Les ondes de la mer parfonde.
- 11775 Jusc'a la journée seconde
 Ne partirent li maronnier
 De Montrose pour traire arrier ;
 Mais li pescheour lors partirent,
 Qui devers Abredane tirent.
- 11780 Toutdis vont costiant la terre.
 Melyador leur va enquerre
 Se il sont lonch de Cornuaille,
 Et chil li respondent, sans faille,
 Qu'il y a bien ou environ
- 11785 Trois .c. lieues au naviron.
 Ceste response ne plaist pas
 A Melyador qui tout bas
 En parolle a son escuier
 Et dist : « Bien me doit anoier,
- 11790 « Quant Fortune m'est si contraire,
 « Que je ne puis estre ne traire
 « Pour aventure qui m'aviegne,
 « Ne com bons que li temps me viegne
 « A ce tournoy, devant Tarbonne.
- 11795 « Pas ne parti a heure bonne
 « De Montrose l'autre sepmainne. »
 Lansonnès, qui point ne demaine
 Ceste parolle longement,
 Li respont assés doucement :
- 11800 « Sire, il couvient tout en gré prendre
 « Ce que temps voet saisir et rendre. »

TANT ont singlet li maronnier
 Aval vent, sans yaus fourvoier,
 Qu'il sont venu a Abredane,

- 11805 Et dalés .i. grant pont de frasne *f. 87 b*
 Ancrerent et se tinrent quoi.
 Li pescheour, savés vous quoi,
 Furent paiiet moult largement.
 La prisent leur atargement
- 11810 En la ville li maronnier,
 Avoech leur maistre et chevalier
 Qui ont congiet de li sans doubtte,
 La nef et leur mesnie toute.
 Melyador s'est trais errant,
- 11815 A .i. hostel assés manant,
 Entre lui et son escuier.
 Durement pooit anoier
 Au chevalier au soleil d'or;
 Il n'a mies passet encor
- 11820 Son mautalent, saciés pour voir,
 Quant nullement ne poet veoir
 Qu'il puist au jour a Tarbonne estre,
 Dont toute honneur li pooit nestre.
 Souvent infortunés se claimme,
- 11825 Mais ses escuiers qui moult l'aimme
 Le reconforte sans attente,
 De bon coer et de bonne entente.

- UNE heure Lansonnés li dist,
 Qui d'un lés a conseil le mist :
- 11830 « Sire, vous vos plaindés moult fort
 « De Fortune; vous avés tort
 « A ce c'on me donne a entendre. »
 Et ses mestres va lors reprendre
 Ce parler et dist : « Comment dont ?
- 11835 « Tu sces bien que nos voies sont
 « Toutes ensus de mon desir,
 « Ne tu ne poes, je croi, oïr
 « Nouvelle qui me resjoïsse.

- « Car, se ossi priès me veïsse *f. 87 c*
 11840 « De Tarbonne que j'en sui loing,
 « Je seroie issus de grant soing;
 « Mais, nennil, il va au contraire. »
 Lors se va Lansons avant traire
 Et dist : « Sire, c'or vous taisiés;
 11845 « C'est drois que vous vos apaisiés.
 « Bonne fortune vous est née :
 « A mains estes d'une journée
 « Dou chastiel ou ceste demeure,
 « Pour qui vous avés a toute heure
 11850 « Porté tant de maulz et de painnes.
 « Ce ne sont mies choses plainnes
 « De courous, quant ensi vous chiet.
 « Se vous osiés mettre le piet
 « Celle part, par la vertu digne,
 11855 « Ou se tient ma dame Hermondine,
 « Tant que vous l'eüssiés veü,
 « Je tenroie a bien pourveü
 « Vostre eür et vostre fortune.
 « Si esçou cose moult commune?
 11860 « Car bien y poriiés aler
 « Et tout couvertement parler,
 « Mais que vous eüssiés avis. »
 Melyador ot ces devis
 Que Lansonnès illuec li baille;
 11865 Si dist ensi : « Vaille que vaille
 « Cilz parlers, tu m'as resjoÿ.
 « Plus a de .x. jours que n'oÿ
 « Parolle qui si bien m'agrée
 « Et, ou cas que je m'i recrée,
 11870 « Si me di ci presentement,
 « De tout ton meilleur sentement,
 « Se tu dis voir u tu mençonges
 « Pour moy oster de telz ensonges. » *f. 87 d*
 — « Sire », dist Lansons, « je di voir.

- 11875 « Mais que confort voelliés avoir,
 « Vous verés dedens .iiii. jours
 « Ceste pour qui li maulz d'amours
 « Vous a duret, puis que partistes
 « De Carlyon, ou vous veïstes
- 11880 « Figuré l'image en la targe. »
 Adont Melyador se charge
 De grant joie, et dist en riant :
 « Compains, or ne va detriant.
 « Pense comment ce se fera
- 11885 « Que mes corps la belle vera.
 « Se tu le poes ou le sces faire,
 « Tu ne me poes en riens complaire
 « De cose qui tant me conforte.
 « Adonc sera ma douleur morte. »
- 11890 — « **M**ONSEIGNEUR », ce dist Lansonnès,
 « J'ai entendu par mos exprès
 « Que ma damoiselle Hermondine
 « Demeure et tient, et soupe et dine
 « En .i. chastiel moult priès de chi.
- 11895 « Montsegur a nom, je vous di.
 « La tient la belle son hostel,
 « Ses mesnies et son tinel;
 « Mais, tant que d'aler jusc'a la,
 « A vous trop bien maniere y a
- 11900 « Et grant sens ossi y couvient.
 « Car je croi moult bien c'on le tient
 « Et garde en ce chastiel de priès.
 « La damoiselle de Montgriès,
 « Qui est sa cousine germainne,
- 11905 « Vous en dist auques le demainne,
 « S'il vous en voloit souvenir.
 « Mais, la aler et revenir,
 « Bien y ara maniere et art,

- « Car il y a trop grant regart.
 11910 « Pensés vous qu'e[lle] soit au large?
 « Nennil, voir; mais, se je l'encarge,
 « Vous y parlerés temprement.
 « G'i cuide tel attemprement
 « Mettre et si tres bonne ordenance,
 11915 « Que vous irés sans cognissance
 « Ou manoir ou elle demeure,
 « Et arés et loisir et heure
 « De li veoir bien et en pais,
 « Com pesans que vous soit li fais. »
 11920 Et quant Melyador l'entent,
 Si demande : « Et, compains, comment
 « Se pora ce par raison faire? »
 — « Bien », dist cilz, « il est necessaire
 « C'on sace des tours a le fois.
 11925 « J'en sçai des bons et des courtois
 « Qui vous venront moult bien a point. »
 Dist Melyador : « Sus ce point
 « Voel je tres volentiers entendre ;
 « Or le me di lors sans attendre. »
 11930 Et Lansonnès la li devise
 La maniere de la devise :
 « Sire », dist il, « premierement,
 « Il nous fault cangier voirement
 « Nostre abit, il n'est mies doubte,
 11935 « Et prendre une ordenance toute
 « Et l'estat de .ii. marcheans,
 « Cotes a plois larges et grans. »
 Et Melyador li demande,
 Qui de ce a joie trop grande
 11940 Et qui en voelt savoir la gise :
 « Lansonnet, de quel marchandise *f. 88 b*
 « Nous verrons nous dont entremettre? »
 Et cilz, qui bien entent la lettre,
 Respont : « Ensi que jeuelier

- 11945 « Qui se voelent ensonnier
 « De porter ces biaux anelès,
 « Ces affikès, ces fremillès,
 « Par ces chastiaus et ces manoirs,
 « Car vous savés, et c'est tous voirs,
- 11950 « Que ces dames et damoiselles,
 « As queles vient telz nouvelles,
 « Sont par nature moult engrans
 « De veoir tous telz marcheans,
 « Et pour les jeuelès qu'il portent
- 11955 « Apriès quoi elles se deportent.
 « Vous en avés, et s'en querrons,
 « Car or en une cité sons
 « Ou gens y a de tel affaire,
 « Qui au besoing les scevent faire.
- 11960 « Et quant pourveü en arons,
 « Devers Montsegur nous traïrons;
 « Lors prenderons nouviel conseil. »
 Melyador, qui en frefel
 Soudainnement se resjoÿ,
- 11965 Dist ensi : « Je t'ai voir oÿ
 « Ossi tres volentiers parler
 « C'on poroit dire ne penser,
 « Et, pour l'amour de ton langage,
 « Tant y ay jou bon avantage.
- 11970 « Amours m'a mis et met en voie,
 « Et chi le sentement m'envoie
 « De faire .i. rondelet joli,
 « Et tout pour l'amour de celi,
 « Que tu me dis et si m'afferme
- 11975 « Que je verai dedens brief terme. *f. 88 c*
 « Le rondelet te canterai,
 « De coer liet, amoureux et gay. »

Rondel

PAR pensée aucun bien reçois
De la dure douleur que j'ai.

11980 C'EST tout le bien qui est en moi;
Par pensée, etc.,

MA dame, quant je ne vous voi,
Et pour ce a vous penserai.
Par pensée, etc.

11985 E^{NSI} en Abredane sont
Li doy, qui une pensée ont
Qui leur tourne a tres grant plaisance.
Lansonnès erranment s'avance,
Qui d'orfevre en orfevre va,
11990 Ou moult de jeuelès leva,
Et les acata bien et chier;
De tous chiaus qu'il avoit plus chier
Moult en cueilla parmi la ville,
Et tant fist qu'il ot une pille
11995 D'anelès bons et bien dorés.
A son signeur est retournés:
Se li moustre sa marchandise,
Des anelès que forment prise
Et des fremillès ne sai quans,
12000 Et dist : « Vous serés marcheans
« Et je serai vostres varlès. »
Lors li baille les anelès
Et les met en une laiette
De blanch bois, qui bien estoit faite,

- 12005 Et les fremillès a par yaus.
 Or s'avise li damoisiaus
 Sus l'aniel qui li fu donnés;
 Adont le regarda assés
 Et li sembla encor plus riches, *f. 88 d*
- 12010 Mieulz ouvrés, plus gais et plus frices
 Que nul qu'il en eüst encor,
 Tant fust ouvrés d'asur ne d'or.
 L'aniel a mis hors de son doy
 Et dist a Lansonnet : « Je croy
- 12015 « Que je vodrai donner celi,
 « Pour le milleur et plus joli,
 « Le mieulz fait et le mieulz ouvré,
 « Que nous aions encor trouvé.
 « Premiers le donrai a l'estrine
- 12020 « A ma souveraine Hermondine. »
 Dist Lannonnès : « Vous ferés bien.
 « Ce que vous avés c'est tout sien. »
 Respont Melyador : « C'est voirs. »
 Deux abis desgisés et noirs
- 12025 Pourvei Lannonnès errant.
 Quant il les eut, je vous creant
 Qu'il est retournés a l'ostel.
 A son signeur dist : « Il n'a el.
 « Il vous fault assaiier cesti. »
- 12030 Adont Melyador vesti
 L'abit qui estoit pour son corps.
 Lannonnès li a .i. peu tors
 Sus l'espaule par desghisance
 Et, quant il en voit l'ordenance,
- 12035 Si dist : « Bien samblés marcheans.
 « Vous escourcerés hault vos pans,
 « Et vous chainerés par maniere
 « Pour mieulz bocier par derriere.
 « Mais vous avés trop blances mains,
- 12040 « Point ne sont teles de villains ;

- « Demain les vous faudra noircir
 « Pour mieulz vostre cose esclarcir
 « Et moustrer que villains soiiés, *f. 89 a*
 « Et si vous faudra en vos piés
 12045 « Mettre ces sorlers a noïiaus. »
 Adont respont li damoisiaus :
 « Je ferai ce que tu vodras. »
 Au matin ont laissiet leurs draps
 Melyador et ses varlès.
 12050 Si ont pris chiaus que Lansonnés
 Eut pourveü le jour devant ;
 Vesti les ont par couvenant
 Que trop bien se sont desgisé.
 Tout ensi qu'il ont devisé
 12055 Ont fait ce jour, ne plus ne mains,
 Et ont bien noircies leurs mains ;
 De faire le villain se painnent.
 .I. garçonnet o yaus en mainnent,
 Qui trop bien y savoit le voie
 12060 Et qui dist, se Diex le convoie,
 Que bien les menra au chastiel
 De Montsegur. En grant reviel
 Se sont mis tous troy au chemin,
 Et se partirent bien matin
 12065 D'Abredane et de leur hostel,
 Sans yaus descouvrir d'un ne d'el.

- E**NSI en cel estat s'en vont
 Li troi, et tant cheminé ont
 Qu'il sont a Montsegur venu.
 12070 A .i. hostel, bien pourveü
 De tout ce qu'il leur fait mestier,
 S'en vont erranment hebergier ;
 Ce fu assés priès dou chastiel.
 Laiens s'aisierent bien et biel

- 12075 De tout ce que il ont trouvé,
Et tout bellement ont rouvé
A leur hostesse qu'elle voie *f. 89 b*
Au matin la plus droite voie
Que elle pora au chastiel,
- 12080 Et elle ara .i. bon jeuïel
Se elle poet tant exploitier
Qu'il puissent moustrer leur mestier
A la fille dou roy Hermont.
Et li hostesse leur respont
- 12085 Qu'elle en fera la diligense.
Adont, sans nulle negligense,
L'endemain, a heure de prime,
Elle s'ordonne et si s'esprime
Pour aler au chastiel la sus.
- 12090 On ne li fait point de refus :
Par tout poet venir et aler,
Sans noient priier ne parler,
Car tous les jours y fust venue
Si com celle qui cogneüe
- 12095 Est laiens, il n'est mie doubté.
A .i. huis vient, .i. peu le boute ;
S'i trouva une camberiere,
Qui le rechut a lie chiere.
Ceste camberiere le mainne
- 12100 Parler a tout la plus proçainne
Qui soit a ma dame Hermondine,
Qui encor fu en sa courdine.
Ceste mist la besongne avant
Et dist a sa dame, en levant,
- 12105 Que la eut .i. marcheant tel,
Qui estoit venus a l'ostel
De dame Fromonde la Grise,
Le quel marcheant elle prise,
Car il a des biaux jeuelès,
- 12110 Des fremaus et des anelès

- Bien dorés et de bonne taille : *f. 89 c*
 « Si voroit volentiers, sans faille,
 « Ma dame, que les veïssiés
 « Et que vous en acatissiés.
 12115 « Il vous en feront grant marchiet. »
 Hermondine n'a point targiet
 De respondre, mes dist errant :
 « On le fera venir avant
 « Assés tost, quant serai levée. »
 12120 Ceste damoiselle secrée
 Respondi tout ce a Fromonde,
 Et li dist que en tout le monde
 Il n'amainne nulluy o soy :
 « Fors vous, Fromonde, ou, par ma foy,
 12125 « Il n'enteroit point ou chastiel. »
 Dist ceste : « Par saint Daniel,
 « Je croi que ja li aie dit. »
 — « Alés, n'atargiés c'un petit,
 « Car lors se levera no dame. »
 12130 — « Je m'en vois. » — « Adieu, bonne fame !
 « Quant arriere reteurnerés,
 « Droitement chi me trouverés. »

- O**R est Fromonde retournée,
 Qui gagera bien sa journée
 12135 A ce que je puis percevoir,
 Car ja a bien fait son devoir
 A parler pour le marcheant.
 Melyador trouva seant
 Et sen varlet d'encoste li :
 12140 « Mestres », dist elle, « je vous di,
 « Vous laisserés chi vo varlet ;
 « Je croi bien que vo jeuilet

- « Seront vendut ains vo retour. »
 Dist cilz : « Diex vous doinst hui bon jour,
 12145 « Belle hostesse, par saint François! *f. 89 d*
 « Tenés; vous en arés, ançois
 « Que je les vende, vostre part. »
 Adonques largement l'en part
 Et l'en voloit encores rendre,
 12150 Mais Fromonde n'en volt plus prendre.
 Entre yaus .ii. se sont mis a voie;
 Homme ne femme ne les convoie,
 Car moult bien y scet le chemin
 Fromonde, qui tamaint matin
 12155 Et maint soir y avoit esté.
 Il n'ont nulle part arresté;
 Venu s'en sont jusc'au chastiel.
 Li portiers les a bien et biel
 Recueilliés et mis en le porte :
 12160 Ce fu drois, puis c'on lor aporte.
 Encores donna en entrant
 Melyador, droit la errant,
 Au portier .i. biel anelet.
 Se dist cilz : « Veci vo varlet,
 12165 « Biaux maistres, et tres grans mercis. »
 Melyador, qui fu noircis
 D'abit ossi noir c'une aronde,
 Va ensi que dame Fromonde
 Le mainne laiens et pourmainne.
 12170 Dame Fromonde si le mainne
 A l'uis de la cambre Argentine
 Et la demanda s'Ermondine
 Estoit encore appareillie,
 Et ceste, com bien consillie,
 12175 Li dist : « Oil, je vois vers li. »
 Adonques de sa chambre issi,
 Si s'est trette devers sa dame,
 Et li dist tout ensi : « Par m'ame,

- « Dame, veci le marcheant. *f. 90 a*
 12180 « Le ferai je venir avant ? »
 — « Oïl, ce respont Hermondine,
 « Je voel veoir, ançois c'on dine
 « Quels jeuelès il nous aporte.
 « Dites c'on le laist en le porte. »
 12185 Dist Argentine : « Il y est ja. »
 Adont Argentine s'en va
 Viers Fromonde et li dist : « Avant
 « Faites venir le marcheant. »
 Et Fromonde se traist arriere,
 12190 Car Melyador fu derriere,
 Et dist : « Maistres, avant venés,
 « Je vous pri. Point ne vous tenés,
 « Mais vendés bien legierement. »
 Dist Melyador : « Vraiment.
 12195 « Ossi ferai je, sans fallir. »
 Adonques volt avant sallir,
 Mais se hostesse le retint,
 Qui tout quoi dalés li le tint.
 La vinrent .iiii. jones pucelles,
 12200 Moulz gratieuses et moulz belles,
 Qui li disent ensi : « Biau mestre,
 « Moustrés nous, voires, s'il poet estre,
 « Quel marchandise vous portés. »
 Et cilz, qui est tous enhortés
 12205 De par son hostesse Fromonde,
 Dist c'a homme ne femme ou monde
 Il ne moustera riens qu'il ait,
 Jusques adont que tout son hait
 Et plainnement a son voloir,
 12210 En ara leur dame eü voir.
 Ensi s'apaisent les pucelles.
 Entrues qu'il devisoit a celles,
 Evous la venue Argentine, *f. 90 b*
 Qui l'acene et li fait .i. signe

- 12215 Qu'il se traie avant, de par Dieu.
 Tout troi s'en vont ou propre lieu
 Ou Hermondine les attent. †
 Sitos que Melyador sent
 Qu'il veoit devant li sa dame,
- 12220 Li sans li trescange, par m'ame,
 Si fort qu'il fu tous esbahis,
 En regardant en mi le vis
 Hermondine, la tres parfaite.
 Adont a ouvert sa laiette
- 12225 Et prent l'anelet tout dessus,
 Ou nulle ne pensoit, ne nulz,
 Ne ilz ossi, fors que grant bien,
 Et riens ne savoit dou moien,
 Ne des mos qui sont ens escrits.
- 12230 Sitost qu'il eut l'anelet pris,
 Qui fu fais par bonne ordenance,
 Dessus le pavement s'avance :
 « Tenés », dist il a Hermondine,
 « Cesti vous donne a bonne estrine ;
- 12235 « Li aultre le recateront.
 « Tel usage en nostre terre ont
 « Li jeuelier, certes, ma dame,
 « C'a le premiere qui entame
 « Les jeuiaus d'un marchant a vendre,
- 12240 « Il l'en faut .i. donner et prendre.
 « Si arés cesti a l'estrine. »
 Adonques le prist Hermondine
 Et dist : « Veci biel anelet. »
 En son doy le met; la le let.
- 12245 Ciunc fois le regarda où .vi.
 Et dist : « Mestres, moult grant mercis.
 « Ce vous sera li mieus vendus. » *f. 90 c*
 Adont ne s'est pas trette ensus
 Hermondine, saciés pour voir;
- 12250 Mais voelt la laiette veoir

- Entre ses mains, et cilz li donne,
 Qui moult douchement l'araisonne
 En disant : « Souffrés .i. petit.
 « Cil fremillet sont moult jolit;
 12255 « Prendés des quelz que vous volés.
 « Il en y a a l'autre lés,
 « Qui ne sont mies de ce tour;
 « Je ne les porte fors que pour
 « Jones fillettes de .xii. ans;
 12260 « Et s'en y a de plus pesans,
 « Et qui sont de plus grant argent.
 « Vous les manoiés si tres gent,
 « Et par si courtoise maniere,
 « Que pucelle ne camberiere
 12265 « N'i saroit avenir vers vous.
 « Tout ce ou il git miulz vos gous,
 « Si le me tournés d'une part.
 « Je crois assés, ains mon depart,
 « Que nous en serons bien d'acort. »
 12270 Dist Hermondine : « A mon grant tort
 « Seroit voir, se je n'acatoie;
 « Car pour quoi vous estes en voie
 « De vendre et avés esté hui? »
 Respont Melyador : « Ce sui
 12275 « Certes, dame, et m'est grant mestier
 « Que je vende, car en dangier
 « Sui d'argent et vous en avés,
 « Par quoi mes jeuelès arés.
 « Or me dittes, par vo merci,
 12280 « S'il vous plaist cose qui soit ci. »
 — « Oil, mestres, sachiés de voir. *f. 90 d*
 « Je voel ces fremillès avoir
 « Et ces anelès d'une pille.
 « Foy que vous devés a vo ville,
 12285 « Metés y fuer ou vo raisons
 « Y soit gardée, et nous aions

- « La denrée pour .i. denier. »
 Et cilz qui se fesist prier,
 Ançois dou laissier que dou prendre,
 12290 Donner les volsist et non vendre,
 Respondi : « Dame, volentiers. »
 Ce qui bien valoit .vi. deniers,
 Et loyaument sans riens rabatre,
 Il ne fist a fuer fait que .iiii.,
 12295 Tant que les damoiselles dient,
 La entr'elles qui s'en derient :
 « Mestres, mestres, avisés vous.
 « Certes, vous feriés trop pour nous,
 « Se les avions pour ce pris. »
 12300 Melyador les a repris
 Et dist : « Dames, je suis si frans,
 « Soit li conquès petis u grans,
 « J'ay tantost fait et marchandé.
 « Vostre dame m'a chi mandé,
 12305 « C'est raisons que son voloir face,
 « Et que de riens ne li sourface,
 « Mes jeuiaus fors encores mains.
 « Espoir que tamainte et tamains
 « Ne les vorroient acater. »
 12310 Elles prennent a regarder
 Leur dame et dient : « Prendés tout.
 « Il n'a mies chiere d'estout,
 « Ne de villain ne de bregier.
 « Espoir vodra il remploier
 12315 « Ses deniers dou tout a sa guise *f. 91 a*
 « En aucune autre marchandise,
 « Ançois que de ce pays wide. »
 Hermondine, qui moult bien cuide
 Qu'il soit ensi, ne plus ne mains,
 12320 Que ses pucelles a leurs mains
 Taillent illuech a bonne entente,
 Respondi tantost sans attente :

- « Je retieng tout vaille que vaille. »
 A Argente dist : « On li baille
 12325 « Tout presentement ses deniers. »
 Parçonnières et parçonnières
 Eut la Hermondine en present,
 Car cascune et cascuns le sent
 Large, et courtoise et deboinaire.
 12330 Si dient : « Dame, il vous fault faire
 « Vo grace a nous qui vous servons,
 « Entrues qu'en ce point vous veons;
 « Car vous avés moult bien de quoi. »
 Et elle respont : « Par ma foy,
 12335 « Vous en arés moult volentiers. »
 Adont ses jolis cors entiers
 Ses jeuelès illuec depart.
 Melyador est trais a part,
 Qui en regarde la maniere
 12340 Et Hermondine en mi la chiere,
 Qu'elle ot si belle et si joieuse
 C'onques cose si amoureuse
 Ne fu, ce dist il, la, sur s'ame,
 Que ceste est qu'il tient pour sa dame.
 12345 La le voit venir et aler,
 Et a ses pucelles parler
 Et a ses chevaliers ossi.
 Sa contenance li plaist si
 Qu'il ne vorroit aultre part estre, *f. 91 b*
 12350 Ce dist, n'en paradys terrestre,
 Pour veoir nulle aultre figure.
 Et dist bien, quant a le figure
 Que sen sieuant point en la targe,
 Assés priès de ceste se charge,
 12355 Et qu'elle fu loyaument faite,
 Bien figurée et bien pourtrette.

12352 quant a le, *B* quant il le.

- Cil et celles qui la estoient
 En la cambre, et qui s'esbatoient
 A regarder leurs anelès,
 12360 Leurs fremaulz et leurs jeuelès
 Que donné leur avoit leur dame,
 Ne cuidassent jamais, par m'ame,
 Que ce fust la Melyador
 Le chevalier au soleil d'or,
 12365 Ne nul compaignon de la queste.
 Il n'eussent point si grant feste
 Demenet que il demenoient ;
 Car tel commandement avoient,
 De par le noble roy Hermont,
 12370 Que ne fust homs en tout le mont
 C'on laiast entrer en la porte.
 Mais cilz, qui le soleil d'or porte,
 I entra par tele maniere
 Que dit ay, et a lie chiere
 12375 Fu il la dedens recheüs ;
 Car il y vint bien pourveüs
 De coses que dames desirent
 Et des queles entre elles rirent
 Assés de son courtois vendage.
 12380 On li dist que point de damage
 N'aroit apriès son paiement,
 Et il respondi bellement
 A cesti qui en fu cargie :
 « Damoiselle, se Diex m'aÿe,
 12385 « Je n'i pense fors que tous biens
 « Ne je ne m'en esmaie en riens. »

f. 91 c

- 12390 **E**NSI Melyador se tient,
 Qui si bellement se maintient,
 Si sagement et si a point,
 Que decheüs il n'i est point.

- Tout cuident, privet et estragne,
 Qu'il soit la venus de Bretagne
 Pour monteplier son catel.
 Dit li fu dou mestre d'ostel,
 12395 Que de la point ne partiroit,
 Jusc'a tant que diné aroit.
 Ces parlers oÿ volentiers,
 Car ses cuers estoit si entiers
 A Hermondine regarder,
 12400 Que il ne s'en pooit soeler
 Et, quant il poet ce doulz samblant
 Regarder ensi qu'en emblant,
 Vis li est qu'en Paradys soit.
 Et encores il ne s'osoit
 12405 Tant confier au regarder
 Pour celles qui l'ont a garder,
 Qu'en aucun cas on ne perçoive
 Son fait et c'on ne l'en deçoive.
 Melyador illuech disna,
 12410 Qui mies en oubli mis n'a
 De faire le courtois a table,
 Quant il est en lieu si notable
 Que il voit devant lui, as ieulz,
 Celle pour qui en tant de lieus
 12415 Il a estet et travilliet,
 Et maint chevalier resvilliet.
 Assis fu avoech les pucelles, *f. 91 d*
 Qui se tient moult bien pour celles
 Qui sont femmes a Hermondine,
 12420 La quele a une table disne
 Et .ii. dames par desous li.
 Cilz estas forment abelli
 A Melyador, ce saciés.
 La ne fu boutés ne saciés,
 12425 Mais servis bien et bellement
 De tous mes assés largement,

- Otant qu'il eut a la grant table,
 Et de vin bon et delitable.
 Quant on ot disné, on lava
 12430 Et puis tantost on se leva.
 Lor fu Melyador paiiés,
 Qui ne s'est noient esmaiés
 De prendre congiet bien et biel
 A toutes celles dou chastel.
 12435 Au partir dist en soi meïsmes :
 « Las ! pour quoi ci aval venismes ?
 « Je cuidoie avoir tout conquis,
 « Mais que je fusse entrés en l'uis
 « De ceens pour veoir ma dame,
 12440 « Mais bien sarai dire, par m'ame,
 « A mon varlet que non arai.
 « Haro ! comment me maintenrai
 « D'or en avant, — je ne sçai voir —
 « Quant je desirrai a avoir
 12445 « Le regard de la bonne et belle,
 « Et point n'en verai, las ? Se elle
 « Pooit savoir que je sui cilz
 « Qui ai souffers tant de perilz
 « Pour s'amour, et ferai encor
 12450 « Ançois que venir puisse au cor
 « Des anées que je poursieu,
 « J'en regracieroie Dieu ! »

f. 92 a

- T**OUT ensi se va lamentant
 Melyador, qui a fait tant
 12455 C'a l'ostel est venus arriere.
 Lansonnet trueve en la chariere,
 Son escuier, qui l'attendoit.
 Si tost que ses mestres le voit
 Se li dist : « Compains, alons ent,
 12460 « Car j'ai acompli mon talent.

- « J'ai vendu tous mes anelès,
 « Mes fremaus et mes jeuelès,
 « Et me fu dit que je reviegne ;
 « C'est bien raisons qu'il m'en souviégne. »
- 12465 Lansonnès regarde son mestre :
 Si le voit trop fort pensieu estre,
 Siques, pour lui servir a gré
 Et pour savoir de son secré
 Comment li va et comment gist,
- 12470 A l'ostesse de laiens dist,
 A dame Fromonde la Grise,
 Qui riens sus leur estat ne vise :
 « Venés, dame, prendés argent.
 « Que devons nous ? » — « Non pas gramment, »
- 12475 Dist Fromonde, « mon ami chier.
 « Vous venistes or primes hier.
 « Paiiés tout ce que vous volés. »
 Lansonnès est avant alés,
 Qui tire argent, et si le paie
- 12480 Si largement qu'elle dist : « J'aie
 « Souvent de telz hostes ceens !
 « Se j'en avoie ja .ii. cens
 « L'anée, je seroie riche. »
 Et Lansonnès, qui fait le nice,
- 12485 Prent congiet ; ossi fait son mestre. *f. 92 b*
 Si tiennent le chemin sus destre
 Pour revenir vers Abredane.
 Li preus, qui mies ne se tane
 De parler a sen escuier,
- 12490 Par quoi mains li puist anuier,
 Fait devant aler le garçon,
 Qui portoit .i. biau grant plançon
 C'a leur hostel avoient pris.
 Lors renouvelle ses escriis
- 12495 Melyador, en cheminant ;
 A son varlet en compte tant

- Qu'il meïsmes y prent plaisance.
 Toute li a dit l'ordenance,
 Comment a estet receüs
 12500 Et de doulz regars pourveüs,
 Qui li font savourer grant painne.
 Dist Lansonnès, qui moult se painne
 De son mestre reconforter :
 « Or deveriés vous raporter,
 12505 « De ces regars qui sont si biel,
 « Aucune cose de nouvel,
 « Mieux c'onques mais, ce m'est avis. »
 Et cilz, qui est si fors ravis
 En pensées qu'il ne poet plus,
 12510 Dist : « Compains, li retraire en sus
 « De ly me fait trop grant anoy,
 « Et, par la foy que je te doy,
 « J'estoie avanthier plus joieus,
 « Mains pensieus et mains anoieus,
 12515 « Que je ne soie maintenant.
 « Or me lay ens ou couvenant
 « Ou je sui, je le te commande
 « Et riens ne me di ne demande,
 « Car grandement m'i plaist a estre. » *f. 92 c*
 12520 Et cilz qui voelt faire a son mestre
 Tous ses bons, car c'est bien raisons,
 Dist : « Or soit et alons, alons.
 « Vous partirés de ces anuis,
 « Se Dieu plaist, ançois qu'il soit nuis. »
 12525 Ensi en cel estat le laisse,
 Bien saciés, une grande laisse
 Que Lansonnès riens ne li dist.
 Et Melyador, qui pas n'ist
 De son penser, pense et repense.
 12530 En pensant illuec il s'apense
 Qu'il fera la une balade,
 De coer tout pesant et malade,

Pour ce qu'il n'a mies espoir
 De sa dame plus reveoir,
 12535 Se ce n'est fortune trop grande.
 Adont quoi qu'il eüst pesande
 L'intention, il le commence
 Et si bien persevere en ce
 Que la balade il acompli;
 12540 Et pas ne le mist en oubli,
 Mais le recorda biel et bien
 Par grant sens et par grant engien.
 Quant revenus fu a l'ostel.
 De la balade sont tout tel
 12545 Li parler que je vous dirai,
 Ne ja ne vous en mentirai.

Balade

JE ne sçai voir li quelz eut plus d'anoi
 En ce monde, ou Narcissus ou moy ;
 Car Narcissus si morut pour amer,
 12550 Dont li couvint sa dolour definer,
 Et je languis pour ce que ne voi mie
 Celle qui est et ma dame et m'amie.

f. 92 d

NARCISSUS aussi veoit devant soi
 L'ombre de li, dont il disoit, je croi :
 12555 « Que cesti ci me voelle conforter. »
 Tel joie avoit adont en son penser,
 Dont je n'ai point, car trop m'est eslongie
 Celle qui est et ma dame et m'amie.

OR soufferei tout quanque je reçoï
 12560 Pour bien amer loyaument et en foy,
 Car Amours poet trestout gerredonner
 Dont ne vorrai jamais jour oublier,

Comment que soie ne tant que soit en vie,
Celle qui est et ma dame et m'amie.

- 12565 **D**E commencement jusqu'en fin,
Tout en alant sus le chemin,
Fist Melyador la ballade.
Quant il l'ot fait, si ot plus sade
Le cuer qu'il n'eüst en devant.
- 12570 A l'ostel sont venu a tant
En Abredane, dont il partirent ;
En leur cambre erranment se tinrent
Tout doi, par tres bonne ordenance.
Melyador, qui en plaisance
- 12575 Sa balade encores avoit
Et qui tout par cuer le savoit,
Tant l'avoit en soy recordé,
A son varlet, par le corps Dé,
L'a recordé incontinent.
- 12580 Et Lansonnès, qui bien l'entent,
Li loe et dist qu'elle est bien faite,
Et puis li dist : « Se la parfaite
« Hermondine que tant amés,
« Pour qui dolereus vous clamés,
- 12585 « Savoit or que ses jeueliers
« Fust uns si friches chevaliers *f. 93 a*
« Qui, pour s'amour, fesist cançons,
« Certes ce seroit bien raisons
« Que elle en euist grant merveille. »
- 12590 Et Melyador, qui s'esveille
Sitost que son varlet oÿ,
De ce parler se resjoÿ ;
Atant laissierent le parler.
Melyador s'en volt raler,
- 12595 Ce dist il, au bon matinet.
Largement paient le varlet,

- Qui moustret leur avoit le voie
 Au chastiel ; se Diex me doinst joie,
 Par tout ont comptet et paiiet.
 12600 Au matin n'ont plus detriiet :
 Congiet ont pris et on lor donne ;
 Il se partent a l'eure bonne
 Et se mettent lors sus les camps,
 Tout ensi qu'il ont fait tous tamps.
 12605 Mais bien chevaucierent .v. jours
 Et fisent moult de divers tours,
 Ne onques dedens ce termine,
 Si com li livres determine,
 Ne trouverent nulle aventure,
 12610 Quele que fust, ou douce ou sure,
 Qui point face a ramentevoir,
 Dont trop fort en anoioit voir
 A Melyador le vassal.
 S'estoit il le plus a cheval
 12615 Pour les aventures trouver
 Ou son corps volsist esprouver.

- Nous lairons de Melyador
 A parler, voires, tant c'a or,
 Car temprement en parlerons ;
 12620 Mais ossi pas n'oublierons
 Le tournoy de devant Tarbonne.
 I. joedi, a heure de nonne,
 S'en revinrent, c'est vraie cose,
 Li dit maronnier a Montrose
 12625 Qui devoient, si com savés
 Et que compter oÿ avés,
 Melyador en Cornuaille
 Mener ; or ne peurent, sans faille,
 Pour le vent mauvais et contraire.
 12630 A leur dame vont tout retraire

f. 93 b

- Leur voiage, et le grant peril
 En quoi il furent et tout cil
 Qu'il avoient en gouvrenance,
 Et ossi par quele ordonnance,
 12635 Et quant il eurent tant waucré,
 Il se trouverent tout ancré
 En .i. isle dedens Escoce.
 Et quant la damoiselle ot ce,
 Si en fu forment couroucie
 12640 Et encores s'est radrecie
 De demander as maronniers :
 « Dittes moy, li dis chevaliers,
 « Ou est il et ou demora ?
 « Est il en liu ou il pora
 12645 « Estre au tournoy que tant desire ? »
 — « Cela ne vous savons a dire,
 « Dame, mais nous laiïet l'avons
 « En Escoce, et si n'en savons
 « Plus avant, fors tant qu'il moustroït
 12650 « Qu'il avoit le cuer moult destroit.
 « Ne savons qu'il a fait de puis. »
 Dist Florence : « Veoir ne puis,
 « Puis qu'il a tel empecement,
 « Qu'il soit au tournoy nullement, *f. 93 c*
 12655 « Ou tant desiroït a aler. »
 Lors en laissierent le parler,
 Ne plus la ne s'en demenerent
 Et en aultre pourpos entrerent.
- 12660 **N**ous laïrons ci, c'est vraie cose,
 De l'iretiere de Montrose,
 Et parlerons en bonne foy
 De l'ordenance et de l'arroi
 Dou tournoy, comment il se tint.
 Quant li jours approça, on vint

- 12665 De tous pays la ou contour.
 Si se logierent tout au tour
 De Tarbonne li chevalier.
 Li rois Artus, pour consillier
 Le duch Patris mieus a sen aise
- 12670 Et faire cose qui li plaise,
 Eut la envoiés de ses gens,
 Sages, songneus et diligens,
 Pour ordonner d'un tel afaire
 Qu'il apertenoit la a faire.
- 12675 Moult y eut de chevalerie
 Et de bonne bacelerie,
 Tant par dedens comme dehors,
 Car lonch eut courut li recors
 Dou tournoy qui devoit la estre
- 12680 Par tout, a destre et a senestre.
 As camps chevalier se logoient,
 A le mesure qu'il venoient,
 Priés d'un bois, dalés une lande
 Qui regarde devers Irlande
- 12685 La estoient li chevalier
 Qui s'appelloient estragnier,
 Mais il ne s'amoustroient point
 Dedens la ville; de ce point
 Estoit il tout consilliet.
- 12690 Quant il furent appareilliet
 Le jour que on deut tournoier,
 Et c'on leur ala envoier
 Dire et noncier tout clerement,
 De par les dames ensemment :
- 12695 « O chevalier, traiiés as camps,
 « Car il en est saisons et tamps
 « Dou traire, et que cascuns s'acquitte,
 « Tant as cops des mains c'a le luitte. »
 Dont s'appareillent chevalier,
- 12700 Qui ne voelent plus detriier.

f. 93 d

Tout armé sus les chevaus montent,
 A leurs vies noient n'acontent,
 Mais qu'il puissent, par bien combatre,
 Pris avoir et leurs corps esbatre.

- 12705 **O**N ot au dehors la cité
 De Tarbonne, pour verité,
 Fait carpenter sus estançons
 Cambres, logeis et maisons,
 Et toutes couvertes d'aisselles.
- 12710 La sont dames et damoiselles,
 Des queles y a grant fuison ;
 Et la devant et environ,
 Sus la place qui est moult lée,
 Ou il n'a terre ne vallée,
- 12715 Tournieront li chevalier.
 Nulz n'a o soy son escuier :
 Ensi qu'il voelt si se gouverne.
 La en y [ot] de chiaus d'Iberne,
 De Nor[t]hombrelande et de Galles,
- 12720 Et dou royaume de Norgalles,
 Ou moult a de bons chevaliers.
 Quant on deubt assamblar premiers, *f. 94 a*
 Pour donner a tous cognissance
 Qu'il se mettent en ordenance,
- 12725 On sonna .i. grant cor d'ivoire :
 Tout cil qui en ont la memore,
 Sevent bien que ce segnefie.
 Lors veïssiés a une fie
 Chevaliers partir des arrois,
- 12730 Chi .vii., chi .viii., chi .v. chi .iiii.,
 Et s'en viennent l'un contre l'autre,
 En portant espées sus fautre.
 Et sitretost comme il s'approcent,
 Avoech ce que de grant coer brocent,

- 12735 Il se donnent grans horions.
 Ne sai pas comment porions
 Telz coses bien considerer,
 Car la veïssiés reverser
 Chevaliers et guerpir les selles.
- 12740 La sont les ordenances belles
 De veoir comment il se cachent,
 Et ossi comment il s'attachent
 L'un a l'autre par vasselage.
 Agamanor, qui par usage,
- 12745 Voet estre toutdis des premiers,
 Tant est corageus chevaliers,
 Va .i. chevalier rencontrer.
 .i. tel cop li ala fraper
 De l'espée sus le hÿaume,
- 12750 Que cilz, s'il deüst .i. royaume
 Gaegnier, ne se fust tenus
 Qu'il ne soit a terre cheüs ;
 Ne say se puis se releva.
 Ensi Agamanor s'en va,
- 12755 Fendant les presses devant soy .
 Dist Phenonée : « Voir, je voi
 « Che chevalier biel tournoïier
 « Et li gentement manoiier.
 « Nulz ne dure devant ses cops. »
- 12760 S'Agamanor oïst les mos
 Que la belle de soi devise,
 Et comment a son bienfait vise,
 Il en fust encor plus vaillans
 Et plus volentiers travillans.

f. 94 b

- 12765 **M**OUlt fu cilz tournois biaus et gens
 Et moult y eut de vaillans gens,
 Car on y compta des premiers
 Jusques a .cc. chevaliers :



- La y ot fait devant les dames
 12770 Tamaint biel et grant exploit d'armes.
 Agamanor trop bien tournoie ;
 De l'espée que biel manioie
 Hyaumes et guaffes desront.
 Toutes ses ententions sont
 12775 Que le pris ara pour le jour.
 Il ne prent mies son sejour
 En .i. lieu, mes toutdis chevauce.
 Chevaliers abat et encauce,
 Et les porte tous jus a terre.
 12780 Ses bras sont tel qu'il font bien guerre ;
 Li plus le fuient et ressongnent.
 Les dames entre elles tesmongnent
 Que c'est voir li mieulz travillans,
 Li plus preus et li plus vaillans,
 12785 Qui point soit veüs sus le place.
 Il a encontré face a face
 .I. chevalier d'oultre Saverne ;
 Mais telement il le gouverne
 Que puis ne tournoia ce jour.
 12790 Il n'ara pas tous seulz l'onnour, *f. 94 c*
 Car Gratiiens est d'autre part,
 Qui donne les coups et depart
 Par tout, a diestre et a seniestre,
 Ensi que cilz que vodroit estre
 12795 Li uns des bons de la journée.
 La cose est moult bien ordonnée :
 La sont cil de Northombrelande
 Contre les chevaliers d'Irlande.
 Messires Tangis de Sormale
 12800 Par le tournoy chevauce et bale,
 Et fait merveille de son corps,
 Car il est chevaliers moult fors
 Et moult bien seans a cheval.
 Evous, descendant tout aval,

- 12805 Dagoriset atout se route,
 Qui ou fort dou tournoy se boute.
 Il fiert et frape autour de li
 Tamaint chevalier maubelli,
 Car il estoit chevaliers grans,
- 12810 Moult hardis et entreprendans
 Et si a ordenance bonne.
 La sont les dames de Tarbonne
 Qui furent en .i. escaffaut,
 Ou riens a ordonner ne fault ;
- 12815 Joliement fu carpentés,
 Et tout environ fenestrés
 De fenestres bonnes et belles.
 La sont dames et damoiselles,
 Vesties de biaus draps a or.
- 12820 La fu ma dame Alÿenor,
 La ducoise de Cornuaille ;
 Sa fille dalés lui, sans faille,
 Qui bien estoit acompagnie
 De belle et bonne compagnie.
- 12825 Plus de .vi^{xx}. furent en compte
 Celles qui bien scevent que monte
 Honneur, car de droite lignie
 En viennent ; se n'i fallent mie.

f. 94 d

- 12830 **V**ous devés savoir qu'entre celles
 Qui la sont, dames et pucelles,
 Nature a mis trop plus de grasce
 A celle qui toutes les passe,
 Ma damoiselle Phenonée,
 Qui la y estoit ordonnée
- 12835 En si friche et si noble arroy,
 Comme elle fust la fille au roy
 D'Escoce ou encor .i. plus grant.
 Et bien savoit, je vous creant,

- 12840 Que belle estoit, et grande assés,
 Et pas n'estoit ses temps passés
 D'amer, mes-commençoit or primes.
 Encor fera faire des rimes
 Et des cançons pour sen amour.
 Ses peres qui amoit honnour,
 12845 Li vaillans dus de Cornuaille,
 Estoit en l'escaffaut, sans faille,
 Et non pas trop lonch de sa fille.
 Entre yaus .ii. tiennent leur concile
 Des preus chevaliers que la voient
 12850 Et li quel vaillamment tournoient,
 Dont c'est grant plaisance au veoir.
 Li dus fait moult bien son devoir
 Dou regarder et dou jugier,
 Et quant il voit .i. chevalier
 12855 Passer qui li plaist en regart,
 Si dist ensi : « Se Diex me gart,
 « Vela .i. chevalier adroit.
 « Ne sai se ma fille vodroit *f. 95 a*
 « Amer par amours .i. tel corps.
 12860 « C'est bien mes gous et mes acors,
 « D'or en avant, qu'elle commence;
 « Car elle en vient de le semence
 « Et par amours pris jou sa mere,
 « Qui n'est ne dure ne amere,
 12865 « Et encor nous amons otant
 « De l'un l'autre, savons bien tant,
 « Que le premier jour que ce fu. »
 Lors demande a Phenonée : « U
 « Avés vous or, ma fille, assis
 12870 « Vostre coer? J'en voi ci telz .vi.
 « Qui sont bien tailliet c'on les aime. »
 Et ceste, qui jone se claime,
 S'escuse et dist que point n'i pense,
 Et s'elle met sa diligense

- 12875 A jeter ses yex hault et bas,
 C'est tant seulement ses esbas
 Pour savoir se jamais veroit
 Son frere, ne cognisteroit.
 Ensi Phenonée s'escuse,
- 12880 Mais ses cuers d'aultre façon use ;
 Elle en a plus chier .i. que cent,
 Car elle au regarder entent
 La ou gist ses cuers et ses gous.
 Elle en a plus chier .i. que tous,
- 12885 Ce dist elle en soi, tout en bas :
 « C'est cilz qui a les rouges draps
 « Et qui porte une blanche dame. »
 La se tient ses regars, par m'ame,
 Et aroit plus chier qu'il eüst
- 12890 L'onneur, et plus ne le veüst,
 Que nulz autres qui soit en place.
 Ensi a par soy se solace,
 Et li chevalier s'esbanoient
 Qui se lassent et qui tournoient
- 12895 As espées moult radement,
 Espris de tres grant hardement.

f. 95 b

- E**NSI cilz tournois se poursieut ;
 Mais, cui c'Aghamanor consieut,
 A plain cop il le met a terre.
- 12900 Monsigneur Tangis va requerre
 De l'espée moult aigrement,
 Et cils qui fu jolierement
 Armés et montés a cheval
 L'attent a chiere de vassal,
- 12905 Car il estoit et durs et fors,
 Bien fait de membres et de corps ;
 Sur son cheval est enfourciés,
 Ce samble qu'il y soit forgiés.

- Quant cil doi l'un a l'autre viennent,
 12910 Des bonnes espées qu'il tiennent
 Se donnent moult grans horions.
 Agamanor fu drois et lons,
 Et chevaliers de belle taille
 Et si bien tournians, sans faille,
 12915 Qu'il n'i avoit riens c'amender.
 Bien scet qu'on le poet regarder
 Des fenestres qui sont lassus,
 Et qu'il n'est mies trop ensus
 Des dames et des damoiselles.
 12920 Au travers prent par les asselles
 Monsigneur Tangis et l'estraint
 Telement que point ne remaint
 A cheval, mes jus il le porte.
 Au relever fu la moult forte
 12925 La bataille, de toutes pars.
 Phenonée, qui sés espars
 Avoit de tous sens ou tournoy,
 A veü celi devant soy
 Qui si faiticement tourne
 12930 Et qui les chevaliers manie,
 Telement et si durement
 Que nulz volentiers ne se prent
 A lui, qui eschiever le puist.
 Ses affaires pas ne le nuist,
 12935 Et dist qu'il est drois chevaliers,
 Telz qu'il doit estre, fors et fiers,
 Bien tournians oultre l'ensengne.
 Ne scet se de la Grant Bretagne
 Est issus ou d'aultre pays,
 12940 Mais il li vient en son avis
 Certainnement que c'est ses freres.
 Moult recommande les materes
 De li et tout ce que cilz fait,
 Car il tournoie bien au het

f. 95 c

12945 De lui et des aultres pucelles,
Des dames et des damoiselles,
Et y fait d'apertises plus
Et des armes ne face nulz.

12950 **E**NSI Phenonée en son cuer,
Qui cuidoit bien estre la suer
De ce chevalier tournoiant,
S'en va tout merancoliant,
Mais voir ceste merancolie
Est amoureuse et moult jolie ;

12955 Assés legierement s'en passe.
Agamanor n'a pas la grasce
De Phenonée seulement,
Mais l'a de tous chiaus proprement
Qui tournoient et qui le voient.

12960 Li bon chevalier qui savoient
La les dames qui les regardent.
Saciés que pas ne se retardent
De ferir et frapper avant.

f. 95 d

12965 Or est revenus, au devant
D'Agamanor, Droomedès,
Li quel avoech Dagorisès,
Estoit partis pour la journée,
Et vous di que la ajournée
Est bataille de grant affaire.

12970 Cascuns scet bien ce qu'il doit faire :
De l'espée biel manoier.

Dames les voient tournoier
Moult fricement, car ou regart
Droit d'elles sont, se Diex me gart ;
Si en prisent moult l'ordenance.

12975 Aghamanor .i. peu s'avance,
Qui voelt c'on parolle de li,
Et fiert de l'espée celi

- Qui fu Dreomedès nommés
 12980 .I. tel cop que tous estonnés
 Cheï le chevalier a terre,
 Et adonques, pour reconquerre
 Son cheval et li remonter,
 Veïssiés chevaliers bouter,
 12985 Presser, ferir, lever les bras.
 La n'avoit mestier nul homs cras,
 Ne qui bien ne portoit alainne,
 Car la presse y est si villainne,
 Que on ne voit èl que fumiere.
 12990 Dagorisès en la lumiere
 Dou hÿaume fu la ferus,
 Mais dou cop ne cheï pas jus,
 Ains se tint bien et fricement.
 Moult se maintienent richement
 12995 Chevalier, il n'est pas doubte.
 Nulz les horïons ne redoubte
 Mais chevaucent toutdis avant,
 En ferant et en tournoiant,
 Et en faisant plusieurs merveilles
 13000 A qui nulles n'ont les pareilles.

f. 96 a

- M**ESSIRES Tangis de Sormale
 Le cheval esperonne et a le
 Entente qu'il voelt tournoier.
 Encontré a .i. chevalier
 13005 Grant et fort, et de belle taille.
 De l'espée tel cop li baille
 Qu'il le porte jus dou cheval.
 La n'avoit ne terme ne val,
 Mais fu la terre toute onnie.
 13010 Messires Tangis biel tournie
 Devant les dames de Tarbonne,
 Et le bon cheval esperonne

- Qui dessous lui bien se remue.
 Pas ne se tiennent trop en mue
 13015 Li bon chevalier d'autre part ;
 Li aucun sevent moult bien l'art
 De tournoier biel et a point.
 Agamanor a ces cops point
 Le cheval, et par ordenance
 13020 Dessus .i. chevalier s'avance,
 Qui estoit nommé Agrapars.
 Doubtés estoit de toutes pars
 Pour les horions qu'il donnoit,
 Mais chilz qui moult bien s'ordonnoit,
 13025 Li quelz Agamanor s'appelle,
 D'un cop li fit guerpier la selle
 Et ceoir jus en mi la préee.
 Ceste jouste forment agréee *f. 96 b*
 A Phenonée, ce saciés.
 13030 La dist que cilz venra a chiés
 Dou tournoy, qui si biaux cops baille :
 A ce n'i ara point de faille.

- L**i dus Patriz a sa fenestre,
 13035 Ensi c'uns grans sires doit estre,
 Estoit et droit la s'apoiot.
 Le tournoy devant lui veoit,
 Qui estoit fors outre l'ensengne ;
 A ciés de fois moustre et ensengne
 Le mieulz tournians a sa fille.
 13040 Ossi en tiennent leur concille
 Les dames et les damoiselles.
 La fu pris dessous les aisselles
 Uns chevaliers de Normendie
 Dou preu Gratiien d'Ytalie,
 13045 Qui savoit moult bien tournier :
 Telement le va manier

- Que jus a la terre le porte.
 En Gratien n'est mies morte
 Proece. A ce qu'il se demainne,
 13050 Bien moustre qu'il a bonne alainne
 Et qu'il poet bien .i. fais porter ;
 Car, sans li en riens deporter,
 Tous jours en la presse se tient
 Et moult gentement se maintient,
 13055 Tant qu'il en a et grasce et vois.
 Dagherisès, a ceste fois,
 L'a encontré tout en venant,
 Et la eut par bon couvenant
 Belle bataille de ces deus.
 13060 Moult estoit vaillans li mains preus :
 Par force les fist on partir
 Et as espées departir ;
 Car si fort s'estoient ahert,
 Ensi que cil qui sont couvert
 13065 De proece et de grant vaillance,
 Que jamais de ceste ordenance
 Ne fuissent parti nullement
 Sans yaus grever trop malement,
 Se ne fuissent et .i. et aultre,
 13070 Qui portent espées sus fautre,
 Les departirent a plains cops.
 Ce jour n'est donnés nulz estos ;
 Mais tournient moult vaillamment,
 En maniant moult gentement
 13075 Les espées, ensi c'on doit,
 Pour ferir amont a leur droit
 Dessus les hyaumes d'acier :
 Ensi s'esbatent chevalier,
 Qui sont amoureux et joli.
 13080 Phenonée voit devant li
 Agamanor qui fait merveilles,
 Et dist : « Ces parures vermeilles

f. 96 c

« Passeront au jour d'ui la route. »
 La est mise s'entente toute
 13085 Au regarder parfaitement,
 Et le prise moult durement
 Plus que nul chevalier qui soit
 Sus le place et voit. On le doit
 Bien recommander pour ce jour,
 13090 Car onques ne fist nul sejour
 Qu'il ne fust toutdis tournians
 Entre les plus fors et plus grans.

TOUT ensi se continua
 13095 Cilz tournois, qui pas n'anoia
 As dames et as damoiselles.
 Maint chevalier fist on les selles
 Vuidier et cheoir entre piés.
 La en y eut de mehagniés,
 De batus et de fourmenés,
 13100 Des plus grans et des plus senés,
 Et estains par faute d'alaine.
 Ensi furent en celle painne
 La grignour partie dou jour.
 Quant ce vint, sus fin de l'estour,
 13105 Que li vespres fort approçoit,
 En la loge ou li dus estoit
 Et la duchoise avoech leur fille,
 Phenonée la tres gentille,
 On sonna le cor de retraitte.
 13110 Depuis n'i ot espée traitte,
 Ferut, ne batut, ne lanciet;
 Mais se sont retrait piet à piet
 Li chevalier des logeïs,
 Et adont se sont entremis

*f. 96 d*13083 Passeront, *B* Paseront.

- 13115 Li varlet qui les vienent querre.
Si en truevent pluseurs a terre
Mors, navrés et en petit point,
Mais la il ne les laissent point :
Les blechiés ont mis en litiere
13120 Et puis les reportent arriere
Dedens la cité pour garir,
Et les mors vont ilz enfouïr.
Ensi se debatent pour lors.
Que fist li preus Agamanors,
13125 Quant il vit que cescuns partoït ?
Encores sus le place estoit ;
Ilz se part tout secretement.
Au devant li vint prestement
Bertoulès, ses bons escuiers.
13130 Ensi as aultres chevaliers
Tout leur escuiers revenoient
Et leurs mestres en remenoient
Ou lieu dont il furent parti.
Agamanor en ce parti
13135 D'armes, si com vous ai conté,
A tant avalé et monté
Qu'il revint a son logeïs,
Qui fais estoit de foelleïs,
Car c'estoit ens au mois de jule.
13140 Li dus Patris sus une mule
Est montés, et sa femme atent
Et sa fille ossi au corps gent,
Les dames et les damoiselles.
Palefrois et moult bonnes selles,
13145 Si com la coustume estoit lors,
Ot on ordené pour leurs corps.
Si monterent sans detriier,
Et chevalier et escuier,
A plus de .cccc. chevaus.
13150 Sans menestrelz et sans hiraus

f. 97 a

- Est li dus rentrés en Tarbonne ;
 Adonques dou tout on ordonne
 Pour souper dedens le chastiel.
 Damoiselles et damoisiel
 13155 Se remettent tantost a point,
 En draps que il n'avoient point
 Vestit, quant au tournoy alerent.
 Les dames entre elles parlerent,
 Cui par avis pour le milleur
 13160 On tient qui en ara l'onneur
 De ce pris et de ce tournoy.
 Li plus s'acordent a l'otroy
 Du chevalier armé vermeil,
 Mais on y retient le conseil
 13165 Encores dou bon duch Patris.
 Ou chastiel fu li souper pris,
 Qui fu grans et bien estoffés.
 Or vous dirai, se vous volés,
 D'Agamanor quel cose il fist.
 13170 A Bertoulet son varlet dist :
 « Compains, trop volentiers iroie
 « Lassus ou chastiel, et veroie
 « Les festes que on y tenra.
 « Je te di : nulz ne m'y verra,
 13175 « Qui ja m'i doie reconnoistre. »
 Et cilz, qui li voloit accroistre
 Son pourpos et non pas brisier,
 Li va moult grandement prisier
 Et dist : « Sire, vous ferés bien,
 13180 « Mais je vous pri, sur toute rien,
 « C'as danses point ne vous prendés.
 « Se le faisiés, or m'entendés,
 « Vous y seriés reconneüs
 « Et par cel estat deceüs.
 13185 « Tenés vous toutdis en la presse. »
 Dist Agamanor : « Or te cesse,

f. 97 b

- « Et de moy n'aies plus de songne.
 « Je ferai moult bien la besongne
 « Espoir mieulz que je ne savoie
 13190 « Deviser, ne sens n'en aroie. »

- A** GAMANOR atant se part
 Et si s'en va de celle part,
 Viers la cité, la droite voie.
 Ses varlès .i. peu le convoie
 13195 Et puis si s'est retrais arriere,
 Car il avoit laissiet derriere
 Ses chevaus qu'il couvient garder.
 Agamanor, sans retarder,
 S'en est venu a la cité.
 13200 On ne lui a riens demandé
 Ou il va, car tout trueuve ouvert.
 On avoit ou chastiel couvert
 Pour souper, quant il y entra.
 Adont a l'un lés se bouta,
 13205 Tant que dames et damoiselles,
 Par ces tables bonnes et belles,
 Furent assises au souper.
 La les pooit bien regarder :
 Si fist il, saciés vraiment,
 13210 Tantost, sans nul delaiement.
 Quant on ot soupé, on lava.
 Agamanor adont s'en va
 O les dames en une cambre
 Qui estoit listellée d'ambre.
 13215 Toutdis se tenoit en le presse :
 Sitost c'on le presse, il represse ;
 Il en scet moult bien l'ordenance.
 La entent toute l'attemprance

f. 97 c

13211 lava, *B* leva.

- Dou pris donner ; comment on dist
 13220 Et sus lequel dou tout il gist.
 C'est li consaus et li acors
 Que, de tous chevaliers dehors
 Et qui tournoïet a le mieus,
 Point n'est nommés, si m'ayt Diex,
 13225 Fors que cilz as armes vermeilles ;
 Car pour le jour a fait merveilles.
 C'est cilz qui ne poet avoir blasme,
 Qui brise d'une blanche dame
 Ses armes, ensi c'on le crie.
 13230 Adont n'a pas talent qu'il die :
 « Vemeci, que demandés vous ? »
 Nennil ! mais lait toutes et tous
 Passer, et de la cambre issir
 Et en la sale revenir.
 13235 Fenonée le faucon porte,
 Et hiraut crient a vois forte :
 « Le pris au rouge chevalier,
 « On ne le puet miulz emploïier ;
 « Tournoïet a oultre mesure.
 13240 « C'est cilz qui, par bonne aventure,
 « A hui fait d'armes plus que nulz.
 « Il faut que li bons rois Artus
 « En soit temprement enfourmés.
 « Le pris ! Le pris ! Nommés ! Nommés !
 13245 « C'est voir le chevalier c'on prise,
 « Qui ses rouges parures brise
 « Seulement d'une dame blanche.
 « Il a hui passet ordenance
 « De tournoy, par son hardi corps.
 13250 « C'est li assens et li acors
 « Des dames et des damoiselles,
 « Des chevaliers et des pucelles,
 « Que li faucons li demorra ;
 « Mais, pour ce c'on ne le pora

- 13255 « Avoir, ne ossi on ne scet
 « S'il se tient es bois ou en pret,
 « Il sera portés temprement,
 « Dit est par bon attemprement,
 « En la court dou tres noble roy,
 13260 « Et la contera on l'arroi
 « Dou chevalier au quel li pris
 « Est de droit donnés et escrits. »

- QUANT on ot ensi demené
 Le pris, et venu et alé,
 13265 En la salle et ens ou chastiel,
 On remist a perce l'oisiel, *f. 98 a*
 Et puis pipent li menestrel.
 Si s'esjoissent en l'ostel
 Cil et celles qui ont deduit,
 13270 Et la ont le plus de la nuit
 Dansé signeur et dames toutes,
 Par compagnies et par routes,
 Ensi qu'il leur venoit a point.
 Et saciés qu'il n'ont cessé point
 13275 Toute la nuit de solas faire.
 Agamanor prent en l'afaïre
 De Phenonée grant plaisance :
 Il regarde sa contenance,
 Son joli corps et sa façon.
 13280 Si dist ensi, sans quisençon :
 « Par Dieu, dame, vous valés bien
 « C'on vous aime sur toute rien ;
 « Car plus belle de vous ne sçai.
 « Avis m'est que pour vous assai
 13285 « D'amours .i. dart et tel assaut.
 « Ne sçai si je pense trop haut,
 « Mais pour vostre amour vodrai estre
 « Bons chevaliers, pour mon corps mettre

- « En aventure d'estre occis,
 13290 « Et si en rent .v^c. mercis
 « Au dieu d'Amours, quant il me fait
 « Penser a vous, qui tres parfait
 « Cors et maintien avés sur toutes. »
 Adont se desrompent ces routes
 13295 Et commencent a caroler :
 La veïssiés moult bien aler,
 A ces caroles qui sont belles,
 Signeurs avoecques damoiselles.
 Agamanor, qui en la presse
 13300 Estoit, voit c'une dame presse *f. 98 b*
 Au canter, de bon sentement,
 .I. rondelet presentement,
 Qui fist les aultres resjoïr.
 Le rondelet porés oïr.

Rondel.

- 13305 **O**u que je soie, doulz amis,
 N'aiés ja doubte de moi.

Mes coers n'iert ja de vous partis,
 Ou que je soie, etc.

 13310 **J**e vous seray loyaus toutdis,
 Et vous jure par ma foy,
 Ou que je soie, etc.

- 13315 **T**ANTOST reprist uns chevaliers
 Au chanter, qui fu biaux parliers,
 Frices, gracieus et courtois,
 Et canta a jolie vois
 Qui fu moult volontiers oÿe.

- Et lors se taist la compagnie,
 Quant cilz commença a canter,
 Jusques a tant qu'il pot cesser.
- 13320 Tous en est au coer resjoïs
 Agamanor, quant a oÿs
 Parlers si doulz, et dist sus s'ame,
 En regardant dessus ma dame
 Phenonée, qui tant est belle :
- 13325 « Au coer me point une estincelle
 « D'Amours, qui point ne me faudra.
 « Las ! cilz maus souvent m'assaudra,
 « Et si n'en sarai ou avoir
 « Confort. Certes, je di tout voir,
- 13330 « Car, par le monde travaillant,
 « Je m'irai moult esmervillant,
 « En pensant a la belle et bonne,
 « Que j'arai veü a Tarbonne, *f. 98 c*
 « La fille au vaillant dus Patris.
- 13335 « Mes cuers y sera tous espris
 « Et point ne le porai veoir,
 « Ne ensieuant faire a savoir
 « Comment espris sui par s'amour.
 « Ensi sui entrés en labour,
- 13340 « Plus grande encor que je ne pense. »
 Li chevaliers, qui en presence
 Est et qui cante bien et biel
 .I. jolit et plaisant rondiel,
 D'Aghamanor ne se prent garde
- 13345 Que ce soit cilz qui de la darde
 D'Amours est ferus et atains,
 Et qui a esté souverains
 Des chevaliers de ce tournoy.
 S'il le seuist en tel arroy
- 13350 Et si priès de li, je me vant,
 Il l'euist fait passer avant.
 Mais Agamanor, sachiés bien,

Ne le volsist pour nulle rien,
 Ançois se cuevre et si se boute
 13355 Toutdis ou plus fort de le route,
 Et entent ce c'on dist et cante.
 Bien a retenu, je m'en vante,
 Le rondelet dou chevalier.
 Il ne fait pas a oublier,
 13360 Car il est jolis et courtois
 Et chantés d'une belle vois.

Rondel.

MON coer est lié plus c'onques mes.
 De ce, dame, je vous merci.

CAR c'est pour vous qu'il est en pais.
 13365 Mon coer est lié, etc.

COMMENT qu'il soit en dis, en fais,
 Vostre demeure, et pour ce di :
 Mon coer est lié, etc.

f. 98 d

LORS que li chevaliers ot dit,
 13370 L On se cessa .i. bien petit
 Et menestrel saillent avant,
 Qui reprennent ce que devant
 Avoient laisset, ce m'est vis.
 Adont sallent chevalier .vi.,
 13375 Qui les danses lors recommencent
 Et les presses en alant fendent :
 Ensi s'esbatent toute nuit.
 Agamanor en ce deduit
 S'est oubliés jusques au jour,
 13380 Car tant se plaist en ce sejour

- Que jamais n'en volsist partir.
 Sus le jour il ala issir
 De la presse, et se trest arriere ;
 Si a rapassé la barriere
 13385 De la presce qui fu ouverte.
 Ensi s'en vint a le couverte,
 Ens ou bois, a son logeïs.
 Bertoulès en fu resjoïs,
 Lors que il le vit revenu.
 13390 La ont grant parlement tenu
 De la feste et de l'esbanoi.
 Ce dist Agamanor : « Par foy,
 « Bertoulet, j'ai trop bien ouvré,
 13395 « Et si m'as bien servi a gré,
 « Quant tu t'accordas a la voie
 « Ou j'ai pris et solas et joie. »
 Et adonques il li raconte,
 De mot a mot, trestout le conte :
 Comment dedens la cambre il fu
 13400 Avoecques les dames, et u *f. 99 a*
 Li pris fu jugiés et donnés,
 Et puis en la sale apportés
 Des dames et des damoiselles,
 A trompes, et a canemelles
 13405 Et a toutes menestraudies :
 « Mais je voel que tu estudies
 « Sur ce que te dirai encor,
 « Car j'ai moult grant mestier desor
 « Que je soie bien consilliés,
 13410 « Car tout pres et apparilliés
 « M'est uns assaus qui me tenra
 « Tant que ceste queste durra. »
 — « Quelz est il ? » ce dist Bertoulès,
 — « Certes, compains, il est si fès
 13415 « C'uns drois amans le doit entendre.
 « J'ai veü la belle et la tendre,

- « La fille au noble duch Patris.
 « Mais ou coer m'est ses cors escrits,
 « Ses biaux maintiens, sa contenance,
 13420 « Et pris y ai si grant plaisance
 « Que j'en sui partis tous navrés. »
 Ce dist Bertoulz : « Sire, souffrés.
 « Grant temps a que j'ai oÿ dire
 « C'on ne poroit en .i. empire
 13425 « Point trouver plus belle de li.
 « Et quant votre oel sont la salli,
 « Vous en devés moult joieus estre ;
 « Car par ce en ferés vous nestre
 « Doubles proeces en vo corps.
 13430 « Or faites tant que li recors
 « De bien faire et de vasselage
 « Voist jusques a la belle et sage,
 « Pour quoi estes enamourés.
 « Si en serés plus honnourés ;
 13435 « Car riens ne vault en gentillece
 « Chevaliers, s'il n'a grant noblece. »
 Et Agamanor li respont
 Que toutes ses pensées sont
 A ce qu'il puist telz devenir
 13440 C'on le puist pour .i. preu tenir ;
 Telz fera, c'est cose certaine
 Ou il demorra en le painne.

f. 99 b

- E**^{NSI} se tient, a celle fois,
 13445 Aghamanor dedens le bois,
 Qui parolle a son escuier,
 Pour lui .i. peu esbanoier,
 Dou grant travel qu'il a empris,
 Qui si li est ou coer escrips
 Qu'il ne s'en partira jamais.
 13450 Et li solaz telz et si fais

- Que vous avés oÿ compter
 Est ou chastiel, c'on doit loer,
 Toute la nuit jusques au jour.
 N'i eurent arrest ne sejour
 13455 D'esbatre et de grant joie faire.
 Se de tout voloie retraire
 Trop longement y metteroie.
 Trois jours furent en celle joie,
 En .iii. nuis plainnes et entieres,
 13460 Dames et damoiselles chieres,
 Et ossi jone chevalier
 Qui ne voelent que festoier.
 Bien est certain que Phenonée,
 Qui fricement fu ordenée,
 13465 Une pensée si le point :
 De ce ne l'osteroit on point
 Et dist en son avision,
 Par bonne imagination,
 Que cilz qui le pris conquis a,
 13470 Et qui si tres bien se porta
 Au tournoy et si vaillanment,
 Est ses freres certainement.
 Trop bien li plect a sa samblance
 Li devis de la dame blanche,
 13475 Et dist que, pour l'amour de li,
 Elle en portera une ossi
 Et fera .i. droit chevalier
 Sans entremuer ne cangier,
 Ce dist, la devise a son frere,
 13480 Fors tant que cilz, c'est cose clere,
 Qui son chevalier se tenra,
 Sa blanche dame portera,
 .i. blanch faucon pour la brisure,
 Et otant bien pour la droiture
 12485 Dou pris que conquis a ses freres.
 Mais il fault toutdis que ses peres

f. 99 c

- Li consente tout ce a faire.
 Phenonée, sus cest affaire,
 S'en est a son pere venue
 13490 Et moult doucement le salue,
 Et li dus Patris, qui bien l'aime
 Et qui belle fille le clame,
 Voit tantost qu'elle voet prier.
 Se li a dit, sans detriier :
- 13495 « Que vous plaist il, ma belle fille ? »
 — « Certes, monsieur, je sui cille
 « Qui vous pric, de tres bon coer,
 « Que je puisse, ensi que la soer
 « De Melyador mon chier frere,
 13500 « Poursieuir de tant sa matere
 « Que de sa devise porter ;
 « En ce me vodrai deporter. »
- Adont respont li dus Patris,
 Qui en joie a ce parler pris :
- 13505 « Ma fille, et quele devise esce ?
 « Encor ne le cognois point je ;
 « Si le saroie volentiers. »
 Dist Phenonée : « Sire chiers,
 « Cilz chevaliers armés de rouge,
 13510 « Qui n'a mies fait le harouge
 « Au tournoy, mais moult le vaillant,
 « Le porte, selonch mon samblant.
 « Nulz ne m'en diroit le contraire.
 « Point ne l'ay veü ou viaire,
 13515 « Mais il est de la propre taille
 « Melyador de Cornuaille,
 « Dou grant, dou fait et de l'emprise.
 « Certes, monsieur, je le prise
 « Ensi c'on doit prisier son frere,
 13520 « Et pour tel je le considere
 « Et c'est ce qui le coer m'entame,
 « Car il porte une blanche dame

f. 99 d

- « Pour l'amour ma dame Hermondine. »
 Li dus, a ces mots, imagine
 13525 Les parlens de sa fille belle;
 Si prent en gré ceste nouvelle,
 Et dist : « Fille, a vo gré en soit.
 « Ne sai se tort avés u droit,
 « Mais ja ne le vous quier debate,
 13530 « Pour vo corps en tous biens esbatre. »

- ENSI se part a ceste fie
 Phenoné[e], toute esjoÿe,
 De son pere le duch Patris.
 Or a ceste devise pris,
 13535 La quele Agamanor si porte.
 Ses coers li semont et enhorte
 Que c'est ses freres vraiment :
 De ce ne voelt aucunement
 Issir, ne de ce bon pourpos.
 13540 Elle fist ordener tantos
 Une cambre apriès la devise :
 En .i. camp vermeil, quant g'i vise,
 A fait mettre une blanche dame.
 Encores a mis sus, par m'ame;
 13545 .I. chevalier jone et joli,
 Moul't corageus et moul't hardi.
 Par sen nom l'appella Lyone,
 Pour ce que elle le vit ydone
 En armes et en gentillece,
 13550 Et tailliet d'acquerre proece.
 Elle li dist : « Vous en irés,
 « Lyone, et de ci partirés,
 « Cercant par tout les aventures
 « Et porterés teles parures,
 13555 « De quoy j'ay la devise empris.
 « Dittes par tout, pour avoir pris,

f. 100 a

- « Que vous estes, sans avoir blasma,
 « Chevaliers a la blanche dame.
 « Et se vous venés ja en place,
 13560 « Ou vous puissiés veoir en face
 « Le chevalier a descouvert,
 « Au quel ceste devise sert,
 « Si l'examinés ci avant
 « Que vous sachiés son couvenant,
 13565 « Se c'est Melyador mes freres,
 « Et li recordés les materes
 « De mon fait, et par quel argu
 « Jou ay encargiet son escu. »
 Et Lyones respont : « Ma dame,
 13570 « Tout ce que me cargiés, par m'ame, *f. 100 b*
 « A mon pooir je le ferai
 « Ou en la place demorrai. »

- D** EPUIS ne demora granment
 Que Phenonée vraiment,
 13575 Pour acomplir son desirier,
 Fist armer le blanc chevalier,
 Monter et partir de Tarbonne.
 Ce puist ore estre a l'eure bonne
 Que messires Lyones part!
 13580 Il s'en chevauce celle part
 Ou li aultre chevalier vont
 Devers Northombrelande. Adont
 Moulst estoit gentement armés;
 Le premier jour qu'il est sevrés
 13585 De Tarbonne, saciés pour voir,
 Jousta il au chevalier noir,
 Et le porta moulst dur a terre
 Et le conquist de belle guerre,
 Tant que bien en ot cognissance
 13590 De puis la jone dame blanche;

Car li chevaliers se vint rendre
 A lui pour ses armes reprendre,
 Ne il ne se pooit armer
 Se Phenonée, c'est tout cler
 13595 Ne l'en donnoit grasce et congiet.
 Ensi a moult bien commenciet
 Li chevaliers a Phenonée,
 Quant en la seconde journée,
 Que par dedens la queste entra,
 13600 Le noir chevalier encontra;
 Il le mata et desconfi,
 Ce devons nous savoir de fi.

O^R recordons d'Agamanor,
 13605 Car mies n'avons nous dit encor *f. 100 c*
 Comment il issi dou biau bois,
 Le secont jour que li tournois
 Eut esté par devant Tarbonne.
 Il parti a heure de nonne
 Entre lui et son escuier,
 13610 Et peurent en ce jour puier
 Une montagne, moult tres roide
 Et qui est en temps d'ivier froide,
 Qui leur fist au monter grant painne.
 Au piet avoit une fontaine,
 13615 Ou il vinrent ce soir jesir,
 Ne il ne sceurent ou dormir
 Fors entre bruissis et genestres ;
 Ensi li varlès et li mestres.
 Passerent la nuit jusc'au jour.
 13620 Adont monterent sans sejour
 Et prisent .i. aultre chemin.
 Chevauciet ont tout ce matin
 En une lande grande et lée.
 Droitement sus une vallée

- 13625 Ont il trouvé .i. chevalier
 Que on appelloit Corbilier;
 Grandement faisoit le harouge.
 De blanc a .i. quartier de rouge
 S'armoit de targe et de parures;
 13630 Moul't bien fu en ses armeüres
 Aprestés et de bonne taille.
 Bertoulès a son mestre baille
 Sa lance, sitost qu'il le voit;
 Messires Corbiliers avoit
 13635 Ja pris la sienne, ce me samble.
 Tantos vodront jouter ensamble,
 Car il esporonnent tout doy
 Et s'en viennent par bon arroi *f. 100 d*
 Moul't fierement l'un contre l'autre,
 13640 En portant les lances sus fautre.
 Ferus se sont sus les escus,
 Sans metre detri ne refus,
 Des lances a bons fers trencans.
 Li chevaliers, qui estoit grans,
 13645 Biaus de fourme et de fier encontre,
 Agamanor si roit encontre
 Que sa lance brise en tronçons.
 Onques n'en perdi les arçons
 Agamanor, mes bien se tint;
 13650 Dessus le chevalier s'en vint,
 Et le feri par tel maniere
 Qu'il le porta jus par derriere.
 Si roit chei dessus la lance,
 Par dalés une pierre grande
 13655 Qu'il ne peut ravoit sen alainne.
 Demorés fust en celle painne
 .i. jour; mes Bertoulès vint la,
 Qui le chevalier appella
 Et li dist, illuech en gisant :
 13660 « Chevaliers, .i. cop moul't pesant

- « Avés vous donné a mon mestre.
 « Mais, dittes, comment vous poet estre ?
 « Estes vous navrés ne bleciés ? »
 Et cilz, qui estoit tous cangiés
 13665 Dou dur cop qu'il ot receü,
 Repondi lors qu'il l'a veü,
 Et dist : « Compains, il me va mal.
 « Voelliés moi rendre mon cheval ;
 « Si ferés courtoisie grande.
 13670 « Tout souef irai ceste lande
 « Tant que trouverai .i. manoir,
 « Et la vodrai jou remanoir *f. 101 a*
 « Jusc'a tant que garis serai. »
 Bertoulès dist : « Je le ferai
 13675 « Volentiers, par l'ame mon pere ! »
 Lors se part sus ceste matere
 Et chevauce apriès le cheval
 De Corbilier qui en .i. val
 Paissoit et estoit arrestés.
 13680 Bertoulès, com tous aprestés,
 Prent le cheval et le ramainne
 Et fait monter a moult grant painne
 Le chevalier qui bleciés fu ;
 Et puis se li rent son escu,
 13685 Et son hÿaume li deslace.
 Agamanor, qui se solace
 A regarder la contenance,
 Vient droit la, par bonne ordenance,
 Pour faire encor une escremie,
 13690 Mais ses escuiers li escrie
 Et dist : « Vous n'avés chi que faire.
 « Bien voi, c'est cose necessaire,
 « Ce chevalier faut reposer
 « Avant qu'il puist jamais jouter,
 13695 « Tout ce vous di jou pour certain. »
 Agamanor depuis la main

- N'i eüst mis, pour nul avoir.
 La ne vorrent plus remanoir,
 Mais sont rentré en une voie,
 13700 Qui devers .i. bois les avoie ;
 Et messires Corbiliers part
 Qui s'en va ossi, aultre part,
 Chiés soi ou en aultre maison
 Pour penser de sa garison.
 13705 Et Agamanor, ce saciés,
 Lors que de li fu eslongiés,
 Desirs et sentemens li vinrent,
 Qui en .i. tel pourpos le tinrent,
 Dou quel onques ne se parti,
 13710 Si ot .i. virelai joli,
 Fait et chanté par grant plaisance.
 Je vous en dirai l'ordenance.

f. 101 b

Virelay.

- J'AI en mon coer si fort enté,
 Dame, vostre tres grant biauté,
 13715 Qu'il m'en souvient, et jour et nuit,
 Et a bon droit, car tout mon bien
 Me vient de vous, sans faillir rien.
 C'est ma plaisance et mon deduit,
 C'est tout mon eur en verité.

- 13720 POUr ce ne poet en moi venir
 Anui, tristece ne tourment,
 Ne nulle riens de desplaisir,
 Dont je voel vivre liement.

- 13725 SI doit ce jour estre prisé,
 Que premiers a vous me donné.
 S'en lo Amours qui m'a conduit

Dou tout en tout au voloir mien.
 De ce, pour voir, eureus me tien,
 Car certes tout anui me fuit :
 13730 Ce me vient de vo grant bonté.
 J'ai en mon coer, etc.

OR vous voel je toutdis servir
 De parfaite foy, loyaument,
 Et ferai voir vostre plaisir
 13735 De tres bon coer entierement,

QUE je m'ai a ce ordonné
 Que jamais jour ne le leré ;
 Car bonne amour a ce me duit,
 Qui me lie d'un tel liien
 13740 Que vostres sui sans nul moïien :
 Si n'en sai fors que a vous gré.
 J'ai en mon coer, etc.

f. 101 c

ENSI chevauce Agamanor
 13745 Sus .i. cheval, .i. petit sor,
 — N'a point de hÿaume en la tieste —
 En desir de sieuir sa queste.
 De puis qu'il ot le chevalier
 Abatu, ce jour tout entier
 Et l'endemain il chevauca,
 13750 Que nulle cose il ne trouva
 Qui point face a ramentevoir.
 Au tierch jour, si com je l'espoir,
 Chevaucoit au dehors d'un bois,
 Et avoit laissiet les herbois,
 13755 Qui sus la lande les menoit.
 Agamanor regarde et voit
 Au dehors dou bois en .i. ombre,
 En .i. lieu ou pas ne fait sombre,
 .I. pavillon biel et joli.

- 13760 Adonques noient n'attendi,
 Mais la s'en vint et si s'arreste.
 Par devant, sans mettre ens sa teste,
 Regarde ens : si y voit des dames,
 Chevaliers, escuiers et fames.
- 13765 Dit li fu errant : « Descendés
 « Et une soupe en vin prendés
 « Chi dalés nous ; si ferés bien,
 « Car nous devons sur toute rien
 « Faire a vous boine compagnie,
- 13770 « En l'onneur de chevalerie
 « Et d'un chevalier gratieus,
 « Qui est vaillans, hardis et preus. »
 Et quant Agamanor entent *f. 101 d*
 C'on le prie, errant il descent
- 13775 Et se met ens ou pavillon :
 .I. lit voit illuech ou moilon
 Et .i. homme gisant dessus.
 Il ne s'est mies trais ensus,
 Mais demande : « Qui est cilz la
- 13780 « Qui gist? » Et adonques parla
 La damoiselle de Montrose
 Et dist : « Sire, c'est vraie cose.
 « Chi sont .iiii. chevalier frere,
 « Que j'enmainne, c'est cose clere,
- 13785 « Parler au noble roy Artu.
 « Li chevaliers au bleu escu,
 « Qui se brise dou soleil d'or,
 « Les a mis en ce point. Encor
 « Faut il que hommage me facent
- 13790 « Ou trop grandement se mesfacent ;
 « Mais pas ne sont entalenté
 « De faire nulle lasqueté,
 « Car il l'ont juré sus leur fois. »
 Lors li recorde a ceste fois
- 13795 Comment cils qui le soleil porte

Les desconfi devant sa porte,
 Et mist l'un en peril de mort.
 Agamanor de ce recort
 A grant joie certainement,
 13800 Et puis parole doucement
 Et dist : « Dame, il n'est mie doubte
 « Que cilz voir passera le route
 « De tous les chevaliers errans.
 « J'ay bien veüs ses couvenans
 13805 « Au tournoy et a la bataille.
 « Chevalier ne sçai qui le vaille. »

f. 102 a

DEPUIS n'ont parlé c'un petit.
 On estendi devant le lit
 Dou chevalier une touelle,
 13810 Et cilz qui dou disner se melle
 L'aporta; si ont la mengié
 Et beü ossi par congié
 Selonch l'usage qu'il avoient.
 Quant mengier ont, entre yaus bien voient
 13815 Que il les couvient departir.
 Agamanor ala issir
 Dou pavillon et congiet prent,
 Et la damoiselle, qui tent
 A tout honneur, errant li donne.
 13820 Ja estoit priès heure de nonne,
 Quant il monta sus son cheval.
 Errant sont entré en .I. val
 Bel et ombru, vert et joli.
 Agamanor avoit en li
 13825 Le sentement gay et plaisant.
 Si dist ensi en chevaucant
 A son escuier Bertoulet :
 « Compains, bonne amour me tramet
 « .I. souvenir qui voelt que face

- 13830 « Aucun biau motet sus la place,
 « Pour l'amour de la bien amée,
 « Qui est Phenonée clamée.
 « L'oserai jou dire ne faire? »
 Et Bertoulès, qui le viaire
- 13835 Par deviers son signeur retourne,
 Li respont que plus ne sejourne :
 « Sire, oïl voir, se vous faisiés
 « Le contraire, trop mal feriés,
 « Puis que la plaisance y avés,
- 13840 « Et que de certain vous savés
 « Ou bien le poés emploïier. »
 A ces mos se va avoïier
 Agamanor, sans plus d'attente,
 A faire une balade gente
- 13845 Selonch l'avis qu'il l'en promuet
 Et l'ardant desir qui le muet.
 Elle fu de bon sentement ;
 Vous l'orés tout presentement.

*f. 102 b***Balade.**

- 13850 **J**E me voel toutdis conforter
 Et prendre certes mon confort
 En ce que je senc enforser
 L'amour de jour en jour plus fort
 Viers vous, dame douce plaisant,
 Car je y prenc si grant plaisance
- 13855 Qu'il m'est avis, en droit samblant,
 Que je voie vostre samblance.

- E**T ensi me voel deporter,
 Car je n'ai voir aultre deport.
 S'en porrai plus aise porter
- 13860 L'anui que j'ai et que je port,

Et c'est drois, car en souvenant
 J'ai vostre douce souvenance,
 Qu'il m'est avis, en droit samblant,
 Que je voie vostre samblance.

- 13865 **L** ne me fault plus enhorter.
 La vostre bonté si m'amort
 De vous servir et acorder
 M'i voel, et j'en sui ja d'acort.
 C'est mon bien, mon avancement,
 13870 Et, en ce pensant, si m'avance,
 Qu'il m'est avis, en droit samblant,
 Que je voie vostre samblance.

- E**NSI de coer joieus et sade
 13875 **F**ist Agamanor la balade, *f. 102 c*
 Et la canta et recorda
 Plus d'une fois, car le coer a
 Gai, amoureux et envoisié.
 Moult grandement li a prisié
 Ses escuiers sur toutes riens
 13880 Et dist : « Sire, c'est uns grans biens
 « D'estre ensi jolis et joieus.
 « Point ne prise ces anoieus,
 « Qui ne font toutdis que muser.
 « Amours voelent bien d'el user,
 13885 « Canter, jouter et tournoier.
 « Trop bien affiert a chevalier
 « D'estre ou parti ou je vous voi,
 « Et ossi dire le vous doi
 « Puis que je sui de vo conseil ;
 13890 « Siques, sire, je vous conseil
 « Que toutdis tenés cel argu,
 « Par quoi devant le roy Artu
 « Viennent de vous bonnes nouvelles. »
 Agamanor tient a moult belles

- 13895 Et moult bonnes ycés reponses.
 Uns chevaliers, qui ot nom Conses,
 Jousta ce soir encontre li ;
 Mais Aghamanor l'abati,
 Et puis si s'en passa atant
 13900 Et chevauca toutdis avant,
 [En] approachans Northombrelande,
 Et la mainte aventure grande
 Y trouva en celle saison,
 Des queles ne puis par raison
 13905 Toutes parler ; si m'en tairai
 Jusc'a tant que g'i revenrai.

- N**ous lairons ci d'Agamanor
 A parler et dirons des or
 Dou chevalier de Cornuaille.
 13910 Ne sçai chevalier qui le vaille
 De sens, d'onneur et de proece
 Et de tres haute gentillece.
 Il chevauce plains et lairis.
 Souvent est voir en coer marris
 13915 De ce qu'il a perdu le jour
 D'avoir esté au grant estour
 Et au tournoi devant Tarbonne.
 Pas n'en tient a belle et a bonne
 La Fortune, mes trop perverse.
 13920 .I. grant temps chevauce et converse
 Ou pays de Northombrelande.
 .I. jour estoit en une lande
 Et avoit estet moult pensieus ;
 Si jetta contremont ses yeus
 13925 Et voit une grant chevaucie
 Venir vers yaus. A ceste fie,
 Son escuier errant appelle
 Et dist : « Lansonnet, vois tu celle

f. 102 d

- « Chevaucie vers nous venant.
 13930 « Je pense et croi par couvenant
 « Que c'est li faucons dou tournoy
 « Que on porte en la court dou roy
 « Artus, ensi c'on a d'usage.
 « Esconser te fault ton visage,
 13935 « Par quoi pas ravisés ne soies,
 « Et t'en va entre .ii. ces voies
 « Veoir de loing se je di voir. »
 Et cilz, qui scet bien le devoir
 De son mestre faire en tous cas,
 13940 S'en chevauce plus que le pas
 En costiant la compagnie,
 Qui bien estoit acompagnie. *f. 103 a*
 Bien fu veüs de chiaus et celles,
 Dames, chevaliers et pucelles,
 13945 Li quel font partir de leur route
 .I. escuier qui se desroute
 Pour venir parler a celi.
 Quant Lansonnès le vit vers li
 Approcier, si en fu joians ;
 13950 Tous quois se tient dessus les camps.
 Cilz est venus vers li en l'eure.
 Lansonnès se met au deseure
 Et le salue belement,
 Et li demande telement :
- 13955 « Amis, dont partés vous, sans faille ? »
 Et cilz respont : « De Cornuaille
 « Et de Tarbonne la cité.
 « Si en alons, pour verité,
 « En la court dou bon roy Artus. »
- 13960 — « Que ferés vous la ? Est il nulz,
 « Amis, qui le peüst sçavoir ? »
 Et cilz li respont : « Oil, voir.
 « Nous y portons .i. sor faucon. »
 — « Et pour quele condition ? »

- 13965 — « Pour ce c'uns chevaliers vaillans
 « I fu l'autrier si travillans,
 « Et si bien faisans la besongne
 « Au tournoy que je vous tesmongne.
 « Le pris en conquist et l'onour,
- 13970 « Mais il se parti de l'estour
 « Si quoiement et si en pais,
 « Quant il ot tout porté ce fais
 « Et tournoïet jusques au soir,
 « Qu'on ne peût onques savoir
- 13975 « Son nom, ne comment on l'appelle;
 « Mais, par bonne ordenance et belle, *f. 103 b*
 « Le pris li donna on pour soy
 « De la journée et dou tournoy.
 « Et pour ce que point n'enporta
- 13980 « Le faucon que vous veés la,
 « En la court du roy on le porte,
 « La ou toute honneur se deporté. »
 Lors dist Lansonnés : « Grans mercis
 « De ce que dit m'avés, amis.
- 13985 « Mais dittes moy encor .i. peu
 « De quoy cilz s'arme ? A Dieu le veu. »
 Dist li escuiers : « Vous l'orés,
 « Par quoy vous le raviserés,
 « Quant faire li verés merveilles.
- 13990 « D'unes armes toutes vermeilles
 « S'arme il, mais de tant il se brise,
 « En sa targe que moult je prise,
 « D'une dame trestoute blanche. »
 Dist Lansonnés : « Par la samblance
- 13995 « Que vous dittes, bien le cognois.
 « C'est uns chevaliers moult courtois,
 « Preu, hardi et bien travillant. »
 Lansonnés prist congiet a tant ;
 A son signeur revint arriere
- 14000 Qui l'attendoit sus la bruiere,

- Au quel il recorda sans doubte
 L'aventure priès que trestoute
 De l'escuier et dou faucon.
 Melyador de l'esperon
 14005 Quoit, et se ferì ou bois,
 En chantant hault, a clere vois,
 .I. rondelet bel et joli,
 Qu'il ot fait ou non de celi
 Qui sejourne dedens Escoce.
 14010 Ou rondiel n'a nulle reproce *f. 103 c*
 Qu'il ne soit bien fait, ce me samble,
 Chant et dit ordené ensamble.
 Si com il fu je le dirai,
 Ne ja ne vous en mentirai.

Rondel.

- 14015 **J**E pri a Dieu c'a tres grant joie,
 Je vous puisse briefment revoir,
 Ma douce amie, ma chiere dame.

- C**AR par ma foy, ou que je soie,
 C'est mon desir et main et soir.
 14020 Je pri a Dieu, etc.

CE doulz espoir me met en voie
 D'avoir joie plus c'onques voir.
 Se dirai de bon coer, par m'ame :
 Je pri a Dieu, etc.

- 14025 **M**ELYADOR ensi s'esbat,
 Qui cevauce sus cel estat,
 Que volentiers enconteroit
 Chevalier a qui il poroit

- Faire d'armes aucune emprise.
 14030 De ce pourpos trop mieulx le prise
 S'il se desire a avancier.
 .I. jour trouva .i. chevalier,
 Qui s'armoit de blanch et de noir,
 Sans aultre differense avoir ;
 14035 Le hÿaume avoit en la tieste.
 Il estoit chevaliers de queste
 Des marces de Northombrelande
 Et, se son nom on me demande,
 Il estoit appelés Gerpins.
 14040 A Florée estoit drois cousins,
 La damoiselle de Montgrîès.
 Quant il s'avisierent de près
 Entre li et Melyador,
 Cescuns point le bon cheval sor
 14045 Et abaisse erranment son glave.
 Melyador, qui ne s'emblave
 De nulle riens fors de jouter,
 Va le chevalier enconter
 Si fierement a plainne lance,
 14050 Que jus de son cheval le lance
 Et moult le bleça au cheoir.
 Lansonnés vint cesti veoir
 Qui illuec gisoit entre piés ;
 Se li dist : « Chevaliers, oiés.
 14055 « Estes vous ens el corps navrés ?
 « Veci vostre cheval ; montés,
 « Car mon mestre si vous attent. »
 Et li chevaliers matement
 Respondi et dist : « Biaux compains.
 14060 « Je sui par roit jouter attains
 « A meschief et trop fort blechiés.
 « Je vous pri que chi me laissiés
 « Reposer et jesir a terre ;
 « Car assés tos me venra querre

f. 103 d

- 14065 « Mes varlès, il n'est mies doubte.
 « Il perdi hui matin le route
 « De mon cheval pour aultres gens.
 « Dittes vo signeur, qui est gens
 « Et moult prisiés de renommée,
 14070 « Que je sui cousins a Florée,
 « Ceste qui de Montgriès est dame,
 « Et qu'il ne poet avoir nul blasme
 « De moy laissier en ce parti.
 « Et quant l'autre fois il parti
 14075 « Dou chastiel que laiens estoie,
 « Et le vi, se Diex me doinst joie,
 « Comment il desconfi Camel,
 « En tous estas le cognois tel *f. 104 a*
 « Que on doit chevalier cognoistre;
 14080 « Mais je seul, pour mon pris accroistre,
 « Ai hui encontre lui jousté
 « Et, s'il me couste ou a cousté,
 « Je ne m'en prise mies mains.
 « Et quant de ce cop serai sains,
 14085 « Se je l'encontre une aultre fois,
 « Trop envis me tenroie quois
 « Que je ne m'esprouvasse a li. »
 Et quant Lansonnès entendi
 Le chevalier ensi parler,
 14090 Si s'en va errant retourner
 Viers son signeur, et se li conte
 Ce dont oÿ avés le conte.

14095 **O**R vint Melyador tantos
 Au chevalier, tous les galos,
 Qui la gisoit dessus l'erbier.
 Lors descendi de son coursier
 Et puis doucement l'araisonne :
 « Sire », dist il, « se Dex me donne

- « Ne envoie bonne aventure,
 14100 « Trop me desplaist la bleceüre
 « Dont vous estes attains, ce dittes ;
 « Et me seroit uns grans merites
 « Se pardonner le me voliés.
 « Ne sçai pour quoi vous vous metiés
 14105 « Sitost au devant de ma lance,
 « Quant vous aviés la cognissance
 « De moy qui riens el ne desire
 « Fors que je puisse desconfire
 « Chevaliers et par terre abatre.
 14110 « En tout ce me puis jou esbatre
 « Et, pour telz aventures querre,
 « Chevauce jou parmi la terre. » *f. 104 b*
 — « Sire », ce li respont Gerpins,
 14115 « Je sçai moult bien que li chemins,
 « En ceste terre droit ci marce,
 « Et pour ce que je sui a faire
 « Et que j'avoie oÿ retraire
 « Que, par dedens Northombrelande,
 14120 « Mainte aventure belle et grande
 « Y sont puis .ii. ans avenues,
 « Entre les grans et les menues,
 « J'en voloie ma part avoir ;
 « Or en avés fait vo devoir.
 14125 « Vous partirés. Je garirai
 « Au plus trestos que je porai,
 « Car jou irai chiés ma cousine,
 « Qui sera grandement encline
 « Au penser de moy et remettre
 14130 « En bon point, ce vous puis prommettre,
 « Pour moy armer, il n'est point doute.
 « Sire, vous sieurés une route
 « D'un grant froais que vous verés,
 « Et je croi que vous trouverés

- 14135 « Temprement aventures grandes,
 « Car la se tiennent sus les landes
 « Li cousin monsigneur Camel,
 « Qui ne desirent voir riens el
 « Qu'il vous puissent prendre et occire.
- 14140 « Tout ce leur ay jou oÿ dire,
 « Promettre et jurer, pour certain,
 « Et se vous volés a le main
 « Senestre tourner vo chemin,
 « Vous ne trouverés ja cousin
- 14145 « Qui a ce Camel apertiegne. »
 Dist Melyador : « Or en aviegne *f. 104 c*
 « Tout ce qui en poet avenir,
 « Je n'en pense ja a issir
 « De mon chemin pour leurs manaces.
- 14150 « Trouvés me sui en pluseurs places,
 « Dont je sui partis, Dieu merci!
 « Encor espoire jou ensi
 « Que j'en partirai sans dangier ;
 « Ja n'en vodrai chemin cangier,
- 14155 « Viegne ce qu'il poet avenir !
 « Mais il vous voelle souvenir
 « De moy, quant vous verés Florée ;
 « Comment, de coer et de pensée,
 « Dou tout a li me recommans,
- 14160 « Et se li dittes telz rommans
 « Qu'encor volentiers le veroie
 « Une fois, se Dix me doinst joie. »
 — « Sire », respont le chevaliers,
 « Tout ce li dirai volentiers. »
- 14165 A ces mos Melyador prent
 Congiet, et Gerpins se li tent
 La droite main au departir.
 Melyador, sans alentir,
 Monta et se parti de la,
- 14170 Et dedens le grant bois entra

- Que on dist de Northombrelande.
 C'est bien raisons c'on me demande
 De monsieur Gerpin qu'il fist.
 Assés tost au chemin se mist,
 14175 Car ses varlès le vint requerre,
 Qui le trouva gisant a terre
 Et blecié a ce qu'il moustroït.
 De li ouvra si bien a droit
 C'a painnes le fist remonter.
 14180 Dis liewes avoit a aler; *f. 104 d*
 Il y vinrent tout plain le pas.
 Moult fu messires Gerpins mas,
 Au soir, quant il vint a Montgriès.
 Florée le tasta de priès,
 14185 Pour mieulz sentir sa bleceüre,
 Et cilz li conta l'aventure
 Dou chevalier au soleil d'or.
 Riens n'en failli de chief en cor
 Qu'il ne li ait dit et conté,
 14190 Et la belle l'a escouté
 Moult volentiers, il n'est pas doubte.
 De puis mist son entente toute
 A medeciner son cousin,
 C'on disoit monsieur Gerpin.
 14195 Tant en pensa qu'il fu garis,
 Et ossi fu Pheugins li Gris,
 Qui gisoit laiens ou chastiel,
 Que ses freres, par bon chembiel,
 Ignoramment navré avoit,
 14200 Cilz qui Savare se nommoit,
 Qui moult estoit bons chevaliers ¹.
 Florée, qui moult volentiers,
 Aidoit tous chevaliers errans,

1. Froissart intervertit ici les rôles qu'il avait précédemment assignés à Feugin et à Savare.

14205 Fu dou bien penser si engrans,
 Que dou tout revint en bon point,
 Et quant cilz cui proece point
 Se senti en estat d'armer,
 Ses armes ala demander ;
 On li bailla incontinent.

14210 Adont s'arma moult frichement
 Et monta dessus son cheval.
 Au partir, par especial,
 Prisent congiet par bon arroi
 A la damoiselle tout doy

14215 Messire Savare et Pheugins,
 Et entrerent en .ii. chemins
 Si com aultre fois fait avoient.
 Je croi assés bien qu'il savoient
 Comment il se doient deduire.

14220 De ce ne les fault introduire,
 Car il sont chevalier moult preu.
 Des .ii. freres lairons un peu
 Et parlerons d'aultre matere,
 De Florée qui a son pere

14225 A dit qu'elle s'en voelt aler
 En Escoce, pour viseter
 Et veoir sa belle cousine ;
 Car il a ja trop lonch termine
 Que elle n'en oÿ nouvelles.

14230 Messires Los jamais rebelles
 N'eust esté a ce pourpos,
 Mais li acorda ossi tos
 Que Florée en parla a li,
 Dont elle ot le coer moult joli.

14235 **L**A damoiselle adont s'ordonne
 Et ses livrées errant donne
 A celles qui o li iront

f. 105 a

- Et qui de Montgriès partiront.
 Quant prestes furent, si monterent
 14240 Et en bon arroi cheminerent
 Deviers le royaume d'Escoce ;
 Florée grandement l'approche.
 Bien est voirs que, sus son chemin,
 Elle trouva par .i. matin
 14245 La damoiselle de Montrose
 Qui revenoit, c'est vraie cose,
 De Carlyon, et s'en raloit
 Ou pays dont partie estoit.
 Si se fisent en ces istances
 14250 Entre elles grans recognissances
 Et furent .i. disner ensamble,
 Et la parlerent, ce me samble,
 Des proeces Melyador ;
 Comment il se portoit encor
 14255 Et dou grant tournoy de Tarbonne.
 Cascune d'elles l'onneur donne
 De pris, d'armes et de proece,
 De vaillance et de gentillece
 Au dit chevalier bleu armé.
 14260 Durement l'ont la renommé
 Entre elles les .ii. damoiselles.
 Florée dist que ces nouvelles
 Portera elle a Hermondine.
 Jusques apriès l'eure c'on disne
 14265 Furent toutdis en ce pourpos ;
 Puis prisent congiet a briés mos,
 Et tint cascune son chemin.
 Florence, dedens brief termin,
 S'en retourna a son chastiel
 14270 Et Florée, en tres grant reviel,
 S'en chevauca vers Montsegur.
 De ce me fai je tout segur
 Que moult bien y trouva le voie ;

f. 105 b

Car elle a bien qui le convoie
 14275 Et qui y scevent le chemin,
 Car esté y ont maint matin
 — Ce sont varlet et messagier —
 Qui ne sont mies en dangier
 De toutes adreces trouver :
 14280 Ce puis legierement prouver.

TANT exploita la damoiselle,
 Avoech sa compagnie belle, *f. 105 c*
 Que elle vint a Abredane
 Et, dalés .i. grant pont de frasne,
 14285 Chiés .i. hoste se herbega.
 Seulement la nuit y targa
 Et puis monta au matinet.
 Si escuier et si varlet,
 Et ses pucelles au corps fin,
 14290 Se misent o soy au chemin
 Et ont cevauciet sans sejour.
 Ja estoit bien nonne de jour,
 Quant il vinrent a Montsegur.
 La garde estoit dessus le mur
 14295 Dou chastiel qui fait a prisier ;
 Si ala erramment noncier
 A l'ostel la venue d'elles.
 Lors vinrent varlet et pucelles
 A la porte, sans plus attendre,
 14300 Et, quant on peut de voir entendre
 Que la dehors estoit Florée,
 Tantost fu la porte avalée.
 Si entrerent en grant revel
 Florée et ses gens ou chastel.
 14305 Remoustré fu a Hermondine
 Comment venue est sa cousine,
 La damoiselle de Montgriès,



- Et celle, qui le voelt de priès
 Conjoïr, est vers li venue;
- 14310 Si le recueille et le salue
 Moult doucement en encontrant,
 Et sachiés qu'en la cambre entrant
 Font des honneurs moult grant fuison.
 Hermondine a mis a raison
- 14315 Florée, et premiers li demande :
 « Que fait on en Northombrelande, *f. 105 d*
 « Belle cousine, dittes moy ? »
 Et Florée respont : « Par foy,
 « Chiere cousine, moult tres bien.
- 14320 « Si me loe sur toute rien
 « Dou chevalier au soleil d'or.
 « En avés vous oÿ encor
 « Nulles nouvelles, ma cousine ? »
 — « Mes, Dieu, non ! » respont Hermondine.
- 14325 « Quelz nouvelles en doi je oïr ? »
 — « Cousine, pour vous resjoïr ;
 « Car messires Camelz est mors,
 « Qui estoit si grans et si fors
 « Qu'il ne doubtoit nul chevalier.
- 14330 « Mais trouvé a, au darrenier,
 « Qui l'a desconfi par bataille,
 « Uns chevaliers de mendre taille
 « Qu'il ne fust, mais il est si gens
 « Et si amés de toutes gens,
- 14335 « Que par tout est il renommés. »
 — « Ma cousine, or le me nommés.
 — « Certes, cousine, ne le sçai
 « Nommer, ne onques en l'assai
 « Ne m'en mis. Si fu il .i. mois
- 14340 « O moy en mon chastiel tous quois,
 « Car Camelz le navra sans faille
 « Ou propre jour de leur bataille.
 « Mais chilz dont je parolle chi

- « Moult vaillamment le desconfi.
 14345 « Mors est Camelz, il n'est pas doubte.
 « Pour sa mort sui je voir trestoute
 « Resjoïe et cil de ma terre,
 « Car a tort nous fist jadis guerre
 « Et porta virgongne et damage.
 14350 « N'estoit il plains de grant outrage, *f. 106 a*
 « D'orguel et de presumption,
 « Quant mis avoit s'entention
 « A vous amer et vous voloït
 « Avoir, fust a tort ou a droit,
 14355 « Si com par maniere de force? »
 Et quant la fille au roy d'Escoce
 Hermondine, qui moult fu piue,
 Ot ce, si fu .i. peu pensieue,
 Tant que Florée s'en prent garde,
 14360 Et voit quant elle le regarde
 C'un petit a mué coulour.
 Si l'araisonne en nom d'amour,
 Et dist : « Cousine, je vous voi
 « Penser; s'ai merveilles pour quoi.
 14365 « M'en vodriés vous la raison rendre? »
 Et Hermondine, sans attendre,
 Li respont : « Oil, volentiers.
 « Il m'est vis que cilz chevaliers
 « Qui mors est, c'est ou nom de moy.
 14370 « C'est une raison ou je doï
 « Bien penser, qui sui une femme;
 « Car, en conscience et en ame,
 « Je m'en tieng grandement cargie
 « Et si plaing la chevalerie
 14375 « De ce Camel, qui fu si grande. »
 Dist Florée : « Je vous demande,
 « Cousine, dont se le plaindés,
 « Quant vous savés qu'il estoit telz
 « Qu'il vous voloït par force avoir,

- 14380 « Et eüst vostre oncle occis voir,
 « Mon pere, et tolut ma contrée,
 « Et plainnement deshiredée
 « Par son orguel et son oultrage,
 « Se je n'i eüsse avantage *f. 106 b*
- 14385 « Consideré sur son pourpos.
 « Certes, cousine, il fu moult os,
 « Oultrageus et fist grant folie,
 « Quant onques en jour de sa vie
 « Pensa a vous par nulle voie.
- 14390 « Car, bien sçai et si le savoie,
 « Que pas n'estoit cose pareille
 « De vous a li, et m'esmerveille
 « Comment tant vous en poés dire;
 « Mais conscience vous y tire.
- 14395 « Ceste escusance avés pour vous,
 « Car je pense que vos coers doulz
 « A li amer ne pensa onques. »
 Hermondine se taist adonques,
 Et tout a par li s'esbanoie
- 14400 A ce que l'anelet manoie,
 Que Melyador li donna;
 En son doÿ .iii. tours le tourna,
 Car au veoir prenoit plaisance.
 Quant Florée en vit l'ordenance,
- 14405 L'anelet reconeult tantos,
 Car elle l'eut a ce pourpos
 Fait forgier pour Melyador.
 Li anelès estoit tous d'or
 Et ouvrés de bonne maniere.
- 14410 Pas n'en osta a la premiere
 Fois, n'a la seconde, ses yeulz;
 Moult y pensa, si m'aÿt Diex,
 Comment il pooit la venir.
 Hermondine, sans li tenir
- 14415 En pais, tournioit l'anelet,

- Et voit que sa cousine met
 Grant entente au regarder sus;
 Adont ne le manoie plus. *f. 106 c*
 Et Florée pas ne le let,
 14420 Mais demande, de l'anelet,
 Qui li donna et dont li vint.
 « Pour quoi? » dist celle qui le tint
 Encores par dedens son doy.
 « Uns merceniers, en bonne foy,
 14425 « Qui l'autre jour passoit par ci,
 « Le me donna et me vendi
 « Des jeuelès qui ceens sont. »
 Et Florée le prent adont
 Par le main, et dist : « Ma cousine,
 14430 « Cest anelet, se Diex m'estrine,
 « Fis je faire, ouvrer et forgier,
 « Et le donnai au chevalier,
 « Quant il parti de mon hostel,
 « Qui occist monsigneur Camel
 14435 « Par sa grande chevalerie.
 « Et pour ce je merancolie
 « Sus cel aniel, j'ai bien raison,
 « Car il n'a pas longe saison
 « Que cilz se parti de Montgriès. »
 14440 Lors le regarda de plus priès
 Et dist : « C'est il, pas n'en fai doubte. »
 Et Hermondine, qui est toute
 Esmervillie dou parler,
 De son doy lait l'aniel aler
 14445 Et a sa cousine le baille.
 Quant Florée le tint sans faille,
 Elle demanda a Hermondine :
 « Or me dittes, chiere cousine,
 « Veïstes vous onques dedens? »
 14450 Et celle respont, par grant sens :
 « Certes, nennil. Pour quoi ce dittes? »

- « Pour ce qu'il y sont ens escriptes *f. 106 d*
 « Lettres, les queles je fis faire
 « Pour mieulz recommander l'afaire
 14455 « Dou chevalier cui le donnai.
 « Tous telz qu'il est, je l'ordonnai
 « Et vous en verés la maniere. »
 Lors le prent sus une carniere,
 Qui estoit justement saudée;
 14460 La verge est en .ii. pars alée.
 Hermondine s'en esmerveille,
 Qui voit en cascune pareilles
 Lettres d'azur, faites petites.
 Ce li dist : « Florée, or me dittes,
 14465 « Cousine, quel cose y a ci. »
 Hermondine, qui s'esjoÿ
 De l'aniel et pour la nouvelle
 Façon qui li sambla moult belle,
 Les .ii. pars de l'anelet prist;
 14470 Tout clerement y voit escrit :
 CILZ SUI QUI LE SOLEIL D'OR PORTE,
 PAR QUI OULTRECUIDANCE EST MORTE.
 Hermondine, pour li esbatre,
 Le lisi des fois jusc'a .iiii.,
 14475 Et puis dist : « Or le recloés,
 « Ma cousine, et le renoés
 « Tout ensi qu'il estoit devant. »
 Et Florée le prent errant,
 Qui le remet a son devoir,
 14480 Et Hermondine, pour savoir
 Dou dit aniel mieulz la maniere,
 Tourne et retourne le ca[r]niere,
 Et si fort sen entente y met
 Que clore et ouvrir l'anelet
 14485 Scet ossi bien que fait Florée,
 La quele cose moult li agrée.

CESTE cose ensi demora.

- Hermondine en grant gré pris a
 La venue de sa cousine.
- 14490 Elle mengüe, et soupe et disne
 Tous les jours en sa compagnie.
 Elle est moult bien acompagnie,
 Car c'est sa cousine germaine
 Et une damoiselle plainne
- 14495 De toute honneur, au dire voir.
 Et sachiés que bien son devoir
 Fait Florée, sans retarder,
 De nuit et jour recommander
 Le chevalier au soleil d'or.
- 14500 Bien dit qu'elle n'a point encor
 Oÿ parler, comment qu'il aillé,
 Qui le ressemble ne le vaille
 De proece et de grant renom;
 Ne scet comment il a a nom,
- 14505 Mais c'est ciiz qui, par bon arroy,
 Eut le pris dou tres grant tournoy
 Qui fut fait par devant la Garde;
 Et dist bien, quant elle regarde
 A ce qu'elle en a oÿ dire,
- 14510 Que sa pensée toute tire
 Qu'il passera route des preus:
 « Il est frices et amoureux
 « Et sont en li, au voir entendre,
 « Toutes les vertus c'on poet prendre
- 14515 « Ne conter au chevalier jone.
 « Cousine, je le voi ydone
 « Droitement d'avenir a vous;
 « Et s'est ci a dire entre nous,
 « Avoech les nobles meurs qu'il a,
- 14520 « Je croi que haus homs l'engenra. *f. 107 b*
 « Quant je vins ci, c'est vraie cose,

- « Nostre cōsine de Montrose
 « Trouvai je dessus mon chemin ;
 « Mais elle me tint a le fin
 14525 « Que pour parler dou chevalier,
 « Et tout voir dou jour .i. quartier,
 « Il li fist .i. trop grant service.
 « Comment qu'elle soit noble et rice,
 « Elle ne pooit recouvrer
 14530 « De chevalier pour resister
 « Encontre .iiii. chevaliers,
 « Tous freres, orgilleus et fiers,
 « Qui deshireter le voloient,
 « Et qui si de priès li aloient
 14535 « Qu'il li occioient ses gens.
 « Mais cilz chevaliers frans et gens
 « Le delivra de ceste guerre,
 « Et mist tout en segur sa terre ;
 « Car tous les conquist par bataille,
 14540 « Et se leur fist jurer, sans faille,
 « C'a tous jours mes le serviroient
 « Et qu'en la court dou roy iroient
 « Recognoistre et donner service :
 « Ensi fist une povre, rice
 14545 « D'onneur, de pais et d'iretage,
 « Par son grant et preu vasselage.
 « Pluiseurs grant fais de haute emprise,
 « Puis l'ordenance qui fu prise,
 « A ilz fait tous seulz par son corps
 14550 « Et des queles li vrais recors
 « Est mieus sceü, en bonne foy,
 « A Carlÿon devers le roy,
 « Qu'il ne soient en aultre part.
 « Ma cousine, se Diex me gard,
 14555 « Il vault trop miex que je ne die
 « De tres bonne chevalerie. »

- HERMONDINE entent la parolle
 De sa cousine qui parolle,
 En loant le bleu chevalier.
- 14560 Se ne l'en a mies mains chier,
 Car ses parlers trop bien saveure;
 En parlant toute s'enamoure.
 Unes fois dist, par grant solas :
- 14565 « Cousine, je ne le voel pas
 « Trop prisier ne blasmer ossi,
 « Car onques jour je ne le vi :
 « Bien me tieng a ce que vous dittes.
 « Ce li seroit uns grans merites
 « Se l'avoie ossi bien veü,
- 14570 « Et tout a loisir pourveü,
 « Que je vi monsieur Camel
 « A Montgriès, dedens vostre hostel.
 « Il me sambla biaux chevaliers;
 « Voirement estoit il moult fiers,
- 14575 « Et si sçai bien par nesun fuer
 « Que onques ne vous fist en coer.
 « Poroit il aucunement estre
 « Que nous sceuissiens faire nestre
 « Aucune cose de nouviel,
- 14580 « A tele fin qu'en ce chastiel
 « Nous le veissiens a loisir ;
 « J'en ai assés bien le desir,
 « Voires, se bien li consilliés.
 « Mais point n'est si appareilliés
- 14585 « Qu'il chevauce en celle contrée.
 « Ossi, d'aultre part, je m'effrée
 « Comment il vendroit jusq'a ci.
 « Il vault miulz qu'il demeure ensi *f. 107 d*
 « Que j'entreprende riens, par m'ame,

14561 Car ses parlers, *B* Car ces parlers.

- 14590 « Dont je puisse recevoir blasme. »
 Dist Florée : « Vous dittes bien ;
 « Mais trouvé y ai un moiien,
 « Par quoi au mains vous le verés
 « Tournoier et l'aprenderés
 14595 « A cognoistre en ses armeüres.
 « Toutdis keurt en bleues parures,
 « Et se brise d'un soleil d'or. »
 Et celle, qui en voet encor
 Bien parler, respont par grant joie :
 14600 « Cousine, or m'en montrés la voie,
 « Car vos sens nous sera mestiers. »
 Et celle respont : « Volentiers. »

- T**ANTOST Florée s'avisa
 A parler de tel avis c'a,
 14605 Et dist : « Se vous volés, cousine,
 « Li bleus chevaliers, qui chemine
 « Et travelle pour vostre amour,
 « Sera chi devant en brief jour.
 « Vous ferés noncier .i. tournoy :
 14610 « Le terme y meterés par quoy
 « Tout chevalier qui en bien sentent
 « Et qui celle marce frequentent,
 « Y venront, il n'est mies doute.
 « Li bleus chevalier en le route
 14615 « Se mettera, comment qu'il aille ;
 « Trop envis y feroit il faille.
 « Adont le verés tournoier :
 « Vous vous porés esbanoier
 « A ce que vous li verés faire.
 14620 « Que dittes vous sus ceste affaire ?
 « Ai je bien dit ? » — « Oil, par m'ame, »

- Ce respondi la jone dame, *f. 108 a*
 La fille au roy Hermont d'Escoce ;
 « Je n'i voi nulle doubtte, fors ce
 14625 « Que monsieur ne le descorde. »
 Dist Florée qui le recorde
 Comment elle dira au roy
 Pour impetrer le dit tournoy :
 « Cousine, vous dirés ensi,
 14630 « Quant vostres peres vendra chi :
 « C'on vous tient trop en une mue,
 « Et c'on ne s'esbat ne ne jue
 « Devant vous, dont trop vous anoie.
 « Adont le meterés en voie
 14635 « D'avoir grasce, quele que soit.
 « Si le porés, et de vo droit,
 « Prier que .i. tournoy aiiés ;
 « Et en parlant li avoiés,
 « Afin que mieulz y prende garde,
 14640 « Comment la dame de la Garde
 « En a eü moult bien sa part.
 « Secondement, a l'autre part,
 « La fille du duch de Cornuaille,
 « Se li remousterés sans faille,
 14645 « En a eü .i., puis brief terme.
 « Ma cousine, je vous afferme
 « Que se bien tenés ce pourpos,
 « Il le vous accordera tos ;
 « Puis arés l'avis dou sourplus. »
 14650 Dist Hermondine : « Certes, nuls
 « Ne se saroit ensonnier
 « De moy telement consillier,
 « Ne par si tres bonne maniere
 « Que vous faites, cousine chiere,
 14655 « Et je le ferai par tel guise
 « Dont bailliet m'avés la devise. » *f. 108 b*

- D** EPUIS ne demora granment
 Que li rois Hermons vraiment
 Vint veoir sa fille Hermondine
 14660 Et Florée ossi, sa cousine,
 Qu'il conjoÿ moult volentiers.
 La fu, par .iiii. jours entiers,
 En deduit et en esbanoi,
 On n'i parla onques d'anoi,
 14665 Fors que de joie et de reviel.
 Hermondine au corps frice et biel,
 Quant elle vit que heure fu,
 Elle s'en vint vers son pere u
 Il estoit en tres grant solas,
 14670 Li quelz rois ne fu mies las
 De sa fille biel recueillir.
 Elle se va agenillier
 Devant li, car li rois seoit.
 Li rois l'embrace, qui le voit,
 14675 Par le brach et li dist : « Ma fille. »
 Et celle, qui fu tres gentille,
 Sans lever se tint toute ferme
 Et parolle par moult biau terme,
 Disant : « Monsigneur, voelliés moy
 14680 « Acorder que j'aie .i. tournoy
 « D'aucuns chevaliers qui venront
 « Et qui ci se recueilleront,
 « Qui se tiennent dessus la lande,
 « Entre Escoce et Northombrelande.
 14685 « Plus ne le ferai lonc savoir.
 « Ossi bien en puis .i. avoir
 « Que la fille de Cornuaille
 « Et ma cosine ossi, sans faille,
 « La damoiselle de la Garde.
 14690 « Tout ensi ychi on me garde
 « C'on fait .i. oiselet en mue,

- « Ne on ne s'esbat ne ne jue
 « Devant moy; ne point n'ay de joie!
 « Ne pensés vous pas qu'il m'anoie
 14695 « Chi toute seule, entre mes gens?
 « Certes, oïl! car je m'en sens
 « Plus pesans et plus rude assés.
 « Il y a ja .ii. ans passés
 « Que je n'ai veü chevalier
 14700 « Jewer, jouter ne tournoier,
 « Qui tout travellent pour m'amour :
 « En ce me portent grant honneur.
 « Siques, monsieur, je vous pri
 « Que j'ou aie .i. tournoi droit ci,
 14705 « Ou ou que soit, dedens Escoce. »
 Et quant li rois Hermons ot ce,
 Si s'en resjoïst grandement
 Et respondi tout erranment :
 « Ma fille, je le vous acorde.
 14710 « Levés sus. » Adont la recorde
 Li rois en sa fille levant,
 Qui parloit en agenillant :
 « On face avant hiraus venir.
 « Je voel une feste tenir,
 14715 « Et .i. tournoi courtois et bon,
 « En le marce de Signandon,
 « Et fera d'ui en .v. sepmainnes. »
 De ce parler furent moult plainnes
 Les cambres de tres grant reviel,
 14720 Parmi Montsegur le chastiel.
 Hiraut furent tantost tout prest ;
 Au roy viennent, qui sans arrest
 Leur dist : « Seigneur, partés de ci,
 « Et si annoncés, de par mi
 14725 « .i. tournoi devant Signandon,
 « Et d'armes .i. tres grant pardon.
 « Et s'on vous demande le pris,

- « Dittes qu'il est fais et escrits :
 « Li mieus tournians la journée
 14730 « Conquerra une blanche espée
 « Que les dames deliveront,
 « Qui avoech ma fille seront.
 « Mais je vous enjoinc et commande
 « Que point, oultre Northombrelande,
 14735 « Ne recordés cestes nouvelles. »
 Et cil, qui ont ja mis leurs selles,
 Respondent : « Sire, volentiers
 « Nous le dirons as chevaliers,
 « Que d'aventure encontrerons :
 14740 « Vostre plaisir tres bien ferons. »

- A** DONT se sont sus ce parti
 Hiraut de Monsegur parti,
 Et s'espencent par le pays
 Pour anoncier, j'en suis tous fis,
 14745 Le tournoy la ou [il] doit estre.
 Partout, a droite et a senestre,
 Chevaucent et leur chemin tienent.
 En ce terme les dames vienent
 Avoech le roi a Signandon.
 14750 Li rois donne la .i. biau don
 A sa fille et a sa cousine :
 N'i a chambre ne offecine,
 Que on n'ait remis en bon point.
 Cilz tournois voir ne faudra point
 14755 Qu'il ne se tiegne et ne se face
 Devant Signandon, en la place
 Ou de ce temps on tournioit
 Et les dames esbanioit.

- 14760 **S**IGNANDON si est un chastiaus
 Dedens Escoce, fors et biaux.
 S'adont le fu, il est encores :
 Estruvelin est nommés ores.
 La a marce pour tournoy faire
 Belle et grande, et qui doit moult plaire
 14765 As chevaliers de la contrée,
 Et je croi que bien leur agrée.
 La se tenoit li rois Hermons
 Le plus du temps ; car li maisons
 Dou chastiel si estoit moult gente.
 14770 On met moult grandement s'entente
 A ce chastiel bien jolier,
 Et moult tres bien appareillier,
 Pour les dames qui y venront
 Dou pays, qui regarderont
 14775 Les tournians sus la campagne.
 La y ara belle compagne
 De chevaliers, si com j'espoir.
 Avoecques Hermondine est voir
 Florée qui tres bien s'acquitte,
 14780 Comme de ce bien introduite,
 A parler de Melyador,
 Le chevalier au soleil d'or.
 Elle en ot volentiers parler
 Et ses proeces recorder,
 14785 Dou quel ossi je parlerai
 Ens ou cas que le lieu en ay.
 Melyador li damoisiaus,
 Qui tant est friches et isniaus,
 Chevaucoit en Northombrelande
 14790 Et estoit dessus une lande
 Belle, et verde et tres bien ombrue.

Amours, qui a le fois l'argüe, *f. 109 b*
 Li fait canter .i. rondelet.
 Je conseille moult bien [c'on] l'et
 14795 Et oe pour l'amour de li,
 Car je le sench friche, et joli
 Et fait par moult bonne ordenance,
 De ce que j'ai de cognissance.

Rondel

14800 **C**E me seroit la plus grant joie,
 Certes, qui me peust avenir,
 De vous veoir, ma douce amour.

MAL ne dolour je n'averioie
 Et ne m'en poroie souvenir.
 Ce me seroit, etc.

14805 **L**IECE et eür recouveroie,
 Et tout mon bien, pour ce desir.
 Dessus toutes riens, ce bon jour,
 Ce me seroit, etc.

14810 **T**OUS en fu en coer resjoÿs
 Lansonnès, quant il a oÿs
 Ces doulz mos chanter a son mestre.
 .i. petit entendent sus destre,
 Et oent .i. cor hault sonner
 Et, en ce sonnans, raisonner
 14815 Que ce sont quelques aventures.
 Melyador ses armcüires

- Prent errant, et s'arme en grant haste.
 Quant il est armés, il se taste,
 Et se sent en point et de taille,
 14820 Ce dist, pour faire la bataille ;
 Presentement n'a cure a cui.
 A son varlet dist : « J'ai moult hui
 « Desiret a trouver sus place
 « .I. chevalier d'encontre. Or place
 14825 « A Dieu que si bien m'en aviegne *f. 109 c*
 « Que combatre a lui me couviagne ;
 « Car j'ay fait .I. trop lonch sejour,
 « Ne saroié dire le jour,
 « Qu'il me couvenist traire espée. »
 14830 Ensi cilz, qui point ne s'effrée,
 Parolle a par lui et devise.
 Or vous dirai de la devise
 Dou chevalier qui vient vers li :
 C'est chilz qui le corps a joli
 14835 Que sa sereur a mis en voie,
 Et en ce nom elle l'envoie
 Pour savoir s'on veroit son frere.
 Cilz chevaliers, c'est cose clere,
 Estoit tous blans, par ma sambla[n]ce ;
 14840 Mais dessus sa senestre mance
 Une targe vermeille porte.
 En la targe, qui n'est pas forte,
 Mais d'argent ouvrée, par m'ame,
 A escript une blanche dame :
 14845 Nous dirons le blanch chevalier.
 Cilz chevaucoit sans escuier,
 Car point n'est chevaliers de queste.
 Laciet le hÿaume en la teste,
 La targe au col, ou poing la lance,
 14850 S'en vient par tres bonne ordenance
 Par dessus le chevalier bleu,
 Qui ne l'a ressongniet c'un peu.

- Des lances se sont encontré,
 Et par dedens l'un l'autre entré,
 14855 Moult fierement et tres a point.
 Messires Lyones a point
 Melyador dedens sa targe,
 Mais de nul peril ne le charge,
 Car sa lance vole en tronçons. *f. 109 d*
- 14860 Moult bien se tint sus les arçons
 Melyador, point ne cheï.
 Mais le blanch chevalier feri
 Si fierement, au dire voir,
 Que onques cilz, pour son pooir
- 14865 Ne se peut tenir es estriers,
 Mais cheï; et lors li destriers
 S'en ala fuiant en la lande.
 Melyador adont commande
- 14870 A Lansonnet qu'il voist après;
 Car li chevaliers n'est pas près
 Dou ravoir, s'on ne li ramainne.
 Lannonnès en ot moult grant painne,
 Ançois qu'il le peuist ravoir,
 Et quant il l'eut, il s'en vint voir
- 14875 Au chevalier, qui la estoit
 Et qui sus l'erbier s'arrestoit.
 « Tenés », ce li dist Lannonnès,
 « Et me dittes ou vos varlès
 « Est demorés, se vous volés. »
- 14880 Li chevaliers, bien emparlés,
 Respont que de valet n'a point,
 Et Lannonnès, qui lors se joint
 Dalés lui pour tenir l'estrier,
 Li ala bellement prier
- 14885 Que, par amours, li voelle dire
 Quel cose il pense et ou il tire
 A aler, quant tout seulz chevauce.
 Et li blans chevaliers, sauf ce

Qu'il dist : « Point ne me nommerai ;
 14890 « Volontiers je le vous dirai.

« **C**OMPAINS, une dame moult frice,
 « Fille de signeur grant et riche,
 « M'a mis sus pour son chevalier, *f. 110 a*
 « Car elle fist faire avant hier
 14895 « .I. tournoy par devant Tarbonne,
 « Et la eut ordenance bonne
 « Et moult de chevaliers armés.
 « Toutes fois li pris fu donnés
 « A .i. chevalier moult vaillant,
 14900 « Li quelz en tres bien travaillant
 « Le conquist en bonne maniere ;
 « Mais onques ne fu en le chiere
 « Li gentilz chevaliers veüs,
 « Dont il puist estre cogneüs.
 14905 « Et, pour l'amour de son abit,
 « Ma dame a et juret et dit
 « Que, toute la queste durant,
 « Elle portera abit blanc
 « Et, dessus sa senestre mance,
 14910 « Une targete a le samblance
 « Que ceste est que ores je porte,
 « Et prie et voet c'on se deporte
 « A lui nommer la blanche dame.
 « Et tout ce a empris, par m'ame,
 14915 « Pour .i. sien frere chevalier,
 « Le quel elle a grandement cier,
 « Et cuide bien que cilz ce soit,
 « Qui au jour dou tournoy s'armoit
 « De rouge a une dame blanche.
 14920 « Je vous en ay dit l'ordenance ;
 « Or me dittes, se tant vous plect,
 « Dou chevalier qui droit la est,

- « Qui c'est et si point a veü
 « Le chevalier au rouge escu,
 14925 « Une blanche dame en mi lieu. »
 Et Lansonès respont : « Par Dieu,
 « Oïl ; mais trop lonch temps y a. *f. 110 b*
 « Ains que cilz tournois commença
 « Dont vous me parlés maintenant,
 14930 « Moi et mon mestre fisent tant
 « Qu'il se combatirent ensamble.
 « Tres bons chevaliers cilz me samble,
 « Dont vo dame est enamourée.
 « Nommés le moy, s'il vous agrée,
 14935 « Ceste dame : s'en vaudrai mieulz. »
 « Et cilz respont : « Si m'aÿt Diex,
 « Phenonée a a nom, sans faille.
 « Fille est au duch de Cornuaille
 « Et s'a, ou elle doit avoir,
 14940 « .I. frere que tant aime voir,
 « Que elle ne s'en poet partir.
 « Au nom de celi, sans mentir,
 « Fist elle la feste ordonner,
 « Dont vous avés oÿ parler.
 14945 « Au partir de li je juray
 « Que jamais ne retourneray
 « Devers li, si l'arai veü
 « Et, se je puis, si cogueü
 « Que elle sara, au retour,
 14950 « Se bien a assis son amour
 « Ou se c'est uns aultres de li. »
 — Dist Lansonès : « Je vous affi
 « Que vous estes entrés en painne. »
 Adont le chevalier enmainne,
 14955 Tout bellement, devers son mestre,
 Qui esmervilliés devoit estre,

Quant il veoit son escuier
Ensi parler au chevalier.

- 14960 **Q**UANT Lansonnés eut amené
Le chevalier de blanch armé,
Qui portoit une blanche dame, *f. 110 c*
Adont premierement entame
La parole, et se li raconte
Si com oÿ avés ou conte.
- 14965 Et quant Melyador l'entent,
Com cilz qui a tout honneur tent,
Se tourne vers le chevalier,
Et dist ensi : « Mon sire chier,
« Se Diex en toute honneur m'avance
- 14970 « Pour l'amour de la dame blanche,
« De la quele vous renommés,
« Que Phenonée vous nommés,
« Je vous feroie volentiers
« Service, ensi c'uns chevaliers
- 14975 « Errans doit a .i. aultre faire.
« Et grandement me poet desplaire
« Quant ensi vous ai abatu ;
« Et s'ensengnier vous savoie u
« Vous trouveriés le chevalier,
- 14980 « Pour qui vous poés chevaucier,
« Volentiers je le vous diroie. »
— « Sire », dist cilz, « Dieux vous doinst joie!
« De ce parler moult bien vous croy.
« Je me trairai viers .i. tournoy,
- 14985 « Qui doit estre proçainnement
« En Escoce certainement ;
« Mais encores ne sçai jou mies
« Ou les marces seront baillies
« Dou dit tournoy. Mes tant y a
- 14990 « Que on m'a dit qu'il se tenra. »

- Et quant Melyador ot ce,
 Qu'il doit avoir dedens Escoce
 .I. tournoy, si lieve la tieste
 Et sus la parolle s'arrieste
- 14995 En disant : « Et es çou dont voir *f. 110 d*
 « Qu'il doit la .i. tournoy avoir ? »
 — « Oil, voir, de ce ne doubtés. »
 — « Et comment, sire, le savés ? »
 Ce dist Melyador li frans.
- 15000 Ce respont li chevaliers blans :
 « Ce que j'en sai, c'est puis hersoir.
 « On le me dist en .i. manoir,
 « Ou d'aventure me logai.
 « Mais mies bien retenu n'ai
- 15005 « Le lieu ou li tournois doit estre. »
 Ce dist Lansonnés a son mestre :
 « Sire, prendés congiet a li.
 « Vous en orés ailleurs que ci
 « Parler ens ou cas que c'est voirs. »
- 15010 — « C'est moult grandement mes espoirs, »
 Ce li respont Melyador.
 « Je me vodrai traire desor,
 « Par devers la marce d'Escoce. »
 Adont le chevalier approce
- 15015 Et demande son bon congié,
 Et de ce qu'il l'avoit blechié
 L'en demande il tout le pardon.
 Et cilz qui Lyones ot nom
 Se part de li moult bellement,
- 15020 Et dist : « Sire, ja nullement
 « De ce pardon ne requerés ;
 « Car, ou cas que je sui armés
 « Et que je voel joster a tous,
 « Se par la joustre m'avés vous
- 15025 « Abatu, ce n'est pas vo coupe ;
 « Nul aultre, fors moy, n'en encoupe.

« Alés a Dieu qui vous convoie. »
 Adont prist cescuns une voie
 Et chevaucent devers .i. bois *f. IIII a*
 15030 Ou grant fuison avoit d'erbois.

OR dist li contes que ce jour
 Li blans chevaliers, sans sejour,
 De puis Melyador parti,
 Chevauca tous seulz a par li,
 15035 Armés desous la blanche gonne.
 .I. chemin prent a l'eure bonne,
 Qui se tournoit devers la lande.
 Grandement je le recommande,
 Car il savoit moult bien chanter,
 } 15040 Sans usage de li vanter.
 Il estoit chevaliers moult friches
 Et de toutes vertus moult riches,
 Et pour ce esleü l'avoit
 Phenonée, qui bien savoit
 15045 Qu'il estoit tres bien adreciés.
 Messires Lyones, sachiés,
 Chanta adont .i. rondelet :
 C'est bien men entente c'on l'et
 Et c'on l'oe, si comme en chant
 15050 Il le mist par bon couvenant.

Rondel

MA douce dame, quant je scé
 Que vous avés joie et santé,
 Nulle rien ne me poet grever,

CAR adont est de moy osté
 15055 Tout mon anui et eslongé,
 Ma douce dame, etc.

MON bien, mon coer m'en est doublé
 Et j'en sui si bien amendé,
 C'on ne poroit mieus amender.
 15060 Ma douce dame, etc.

A L'EURE que li chevaliers
 Chantoit ensi sus ces sentiers, *f. IIII b*
 Chevaucioit li chevaliers rouges
 Qui n'estoit mies trop harouges,
 15065 De qui nous parlerons des or :
 C'est messires Agamanor.
 Ensi qu'il estoit ens ou bois,
 De lonch a entendu la vois
 Dou chevalier qui chanté ot.
 15070 A Bertoulet a dit .i. mot,
 Son escuier : « Or va avant,
 « Et si regarde chi devant
 « Quel cose c'est que j'ay oÿ. »
 Et Bertoulès, sans nul detri,
 15075 Chevauce ensi c'on li ot dit.
 Il n'a chevauciet c'un petit,
 Quant il a celi perceü
 Qui point ne l'a aperceü,
 Car il avoit mis son hÿaume.
 15080 Biertoulès, qui vault .i. royaume
 Pour bien servir .i. chevalier,
 Esperonne le bon coursier
 Et vient au chevalier errant.
 Quant il en voit le couvenant,
 15085 Si en fu moult esmerveillés,
 Pour ce qu'il est appareiliés
 De la devise de son mestre.
 Adont s'en retourne sus destre
 Et a Agamanor revint,
 15090 Qui sus la lande quois se tint.

Quant il voit Bertoulet venir,
 Com cilz qui a tres grant desir
 De savoir quel cose a trouvé,
 Errannent li a demandé
 15095 Comment se porte li affaires,
 Et cilz ne se detria gaires
 Dou compter bien et sagement :
 « Sire, j'ay veü vraiment
 « .I. chevalier qui par chi passe.
 15100 « Or ne sçai se li ferés grasce,
 « Car il porte vostre devise,
 « Voires, sire, par une guise
 « Que, dessus sa senestre mance,
 « La porte il une dame blanche
 15105 « Et une targette petite,
 « De vermeil, assez bien escrite. »
 Et quant cilz entent ces raisons,
 Si dist ensi : « Alons, alons.
 « Je voel savoir qu'il se demande,
 15110 « Ne a qui porter li commande
 « La devise que j'ai empris. »
 A ces mos, a sa lance pris
 Et esporonne les galos
 Par mi le bois, a tel pourpos
 15115 Que pour le chevalier combatre
 Et la blanche dame debatre.

f. IIII c

15120 **M**ESSIRES Lyones estoit
 Arrestés, et si busioit
 Sus .iii. chemins que trouvés ot,
 Et si ne sonnoit nesun mot ;
 Mais pensoit le quel pour ce jour
 Il tenroit. Evous sans sejour
 Messire Agamanor qui vient
 Devant lui, et sa lance tient

- 15125 En samblance que pour jouter.
Lyones se va arrester,
Qui encor n'avoit point de lance,
Car, bien en savés l'ordenance,
Qu'il l'ot .ii. jours avant brisie
- 15130 Contre celi dont la prisie *f. III d*
Est moult grande, c'est bien raisons,
De qui tous bleus est li blasons.
Si dist ensi a ce premiers :
- 15135 « O, sire, rouges chevaliers,
« Maintenés vous par ordenance.
« Se j'euisse ossi une lance,
« Si com vous avés pour certain,
« A la joust ne faudriés grain ;
« Mais point n'en ay, bien le veés,
- 15140 « Et pour ce si priès me venés. »
Et quant Agamanor l'entent,
Si est tous honteus et si sent
Assés bien que cilz a raison.
Adont jette sur le sablon
- 15145 Sa lance, si com par courous,
Et dist : « Sire, qui estes vous,
« Qui vous armés de ma devise ?
« Dittes le moy. Ma lance est mise
« A terre, vous n'en avés garde.
- 15150 « Espée avés, je le regarde,
« Et jou une ; c'est pareçons.
« Assés tost les esprouverons ;
« Mais je voel savoir, en devant
« Que ce se face, qui avant
- 15155 « Vous a mis en ceste ordenance
« De porter ceste dame blanche. »
Messires Lyones s'avise,
Et pense adont sus la devise

- Dou chevalier qui la estoit
 15160 Et qui devant lui s'arrestoit,
 Et ossi a sa gentilz dame,
 Qui li faisoit porter. « Par m'ame, »
 Ce dist Lyones en son cuer,
 « Veci celi de qui la suer *f. 112 a*
 15165 « M'a mis sus, ensi m'i adonne,
 « Qui ot le pris devant Tarbonne
 « Dou tournoy, il n'a pas .ii. mois.
 « Elle me dist bien toutes fois,
 « Au partir, se je le trouvoie,
 15170 « Fust en bois, en lande ou en voie,
 « Que cognissable me fesisse
 « A li et que je li desisse
 « L'enclavure de son pourpos. »
 Adont Lyones, a ces mos,
 15175 De son cheval descent a terre :
 Che n'est mies signe de guerre.
 Agamanor s'en esmerveille,
 Qui tient a grant ceste merveille.

- 15180 **Q**UANT Lyones fu descendus,
 Si dist : « Sire, ne me puis plus
 « Combatre par nulle maniere.
 « Ce me commanda ma tres chiere
 « Dame, quant je parti de li,
 « Jusques a tant, je le vous di,
 15185 « Que j'averai parlé a vous. »
 Et Agamanor, qui est tous
 Esmervilliés de cest afaire,
 Li respont : « Et que doi je faire,
 « Biaus sire ? Dittes moy errant. »
 15190 Et Lyones, tout en riant,
 Qui avoit osté son hÿaume,
 Li recorde ensi une psaume :


- « Sire, descendés dalés moy,
 « Et je vos dirai, par ma foy,
 15195 « Tout ce que je quier et demande,
 « Et pour quoi en Northombrelande
 « Sui entrés puis .ii. mois en ça.
 « Et se la cose aultrement va *f. 112 b*
 « Que je n'espoir, je vous creant
 15200 « Que je remonterai errant
 « Et m'esprouverai a l'espée
 « Contre vous. De ce ne m'effrée. »
 Dist Agamanor : « Je, l'otri. »
 Adont descent, sans nul detri,
 15205 De son cheval dessus l'erhier,
 Et le baille a son escuier,
 Et son hÿaume apriès deslace.
 Empur la coiffe, a mie face,
 Se met par dalés Lyonnuel.
 15210 Bertoulet en a grant reviel,
 Qui s'est a l'eure trais en sus.
 Ce dist Agamanor : « Or sus,
 « Chevaliers, dittes vostre entente.
 « Saciés que grant desir me tempte :
 15215 « Que je sace par quel raison
 « Vous me faites chi la saison
 « Emploier en teles huiseuses.
 « Ce me sont coses mervilleuses. »
- « **S**IRE », dist li blans chevaliers,
 15220 « Voirement me couvient premiers
 « Parler, pour ouvrir la matere.
 « Une dame, c'est cose clere,
 « Fille du duch de Cornuaille,
 « M'a mis sus ce chemin sans faille.
 15225 « Ceste est suer a Melyador,
 « Dont elle n'a oÿ encor

- « Nulles nouvelles vraiment.
 « Se les desire elle forment
 « A oïr, d'amont et d'aval.
 15230 « Pas ne me nomme on Perceval,
 « Fors le chevalier a la dame,
 « Cui bonne amour le cuer entame *f. 112 c*
 « Apriès Melyador son frere,
 « Sans dire a pere ne a mere
 15235 « Nulle cose de son pourpos,
 « Fors a moy. Et se vous pourpos
 « Que se vous estes cilz, sans faille,
 « Qui a Tarbonne en Cornuaille
 « Eüstes le pris dou tournoy,
 15240 « Elle vous tient en bonne foy
 « Pour son frere et pour son ami.
 « Car elle ens ou nom de celi
 « Qui si vaillamment tournoia,
 « Ceste devise encargié a
 15245 « Que je porte et que vous portés.
 « Se vous pri, se vous estes telz
 « Que Melyador, si le dittes ;
 « Ce me seront joies escriptes
 « Moult tres grandes a mon retour,
 15250 « Car Phenonée, en nom d'amour,
 « Le me carga et enjoindi
 « Au partir, et bien je le di :
 « Que se le chevalier veoie,
 « Pour le quel je sui mis a voie,
 15255 « J'en saroie la verité.
 « Or vous ay je dit et conté
 « Quel cose par les camps me mainne.
 « Si m'osterés de ceste painne,
 « Se vous volés et cilz soiiés,
 15260 « Et se bien me sui avoiés,
 « Mon chemin irai com devant.
 « Mais quant je pense au couvenant

- « Dou chevalier, qui a Tarbonne
 « Fu, il avoit toute tel gonne
 15265 « Que vous portés ne plus ne mains.
 « Je n'en vi viaire ne mains, *f. 112 d*
 « Mais il estoit ensi armés.
 « Estes vous cilz? Parlés, parlés. »
 Et messires Agamanors
 15270 Mout doucement parolle lors
 Et dist : « Je sui cilz voirement
 « Qui fui au tournoy telement
 « Que vous avés recordé ci,
 « Mais je ne sui pas, je vous di,
 15275 « Li freres a la vostre dame.
 « Si vodroi jou estre, par m'ame,
 « Si bons que li apertenisse
 « Ou c'a son plaisir avenisse,
 « Car en tous cas elle vault bien
 15280 « D'onneur, de francise et de bien,
 « Et de recommandation,
 « Que de tres bonne affection
 « Elle soit amée et servie,
 « Et quant par sa grant courtoisie,
 15285 « Elle a ma devise encargié,
 « Je vous en donne bon congié
 « Dou porter, et li sçai grant gré
 « Quant elle m'a tant honoré
 « Qu'elle le porte, et vous ossi
 15290 « Qui estes chevaliers a li.
 « Ce li dirés, a vo retour,
 « Que Diex vous otroist hui bon jour,
 « Tres bon an et tres bonne estrine. »
 Et quant Lyonniaus imagine
 15295 La parolle dou chevalier,
 Qui si biel le poet recueillir
 Et s'a falli a sa demande,
 Car ce n'est pas cilz qu'il demande,

Si est plus pensieus que devant.
 15300 Agamanor le couvenant *f. 113 a*
 Dou chevalier moult bien regarde,
 Qui sa parolle li retarde.

ENTRUES qu'en cel estat estoient,
 Et que tout doy la s'arrestoient
 15305 Sans dire parolle ne mot,
 Evous la venu .i. escot :
 Hiraut estoit, il le me samble.
 Les chevaliers trouva ensamble ;
 Adont s'est sus yaus arrestés,
 15310 Et les a moult hault salués,
 Et dist ensi : « Mi chier signeur,
 « Qui devés entendre a honneur
 « Et as fais d'armes plainnement,
 « Je vous anonce vraiment
 15315 « .I. tournoy et .i. grant pardon
 « D'armes, qui devant Signandon
 « Sera d'ui en .xiiii. jours.
 « La sera la joieuse cours
 15320 « Dou roy Hermont, avoech sa fille,
 « Hermondine la tres gentille,
 « Qui ara a tres grant plenté
 « De dames dalés son costé
 « Et de damoiselles ossi.
 « A celle fin je le vous di
 15325 « Que vous y soiiés, s'il vous plaist. »
 Encores mies ne se taist
 Li hiraut, mais parolle avant
 Et dist : « Signeur, je vous creant
 « Que cilz qui le pris conquerra,
 15330 « Avoecques l'onneur qu'il ara,
 « Une espée ara pour le pris,
 « Et puis que vous avés empris



MELIADOR

- 15335 « A poursieur la ditte queste,
« Je vous pri, soiiés a la feste. »
Cil respondent tout d'un acort :
« Gentilz hiraus, a ton recort,
« Irons a la feste, sans faille.
« Car bien vault ceste qui le baille
« C'on y voist pour li honorer. »
- 15340 Et li hiraus, sus ce parler,
Prent congiet et d'iluec se part,
Et s'en chevauce d'aulture part ;
Les chevaliers lait la seant.
Plus ne voelt de leur couvenant
- 15345 Savoir, ne aultrement enquerre ;
Ne s'il sont de pais ou de guerre.

f. 113 b

- A**GHAMANOR et Lyonnaus,
Dont li affaires est moult biaus
De ce qu'il eut illuech oy,
15350 Sont moult grandement resjoÿ,
Et dient c' a ceste journée,
Il ne faudroient pour riensnée.
Adonques reprist la parolle
Li blans chevaliers, qui parolle
- 15355 Et dist : « Je partirai
« Et en cel estat vous lairai
« Que je vous verai au tournoy,
« Par devant Signandon, je croy.
« Trop bien ay retenu, par m'ame,
- 15360 « Que vous n'estes point a ma dame
« Freres, ne parens, ne cousins ;
« Mais vous estes ses bons voisins,
« Et ses chevaliers volés estre. »
Agamanor, qui au senestre
- 15365 Dou chevalier estoit assis,
Respondi par moult grant avis :

- « Sire, je croi bien vraiment
 « Que vous li dirés sagement *f. 113 c*
 « Tout ce que vous avés trouvé ;
 15370 « Mais dittes li, de verité,
 « Que, pour mettre tout jusc'a l'ame,
 « Pour l'amour de la Blanche Dame,
 « Je vodroi mon corps travillier
 « Et, se tant pooie exploitier
 15375 « Que mes services li pleuist
 « Et qu'en plaisance li venist,
 « J'en seroie tres ewireus,
 « Plus liés et plus chevalereus. »
 Sus cel estat se sont adont
 15380 Parti, et .ii. chemins pris ont.
 Agamanor errant remonte,
 Et puis en chevaucant raconte
 L'ordenance dou chevalier
 A Bertoulet son escuier,
 15385 Li quelz moult volentiers l'entent,
 Et a l'oïr plaisance y prent.
 Ce soir vinrent sus .i. manoir,
 Ou quel il peurent remanoir
 Deus nuis et .i. jour tout entiers,
 15390 Et pour tant que li forestiers,
 Li sires de celle maison,
 Leur avoit compté tel raison
 Que, depuis .ii. mois en esça,
 Tous les jours passoient par la
 15400 Chevalier tous près pour combatre,
 Qui volsist leur chemin debatre ;
 Mais onques dedens ce sejour
 Ne cheï, de nuit ne de jour,
 C'aventure leur avenist,
 15405 Ne que nulz chevaliers tenist
 Par la son chemin ne sa voie.
 De quoi Agamanor mains joie *f. 113 d*

Avoit, ce devés vous savoir,
 Car tous les jours volsist avoir
 15410 Des armes aucune aventure.
 Tout ce desiroit par nature,
 Ne onques ne s'en refraindi
 Tant c'au chevaucier entendi.

15415 **N**ous lairons ci d'Agamanor
 Et au vaillant Melyador
 Retourneront, car c'est bien drois,
 Et conterons a ceste fois
 Qu'il li avint de puissedi
 Que dou chevalier se parti,
 15420 Monsigneur Gerpin qu'il bleça.
 Melyador si s'adreça
 Parmi .i. bois sus une lande.
 .I. forestier voit; si demande :
 « Compains, or me di verité.
 15425 « Depuis que tu as ci esté,
 « As tu veü nul chevalier
 « Par ci passer ne chevaucier? »
 Et cilz li respondi en l'eure :
 « Sire, oïl, par droit ci deseure
 15430 « S'en passe uns chevaliers errans,
 « Qui, còmme gratieus et frans,
 « Moult bellement m'araisonna,
 « Et ossi il me demanda
 « Se hui veü nullui avoie. »
 15435 Respont Melyador : « Quel voie
 « Tient li chevaliers, par avis? »
 Dist li forestiers : « Il m'est vis,
 « Sire, qu'il va toute la lande. »
 Melyador plus n'en demande,
 15440 Mais se part et chevauce fort,
 Com cilz qui est plains de confort. *f. 114 a*

Dou chevaliers les froais trueve :
 Moult grant desir a qu'il s'esprueve
 A quel chevalier que ce soit.
 15445 Tant chevauce que il perçoit
 Par devant lui le chevalier,
 D'encoste li son escuier.
 Adonques dist a son varlet :
 « Tost mon hÿaume met. Çà met. »
 15450 Et cilz apertement li baille.
 Melyador se joint sans faille
 En son escu et prent sa lance.
 Ja y ara grant ordenance,
 Et croi moult bien qu'il coustera
 15455 A celi a qui joustera.

L i chevaliers qui chevaucioit
 Messires Tangis se nommoit.
 Moult estoit doulz et gratieus
 Et grandement chevalereus.
 15460 Norois estoit de nation
 Et de moult haute estration.
 Mies ne faisoit le harouge.
 En une targe toute rouge
 Portoit il une dame blanche.
 15465 Melyador, par ma samblance,
 Fist tant qu'il est venus a li,
 Et puis se li dist tout ensi :
 « Chevalier, il nous fault joster.
 « N'ai cure au quel il puist couster. »
 15470 — « C'est voirs, » respondi cilz en l'eure.
 Sus cel estat plus ne demeure,
 Mais prent sa lance incontinent
 Et s'appareille frichement
 Pour joster, et lors esporonne.
 15475 Melyador ossi s'ordonne,

f. 114b

Qui bien en voit le couvenant
 Et proprement vers lui venant
 En soi meïsmes moult le prise.
 Son glave a a son devoir mise,
 15480 Et puis se joint dedens sa targe.
 De nul autre soing ne se charge,
 Fors dou chevalier aviser,
 Sans plus dire ne deviser.
 En espouronnant fort et roit,
 15485 L'un sus l'autre s'en viennent droit ;
 Si se fierent, sus les escus,
 Des lances as bons fers agus.
 Par la force de leurs chevaus
 Et l'emprise des bons vassaus,
 15490 Les lances volent en tronçons.
 Moult fricement sus les arçons
 Se tiennent li doï chevalier ;
 Ce ne fu mies hui ne hier
 Que on veïst joustes si belle.
 15495 Cescuns son escuier rappelle,
 Et voelent par bonne ordenance
 Encor recouvrer une lance ;
 Ensi l'ont acordé entre yaus,
 Qui que soit li jeus, lait ou biaux.

15500 **A**u retour que cescuns a fait
 Li escuiers s'en vint de fait
 A celi qui le harpe porte
 Et telz nouvelles li aporte :
 « Sire, sire, sour toute rien,
 15505 « Vous di que vous vous gardés bien,
 « Car vous joustés au chevalier
 « Qui si belles les scet baillier,
 « Qui desconfi, c'est vraie cose,
 « Les .iii. chevaliers a Montrose

- 15510 « Et qui porte le soleil d'or.
 « Je le vous ramentoi encor,
 « Afin que mieulz vous en souviegne
 « Et que point ne vous en mesviegne. »
 Messires Tangis bien entent
- 15515 Son escuier, et assés sent
 Qu'il li dist voie de raison ;
 Mais, quoi que droit l'a li prison, ?
 Tout est ens ou fier escaufés.
 Que soit angles ou soit maufés,
- 15520 Il dist c'a lui il joustera,
 Ne scet combien li coustera,
 Car trop aroit reproce et honte,
 Ce dist en soy, quant tout bien conte,
 S'il refusoit sur ce parti.
- 15525 Adont de ses rens se parti
 Et le bon coursier esporonne.
 Melyador ossi s'ordonne
 De venir vers li, par maniere
 Que joustes y ara moult pleniere.
- 15530 Les chevaus des esporons fierent,
 Et si droitement se requierent
 A ce qu'il se sont encontré.
 Il sont l'un dedens l'autre entré,
 Telement que les lances roides,
- 15535 A pointes agues et froides,
 Font par dedens leurs targes prendre.
 La plus entiere couvint fendre :
 Onques pour cuir ne pour nervures,
 Se sont ces choses assés dures,
- 15540 Ne remest que li traus n'i fust ;
 Le fier et bien .v. pos dou fust
 Mist li vassaus de Cornuaille
 En l'espaule cesti sans faille,
 Qui messires Tangis s'appelle.
- 15545 Ce fu une joustes moult belle ;

f. 114 d

- La glave vole en .ii. tronçons.
 Moult bien se tint sus les arçons
 Messires Tangis sans cheoir.
 Melyador, qui son devoir
 15550 Fait en armes et aultre part,
 De la jousté biel se depart,
 Et, au retour qu'il fait arriere,
 Il voit c'on ostoit la baiviere
 De celui a cui jousté ot.
 15555 Droit la s'en vint sans dire mot
 Et perçoit qu'il estoit navrés.
 Ses varlès dist : « Souffrés, souffrés,
 « Sire; vous avés mort mon mestre.
 « Tout ensi voir qu'il devoit estre
 15560 « En est venu sans desdit.
 « Je li avoie orains bien dit
 « Que point ne se presist a vous. »
 Melyador, qui fu a tous
 Deboinaires, doulz et courtois,
 15565 Sus son cheval se tient tous cois,
 Et celi a desarmer aide
 Et .i. bon surgien souhaide,
 Qui bien le sace apparillier.
 Bendeler le vont et loier,
 15570 Ensi que bien le scevent faire.
 Melyador, pour mieus complaire
 Au chevalier que bleciet a,
 Li offre et li presente la
 Son escuier .ii. jours ou .iii.,
 15575 Et li prie qu'il ne soit frois
 Dou prendre, se c'est sa besongne.
 Et cilz dist qu'il ne li besongne
 Nul aultre que le sien pour l'eure.
 Li bleus chevaliers la demeure
 15580 Tant qu'il fu bien appareilliés,
 Et apriès fu pris li congiés.

f. 115 a

- Messires Tangis vint ce soir
 Logier ens, ou propre manoir
 Dont Melyador au matin
 15585 Se parti, dont sus son chemin
 Il eut trouvé ceste aventure.
 Ses escuiers grandement cure
 Qu'il soit garis hastéement,
 Pour estre a ce tournoiement
 15590 Qui sera devant Signandon,
 Et Melyador d'abandon
 Chevauca ce jour sans arrest,
 Et entra en une forest.
 La le couvint entre .ii. landes,
 15595 Sous un arbre qui porte glandes,
 Reposer, et a l'endemain
 Prist la voie a la droite main,
 Et chevauca ceste journée
 Sans veoir ne trouver riensnée
 15600 Qui point face a ramentevoir.
 Le soir vinrent sus .i. manoir,
 Ou il y avoit une dame,
 Veve estoit et moult gentilz femme,
 Qui mist grant paine a recueillir
 15605 Liement le dit chevalier,
 Et ossi sa mesnie toute;
 De ce ne devés faire doubte.

- C E soir avint, apriès souper,
 Que il alerent demander,
 15610 Entre li et son escuier,
 A le dame, qui le mestier
 Savoit d'onneur oultre l'ensengne,
 Se de nulle nouvelle estragne
 Elle avoit point oÿ parler.
 15615 Et celle qui ne voelt celer,

f. 115 b

- Ne ne doit selon leur requeste,
 A nesun chevalier de queste,
 Cose qu'elle sace de voir,
 Qu'elle n'en face son devoir,
- 15620 Respont lor assés doucement :
 « Oil, il n'a pas longement
 « C'uns chevaliers si com vous estes,
 « Je croi qu'il poursieuoit vos questes,
 « Jones, amoureux et faitis,
- 15625 « De blanc et de vert mi partis
 « Fu ceens .i. soir a hostel.
 « Se nous dist, sans demander el,
 « Qu'il doit moult temprement avoir,
 « Ensi le fait on a savoir,
- 15630 « Tout parmi le Northombrelande,
 « .I. tournoy par dessus la lande
 « D'Escoce, devant Signandon,
 « Et sera ens, ou propre nom
 « D'Ermondine, la fille au roy. »
- 15635 Et quant ce oïrent li doy,
 Li chevaliers et ses varlès,
 Cescuns fu lors telz et si fes
 Que durement, et fort pensieu.
 « Dame, » dist Lansonnès, « pour Dieu,
- 15640 « Dittes nous dont a bonne entente
 « Se longe sera li attente
 « Qu'il faudra ceste part aler. »
 Et la dame prist a parler
 Et dist : « Si com je suis sentans,
- 15645 « Bien y venrés encor a temps, *f. 115 c*
 « Mais que vous alés celle part. »
 — « Dame, » dist Lansons, « Diex vous gard,
 « Quant ce nous avés anoncié. »
 Ce soir sont ou manoir coucié,
- 15650 Et l'endemain, au matinet,
 Lansonnès lors les selles met.

- Quant Melyador fu levés,
 Il s'est apartement armés ;
 Congiet prent et d'illuech se part.
 15655 Bien a demandé de quel part
 Li chemins est vers Signandon,
 Et cil qui sont de le maison,
 Ou hostel avoit signouri,
 Et de le marce ensi nourri
 15660 Li ensengnent tres volentiers.
 Or chevauce tous les sentiers
 Melyador devers Escoce ;
 La terre grandement approche,
 Et sachiés qu'il est vraiment
 15665 En cuer resjois grandement
 Des nouvelles qu'il a oÿes.
 Melyador fist a deus fies,
 Sus le chemin qu'il chevaucoit,
 Une balade qui bien doit
 15670 Par droit estre ramenteüe ;
 Car vis m'est, quant je l'ay veüe,
 Qu'elle soit belle et gratieuse,
 Et moult grandement amoureuse.
 Telle comme elle est, vous l'orés
 15675 Et puis vostre entente en dirés.

Balade.

- 15680 S'A men voloir ne puis veoir,
 Ma tres douce dame d'onnour,
 S'ay je toutdis, et main et soir,
 En mon coer sa tres grant valour,
 Sa bonté, sa fine douçour
 Et son tres doulz contentement :
 Pour ce voel vivre liement.

f. 115 d

15685 **J**E me puis bien apercevoir
 Qu'en joie ferai mon demour,
 Dont ne puis certes mieus avoir,
 Quant celle ou sont tout mi retour
 Est dessus toutes la millour
 Qui soit ou monde vraiment :
 Pour ce voel vivre liement.

15690 **M**A joie doubleroit pour voir,
 Se je veoie par nul tour
 Celle que j'aim sans decevoir
 Et qui est ma tres douce amour.
 Se n'ay pensée nuit ne jour
 15695 Qu'a reveoir son doulz corps gent :
 Pour ce voel vivre liement.

ENSI en faisant la balade
 De coer liet, amoureux et sade,
 Chevauca li dis chevaliers,
 15700 Ce m'est avis, .ii. jours entiers,
 Sans trouver nesune aventure.
 Au tierch jour, en une pasture
 Voient .i. chevalier venant
 En tres biel et bon couvenant,
 15705 Armé moult bien a sa devise.
 Li chevaliers, quant je m'avise,
 Estoit Sansorins appellés.
 De blanc et de bleu fu parés,
 Tous semés de roses vermeilles.
 15710 Dist Melyador : « Me conseilles
 « Tu, Lansonnet, que je m'avance
 « Pour joster droit ci une lance
 « A ce chevalier que je voi?
 « Se il me bleçoit ou je soi,

f. 116 a

- 15715 « Perdu arions l'aventure
 « D'estre au tournoy dont je fai cure,
 « Ou je faudroie trop envis. »
 Respont Lansonnès : « Il m'est vis
 « Qu'il s'ordonne tous pour joster.
- 15720 « Volés vous que voise parler
 « A lui et son entente sace? »
 Melyador respont a ce
 Et dist : « Oyl, va celle part. »
 Atant Lansonnès se depart
- 15725 Et galope tout le chemin;
 Venus s'en est a Sansorin
 Qui ot le hÿaume en la teste,
 Car il fu chevaliers de queste.
 « Sire », ce li dist Lansonnès,
- 15730 « Vis m'est que vous soiés tous près
 « Pour joster se mes mestres voelt;
 « Mais il dist que bien on se poet
 « Par honneur targier de ce faire,
 « Et est grandement necessaire
- 15735 « Que vous et ilz soiés en point;
 « C'au tournoy vous ne fallés point,
 « Qui sera dedens .iiii. jours
 « Devant Signandon ou li cours
 « Dou roy Hermon se tient pour lors. »
- 15740 Et quant Sansorins, qui ot corps
 Fourmé pour faire une bataille,
 Ot les parolles c'on li baille,
 Si s'arreste et puis si s'apoie
 Sus sa lance, et dist : « Je vodroie
- 15745 « Croire conseil tout par raison;
 « Mais j'ay moult en ceste saison *f. 116 b*
 « Desiret que jou encontresse
 « Le chevalier ou le trouvasse,
 « Qui se brise dou soleil d'or. »
- 15750 — « Pour quoi? » ce li demande lor

- Lansonnès, qui estoit droit la.
 — « Pour ce c'un mien cousin tua,
 « Messire Camel de Camois. »
 Et Lansonnès a celle fois
 15755 Respont et dist : « Trouvé l'avés.
 « Or me dittes se vous savés
 « De ses fais, ne sceuistes onques. »
 Et Sansorins respont adonques :
 « Certes, nennil, pour ce le voel
 15760 « Assaiier, non pas par orguel,
 « Fors tant seulement par vaillance. »
 Et Lansonnès a l'ordenance
 Dou chevalier respondi lors :
 « Chevaliers, je me fay bien fors
 15765 « Que vous l'assairés voirement,
 « Puis que vous volés telement
 « Parler, mes c'a lui je reviegne.
 « Mais, s'il avient qu'il vous couviegne
 « Sejourner a ce dit tournoy,
 15770 « Si ne le tenés a anoi. »
 Dist Sansorins : « Si ne ferai. »
 Adont retourne sans delai
 Lansonnès devers son signour,
 Et li recorde a son retour
 15775 Ce qu'il a trouvé et veü.
 Evous erranment pourveü
 Melyador que pour jouter,
 Quel cose qu'il doie couster.

15780 **L** i chevalier estoient près
 Pour jouter, et estoient très *f. 116 c*
 Fort armé pour celle journée.
 Melyador, de randonnée,

15781 Celle journée, *B* la journée.

- Point le cheval vers Sansorin,
 Qui vient ossi tout le chemin ;
 15785 Tost y ara jouste moult belle.
 N'i a lance que la lemelle
 D'acier n'ait bien d'un piet entier.
 Bien savoient le plain mestier
 De jouter si com il l'ensengnent.
 15790 Ne sçai comment ne se mehaignent,
 Car trop dur se sont encontré
 A ce que leur cop sont entré
 L'un en l'autre, par grand aïr.
 Melyador, qui grant desir
 15795 Avoit de bien son exploit faire,
 Porte a Sansorin grant contraire ;
 Car sa lance, qui fu moult roide,
 Tout le fier a la pointe froide
 Li passe parmi son escu ;
 15800 Ens ou costet li a fondu
 Plaine paume et la le reverse.
 Sansorins cheï teste enverse,
 Si roit c'a paines fu il mors.
 Ses varlès vint la sus le corps
 15805 Et mist errant piet jus a terre,
 Et voit que sa targe li serre
 Au costé et est pertuisie,
 Et que li sans a une fie
 En sort a force et a randon.
 15810 Lors le desboucle en abandon
 Et le jette dessus l'erbier,
 Et puis le hÿaume d'acier,
 Le quaffe, et tout au nu le met.
 Ensi li varlès s'entremet
 15815 De donner a son mestre alainne.
 Sansorins gist la en grant painne,

*f. 116 d*15807 pertuisie, *B* petruisie.

- Car il est durement navrés.
 Melyador li alosés
 S'en est venus de celle part ;
- 15820 Piet a terre met, et a part
 S'est trais par devers Sansorin.
 Se li demande en son latin :
 « Chevaliers, dittes, comment va ? »
 Et adont Sansorins parla,
- 15825 Car pas n'estoit a mors ferus,
 Et dist : « Je sui droit si cheüs
 « Tout bleciés, si com vous veés.
 « J'ai esté trop mal enfourmés,
 « Quant onques je joustai a vous ;
- 15830 « Mais ensi se portoit mes gous,
 « Se le me couvient comparer.
 « A ce tournoy poés aler
 « Sans moy, ne point vous n'avés garde
 « Que le pris qu'Ermondine garde,
- 15835 « Je le vous doie calengier.
 « J'en ay assés pour ce quartier
 « De l'an, et tout au mieulz venir. »
 Et quant ensi le peut oïr
 Melyador, se li respont :
- 15840 « Chevalier, ensi li fait vont
 « Et les guerres, il n'est pas doubte.
 « Or, metés vostre entente toute
 « A vous garir, je vous en pri ;
 « Car, pour verité je vous di,
- 15845 « Je seroie moult courouciés
 « Se de ce mehain vous moriés,
 « Et me dittes a ceste fie
 « Se vous volés avoir aÿe. *f. 117 a*
- 15850 « S'ensi est, je vous presterai
 « Mon varlet, saciés le pour vrai. »
 Respont Sansorins : « Grans mercis !
 « Nennil. Mes varlès, ce m'est vis,

- « Fera assés bien la besongne.
 « Veoir poés comment il songne
 15855 « De moy appareillier a point. »
 Melyador lors, sus ce point,
 S'est partis dou dit chevalier,
 D'encoste li son escuier,
 Lansonnet, qui bien le servi,
 15860 Ne onques jour ne le falli.

- E**^{NSI} fu Sansorins navrés.
 Il est erramment desarmés
 Et croi qu'il ait moult grande plaie.
 Nullement il ne s'en esmaie ;
 15865 Tantée l'ont et a point mise,
 Vis m'est dou pan d'une chemise ;
 Et, quant loiié fu bien [et] fort,
 Sus la place noient ne dort
 Sansorins, mais se met a voie.
 15870 Par devers .i. manoir s'avoie
 Qui n'estoit mies lonch de la ;
 Tant fist qu'ens ou manoir entra.
 La dedens fu biel recueilliés
 Et a son droit appareilliés.
 15875 De Sansorin lairons atant,
 Et si parlerons maintenant
 De Melyador le vassal,
 Qui chemine tout a cheval,
 Au lés, par devers Signandon.
 15880 Souvent pense au corps et au nom
 D'Ermondine, bien le sachiés,
 Com cilz qui est pris et laciés *f. 117 b*
 Des las d'amours, et si estrains
 Qu'il poet bien dire : « Certes, j'ains
 15885 « Ardanment la bonne et la belle,
 « Pour qui mainte cose nouvelle

« Ay fait et si ferai encor. »
 Or s'avise Melyador,
 Tout en chevaucant, qu'il fera
 15890 Une cançon et chantera.
 Adonques li preus le commence,
 Et met fort son entente en ce
 Que la cançons soit tres bien faite,
 Car il dist : « C'est pour la parfaite
 15895 « Ma dame, que je tieng a dame.
 « Se ne vodroie pas, par m'ame,
 « Ou cas que pour l'amour de li
 « Le fay, que g'i eusse falli. »
 Et adonques, sans nul delay,
 15900 Fist il .i. joli virelay,
 Qui se commençoit par tel fourme
 Que l'escripture nous enfourme.

Virelay

JOIE me croist, si pers dolour,
 En pensant a vous nuit et jour,
 15905 Ma douce dame souverainne;
 Car c'est voir ma joie mondainne
 Que j'en sui ostés de tristour.

MAIS plus me seroit grant joie,
 Cent mille fois, de vous veoir,
 15910 Car se souhaidier pooie,
 Je ne vodroie mieus avoir.

SE saciés, ma tres douce amour,
 Que se j'ai solas ou baudour,

15899 de lay, B de lay.

15915 De vous me vient, soiiés certaine.
 Vous estes de tous biens si plainne
 Que vostres vrais servans demour.
 Joie me croist, etc. *f. 117 c*

15920 **P**AR ma foy, ou que je soie,
 Envers vous ferai mon devoir,
 Et cui qu'anuiier en doie
 Servir vous voel sans decevoir

15925 **T**RES loyaument en toute honneur,
 Car je vous crieng, sers et aour
 Dessus toute rien terriainne,
 Dont tous jours, en vostre demainne,
 Je me sui mis sans nul retour.
 Joie me croist, etc.

15930 **E**NSI s'esbat en chevaucant
 Melyador au corps plaisant,
 Et tant fait qu'il est en Escoce
 Entrés, et que moult priès approche
 Le lieu ou li tournois sera.
 De haute heure ou bois se loga
 De foellies moult fricement.
 15935 Li chevalier certainement,
 Qui oÿ parler en avoient
 Et qui la journée savoient,
 Se tenoient de ceste part.
 Cescuns d'yaus s'est logiés a part,
 15940 Par moult gratuite ordenance.
 La cose grandement s'avance
 A maniere d'un escaffaut,
 Ou nulle cose ne defaut
 D'estre proprement carpentés.
 15945 Lons et larges comme uns hostés

- Est li lieus ensi c'on destine,
 Ou sera ma dame Hermondine,
 A compagnies de pucelles
 Friches, jones, gentes et belles, *f. 117 d*
 15950 Et si en y a grant fuison.
 Il n'a ne haie ne buisson,
 En le place ou li chevalier
 Doient pour le jour tournoier.
 Les dames sont illuec venues,
 15955 Et de leurs chevaus descendues
 Et montées dessus la loge ;
 Li rois avoech elles se loge.
 Quant heure fu de l'assambler,
 On ala .i. grant cor sonner,
 15960 Et li sons moult lonch s'espandi.
 Adonques cescuns entendî
 A mettre le hÿaume en teste.
 La sont li chevalier de queste
 Plus de cent, qui se tiennent prest.
 15965 Tout se partent de le forest
 Montés par dessus leurs chevaus.
 Li bleus chevaliers, com vassaus,
 Fu auques que des premerains ;
 Car segurs se tient et certains
 15970 Que tout premiers assamblera.
 Agamanor, d'autre part, ra
 Pris les camps, par bonne ordenance.
 Florée adonques si s'avance,
 Qui estoit dalés Hermondine,
 15975 Et dist ensi : « Belle cousine,
 « Veci .ii. vaillans chevaliers.
 « Cilz qui chevauce tout premiers,
 « C'est cilz qui desconfi Camel ;
 « Et li secons sans vous dire el,
 15980 « Qui porte ceste rouge gonne,
 « C'est cilz qui eut devant Tarbonne

- « Le pris, si com j'ay oÿ dire.
 « Il n'y en a nul qui ne tire *f. 118 a*
 « A vostre amour, saciés, pour voir.
 15985 « Vous porés au jour d'ui veoir
 « Faire mainte grant apertise. »
 Et si com Florée devise
 Ses parolles, evous venant,
 En tres biel et bon couvenant,
 15990 Chevaliers qui hors dou bois sallent,
 Et ensi qu'il viennent assallent
 L'un l'autre, a bien trencans espées.
 Lors se commencent les meslées,
 De toutes pars, devant les dames.
 15995 Ce seroit et virgongne et blames
 A Melyador le vassal,
 Puis qu'il est armés a cheval,
 Se la ne se faisoit cognoistre
 Pour son pris encor plus accroistre.
 16000 .I. chevalier a rencontré;
 De l'espée l'a si frapé
 Qu'il le fait jus cheoir a terre.
 Ensi se commence la guerre.
 Tout se sont priès mis en .i. mont
 16005 Et la des bras merveilles font;
 Il fierent, frapent et martellent,
 Tant que li oel leur estincellent.
 Qui la est cheüs entre piés,
 A grant dur poet il estre aidiés,
 16010 Car nul n'i a qui ait varlet.
 Melyador merveilles fet :
 De l'espée si grans cops donne,
 Avoecques ce qu'il s'abandonne
 De fait et de tres grant corage,
 16015 Qu'il en porte a pluseurs damage.

- Il les abat, il les reverse,
 Ceoir les fait la tieste enverse. *f. 118 b*
 Hermondine moult bien le voit,
 Qui as fenestres s'apoiioit ;
 16020 Si en parole a sa cousine :
 « Florée, » ce dist Hermondine,
 « Vela le vostre chevalier ;
 « Je le voi moult biel tournoier.
 « Il n'i a nul qui le ressamble.
 16025 « Or me dites qu'il vous en samble ? »
 — « Ma cousine, vous dittes voir.
 « Telz chevaliers doit bien avoir
 « Belle amie certainement. »
 En dementrues que telement
 16030 Les .ii. damoiselles parloient,
 Elles regardent et si voient
 Le bleu chevalier et le rouge,
 Qui forment faisoit le harouge,
 Qu'il se sont encontré de fait.
 16035 Je vous di que cescuns d'yaus fait
 Grans apertises de son corps ;
 Mais Melyador fu plus fors
 Et mieulz savoit de la meslée.
 Gentement manioie l'espée
 16040 Agamanor ; tel cop en donne
 Sus le hÿaume qu'il l'estonne ;
 Bien bas le fait plonkier aval,
 Sus la grigne de son cheval.
 Ja se fust entre yaus departie,
 16045 Par mautalent, li ahatie ;
 Mais chevaliers de toutes pars
 Les ont, tant que pour l'eure, espars.
 Ensi s'entreprenent li tournois,
 Li behours et li esbanois.
 16050 Bien y a .cc. chevaliers
 Tous tournoians, a ce premier. *f. 118 c*

- B** IEN se maintient Melyador.
 Ensegniés fu d'un soleil d'or;
 C'est ce dont ses parures se brise.
 16055 La ot .i. chevalier de Frise,
 Grant et fort, et moult bien monté.
 Melyador l'a encontré,
 Devant les dames, sus sa voie;
 De l'espée, qui pas ne ploie,
 16060 Le fiert sus son hÿaume amont.
 Melyador senti adont
 Moult bien le cop dou chevalier,
 Mais tele li ala baillier
 Que jus a terre l'abati.
 16065 Quant cilz a terre se senti,
 Tantost fu relevés en piés,
 Mais il ne fu mies trop liés
 De ce qu'il fu ensi cheüs.
 Ses chevaus li fu la rendus;
 16070 Car varlet estoient sus place
 Tout a piet, ce voel jou c'on face,
 Qui mainte courtoisie grande
 Fisent ce jour, dessus la lande,
 As chevaliers qui la cheoient.
 16075 Car quant avenir y pooient,
 Il leur rendoient leurs chevaus.
 La pooit on oïr hiraus
 Criier et anoncier les preus,
 Et disoient as amoureux :
 16080 « Seigneur, Hermondine vous voit,
 « Par la quele cilz pris ci doit
 « Estre donnés, il n'est pas doute.
 « Or metés vostre entente toute
 « A estre vaillant et hardi ;
 16085 « Car s'on y voit acouardi ; *f. 118 d*
 « Chevalier nul, comment qu'il aille.

- « C'est bien drois c'a l'amour il faille
 « De la belle qui vous regarde. »
 Ensi nulz hiraus ne se tarde
 16090 De parler, et encores plus.
 Cilz, dont tous bleus est li escus
 Au soleil d'or, bien les entent ;
 Adont le brac lieve et estent,
 Et dedens la presse se boute.
 16095 Venus est en une grant route
 De chevaliers qui se batoient,
 Et qui moult dur se combatoient,
 Et se donnoient grans colées,
 De leurs nues trencans espées.
 16100 Mais quant Melyador vint la,
 Je vous di que bien on parla
 Des apertises qu'il y fist ;
 Car tantost .iiii. chevaliers mist
 A le terre par bien ferir
 16105 Et par vassaument requerir.
 Et tout ce veoit Hermondine,
 Car grandement estoit encline
 Au dit chevalier regarder,
 Et par tout venir et aler.
 16110 Si l'en prise moult grandement
 Et dist bien en son sentement
 Que, se Florée bien le prise,
 Droit a, car ossi a sa guise
 Il le vault en toutes manieres,
 16115 Car n'i a, desous les banieres,
 Chevalier qui tant face d'armes ;
 Ce dient bien les aultres dames.

- M**ELYADOR, bien le saciés,
 16120 Est ensi grandement prisiés
 D'Ermondine. Bien le doit estre,

f. 119 a

- Car, et a senestre et a dèstre,
 Par tout se combat bien et biel.
 La y avoit .i. damoisiel,
 Qui estoit Gratiens nommés
 16125 Et en armes moult renommés.
 C'est cilz qui issi d'Italie.
 Melyador a ceste fie
 L'encontre dessus son chemin ;
 Si le feri a tele fin
 16130 Que tout bas il le fist bronchier.
 Dist Gratiens au chevalier :
 « Sire, sire, vò cop sont grant.
 « Vous avés puis .i. an fait tant
 « Pour moy, que je m'en doy souffrir.
 16135 « Ne vous endurroie a ferir,
 « Se Diex m'äyt, cõment qu'il aille. »
 Adont entre ou tournoy sans faille
 Et lait Melyador droit la.
 A ce que Gratiens s'en va,
 16140 Il encontre .i. chevalier aultre,
 Qui portoit l'espée sus fautre ;
 Nommés fu messires Feughins.
 Gratiens qui fu bons et fins
 Le feri dessus le hÿaumé ;
 16145 Li aciers vali .i. royaumé
 Contre le cop bien estendu,
 Autrement l'euist pourfendu.
 Messires Gratiens passe oultre
 Frichement, en faisant son moustré.
 16150 Es Dagoriset et Savare,
 — Entre yaus n'i avoit point de bare ; —
 Des espées sont encontré,
 Et li uns dedens l'autre entré *f. 119 b*
 Et se donnent grans hatiplas,
 16155 En levant contremont les bras.
 Ja se fuissent adamagié,

- Car moult furent encoragié
 L'un sus l'autre, par grant air
 De cascun moustrer le desir
 16160 Qu'il avoient du dit tournoy,
 Quant evous, en tres bon arroy,
 Le chevalier de Cornuaille
 Qui leur desrompi la bataille,
 Parmi tant qu'il vint sus leur place
 16165 Ou tantost il entra en cace
 Apriès .ii. aultres chevaliers.
 Moult le veoient volentiers
 Les damoiselles de la loge,
 Car Melyador pas ne loge
 16170 En une place longement,
 Mais se remoustre telement
 Sus et jus, aval la besongne,
 Qu'il n'i a nul qui ne ressongne
 Les grans horions qu'il depart,
 16175 Se ce n'est cilz qui a grant part
 Dou tournoy et a sen honnour,
 Agamanor, qui ens ou jour
 Y fist moult d'apertises d'armes,
 Devant les loges et les dames.
 16180 Pas ne sçai s'il avoit envie
 Sus la bonne chevalerie
 Dont Melyador estoit plains,
 Mais moult desiroit c'a ses mains
 Il li peuist porter damage.
 16185 Une heure sus son avantage
 Le trouva, si com il m'est vis.
 Adonques fu la li devis *f. 119 c*
 Des damoiselles qui le voient,
 En disant : « Cil doi estre doivent
 16190 « Moult grandement recommendé.
 « Or regardons, pour le corps Dé,
 « Comment entre yaus se maintenront,

« Car hui .ii. fois trouvé se sont
 « Et combatu moult fierement. »
 16195 Et cil qui ont grant hardement,
 Et moult de vertu en leurs bras
 Qu'il n'ont mies pesans ne cras,
 Mais fort, et drois et aligniés,
 Fierent et frapent, ce saciés,
 16200 Desus les hÿaumes amont.
 Hardemens ensi les semont,
 Ce poet on loyaument bien dire,
 De l'un l'autre la desconfire.

16205 **C**HIL doi chevalier dessus dit
 Ne se combatent pas petit,
 Mais longement et a leur aise,
 Ce n'est pas drois que je m'en taise,
 Car il fõnt d'armes grans merveilles.
 Et toutesvoies les vermeilles,
 16210 A une blanche dame en mi,
 N'ont pas les blewes desconfi,
 Car li place la li demeure,
 Et me samble que pour ceste heure
 Agamanor chei a terre.

16215 Et tantost le vinrent requerre
 Li homme qui au tour estoient,
 Qui au relever les aidoient,
 Car autrement par verité
 Point ne se fuissent relevé.

16220 Tantost fu a cheval remis.
 Or est il, ce dist, ennemis;
 Au chevalier au soleil d'or,
 Quant bien batu l'a et encor
 Fait jus aler de son cheval.

16225 Agamanor parmi .i. val
 S'en est venus, car on l'ensengne,

f. 119 d

- Sus .i. chevalier de Bretagne,
 Qui nommés estoit Agoris.
 Il l'a a l'avantage pris,
 16230 Car illuecques le fist cheoir.
 Ceste empainte peut bien veoir
 Li rois Hermons de sa fenestre,
 Car, fust a senestre ou a destre,
 Il veoit aval et amont.
 16235 A ce pourpos a dit adont :
 « Cilz rouges chevaliers, voiiés,
 « S'est moult grandement revengiés,
 « Car il en a .i. abatu,
 « Qui avoit trop bien combatu
 16240 « Tout le jour et sans cheoir point.
 « Regardés encores : il point
 « Devers le plus fort de l'estour ;
 « Par armes poroit en ce jour
 « Avoir le pris c'on li calenge.
 16245 « Mais cilz est de plus grant loenge,
 « Ce m'est vis, qui le soleil porte,
 « Car tres vaillamment se deporté
 « A aler et venir par tout.
 « Hui, ens ou jour, l'ai veü moult
 16250 « De tres grans apertises faire.
 « S'en loe trop mieulz son afaire. »

- A** CES parolles deviser,
 Que si vous m'oés recenser,
 Estoient a tres bonne estrine
 16255 Florée et ma dame Hermondine. *f. 120 a*
 Si leur viennent a grant plaisance,
 Quant cils, par sa bonne ordenance,
 Sa gouvrenance et son arroi
 Se fait recommander dou roy.
 16260 Adonques respondi Florée :

- « Certes, monsigneur, sus la préé
 « N'i a chevalier qui le vaille,
 « Ne qui mieus se tiegne en bataille,
 « Ne qui tant face d'apertises. »
 16265 Tout ensi font la leurs devises,
 Et Melyador en la painne
 Est, qui moult bien tient sen alainne.
 Point ne va devers les plus foibles,
 Ne les lassés, ne les endoibles,
 16270 Mais chevauce contre les fors.
 Il est bien voirs c'Agamanors
 Se combati tres vaillamment,
 Et abati certainement
 Plus de .x. chevaliers ce jour.
 16275 Mais toutes fois, tant c'a l'onour
 Et a le loenge de tous,
 Non pas acordée au rebous
 Mais ensi qu'elle devoit estre,
 Melyador fait de lui nestre
 16280 De proeces oultre mesure.
 Tout ce jour en son armeüre
 Se tint sans recouvrer alainne,
 Qui estoit as aultres grant painne ;
 Mais point n'en moustra dou contraire.
 16285 D'une coursée s'ala traire
 Devers la fenestre Hermondine ;
 La ramena a bonne estrine
 Le tournoy, ferant, et frapant
 Et as chevaliers abatans, *f. 120 b*
 16290 Tant que les dames en disoient
 Ensi de li et devisoient :
 « Cilz chevaliers nous vient esbatre.
 « Veés, il met painne a abatre
 « Chevaliers. Il fait de son corps
 16295 « D'armes grans fais et grans recors. »
 Hiraut ne sont mies trop loing,

- Qui ont grant entente et grant soing
 Qu'il soit tres bien recommandés,
 Et dient en hault : « Regardés
 16300 « Dou chevalier au soleil d'or,
 « Comment il se maintient encor.
 « Il est en armes ossi frès
 « Et en ses coses ossi près,
 « Comme il fust en l'eure venus.
 16305 « Il est tres franchement tenu
 « A cheval, car hui ne cheï,
 « Ne onques ne li mescheï
 « Chi ne ailleurs, dont il vault mieux.
 « La renommée a en tous li[e]us
 16310 « De grant proece et de vaillance. »
 Tout ensi, par bonne ordenance,
 Hiraut dient la et recordent,
 Qui a l'un l'autre bien s'acordent,
 Et puis crient a haute vois :
 16315 « Le pris, le pris, l'onneur, c'est drois,
 « A celi qui le soleil porte,
 « Qui ci et ailleurs se deporte
 « A estre si bons chevaliers.
 « C'on en parole volentiers. »
- 16320 **M**oult fu cilz tournois biaux et gens,
 Et moult prisiés de toutes gens
 Qui le regardent environ.
 Ce jour maint pesant horion *f. 120 c*
 Y donna et rechet ossi
 16325 Li chevaliers c'on prise si,
 Qui se brise dou soleil d'or.
 Florée ne s'en poet encor
 Ravoir de dire a sa cousine :
 « Regardés, tres douce Hermondine,
 16330 « Comment nos chevaliers s'esprueve.

- « Tout ce qu'il encontre et qu'il trueve
 « Est abatu, voiant nos yeus.
 « Tout ensi me voelle aidier Diex,
 « Se onques vi tel chevalier.
 16335 « Comment poet il tant travillier,
 « Ne durer, ne souffrir la painne,
 « Ne demorer en sen alainne,
 « Car si cop noient n'afoblissent?
 « Je voi des chevaliers qui issent
 16340 « Et qui sont durement lassé,
 « Batu, fourmené et pressé,
 « Pour .i. peu rafreschir leurs corps ;
 « Mais cilz ne se traist point la hors,
 « Ançois se boute toutdis ens. »
 16345 Hermondine, qui a bon sens,
 Le prise ossi en son corage ;
 Dist qu'il passe de vasselage
 Tous les aultres certainement,
 Et que selonc son jugement
 16350 Nulz ne li torra la l'espée,
 Car moult bien sera acatée
 Par proece et par haute emprise ;
 Ensi Melyador on prise
 Et il l'acquiert par son bien fait.
 16355 Li hiraut qui doivent dou fait
 Jugier, et qui sont la au tour,
 Et qui poursieuent tout le jour *f. 120 d*
 Le mieulz faisant a lor maniere,
 Dient : « Ceste journée chiere
 16360 « A ce chevalier demorra,
 « Qui ou bleu le soleil d'or a. »
 Adont s'en viennent, ce me samble,
 Vers li et puis dient ensamble :
 « Or avant, sire chevaliers.
 16365 « Certes en vous est li mestiers
 « D'armes tout plainnement entés.

- « On trueve en vous les volentés
 « Si grandes pour a honneur tendre,
 « C'on ne vous ose as coups attendre. »
- 16370 Melyador, qui les caroles
 Ront, des plus fors de ces paroles
 N'est point vraiment courouciés :
 Car il scet bien que li grans chiés
 Ou toute sa pensée gist
- 16375 Est la, et ot ce c'on en dist.
 Pour ce se met il a l'esprueve
 Contre tous et son corps esprueve.

- A ^{GAMANOR} moult honteus fu
 Dou chevalier au bleu escu,
 16380 Qui l'avoit ce jour fait cheoir,
 Car au matin cuidoit pour voir
 Que on ne le peuist abatre
 Et qu'il deuist, par bien combatre,
 Avoir le pris de ce tournoy.
- 16385 Et quoi qu'il eüst grant anoi
 Et qu'il fu honteus pour les dames,
 Si dist il : « Ce n'est mies blames
 « De cheoir quant uns chevaus chiet.
 « A milleur de moy bien meschiet ;
- 16390 « Mais c'est blasmes se ne me venge,
 « Et a l'espée ne calenge f. 121 a
 « La journée au chevalier d'or. »
 Dont qui veüst Agamanor
 Poindre le cheval par irour
- 16395 Et li ferir dedens l'estour,
 Bien desist : « Vela chevalier
 « Qui scet grandement tourniier
 « Et qui se porte vaillamment. »
 Bien est sieuis certainement
- 16400 Et de hiraus et de pietaille,

- Qui environnent la bataille,
 Et dist on : « Avant, chevaliers !
 « Vous estes moult bien coustumiers
 « De vous maintenir par arroi,
 16405 « Sus les camps, en .i. tel tournoy
 « Comme cilz ou encor plus grant. »
 Evous Agamanor entrant
 En une route grande et fiere
 Ou nul n'en y a qui ne fiere
 16410 De l'espée a tout son pooir.
 Agamanor, qui grant voloir
 A qu'il se puist contrevengier,
 Va encontre .i. chevalier
 De blanc a une noire bende.
 16415 Sus li son mautalent amende,
 Car telement le porte a terre,
 Que li hÿaumes tout jus serre
 En terre et les piés contremont,
 Ens ou regart dou roy Hermont
 16420 Qui le cop grandement pris a.
 Agamanor son tour pris a
 En [s'en] venant vers Hermondine,
 Qui le remoustre a sa cousine
 Et dist : « Veci le chevalier,
 16425 « Qui devant Tarbonne avanthier, f. 121 b
 « Eut le pris, ensi que vous dittes.
 « Ce sont choses toutes escriptes
 « Qu'il est biaux chevaliers de corps,
 « Bien tournïans, hardis et fors,
 16430 « Et croi qu'il le conquist de droit. »
 Florée qui pas n'en vodroit,

16407-16451. *Le premier fragment de A débute par le vers final d'une strophe, auquel succède une strophe de 56 vers, relative à l'épisode qui suit et où l'on ne retrouve que quatre vers donnés ici par B (les vers 16414-16416 et 14619). Nous reproduisons cette strophe à la fin du présent volume.*

- Fors a point, parler, respondi :
 « Bele cousine, je vous di
 « Qu'il est chevaliers voirement
 16435 « Preus et hardis, mes nullement
 « Il ne poroit durer en place
 « A celui que je voi en face,
 « Pas ne sçai comment on l'appelle,
 « Mais il siet moult bien en sa selle
 16440 « Et se porte ce soleil d'or ;
 « Vous ne l'avés veü encor
 « Cheoir et cilz la est cheüs. »
 Ensi est la ramenteüs
 Li chevaliers, par son bien fait,
 16445 Et li dis tournois se parfait
 Qui jusqu'a la vesprée dure.
 Et la mainte belle aventure
 Y eut faite pour celi jour
 En painne, en traveil, en suour ;
 16450 Ne sçai comment il peürent tant
 Tournoiier tout en .i. estant.

- T**OUT ensi se continua
 Cilz tournois, qui point n'anoia
 As dames qui le regardoient,
 16455 Mais li chevalier qui estoient
 Sus les camps, en haire, et en painne
 Et priès jusqu'a la grosse alainne,
 Li pluseur caciet et menet,
 Vosissent estre ramenet
 16460 Ens el bois, a leur logeïs.
 Ensi dura cilz capleïs

f. 121 c

16453 Cilz, *A* Chilz. — 16458 pluseur, *A* pluisour. — 16459
 estre ramenet, *A* iestre remenct. — 16460 el bois, *A* es bois. —
 16461 Ensi dura cilz capleïs, *A* Tant dura chils fors capleïs.

- Jusques au soir sans nul sejour.
 Quant on vit decliner le jour,
 On sonna, dedens le chastiel
 16465 De Signandon, .i. son moult biel :
 Ce fu un cor a longe alainne.
 Cilz sons les chevaliers remainne
 Incontinent devers le bois ;
 Lors qu'il en oïrent la vois,
 16470 Il cesserent de toutes pars.
 Tantos fu li tournois espars,
 Et s'en vont ens el bois rembatre,
 Chi .v., chi .vi., chi .iii., chi quatre,
 Dont devant estoient parti.
 16475 La sont en moult tres dur parti,
 Li varlet qui n'ont point de mestre :
 Les camps a senestre et a destre
 Cercent et font tant de tous lés,
 Que leurs mestres ont retrouvés.
 16480 Chiaus qui sont mort pleurent et crient,
 Et des aultres tout hors les trient ;
 Les mehagniés a point remettent.
 Ensi, sus les camps, s'entremettent
 Li escuier de mettre a point
 16485 Tout ce qui leur touce et leur point ;
 Et cilz, qui sen signeur retrueve
 En santé, il li prie et rueve
 Qu'il s'en retourne vers le bois.

16462-16471 *Ces dix vers sont représentés dans A (1^{er} fragment par vingt-huit vers entièrement différents qu'on trouvera à l'Appendice. — 16472-16473 Ces deux vers sont transposés dans A qui les reproduit ainsi : Chi .v., chi .vi., chi .iii., chi quatre || Et s'en vont ens el bois rabatre. — 16477 a senestre et a destre, A a diestre et a senestre. — 16481 Et des aultres tout hors, A Et de l'un l'autre hors. — 16482 Les mehagniés, A Et les blechiés. — 16485 qui leur touce, A qu'il leur touche. — 16486 cilz, A chilz. — 16487 En santé, A en bon point ; — rueve, B trueve. — 16488 vers, A viers.*

- 16490 Agamanor, a ceste fois,
 O Bertoulet s'en est ralés,
 Et Melyador d'autre lés.
 Cescuns va ou il est logiés,
 Desarmés est et refroidiés, f. 121 d
 Et boivent cescuns .i. petit
 16495 Sus l'erbe; il n'ont la aultre lit.

- O R vous dirai dou roy Hermont
 Et de sa fille, qui amont
 S'en sont ralé ens ou chastiel.
 Damoiselles et damoisel
 16500 Les convoient en grant arroy ;
 La ont maint joli palefroy
 Et tamaint cheval ensellé.
 En grant reviel s'en sont ralé
 De trestoutes menestraudies.
 16505 Li rois et les dames prisies
 Sont rentré dedens le chastiel,
 Et la s'ordonnent bien et biel
 De reprendre nouviaux abis.
 Ce sera uns tres grant delis
 16510 Que des dames veoir en face.
 Melyador voelt bien c'on sace,
 Voires li et ses escuiers,
 Ailleurs ne baille ses cuidiers,
 Qu'il ira veoir Hermondine.
 16515 A Lansonnet en determine

16490 Bertoulet, *A* Biertoulet. — 16493 Desarmés est, *B* Et desarmés. — 16495-16496 *A* remplace ces deux vers par les suivants : Et esventés ens ou biel ombre || Dou bois qui biaux estoit sans nombre. — 16498 chastiel, *A* castiel. — 16499 damoisel, *A* damoisiel. — 16502 cheval, *A* ceval. — 16503-16504 *A* remplace ces deux vers par les suivants : Et a che qu'ils s'en sont ralé || Et ensi rentré en le porte.

- Son pourpos pour avoir conseil,
 Et cilz respont : « Je m'esmerveil
 « Comment tout ce se pora faire. »
 Et Melyador tout l'afaire
 16520 Li conte et dist : « Bien se fera,
 « On ira par tout et venra ;
 « J'a n'i ara porte fremée.
 « Pas ne seroit de moy amer
 « Parfaitement belle Hermondine,
 16525 « Se li et sa bonne cousine
 « Ne veoie avant mon retour
 « Et, se je puis venir a tour, *f. 122 a*
 « A tout le mains je parlerai
 « A Florée, et li conterai
 16530 « La grignour part de mon entente.
 « Elle est bien si france et si gente
 « Qu'en tous cas me fera adrece. »
 Adont Melyador se drece,
 Qui estoit vestis et parés,
 16535 Et dist : « Lansonnet, demorés.
 « Je m'en vois, car il est droite heure. »
 A ces mos, la plus ne demeure,
 Mais se part et se met a voie.
 Lannonnès rien ne le convoie,
 16540 Car point ne le voelt cilz souffrir.
 Tout a piet et de grant desir,
 Parmi uns prés ou moult fist biel,
 S'en est venus jusc'au chastiel.
 La porte trueve toute ouverte,
 16545 Il se boute ens, a le couverte.
 De nullui ne fu cogneüs,
 Car la de grans et de menus
 Estoit la voie toute plainne.
 Ensi c'aventure le mainne,
 16550 Il s'en est entrés en la sale
 Ou on carole ja et bale,

Et s'ensonnient de piper
Li menestrel pour le souper.

- 16555 **E**^N demetrues que la estoit
Melyador, qui s'arrestoit
En la sale avoëch yaus .cc.,
Evous venues o leurs gens
Les dames et les damoiselles,
Par ordenances, grans et belles.
16560 Tout premiers estoit Hermondine,
Et puis Florée sa cousine
Et des aultres moult grant fuison.
Toute estoit plainne la meson
De jeux, de solas et de joie,
16565 Ne on ne veoit el sur voie.
On a lavé; assises sont.
La fille au gentil roy Hermont
Est assise a la haute table,
En lieu moult biel et moult notable
16570 Qui estoit ordonnés pour li.
Sa cousine s'assist ossi,
.I. moult petit par desous soy,
Et trois dames après, ce croy,
De Northombrelande et d'Escoce.
16575 Il n'est riens que laiens on ot ce,
Fors menestrelz qui se demainent.
Adont li chevalier enmainnent
Seoir dames et damoiselles
As aultres tables moult tres belles.
16580 Tout fu de tele compaignie
La sale a ce dont raemplie.
Li rois Hermons, dedens sa cambre
Qui estoit listelée d'ambre,
Avecques pluseurs chevaliers
16585 Les quelz il veoit volentiers,

f. 122 b

- S'assist en yaus moult honnourant
 Et le roy Artu coulourant,
 Car il venoient de sa court.
 On ne le fist mies trop court
 16590 Ce souper, saciés le pour voir,
 Mais fisent moult bien leur devoir
 Li chevalier de bien servir;
 C'est plaisans cose dou veïr.
 Melyador par tout se boute.
 16595 Quant il veoit une grande route *f. 122 c*
 De gens par devant Hermondine,
 Il fait d'yaus verriere et gourdine
 Pour mieulz regarder a sen aise
 Ceste qui bien vault qu'il li plaise,
 16600 Car il l'aime sur toutes riens.
 Haro! que ce li est grans biens,
 Quant bien le poet imaginer
 Et .i. regart en priesse embler,
 Et, quant ensi qu'en emblant l'a
 16605 Regardé, il se traist de la
 Pour les mestres d'ostel qui vienent,
 Et qui cerges en leurs mains tienent
 Dont il resclarcissent par tout.
 Melyador, a un debout
 16610 De la sale s'en est venus,
 Et la ne se tient mies mus
 Pour une cançonnete faire;
 Car vis li est que necessaire
 Li soit, c'a se s'ordonne et pense,
 16615 Quant il voit priès qu'en sa presense
 Celle qui est dame de soy.
 Adont commence en bonne foy
 Une balade incontinent.
 Lors qu'il y entra erranment
 16620 Le fist ains c'on euist soupé,
 Et, pour ce que j'en ay hapé

La matere ensi qu'il le fist,
 Vous l'orés, car cilz le me dist
 Qui le trouva de puis escrite
 16625 En une cedula petite.

Balade.

AUCUN dient c'amant ont trop grant painne,
 Pour bien amer et loyauté tenir;
 Pour ce, s'il ont .i. bien une sepmainne, *f. 122 d*
 Encontre ce leur fault .c. maus souffrir.
 16630 Mais a ce point ne me voel acorder,
 Car Amours poet tout ce bien amender.
 Par .i. seul eur c'on en poet recevoir,
 Couvient il dont tout l'anoi oublier
 C'on ot onques ou puist jamais avoir.

16635 SI doucement Amours ses servans mainne
 C'on doit tous jours son voloir acomplir,
 Mais pour ce voir dou tout en son demainne
 Je me sui mis sans jamais repentir.
 En ce pourpos voel fermes demorer,
 16640 Si ne m'en poet jamais nullui oster;
 Car, pour certain sçai, a son doulz voloir,
 Couvient il dont, etc.

OR li pri dont que de ma souverainne
 Puisse, en brief temps, par sen honneur joïr;
 16645 Car c'est tout voir et bien cose certainne
 Que tout mon bien me poet de ce venir.
 Par ce puis jou ma joie recouvrer;
 Si l'en lairai de ce tout ordener,
 Que je sçai bien par son tres grant pooir,
 16650 Couvient il dont, etc.

- ENSI, par soy esbanoiant,
A une fenestre apoiant,
Fist Melyador la balade
De coer haitiet, non pas malade,
16655 Mais joieus et tres envoisiet.
Et quant il l'eut metrefiet
Et recordé, si dist pour vrai :
« Jamais jour ne l'oublierai. »
Et ensi qu'il revint arriere,
16660 Il y avoit moult grant lumiere
Par devant la table a sa dame;
Car on estoit sus l'ain, par m'ame, *f. 123 a*
De lever et oster les tables.
Cilz en qui le coers est estables
16665 De bien amer, il n'est pas doubte,
S'est tantost remis en le route
Des chevaliers qui la estoient,
Et qui en estant s'arrestoient
Par devant la table Hermondine.
16670 Si le regarde et sa cousine,
Que veü avoit aultre fois;
Moult li est ce regart courtois,
Doulz, gratieus et tres plaisans.
On se leva, car il fu temps,
16675 Dont commencierent a piper
Menestrel, et hault a tromper,
Et a ouvrer de leur mestier.
Signeur, dames et chevalier
Se prennent errant par le doy,
16680 Et commencent par esbanoy
A caroler .i. seul petit;
Et puis tantost, sans contredit,
Sont de ce rentré ens es danses,
Et la furent ces ordenances
16685 Bien demi heure maintenues.

- Evous la pluseurs vois venues,
 En disant : « Dames, c'or partés
 « Et dou pris ordonner venés,
 « Car li rois lassus vous attent. »
 16690 Et quant Melyador entent
 Ce parler, si dist qu'il ira
 La ou le pris se jugera,
 Car toutes gens de bien iront.
 Les dames se partent adont
 16695 Et li chevalier tout en l'eure;
 Nulz en la sale ne demeure *f. 123 b*
 Qui soit tailliés de donner pris.
 Le chemin d'une cambre ont pris
 Ou li rois estoit proprement,
 16700 Qui ne voelt mies sobrement
 La dou bleu chevalier parler,
 Mais en tous cas recommander.
 Li pris valoit que tous jugiés,
 Car si fort estoit entechiés
 16705 De proeces, de chief en cor,
 Li chevaliers au soleil d'or,
 C'on li donne a plainne huée
 Le pris dou tournoy et l'espée.
 Adonques ceste voie s'espant.
 16710 Chevaliers et dames errant
 Devers la sale s'en retournent,
 Et hiraut, qui point ne sejourment
 De hault criier a clere vois,
 Dient en cheminant envois :
 16715 « Le pris, le pris au vaillant homme,
 « Que le bleu chevalier on nomme,
 « Celi qui le soleil d'or porte,

16693 *Ici commence le second fragment de A.* — 16702 Mais en tout cas recommander, *A* Mais grandement recoumender. — 16705 proeces, *B* proeches. — 16707 donne a plainne, *A* doune a plaine. — 16713 criier, *A* crier. — 16716 nomme, *A* noume.

- « En qui proece se deporte !
 « Conquis a l'espée et de droit
 16720 « Nulz n'est qui tollir li vodroit,
 « Car il l'a tres bien acaté.
 « Hui ne le veïsmes maté,
 « Ne faire samblant de guerpir
 « Le tournoy, mais toutdis ferir
 16725 « Et chevaucier sus les plus fors. »
 Chil hiraut salent errant hors
 Dou chastiel, et tout ensi crient
 En la place, et en criant dient :
 « Le pris, le pris au chevalier
 16730 « Qui a hui volut tournoier, *f. 123 c*
 « Si vaillamment et si a point,
 « Que nulz n'est trouvés ens ou point
 « De lui, ne en sa grant vaillance !
 « On ne le poet a la samblance
 16735 « Des dames voir emploier mieuls.
 « Conquis l'a, si nous aÿt Dieus,
 « Si vaillamment et si a droit,
 « Que, qui retollir li vodroit,
 « On li feroit grandement tort.
 16740 « C'est cilz qui mies ne se tort
 « De proece dont on le prise
 « Et qui d'un soleil d'or se brise. »

16718 qui, *A* cui. — 16721 acaté, *A* achaté. — 16722 Hui ne le veïsmes, *A* Hui ne le vismes nous. — 16724 Le tournoy, *A* La sele. — 16725 chevaucier, *A* cevaucier. — 16727 chastiel, *A* castiel. — 16728 En la place, *A* En le plache. — 16730 Qui a hui, *A* Qui hui a. — 16733 vaillance, *A* vaillanche. — 16734 poet a la samblance, *A* puet a la samblanche. — 16735 voir emploier mieuls, *A* point emploier mieus. — 16740 cilz, *A* chils. — 16741 proece, *A* proeche.

- E**NSI la vois s'espant par tout.
 Melyador, a .i. debout
 16745 De la cambre ou dit on avoit
 Le pris, a ce dont se tenoit
 Et ne visoit a aultre cose
 Que Florée a qui moult bien ose
 Parler, ce li vient en samblance,
 16750 Passe par la, en ordenance,
 Ensi que passer li couvient;
 Au dehors de l'uis il se tient.
 Tortis passent a grant randon
 Et chevalier en abandon,
 16755 Qui par devant les dames vont.
 Hermondine passa adont,
 Et tantos apriès sa cousine.
 Melyador .i. peu l'encline,
 Par maniere de contenance,
 16760 Et le trait a li par le mance
 Et puis tantost le lait aler.
 Mais il adreça son parler
 Tout en bas, en disant ensi :
 « Damoiselle, je vous suppli *f. 123 d*
 16765 « Que dou chevalier vous souviegne,
 « S'il est ensi c'a tour aviegne,
 « Qui se combati l'autre fois
 « Encontre Camel de Camois
 « Et cui donnastes l'anelet. »

16747 cose, *A* coze. — 16748 qui, *A* cui. — 16749 sam-
 blance, *A* samblanche. — 16750 ordenance, *A* ordenanche. —
 16754 abandon, *B* abandon. — 16759 contenance, *A* contenance.
 — 16760 mance, *A* manche. — 16762 Mais il adreça son, *A* Mais
 pas n'en laissa a. — 16763 Tout en bas, en disant ensi, *A* A lui,
 enchois li dist ensi. — 16765 souviegne, *A* souvigne. — 16766
 S'il est ensi, c'a tour aviegne, *A* S'il est ensi, c'a tour il vigne. —
 16769-16774 Voir, à l'Appendice de ce volume, les dix vers qui,
 dans *A*, prennent la place des six vers que donne *B*.

- 16770 Florée cuida d'un varlet
Estre aresnie vraiment ;
Si passa outre incontinent ;
Mais, tout en alant ses sentiers,
Elle dist : « Compains, volentiers.
- 16775 « Veci voir le pris qu'on li porte.
« Ou est il ? Est il a le porte ? »
Et cilz respont, tournant son sens :
« Damoiselle, il est hors ou ens. »
Plus n'i eut dit a ceste fois.
- 16780 Melyador se tint tous quois.
Et Floré[e] vint en la sale.
Saciés que pas ne tint a gale
Li bleus chevaliers la response,
Ançois tous courouciés s'esconse
- 16785 Et se met en un angelet.
Les danses et Florée let,
Et se repent qu'il est venus.
A par soy dist : « Bien sui tenus
« Quant on m'a respondu ensi.
- 16790 « Et ceste que j'amoie si
« S'est de moy si briefment passée ;
« Ensi c'une femme lassée,
« Qui n'a mies trop grant desir
« De nulles nouvelles oïr,
- 16795 « M'a respondu et m'a fait signe.
« Las! pour quoi vous ains, Hermondine,
« Car vis m'est que je pers ma painne.
« Espoir telz mies ne se painne *f. 124 a*
« A la vostre amour que je fai
- 16800 « Et jusques a ores fait ay,

16775 Veci, *A* Vechi; — qu'on, *B* c'on. — 16777 cilz, *A* chils. —
16779-16825 Ces quarante-sept vers sont représentés dans *A* par
sept vers qu'on trouvera reproduits dans l'Appendice. — 16790
que, *B* qui.

- « Si fort ne si destroitement,
 « Ce sai je tout certainement,
 « Et si n'en ay fors que les haïres,
 « Car vous a moy ne pensés gaires
 16805 « Et ossi ne fait vo cousine,
 « Si com j'en ay veü le signe.
 « Tost sont femmes en brief muées ;
 « Ensi que vens vont leurs pensées.
 « Creü n'euisse point orains,
 16810 « Pour tout l'avoir qui est a Rains,
 « Que Florée m'eüst ce fait. »
 Adont sus cel estat le lait
 Melyador tout courouciés,
 Et s'en est venus de reciés,
 16815 La ou il vit la grignour presse,
 Et a veoir les danses presse,
 Qui estoient ja commencies
 A tel son de menestraudies,
 C'on ne pooit la oïr goute.
 16820 Or est Florée entrée en doubte
 Qu'elle n'ait trop mal respondu.
 Trop se repent quant attendu
 N'a plus et parlé a cel homme.
 Si pensieue est en fin de somme,
 16825 Que elle en piert la contenance,
 Et s'en met en tele ordenance
 Que sa cousine s'en perçoit.
 Vers li vint ou elle le voit
 Et li dist : « Que vous fault, cousine ? »
 16830 Et ceste, qui fu toute estrine,

16817 commencies, *A* coumenchies. — 16819 goute, *B* goutes.
 — 16820 doubte, *A* doupte, *B* doubtes. — 16823 cel, *A* cest. —
 16824 en fin, *AB* la fin. — 16825 la contenance, *B* moult conte-
 nance. — 16826 Et s'en met en tele ordenance, *A* Et se met la
 telle ordenanche. — 16827 perçoit, *A* perchoit. — 16828 Vers li
 vient, *A* Viers lui vint. — 16830 ceste, *A* celle.

- Li dist : « Pour quoi le dittes vous ? »
 — « Pour ce qu'il samble tant qu'a vous *f. 124b*
 « Que vous soiés .i. peu malade. »
 Dist ceste : « J'ay le coer tout fade
 16835 « D'une pointure, Dieu merci,
 « Qui m'est sourvenue droit ci;
 « C'est une cose merveilleuse.
 « Je ne sçai s'elle est perilleuse;
 « Mais volontiers .i. peu iroie
 16840 « En ma cambre, et la me tenroie
 « Tant qu'en point fuisse revenue. »
 Et ceste, qui pas ne l'argüe,
 Li acorde legierement.
 Adonques tout secretement
 16845 Se part Florée a quelque painne
 Que ce soit, et o lui n'enmainne
 Que une seule pucelete,
 Espoir que de .xii. ans jonete.
 Et se departoit sus l'entente
 16850 Que ses sens tout ensi le tente,
 Et li fait proprement a croire
 Que se ceste matere est voire,
 Que Melyador est en place
 Entrues c'on deduit et solace.
 16855 A ce qu'elle a oÿ devant,
 Il se traitra tantost avant;
 A tout le mains en ora elle
 Aucune certaine nouvelle.

16832 vous, A nous. — 16834 ceste, A celle; fade, A sade.
 — 16835-16837 *Ces vers sont sensiblement différents dans A :*
 Et en bon estat, Dieu merchi; || Mais une pointure m'est
 chi || Avenue, moult merveilleuse. — 16848 de .xii. ans, A de
 .vi. ans.

- 16860 **M**ELYADOR, si m'aÿt Diex,
 Avoit veü devant ses yex
 La contenance d'Ermondine
 Et de Florée sa cousine,
 Car il n'avoit ailleurs regart.
 Et si tost qu'il voit qu'elle part,
 16865 Il tourne d'autre part sa teste;
 Si voit qu'elle vuide la feste. *f. 124 c*
 A ce premiers le sieut de loing.
 On n'avoit laiens aultre soing
 Que d'esbatre et solatier.
 16870 Pluiseurs dames et chevalier
 Virent bien Florée partir;
 Mais tout et toutes, sans mentir,
 Cuidierent bien a celle fois
 Que leur dame a baissete vois
 16875 Li euist quelque cose dit
 Qu'il li fausist sus son abit,
 Se l'alast secretement querre.
 Pour ce n'en volt on plus enquerre.
 Et Florée, qui bien el pense,
 16880 Voit revenir en sa presense
 L'omme qui ot parlé a li.
 Ce grandement li abelli
 Et li dist : « Traiiés vous avant.
 « N'estes vous cilz qui au devant
 16885 « Telz parlens ores me mesistes,
 « Et qui si me ramentesistes
 « Le chevalier au soleil d'or ? »
 — « Oil, voir, et le fay encor. »
 Dist Florée : « Et qui estes vous ? »
 16890 Respont cilz : « C'est ci entre nous
 « A dire. Et ne me cognissiés ? »
 — « Non voir ; mais moult m'esjoïssiés
 « Quant dou chevalier me parlés.

- « Dittes quel cose vous volés
 16895 « Et je le ferai vraiment,
 « A mon pooir tout prestement. »
 — « Damoiselle, je sui cilz voir,
 « Puis que tant vous en fault savoir,
 « Qui fu anten en vo chastiel,
 16900 « A cui vous donnastes l'aniel. » *f. 124 d*
 — « Et ou est il? » — « Il est ou doy
 « De celle pour qui je le doi
 « Mieus amer, assés que pour mi :
 « Pas n'a granment que je li vi. »
 16905 Adont Florée se repret,
 Qui par ses parolles aprent
 Que c'est la li bleus chevaliers :
 « A! » dist elle, « doulz sires chiers.
 « Aventure ci vous amainne,
 16910 « Et s'avés hui eü tel painne
 « De tournoier trestout le jour,
 « Sans avoir noient de sejour.
 « Comment le poés vous porter? »
 — « Dame », dist il, « au deporter,
 16915 « Avoech vous et vostre cousine,
 « Porteroyie bien a l'estrine
 « Plus grant painne que ne soit ceste. »
 Florée adont baisse le teste
 Et dist tout bas : « Alons, alons.
 16920 « Longement droit ci ne parlons.
 « Nous arons bien ailleurs matere
 « De parler en cambre plus clere
 « Que ne soit ceste voie sombre ;
 « Mais tout de gret ay pris cel ombre
 16925 « Pour parler a vous en requoi. »
 Dist Melyador : « Bien le croi.
 « Vous estes sage et bien couverte,
 « Et au besoing assés ouverte
 « Pour faire toutes riens a point.
 16930 « Sur tout ce, je ne pense point. »

- EN une cambre belle et gente,
 Qui en la garde estoit d'Argente,
 La plus secrée de leur dame,
 En mena Florée, par m'ame, *f. 125 a*
 16935 Melyador son chevalier.
 Quant ens fu l'uis cloÿ arrier,
 Ce dist : « Argente, douce amie,
 « Veci cesti, n'en doubtés mie,
 « Qui fu a Montsegur l'autrier,
 16940 « En estat que d'un mercenier.
 « Di je voir? Regardés le bien. »
 Et ceste, qui sur toute rien,
 Fu dou parler esmervillie,
 .I. petit y merancolie
 16945 Et respont : « Certes, je ne sçai.
 « Le marchant bien avisai,
 « Mais point ne ressamble cesti.
 « Je le vi aultrement vesti
 « En gise d'un droit paisant,
 16950 « Et cesti a le corps plaisant,
 « Bien tailliet et de belle fourme.
 « Espoir mies ne vous enfourme
 « De verité a sa parole ;
 « Vous poriés bien estre trop mole
 16955 « De lui trop legierement croire. »
 Dist Florée : « C'est cose voire. »
 — « Pensés vous dont c'uns merceniers
 « Fust cilz, qui ot de vos deniers ? »
 — « Certes, nennil, pas ne le taille
 16960 « Que tel cose faire li faille.
 « C'est li bleus chevaliers sans doute,
 « Qui a hui passée la route
 « Dou tournoy et conquis le pris.

16937 Ce dist, B Et dist.

- 16965 « Plus le regart, mieulz l'ay appris ;
 « Car je l'euch ja en mon chastiel,
 « Bien .i. mois, et me fist .i. biel
 « Et tres grant service, par m'ame,
 « Et ossi fist il a vo dame, *f. 125 b*
 « Ma cousine, et tout en .i. mois :
 16970 « Monsieur Camel de Camois
 « Occist par sa chevalerie.
 « Argente, ma suer, je vous prie,
 « Que vous li faites bonne chiere ;
 « Car, pour l'amour de ma tres chiere
 16975 « Cousine, est il droit ci venus,
 « Et ne l'i scet nulle ne nulz,
 « Fors vous et moy, dont je vaulz mi[e]ulz.
 « Vous avés esté ens es lieux
 « Pluiseurs, ou parlé en avons
 16980 « Et souhediet plus c'onques homs
 « Ne fust desirés ; je le croy.
 « N'en aiiés doubté ne effroy ;
 « Car, se nul contraire y sceuisse,
 « Ci point amené ne l'euisse. »

- 16985 * **M**ELIADOR estoit a part
 Trais, et n'ot mies quel depart
 De biens Florée la ordonne,
 Et quoiement les seme et donne
 Pour li, afin que mieulz en vaille
 16990 Et que la pucelle, sans faille,
 Qui estoit de sa garde dame,
 Amoureusement le regarde.
 Bien en avoit oÿ parler
 Sa dame, et si savoit tout cler
 16995 Que cilz tournois estoit emprís
 Pour veoir s'il avoit le pris
 Et la grande chevalerie

- Que Florée, sa bonne amie,
 Recordoit de lui et disoit;
 17000 Mais toutes fois elle visoit
 Que sen honneur y fust gardée.
 Pour ce s'est encor retardée *f. 125 c*
 De Melyador festiier;
 Mais se va moult ensonniier
 17005 Au parler et dist : « Las ! Florée,
 « Vous savés comment m'est donnée
 « Et mise vo cousine en garde.
 « C'est ci uns poins ou je regarde,
 « Car je crieng trop blasme et reproce.
 17010 « Que diroit ja li rois d'Escoce
 « Nos sires, se ceens venoit
 « Et .i. seul chevalier trouvoit,
 « Soit de Gales ou de Bretagne,
 « Parlant a moy par voie estragne
 17015 « Ou a sa fille nostre dame ?
 « Je seroie morte, par m'ame,
 « Ou virgondée a tous jours mes.
 « Trop bien me faut garder ma pais
 « Se je voel demorer ceens,
 17020 « Pour l'envie de toutes gens
 « Qui sont dedens ceste maison.
 « Encor y a aultre raison
 « Qui m'est revenue au devant,
 « Que je vous dirai maintenant.
 17025 « Ma dame et la vostre cousine
 « Seroit ja certes moult estrine
 « Et grandement esmervillie,
 « Se ci entroit a chiere lie
 « Et elle trovast sans savoir
 17030 « Ce chevalier avoec moy, voir.
 « Elle m'en saroit trop mal gré,
 « Tant cognoi je de son secré. »

- « **E**T que ferons dont, douce amie ?
 « Aultre conseil n'i perçoi mie,
 17035 « Il couvient que ceens demeure. »
 Et Argente respont en l'eure : *f. 125 d*
 « Je le vous dirai volentiers,
 « Ou cas que c'est li chevaliers
 « Dont vous recordés si grant bien ;
 17040 « Car je ne voel sur toute rien
 « Faire chose ou reprise soie.
 « Je le mettrai hors de voie,
 « En une cambre tout par li,
 « En lieu gratieus et joli,
 17045 « Ou il sera tout a sen aise.
 « Mais, belle dame, qu'il vous plaise
 « Et vous me dirés au sourplus
 « Que je ferai, et sans refus
 « Je le ferai, s'il se poet faire. »
 17050 Florée, qui perçoit l'afaire
 D'Argentine, et trop bien le sent,
 A ceste parolle s'assent,
 Et fu en l'eure consillie
 De respondre et appareillie
 17055 De donner conseil a son gré.
 Adont li recorde en secré
 Comment des danses se parti,
 Pour ce que elle avoit oÿ
 Ce chevalier ensi parler,
 17060 Quant en sale s'en peut aler.
 « Je vous dirai que je ferai.
 « Sus ce lit je me mettrai,
 « Et ferai moult fort le malade,
 « Le pesant de corps et le fade ;
 17065 « Et lors que je serai couchie,
 « Vous irés toute couroucie
 « A ma cousine et li dirés,

- « Coiement ou vous le verés,
 « Ma maladie a bonne entente.
- 17070 « Je le sench bien vers moy si gente, *f. 126 a*
 « Si appareillie et si propre,
 « Que ja n'ara le coer si sobre
 « Que tantost ne viegne vers moy;
 « Et quant ci sera, par ma foy,
- 17075 « Je le cuide si biel attraire
 « Et par mes paroles tant faire
 « Qu'en riens n'en serés demandée,
 « Mais tout plainnement escusée.
 « Que vous semble? Ay ge bien visé? »
- 17080 Et celle n'a riens devisé,
 Car la parolle bien li plaist.
 Elle dist : « Oil. » Lors se taist,
 Et Florée s'en vient arriere
 Tout en riant, a lie chiere,
- 17085 Viers Melyador le courtois,
 Qui se tenoit illuech tous quois.
 Si s'escuse moult doucement,
 Sans parler ja trop longement,
 De ce c'on li fait tant de painne,
- 17090 Qu'il ne poet a sa souverainne
 Parler, sitos comme il vodroit;
 La moustre le tort et le droit
 De la damoiselle, sa dame.
 Melyador respont : « Par m'ame,
- 17095 « Florée, je l'escuse bien,
 « Car il li fault sour toute rien
 « Garder sa pais ; c'est vraie cose.
 « Elle ne poet faire ne ose,
 « Fors tout ce qu'elle a d'ordenance. »
- 17100 Adont Argentine s'avance
 Et dist au chevalier : « Alons.
 « Li chemins n'est mies trop lons,
 « Biaus sire, je vous voel mener;

- « Mais hui vous lairés gouvrener *f. 126 b*
 17105 « Par moy. » Et a ces cops desfrume
 Une cambre et feu y alume.
 La lait Melyador, et dist
 Tout ensi quant de la cambre ist :
 « Sire, ci vous couvient attendre
 17110 « L'eure c'on pora bonne prendre.
 « Ne le poons aultrement faire. »
 — « Bielle, » dist cilz, « sus vostre afaire
 « Ne voel je noient deviser. »
 La le va laiens enfremer
 17115 Argente, puis revient arriere,
 Et trueve ja en sa maniere
 Florée gisant sus .i. lit,
 Qui incontinent li a dit :
 « Douce Argentine, alés ent la,
 17120 « Car la nuit grandement en va,
 « Qui nous sera courte ains le jour. »
 Et Argentine, sans sejour,
 S'en part et en la sale vient,
 Et regarde, et voit c'on se tient
 17125 Tout en carolant par le doy,
 Et que menestrel sont tout quoi,
 Et cantoient cil baceler
 Et ces damoiselles moult cler.
 Si vint la si a point Argente
 17130 C'une pucelle jone et gente
 Avoit, comme lie et doucete,
 Commencié une cançonnete,
 Que sa dame ooit volentiers ;
 Car moult li plaisoit li mestiers
 17135 Dou canter, il n'est mies doubte.
 Argente se taist et escoute
 Que c'estoit uns rondelès gens,
 Qui doit bien plaire a jones gens *f. 126 c*
 Qui ont la pensée amoureuse.

17140 Ensi disoit la gratieuse
 Que vous orés recorder ci,
 Pour l'amour de son doulz ami.

Rondel.

17145 **S**E plus parfaitement pooie
 Amer mon douls loyal ami,
 Par ma foy, je l'amerioie.

ET bien faire le deveroie
 Pour la grant loyauté de li,
 Se plus, etc.

17150 **D**E bon voloir je le feroie,
 Dont je mach en garde de li
 Mon coer, quel part que je soie,
 Se plus, etc.

17155 **C**ESTE cançon ditte et finie,
 Argente fu appareillie
 De traire la dame a .i. lés,
 Et dist : « Dame, venés, venés.
 « Vostre cousine est en grant painne
 « D'une fievre qui le fourmainne,
 « Et si ne demande fors vous.
 17160 « Prendés a toutes et a tous
 « Congiet, et dittes qu'il s'esbatent
 « Et ja pour ce il ne s'abatent;
 « Assés en avés pour meshui. »
 Et celle qui n'amoit autrui
 17165 A painnes, fors que sa cousine,
 Prent errant congiet sus ce signe.

- Dont elle se tient enformée.
 Pour ce n'en fu en riens tourblée
 La feste, mais pria a toutes
 17170 Et a tous, pour oster les doubtes,
 Qu'il perseverassent en joie. *f. 126 d*
 Puis se part et se met en voie
 Entre lui et sa camberiere.
 Cilz qui portoient la lumiere
 17175 Par devant vinrent jusc'a l'uis.
 Plus avant n'alerent de puis
 Qu'il furent venu jusque la,
 A la cambre ou on leur donna
 Congiet. Adont s'en retournerent,
 17180 Et elles en la cambre entrerent;
 Si fu fremée bien et fort.
 Hermondine, pour reconfort
 Donner a sa cousine errant,
 S'en vient doucement par devant
 17185 Le lit, et illecques s'apoie.
 Florée ne se tient pas coie,
 Mais se plaint, quant la sent venue
 Sa cousine et vers li se rue
 Et dist : « Cousine, je sui morte.
 17190 « J'ai voir une fievre si forte,
 « Que j'en ay trop mal en la teste.
 « Irés vous meshui a la feste ?
 « Est li rois vos peres couciés ?
 « Pour Dieu, que point ne m'eslongiés !
 17195 « Si me ferés trop grant solas. »
 Et la belle respont en bas
 Et dist : « Cousine, volentiers.
 « Mais dittes moy dont cilz dangiers
 « De la fievre vous est venus.
 17200 « C'est uns maulz pesans et agus,

17177 jusque la, *B* jusqu'ala.

- « Et qui fait moult a ressongnier.
 « Voellés de vo santé songnier,
 « Je vous en pri, chiere cousine. »
 Et Florée .i. petit se cline,
 17205 Et dist : « Cousine, grant mercis. *f 127 a*
 « Mais cilz maulz seroit tost garis
 « Se vous voliés ja, au certain. »
 Lors mist Hermondine sa main
 Sus son cief et dist : « Oil, voir.
 17210 « Puis que santé poés avoir
 « Par moy, je voel que vous l'aiiés.
 « Vous est il par moy envoiiés? »
 — « Nennil. » — « Et de quoi vient il dont? »
 Et Florée adont li respont,
 17215 Qui .i. peu le voir li eskiewe :
 « D'une paour assés hastiewe,
 « Que j'ai eü apriès souper. »
 « Paour? » — « Voire, et esçou tout cler
 « C'on conçoit fievre par paour. »
 17220 — « Oil, voir. » Et lors sans demour,
 Hermondine, com esbahie
 Et qui bien cuide estre trahie
 Quant on a tourblé sa cousine,
 Dist, et prie et li moustre signe
 17225 D'amours, trop plus grant que devant,
 En disant : « Cousine, or avant.
 « Dittes qui vous a couroucie. »
 — « Il ne m'a point esleecie,
 « Mais irée, saciés de voir. »
 17230 — « Briefment il le me fault savoir.
 « Si en serés mieus apaisie. »
 Et Florée, qui est aisie
 De dire tout ce qu'elle voelt,
 Dist : « Cousine, estre ce ne poet
 17235 « Que vous le saciés. » — « Si ferai.
 « Au mains conseil y metterai



- « Ou ferai mettre par nos gens. »
 Dist ceste : « Il n'est point voir ceens,
 « De qui celle doubtte me vient. » *f. 127 b*
- 17240 — « Dont est il? savoir le couvient.
 « Trop y faites refus dou dire. »
 — « Je ne vous en ose desdire, »
 Dist Florée, « puis qu'ensi est.
 « Ceste fievre a present me nest
- 17245 « Pour cesti qui tout a vaincu,
 « Le chevalier au bleu escu
 « En qui proece se deporte;
 « Cesti qui le soleil d'or porte,
 « Qui ocist Camel de Camois,
- 17250 « Et par qui dou tout li tournois
 « A hui esté autorisiés,
 « Et qui a esté si prisiés;
 « Qui de droit a le pris conquis.
 « Orains il estoit toute nuis;
- 17255 « A moy envoia .i. varlet
 « Et me dist qu'il voloit de fet
 « Venir par dedens ce chastiel,
 « A cui que fust ou lait ou biel,
 « Pour vous veoir, c'est la substance,
- 17260 « Et feroit ce en men istance.
 « Il le me manda tout ensi
 « Et, lors que le varlet oÿ,
 « Je fui esbahie forment
 « Car ne vodroie nullement
- 17265 « Qu'il venist ceens sur nous deus.
 « S'est il bien si chevalereus
 « Qu'il n'i meteroit que le faire. »
 — « Adonques », dist la debonnaire
 Hermondine, comme courtoise,
- 17270 « Cousine, il me desplaist et poise
 « Que pour ce estes couroucie,
 « Car je le veroie une fie,

- f. 127 c*
- « Ossi volentiers a mon gré
 « Desarmé, que je l'ay armé
 17275 « Hui veü tres bien tournoier.
 « S'il fust venus esbanoier
 « Ceens, et vous le sceuissiés
 « Et moy, quel mal en euissiés?
 « Ostés vostre merancolie,
 17280 « Car j'en seroie plus jolie,
 « Certes, se veü je l'avoie. »
 Et quant ceste entent qu'en la voie
 Est sa cousine et amoureuse,
 Si en fu grandement joieuse,
 17285 Et puis .i. bien petit souspire
 Et dist : « Lasse ! je n'ose dire
 « Tout ce qui sus le coer me gist. »
 — « Pour quoi ? » Hermondine li dist.
 « Ceens poés faire a vostre aise.
 17290 « Riens ne dirés qui me desplaise,
 « Non plus qu'en la vostre maison »
 Et quant Florée ot tel raison,
 Si dist : « Cousine, grant mercis.
 « Je vous di vraiment que cilz,
 17295 « Qui a hui vaincu le tournoy
 « Et dont nous avons, vous et moy,
 « Tant parlé puis .i. mois en ça,
 « Est ceens. » Adont li compta
 De mot en mot comment il vint,
 17300 Et comment aler le couvint
 En une cambre pour Argente,
 « Qui en fist trop fort la dolente,
 « Quant jusc'a ceens l'amenay.
 « Certes, cousine, veü n'ay
 17305 « Ne ne verai en mon vivant
 « Chevalier de tel couvenant,
 « Plus gratieus ne plus joli,
 « Ne a qui mieulz aviegne a li
- f. 127 d*

- « Uns grans biens, et il l'ara voir.
 17310 « Il a hardement et voloir,
 « Corps, proece et grant renommée,
 « Et si estes de li amée
 « Sur toutes riens, je vous creante ;
 « Car pour vostre amour recreante
 17315 « Tous chevaliers et lait aler,
 « Sitost que il les ot parler
 « De vous et de la queste ou sont
 « Et que pour vostre amour il font,
 « Et les envoie au roi Artu.
 17320 « Je ne vi onques tel argu
 « Avoir a chevalier qu'il a.
 « Se vous volés il vous vera
 « Et, se vous le volés ossi,
 « Il s'en rira, cousine, ensi
 17325 « Que ceens est venus, sans doute.
 « Car voir si fort il vous redoute
 « Qu'il n'oseroit nullement faire
 « Cose qui vous deuist desplaire.
 « Or, m'en respondés liement
 17330 « Vostre entente et legierement. »

- C E ne fu mies grant merveille
 Se cremeurs, qui souvent resveille
 Mainte dame frice et jolie,
 Fu en la place appareillie
 17335 Pour esmervillier Hermondine.
 Elle le fu et bien le signe
 En moustra, vous orés comment,
 Car elle dist : « Je me repent,
 « Cousine, de ce que j'ai dit.
 17340 « Que feroiie, se Diex m'aÿt,
 « Se cilz chevaliers chi venoit
 « Et ja par le doy me tenoit?

f. 128 a

- « Je seroie trop esbahie.
 « Il vault trop mieulz, quoi que je die
 17345 « Ne aie dit a le bonne heure,
 « Qu'il s'en voist que droit ci demeure.
 « Car je ne sui pas coustumiere
 « De parler, ne point la maniere
 17350 « Ne sçai comment je parleroie,
 « Se devant moy je le veoie.
 « J'en commence ja a fremir
 « Et lui grandement a cremir.
 « Laiiésle aler, Diex le conduise
 « Et n'ait nulle riens qui li nuise.
 17355 « Je vodroie sur toute rien
 « Que Diex lui envoiast grant bien,
 « Tout ensi qu'il en est merites. »
 Respont Florée : « Et vous que dittes?
 « Cousine, vous vous fourvoiiés.
 17360 « Pensés vous que assés n'aiiés
 « De sens, d'avis et d'attemprance,
 « De maniere et de cognissance
 « Pour parler a .i. chevalier?
 « Vous le sarés mieulz recueillir,
 17365 « Et par parole plus meüre,
 « De ce sui je toute segure
 « Qu'il ne vous osera parler.
 « Laissiés Argente avant aler.
 « Il est heure c'on le voist querre.
 17370 « Chi n'affiert ne courous ne guerre,
 « Fors que paroles gratieuses
 « Et ossi aucunes huiseuses.
 « Il est bien si doulz et si frans,
 « Si preus et si entreprendans,
 17375 « Et si garnis de grant prudense, *f. 128 b*
 « Que ja n'arés de li, g'i pense,
 « Fors que parlars doulz et courtois,
 « Et si serons droit chi nous trois

- « Et il sera tous seulz, cousine.
 17380 « Vous ne serés ja si estrine
 « Qu'il sera estrins, je m'en vant,
 « Car nous saudrons tantos avant
 « Et parlerons bien au besoing
 « Pour vous, de tout ce n'aiiés soing,
 17385 « Car aussi le cognois je assés,
 « Et si sera tantost passés
 « Vo parlement, sans detriance,
 « Car mettre y vodrai attemprance.
 « Je li dirai qu'il s'en retourne
 17390 « Et qu'il s'en voist, ains qu'il ajourne. »
 A ces mos, se test Hermondine,
 Et fait a Argentine .i. signe
 Qu'elle voist le chevalier querre
 En la cambre qui si bien serre.
 17395 Et Argentine devant salli
 Sitos que sa dame entendî;
 La clef met en l'uis et si l'uevre.
 En l'uis ouvrant perdi son oevre
 Melyador qui la ouvroit,
 17400 Je vous dirai sur quel endroit.

- QUANT Argente la camberiere
 Ot laiens mis a la priiere
 De Florée Melyador,
 Le chevalier au soleil d'or,
 17405 Il fu qu'en alant, qu'en venant,
 Ensi que j'ay dit ci devant,
 Moult longement, saciés pour voir.
 Entrues li couvint il avoir
 Aucune pensée jolie
 17410 Ou espoir grant merancolie,
 Car mies ne savoit encor
 Comment il venroit jusc'au cor

f. 128 c

- De ce pour quoi est la tenus.
 Et se li estoit revenus
 17415 Li pourpos ou il eut esté
 En devant une quantité,
 Quant Florée parti de li,
 Qui a ce dont le recuelli
 Diversement, ce li sambla,
 17420 Comment que bien s'en escusa,
 Quant il se fu fais cognissables.
 Siques Melyador, comme ables
 En ces imaginations,
 Avoit dit ensi : « Il n'est homs,
 17425 « C'est une cose moult commune,
 « N'ait tous les jours quelque fortune
 « Ou mole, ou dure ou perilleuse.
 « Veci cose moult mervilleuse;
 « On me tient ci ensi qu'en mue.
 17430 « Fortune grandement m'argüe,
 « Et pour ce qu'elle est si perverse,
 « Et avoech moy elle converse
 « Et a ja conversé maint jour,
 « Entrues que j'ai ci bon sejour
 17435 « Et loisir, selonc ma samblance,
 « Je vodrai mettre en ordenance
 « Une balade incontinent,
 « Et le ferai de sentement,
 « Car j'en ay grandement matere. »
 17440 En ces parlens, c'est cose clere,
 Melyador fist la balade,
 Moiiennement lié et malade.

Balade.

f. 128 d

SE fortune la tres fausse et perverse
 Est contre moy, je voel a ce penser.

17445 A maint homme a esté dure et averse,
 Et puis apriès on l'a veu retourner,
 Et pour ce voir je me voel conforter
 Sur cest espoir, que je sai tout de fi,
 Que le temps n'est mies toutdis onni.

17450 **C**AR quant li plaist, je sçay bien qu'elle excerse
 Cui qu'elle voelt, et fait en hault monter
 Et puis apriès en brief temps jus le verse.
 Si en haste fait sa roe tourner,
 Siques en li nulz ne se poet fier.
 17455 Aussi, certes, point je ne m'i affi
 Que le temps n'est mies toutdis onni.

ET comment dont c'avoecques li converse,
 Je doi toutdis le milleur esperer,
 Car s'elle estoit .m. fois plus diverse,
 17460 Si voel je bien son pooir endurer.
 Car bon espoir me voet confort donner,
 Et si me fait souvenir de checi
 Que le temps n'est mies toutdis onni.

17465 **C**ESTE balade moult bien siert
 A Melyador, qui la iert
 Par dedens la cambre enfremés.
 Vis li est qu'il y a remés
 Et sejourné .i. lonch termine.
 A ces cops evous Argentine,
 17470 Qui deffrume l'uis en soudain ;
 A son caperon met le main
 Et le dit chevalier salue,
 Et li dist, ou a la value :
 « Sire, or avant, on vous demande. »
 17475 De ce parler ot joie grande
 Melyador, bien le saciés.

- Il est .i. petit avanciés,
 Et se part et s'en va avant,
 Et la damoiselle devant,
 17480 Qui l'alume et entre en sa cambre,
 Qui estoit listelée d'ambre.
 Florée et Hermondine estoient
 Dalés le lit; la s'arrestoient.
 Or fu Melyador souspris
 17485 Et de langage mus et pris,
 Quant il vit sa dame en la chiere.
 Toutes fois pas n'est trais arriere,
 Mais s'avance moult doucement,
 Et salue benignement
 17490 Hermondine et sa compaignie.
 Et celle, qui fu esbahie
 Quant le chevalier vit venant,
 S'est retrette et non mise avant.
 Adonques Florée s'avance,
 17495 Qui bien en vit la contenance
 Que pris estoit et elle prise;
 C'est une cose que moult prise.
 Si respondi pour sa cousine,
 Et tant sachiés c'a Hermondine
 17500 Fist la response trop grant bien,
 Car matere y prist et engien
 De parler puissedi assés,
 Et dist : « Sire, en avant passés.
 « Vous soiiés li tres bien venus.
 17505 « Vous avés esté la tenus
 « En une cambre longement.
 « Ne vous anuist, car vraiment
 « Toutes choses ont leur saison.
 « Il nous couvenoit par raison
 17510 « Ouvrer, et pour chiaus apaisier *f. 129 b*
 « Qui nous poroient mesaisier
 « De langage ou de jalousie;

« Mais tant y a de courtoisie
 « En vous, et si bien le savés,
 17515 « Que escusées nous avés. »

— « **D**AME, » ce dist li chevaliers,
 « Mais me rench tous ens es dangiers
 « De vous, et especialment
 « De ma dame certainement,
 17520 « Que je voi ci en ma presence.
 « Mais je croi que trop hault je pense
 « Et de ce fait voir j'en encoupe
 « Amours, et di qu'il est en coupe ;
 « Car, en espoir d'avoir merci,
 17525 « Penser m'i a fait jusqu'a ci
 « Et fera tant com jou vivrai,
 « Ne aultre penser je n'avrai. »
 Hermondine adont le regarde
 Et son parler plus ne retarde,
 17530 Que tout pourveü elle avoit,
 Je le croi, car trop bien servoit
 Et servi a leur ordenance,
 Car elle dist de pourveance :
 « Sire, mieulz samblés chevaliers
 17535 « Que vous ne faites merceniers,
 « Qui vous a veü au tournoy.
 « Pas ne moustriés la, par ma foy,
 « Que sceuïssiés anelès vendre,
 « Car j'ai hui veü hault estendre
 17540 « Vos bras et donner horions
 « Si grans, que je croi qu'il n'est homs
 « Qui a vous se peuist attaindre.
 « Trop bien fesistes vos mains taindre,
 « Quant le mercenier vous fesistes *f. 129c*
 17545 « Et a Montsegur vous venistes.
 « Cognissiés vous cest anelet? »

- Adont hors de son doy le met
 Et Melyador le regarde,
 Qui encor .i. peu se retarde
 17550 De parler, qar tous souspris fu
 Et atains de l'amoureux fu
 Qui le fist taire et hontoier.
 Et adont pour lui ravoier
 17555 S'est Florée lors traitte avant,
 Qui moult doucement en riant
 Dist : « Cousine, oil, par ma foy,
 « Car anten le mis en son doy
 « Et le fis faire ou nom de li ;
 « Mais de puis vous a il servi. »
 17560 Adoncques Florée le prent
 Et le deffrume incontinent,
 Ensi qu'elle ot fait aultre fois.
 En .ii. parties mist les plois,
 Car moult bien en seut l'ordenance.
 17565 Melyador adont s'avance,
 Qui moult pensa sus cest affaire,
 Ne quel cose elle voloit faire.
 « Sire, lisiés, » ce dist Florée,
 « Car en vo nom fu ci jettée
 17570 « Ceste escripture, ce saciés. »
 Melyador s'est avanciés
 Et voit, en lettres moult petites,
 Paroles en son nom escrites,
 Ou onques n'avoit [pas] pris garde.
 17575 Quant leü les ot, si regarde
 Que Florée si le rassamble
 Et remet les pieces ensamble ;
 Si l'en prise mieulz que devant. *f. 129 d*
 Florée sus ce couvenant
 17580 Mist fin, car l'anelet rendi
 A sa cousine et dist ensi :
 « Belle cousine, reprendés

- « Vostre aniel, et si entendés
 « Que li chevaliers, qui ci est,
 17585 « A veoir trop mieulz il li plest
 « Cest anelet en vostre doy
 « Qu'il ne face ens ou sien, je croi.
 — « Damoiselle, verité dites.
 « Encor m'esçou uns grâns merites
 17590 « Quant elle le daigne porter. »
 Et la belle, sans plus parler,
 Moult doucement l'anelet prist
 Et dedens son doy le remist.

- 17595 **E**N cel estat se trest arriere
 Florée, et a la camberiere
 S'ensonnie tout volentiers.
 Lors s'avancè li chevaliers
 Et li samble c'on li fait voie,
 Et doucement ses yeulz convoie
 17600 Vers sa dame d'un doulz regard,
 Et par le doy le trait a part.
 Tout basset dist : « Ma chiere dame,
 « Il vous plaise a savoir, sur m'ame,
 « Que veci vostre chevalier,
 17605 « Qui en abit de mercenier
 « Et de marcheant se mist lors,
 « Pour veoir le vostre gent corps
 « Que onques veü je n'avoie.
 « Si vous pri, metés moy en voie
 17610 « Qu'encores pourfiter je puisse ;
 « Car il n'est riens, se le sceuisse
 « Faire, pour vous je le feroie, *f. 130 a*
 « Car vous estes toute ma joie,
 « Mon reconfort et ma vaillance,
 17615 « Et tout ce que j'ai d'ordenance
 « Empris, c'est pour vostre amour, dame.

- « Le corps tout entier jusc'a l'ame
 « Vous renc et mac en vo service,
 « Car Amours voelt que j'obeisse
 17620 « A vous et je le voel, sans doubte,
 « Car ossi le valés sur toutes
 « De celles qui sont ens ou mond. »
 Adonques francise semont
 Hermondine de biel respondre,
 17625 Pour ces parolles miex expondre,
 Et dist : « Sire, je croi assés
 « Que vous avés des fais passés
 « Grans et durs, pour l'amour de moy,
 « Et ferés encor, je le croy,
 17630 « Ains que la queste soit finie.
 « Si devés en grant courtoisie
 « Tenir ce quant ci je vous sueffre,
 « Je ne vous prommet ne vous oeffre
 « Cose petite ne trop grande,
 17635 « Mais je vous enjoins et commande
 « Que telement perseverés
 « Et si bien tous considerés
 « Les affaires de ceste queste,
 « Que, par loenge et par conquete,
 17640 « Vous soiiés sans nul entre deus
 « De tous les aultres li plus preus,
 « Et, saciés, se Diex me doinst joie,
 « Que, volentiers je le veroie. »
 — « Ma dame, » ce respondi cilz,
 17645 « De vos parlars mille mercis.
 « Tant avés fait pour moy, sans doubte, *f. 130 b*
 « Que painne ne peril ne doubte
 « Qui me puist avenir ne croistre.
 « Or, primes ferai recognoistre
 17650 « Mon nom par tout pour vostre amour,
 « Puis que je tire a tele honnour
 « C'a vo gent corps, ma souverainne,
 « Ou je demorrai en le painne. »

- 17655 E^{NSI} fu droit la une espasse
 Cilz a qui on a fait grant grasce,
 Quant il est alés si avant,
 Et par sage et bon couvenant
 Parolle a la belle Hermondine,
 Qui si garnie est de doctrine
- 17660 Et de grant sens, au dire voir,
 Que dame n'en poet plus avoir ;
 Car, a fin que cilz mieulz en vaille
 Qui ses sers chevaliers se baille,
 Elle li moustre doucement
- 17665 Parolles de grant sentement,
 Et li dist que c'est cilz, sans doute,
 En qui elle a s'entente toute
 Mise plus que nul chevalier
 Qui puisse errer ne travillier,
- 17670 Pour les grans proeces de li.
 En devisant furent ensi
 Que tout droit sus le point dou jour,
 Mais tant leur plaisoit le sejour
 C'au jour ne predoient point garde.
- 17675 Argentine lors se regarde
 Que li jours venoit durement ;
 Si dist a sa dame erramment :
- 17680 « Dame, li jours vient grans et biaux.
 « Tous plains en sera cilz chastiaus *f. 130 c*
 « Assés tost, il n'est mies doute.
 « Pour tant le vous di que je doute
 « Que cilz chevaliers qui est ci
 « Ne soit veüs, je vous affi.
 « J'en ay grant soing oultre l'ensegne.
- 17685 « Ceens a de chiaus de Bretagne
 « Qui le poroient recognoistre
 « Et, en ce, son nom peu accroistre. »
 Dist sa dame : « Vous dittes voir.

- « Toutes choses ont leur devoir
 17690 « De faire a point et a raison. »
 Moult bien de ceste souspeçon
 S'en est Melyador pris garde ;
 Hermondine adont le regarde
 Et li dist : « Il vous fault partir
 17695 « Et s'est sans plus ci revenir,
 « Car bien croy qu'en aultre contrée
 « Serai temprement remenée.
 « Or pensés dou bien travillier.
 « Je vous tieng pour mon chevalier
 17700 « Et vorroie, se Diex me vaille,
 « Que faire ne peussiés faille
 « A ce que vous avés empris. »
 Melyador, qui fu tous pris
 De respondre et voit que partir
 17705 Le couvient, ne plus n'a loisir
 De demorer, car on li donne
 Congiet, ensi comme on l'ordonne,
 Dist : « Ma dame, a Dieu vous commant.
 « Pour vous me vodrai en avant
 17710 « Mettre en toutes painnes de corps ;
 « Ou en la queste serai mors
 « Ou je venrai a mon entente.
 « Mais dittes moy, ma dame gente,
 « Se de vous arai plus nouvelles. *f. 130 d*
 17715 « Ce me seroient moult tres belles
 « Aventures, se j'en ooie
 « Aucunes, se Diex me doinst joie. »
 Et Hermondine li respont,
 Qui un petit y vise adont :
 17720 « Je ne sçai comment ce seroit,
 « Ne faire ossi ce se poroie ;
 « Car vous irés par les contrées
 « Querre aventures et meslées,
 « Et je demorrai a l'ostel

- 17725 « Et si ne sçai mies le quel. »
 Adont Florée avant salli,
 Qui ceste parolle entendi,
 Et dist pour plaire a sa cousine
 Et faire a Melyador signe
- 17730 Qu'elle l'amoit de tout son coer :
 « Belle cousine et douce suer,
 « Et vous, biaux sire chevaliers,
 « J'ai regardé, il est mestiers,
 « Sus l'ordenance que vous dittes ;
- 17735 « Mais, par lettres moult bien escrites,
 « Et amoureusement dittées,
 « De vos plus entieres pensées,
 « Porés vous point, n'en fault doubter,
 « L'un l'autre moult reconforter ? »
- 17740 — « Et comment, » respont Hermondine,
 « Se poroit tout ce, ma cousine,
 « Acomplir par aucune voie ?
 « Moult volentiers je le saroie. »
 — « Tres bien, » ce respondi Florée,
- 17745 « J'ai amené de ma contrée
 « .I. jone escuier a mon gré,
 « Que je tieng a sage et secré,
 « Enlangagiet bien et a point. *f. 131 a*
 « Ycilz si ne vous faudra point
- 17750 « De porter lettres, s'il besongne. »
 Dist Hermondine qui ressongne
 Le jour que elle voit venant :
 « Cousine, sus vo couvenant,
 « Me vodrai je voir ordonner :
- 17755 « Laissiés le chevalier aler ;
 « Il est heure que de ci parte.
 « Mieus vault petit gains que grant perte. »
 — « Dame », dist cilz, « vous dittes voir.
 « Je partirai par vo voloir ;
- 17760 « Bien voi qu'il le me couvient faire. »

- Adont parti sus cest afaire
 Melyador dou dit castiel.
 On le mist hors par .i. praiiel
 Qui regardoit devers le bois.
 17765 Tant fist li chevaliers courtois
 Que, sans estre recogneüs,
 Au logeïs est revenus
 Dont il estoit le soir partis.
 Grandement en fu resjoïs
 17770 Ses escuiers quant il le vit.
 Melyador li a tout dit
 Quanqu'il a veü et trouvé.
 Jamais ne li euïst celé,
 Car en lui avoit grant fiance,
 17775 Et cilz, qui ot grant cognissance,
 Li dist : « Sire, bien va la cose.
 « Or me dittes a la parclose
 « Se vous avés a vo retour,
 « En considerant la valour
 17780 « D'Ermondine et son gent maintien,
 « Fait aucune cose de bien,
 « Rondelet, balade ou cançon, *f. 131 b*
 « Pour mieulz emploier vo saison,
 « Qui en estes tres grans ouvriers. »
 17785 — « Oil, » respont li chevaliers,
 « J'ai fait .i. petit rondelet,
 « Et le commençai de grant het
 « A faire, sitos que parti
 « De ma dame et que jou issi
 17790 « Dou dit chastiel, saciés pour voir. »
 Dist cilz : « Il le nous fault savoir.
 « Si en dirai ce qu'en samblance
 « M'en venra et sans detriance. »
 Et Melyador li respont :
 17795 « Tu l'oras. » A ces mos adont
 A le rondelet commencié,
 De coer gay, amoureux et lié.

Rondel.

SANS departir de vous me part,
Ma tres douce dame chiere.

17800 TRESTOUT vous demeure sans part,
Sans departir, etc.

CAR ou je sui ne quelque part,
Vostres sui a lie chiere.
Sans departir, etc.

17805 « P^AR ma foy, » ce dist Lansonnés,
« M^Oult bien me plaist li rondelés,
« Car il est de bon sentement,
« Et assés amoureusement
« L'avés fait selonc vo matere.

17810 « Or le couvient, c'est cose clere,
« Mettre en chant sans nul remanoir. »
Dist Melyador : « Tu dis voir,
« Mais ce ne sera pas meshui,
« Car droitement tous pesans sui.

17815 « Il me couvient aler dormir *f. 131 c*
« Et, en apriès, de ci partir,
« Car rentrer m'en vodrai en queste,
« Lachiet le hÿaume en la tieste,
« Pour cerchier toutes aventures. »

17820 Or nous dient les escriptures
Que quant Melyador parti,
Vous savés bien sus quel parti,
Dou chastiel chi dessus nommé,
Hermondine pour verité,

17825 Qui en estoit d'amours attainte

- Et tres amoureusement chainte,
 Se departi de sa cousine,
 Et li dist ensi Hermondine :
- 17830 « Cousine, je sui moult pesans,
 « Car li jours est ja biaux et grans,
 « Et si n'ay encores dormi,
 « Dont je vous di en droit de mi
 « Que dormir irai un petit. »
 Adont se jetta sus un lit,
- 17835 Et Argentine d'un mantiel
 Le couvri, d'ermine moult biel;
 Et de sa cambre se partirent
 Celles qui assés bien sentirent
 C'un petit estoit travillie.
- 17840 Hermondine tost consillie
 Fu a ce qu'elle s'endormi
 Et, si tost qu'elle s'esclemi
 Ymagnations li vinrent,
 Qui en .i. tel pourpos le tinrent
- 17845 Que chi vous m'orés regarder.
 Elle prist a considerer
 L'arroy, le maintien, la samblance
 Et la jolie contenance
 De Melyador le vassal,
- 17850 Et comment il est a cheval
 Et a piet gratieus et frices.
 Ces pensers [li] furent si riches
 Que la belle adont s'eslargi,
 A tout ce que elle entendi,
- 17855 A faire .i. petit rondelet
 Et, de corage joliet,
 Elle en entra en ordenance,
 Et prist ens es mos tel plaisance
 Qu'elle les recorda .iiii. fois ;
- 17860 Puis le canta a clere vois
 En la cambre toute seulete.

f. 131 d

Si fu tele la cançonnete
 Et faite de bon sentement
 Que vous orés presentement.

Rondel

17865 **A**MIS, en vostre compagnie
 Ay mis mon coer, gardés le bien,

POUR demorer toute la vie,
 Amis, etc.

17870 **S**I entiere, n'en doubtés mie,
 Qu'a li n'a nulz fors que vous rien.
 Amis, etc.

E^N ce propre jour a la feste
 Belle Hermondine, et sans requeste,
 Canta ce rondelet joli,
 17875 Et la estoit d'encoste li
 Florée, sa chiere cousine,
 Qui retint ce a bonne estrine,
 Et dist bien c'amours ouveroient
 En li, car si parler moustroient
 17880 Comment a le fois y pensoit.
 Or esçou bien raison c'on doit
 Recorder dou bleu chevalier.

f. 132 a

17885 Il s'arma et apparilla,
 Et a Lansonnet consilla
 Qu'il chevaucassent sans sejour.
 Si chevaucierent tout ce jour
 Sans nulle aventure trouver.

- Et l'endemain jusc'au diner,
 17890 Dont trop esmervilliet estoient.
 Tout ensi comme il chevaucioient
 Au lés devers Norchombrelande,
 Au travers d'une grande lande,
 Il voient devers yaus venir
 17895 Et leur chemin tout droit tenir
 Deus varlès et .ii. damoiselles.
 « Assés tost arons nous nouvelles »,
 Ce dist Melyador en l'eure.
 De puis ce granment ne demeure
 17900 Que cil .iiii. moult approcierent,
 Et premierement s'adrecierent
 Viers Melyador li vassal,
 Li quelz estans sus son cheval
 Le[s] salua courtoisement
 17905 Et leur demanda ensemment :
 « Damoiselles, ou alés vous? »
 Elles disent : « Biaux sires doulz,
 « Nous alons devers Signandon.
 « Besongne et aultre cose non
 17910 « Nous y mainne, bien le saciés.
 « S'il vous plaist, se nous radreciés
 « Se noient sommes fourvoies,
 « Car nous y sommes envoies
 « En cause de messagerie. »
 17915 Adont Melyador leur prie
 Qu'elles voelent dire pour quoi : *f. 132 b*
 « Et saciés, belles, par ma foy,
 « Que se je vous puis consillier,
 « Pour mon corps assés travillier,
 17920 « Je le ferai de grant corage. »
 Adont respondi li plus saige •
 Et dist : « Sire, vous dittes bien.
 « Enjoint nous fu, sur toute rien,
 « Au partir de nostre maison

- 17925 « C'a tous chevaliers no raison
 « Remoustrissions voirement,
 « Car en yaus en tient grandement
 « Dou consillier et mettre a point.
 « Tantost vous orés sur quel point.
- 17930 « **C**HIERS sires, dessus la Saverne
 « Siet li biaus chastiaus de Valerne,
 « Dont ma dame et cousine chiere,
 « Yvore, est dame et hiretiere.
 « Or est seans a l'autre part,
- 17935 « La riviere seule le depart,
 « Uns chastiaus c'on dist Orgilleus,
 « Ou dedens demeure uns tres preus
 « Chevaliers et de grant emprise,
 « Et c'on ressongne moult et prise
- 17940 « Dessus les marces de Norgalles.
 « Et ne tenés mies a gales
 « Les parolles que je vous baille,
 « Car cilz preus chevaliers sans faille
 « Nul autre chevalier ne doubte.
- 17945 « Et pour ce que on le redoute,
 « Soit a la lance ou a l'espée,
 « Ma dame, qui est aseulée
 « Et voisine moult pres de li,
 « En est en .i. trop dur parti ;
- 17950 « Car cilz chevaliers le herie *f. 132 c*
 « Et couvertement le guerrie,
 « Et li voelt, si com par hansage,
 « Tollir chastiel et hiretage,
 « Ne nulz ne l'en va au devant.
- 17955 « Or fu mis a ma dame avant
 « C'a Signandon devoit avoir
 « Une assamblée tout pour voir
 « De chevaliers preus et hardis ;

- « Mais li jours ne fu mies dis
 17960 « A ma dame, que ce doit estre.
 « Toutes fois nous avons a destre,
 « Ensi c'on nous ensengne a fin,
 « Pris de Signandon le chemin
 « Pour venir a celle journée.
 17965 « Et se la estoit ajournée
 « Proece en quelque chevalier,
 « Qui tant se volsist travillier
 « Que pour venir aidier ma dame,
 « Je retieng et le di sur m'ame
 17970 « Qu'il feroit courtoisie grande;
 « Car cilz ne scet qu'il li demande
 « Qui li fait presentement guerre.
 « Siques, chiers sires, se la terre
 « De ce Signandon nous moustrés,
 17975 « Grant courtoisie vous ferés. »

- L**ORS respondi Melyador,
 Li chevaliers au soleil d'or,
 Et dist : « Belle, je vous dirai.
 « De ci a Signandon, pour vrai,
 17980 « A bien .ii. journées moult grandes,
 « Divers chemins, et bois et landes
 « Qui sont moult fortes a tenir.
 « Encor quant la porés venir,
 « Vous trouverés la feste esparse, *f. 132 d*
 17985 « Et l'un ou norch et l'autre en Tarse,
 « Ensi que chevalier cheminent,
 « Qui ne cessent point ne ne finent
 « Des aventures demander.
 « Mais tant vous oc recommander
 17990 « Vostre dame et le droit qu'elle a,
 « Que cilz moult bien le consilla
 « Qui li dist que ci venissiés;

- « Car point ne fault que vous issiés
 « De vo chemin, par nulle voie,
 17995 « Sus la cause ou on vous envoie,
 « Car je serai li chevaliers
 « A vostre dame volentiers,
 « Et ne desire riens el, voir,
 « Fors que de prestement mouvoir
 18000 « Pour aler tantost celle part. »
 — « Sire, » dist ceste, « Diex vous gart !
 « Vous nous offrés grant courtoisie. »
 Dont retournent a chiere lie
 Les damoi[se]lles de Valerne,
 18005 Et laissent le chemin d'Iberne
 Et prennent celi de Norgales.
 Melyador, en disant gales
 Et faisant cançons et motès,
 S'en chevauce avec les varlès
 18010 Des damoiselles qui le mainnent,
 Et les queles forment se painnent
 Dou dit chevalier honnourer
 Et leurs besongnes colourer
 A le fin que mieulz s'i encline.
 18015 Et cilz est si plains de doctrine
 Qu'il les conforte grandement
 De coer et de grant sentement.

- 18020 **N**ous lairons de Melyador
 A parler, voires, tant c'a or,
 Car la matere le desire,
 Et parlerons sans contredire
 Dou chevalier qui ne peut estre
 Au tournoy, ne faire y fenestre,
 De Signandon, dessus les prés;
 18025 Car a ce jour estoit navrés
 Messire Tangis de Sormale

f. 133 a

- Dont l'aventure tint a male,
 Coi c'amender ne le peuist.
 Moult bien vosist qu'il li euist
 18030 Cousté mille florins et plus,
 Et il y fust a temps venus.
 Sitost comme il se peut armer,
 Il ne volt la plus sejourner
 Ou on li ot fait bonne chiere.
 18035 La dame qui fu hiretiere
 Dou Brun Manoir, ou jeü ot,
 Remercia de quanqu'il pot,
 Ensi que bien le sçavoit faire,
 Et puis, pour mon compte parfaire,
 18040 Il monta et d'iluech parti
 A l'entente et sur tel parti
 Que pour aventures trouver.
 Une heure li ala rouver
 Ses varlès, qui trop bien chantoit,
 18045 Qu'il chantast, puis qu'en point estoit,
 .I. virelay qu'il avoit fait;
 Et je vous dirai de quel fait.

- C**ILZ chevaliers avoit eü,
 En dementrués qu'il ot jeü
 18050 Au Brun Manoir dit par arriere,
 Dalés lui une camberiere
 Qui moult estoit courtoise et sage. *f. 133 b*
 La damoiselle avoit d'usage
 De dire en son parler, pour vrai :
 18055 « Sans doubte ensi je le ferai. »
 Briefment, en sa parolle toute,
 Toutdis mettoit devant : « Sans doubte. »
 Messires Tangis, qui oÿ
 L'avoit souvent, s'en resjoÿ,
 18060 Entrues que sus son lit gisoit,

- Et a le fois ce mot disoit,
 Tant l'avoit il enamouré
 Et en son coer encorporé,
 Et y prenoit si grant plaisir
 18065 C'a painnes en pooit issir.
 Dont il li avint, ce termine
 Qu'il gisoit dedens la courtine
 Dou Brun Manoir, ou .ii. mois fu,
 Qu'il ot ordenance et argu
 18070 De faire .i. jolit virelay
 Sus le matere que dit ay.
 Quant il l'eut fait, bien li plaisi
 Tant que ses vallès l'escrisi
 Et se li aida a chanter.
 18075 Or se pooient bien vanter,
 Quant il estoient entre yaus .ii.,
 Que leurs cans estoit gratieus.
 « Et pour .i. tant, » dist li varlès,
 « Mon signeur, que vos virelès
 18080 « Soit chi chantés a clere vois,
 « Entrues que nous sons en ce bois. »
 Messires Tangis, sans detri,
 Respondi : « Certes, je l'otri. »
 Adont entre yaus .ii. s'adrecierent
 18085 Et le virelai commencierent,
 Par tel maniere et par tel fourme *f. 133 c*
 Que li contre escripts nous enfourme.

Virelay.

SANS doubtte vostres serai,
 Sans doubtte tant com vivrai,

Virelay. Dans l'impossibilité de mettre sur ses pieds cette bizarre pièce, nous nous sommes contenté de distinguer les vers d'après le nombre de syllabes que leur donne le manuscrit.

18090 Sans doute dame entierement,
 Sans doute tous jours loyaument,
 Sans doute vous servirai.

SANS doute je le ferai,
 Sans doute tres liement,
 18095 Sans doute de bon coer vrai,
 Sans doute joicusement.
 Sans doute je ne le lairai,
 Sans doute je me tairai,
 Sans doute a vo commandement,
 18100 Sans doute de tres bon talent,
 Sans doute l'acomplirai,
 Sans doute, etc.

SANS doute je n'ay esmay,
 Sans doute ne nul tourment,
 18105 Sans doute pour ce que je sçai.
 Sans doute que vraiment,
 Sans doute m'asservirai,
 Sans doute n'en partirai,
 Sans doute, de vous nullement.
 18110 Sans doute creés fermement,
 Sans doute, que c'est tout vrai,
 Sans doute, etc.

ENSI pour soi solatier
 18115 Tangis, avoech son escuier,
 Chanta son virelay adont,
 Et quant ensi canté il l'ont,
 Si chevaucent tous les galos.
 A l'issue d'un biau vert bos,
 Ont rencontré en une route
 18120 Dames et chevaliers, sans doute,
 Qui venoient de Signandon;
 Des queles ne sçay pas le nom

f. 133 d

- Des dames ne des chevaliers.
 Mais cilz qui chevaucioit premiers
- 18125 Demanda a cesti Tangis :
 « Or me dittes, par vostre avis,
 « Sire chevaliers, dont vous estes
 « Et se vous poursiewés les questes. »
 — « Oil, » respont cilz erranment.
- 18130 « Mais dont je sui certainement
 « Ne poés vous ores savoir.
 « J'en poroie trop mains valoir
 « Si mon nom saviés et ma terre.
 « Si ne m'en voelliés plus enquerre,
- 18135 « Mais dittes moy dont vous venés,
 « Et se cilz tournois est passés
 « Qui fu a Signandon nonciés. »
 — « Oil, » dist cilz, « et bien saciés
 « C'on y tournia ossi bien
- 18140 « Que, de puis le temps Uriien,
 « On oÿ parler de tournoy. »
 Respont Tangis : « Moult bien le croi.
 « Et a qui fu donnés li pris ? »
 — « Par ma foy, sire, il est escrit
- 18145 « A .i. chevalier tres vaillant
 « Et moult grandement travaillant
 « La et ailleurs, il n'est pas doubte. »
 Adont mist sen entente toute,
 Messire Tangis, dou savoir
- 18150 De quoi cilz s'arme au dire voir.
 On li dist tout incontinent :
 « De bleu sont tout si parement
 « Et tant y a, dont on le prise, *f. 134 a*
 « D'un biel soleil d'or il se brise. »
- 18155 Messires Tangis dist adont :
 « C'est li chevaliers ens ou mont

18156 ou mont, *B* ou mond.

- « De qui j'aie la cognissance,
 « Ens ou quel j'ay plus grant fiance
 « Qu'il venra a s'entention
 18160 « De la queste ; car de renom
 « D'armes et de chevalerie
 « Passe tous aultres, quoi c'on die.
 « Et, biau sire, tres grans mercis,
 « Quant en tel point vous estes mis
 18165 « Que vous m'avés dit et conté
 « Dou chevalier la verité. »
 A ces parlers la congiet prent,
 Et puis au chevalier entent
 Le chemin de Norchombrelande.
 18170 Or esçou drois c'on me demande
 De monsieur Melyador ;
 Comment il chevauce des or
 Avoecques les .ii. damoiselles,
 Qui sont jones, frices et belles,
 18175 Le chemin par devers Norcgalles.
 Faire ne vous voel intervalles.
 Tant ont chevaucié et erré
 Qu'il sont en Norgales entré
 Et venu jusques ou chastiel
 18180 De Valerne, ou ot maint crestiel.
 Arresté se sont a la porte ;
 Li forestiers qui les clés porte
 Oevre la porte toute arriere,
 Sus le conduit et le maniere
 18185 Des damoiselles de laiens.
 Evous tantost que sallent gens
 De tous lés, qui moult biel recueillent *f. 134 b*
 Melyador et si l'accueillent
 A fester et a conjoir.
 18190 Et quant la dame peut oïr
 Que cilz laiens estoit venus,
 De cui tous bleus est li escus

- A .i. soleil d'or de brisure,
 Si en fait par samblant grant cure
 18195 Et s'en tient a moult confortée.
 De noient ne s'est arrestée,
 Mais s'en vient aMelyador,
 Li quelz n'estoit mies encor
 En sa cambre, mais en la court,
 18200 Ou cascuns contre li acourt
 Pour li conjoïr et veoir.
 Yvore, sans plus remanoir,
 En saluant moult bas s'encline,
 Et cilz, qui fu plains de doctrine,
 18205 Son salu errant li rendi
 Et a sa parole entendi;
 Car la dame moult doucement
 Li remoustre courtoisement
 Dou chevalier qui le herie
 18210 Et qui sa terre li guerrie,
 Et si n'a title de raison.
 Melyador, qui sa saison
 Voelt emploïier de biel parler,
 Respont : « Dame, laiésle aler;
 18215 « Nous l'aprenderons a cognoistre.
 « Nous vodrions moult bien accroistre
 « Nostre honneur, se Dix le consent,
 « Et, pour le droit que mes cuers sent
 « Que vous avés en la querelle,
 18220 « Sui je avoech vostre damoiselle
 « Chi venus pour cesti combatre *f. 134 c*
 « Et vo droit aidier a debatre. »
 — « Sire, » dist elle, « grant mercis. »
 Adonques l'a par le main pris
 18225 Et en une cambre l'enmainne,
 Qui ordenée estoit et plainne
 De vers jons pour li rafrescir.
 Tost poront nouvelles oïr,

- Car evous venu a le porte
 18230 Le chevalier qui se deporte
 A heriier chiaus dou chastiel,
 Qui se gouverne bien et biel,
 A gise de bon combatant,
 Et dist : « Ou est il ? » en estant
 18235 Sus son cheval, moult bien armés.
 « Vous de laiens, se vous avés
 « L'onneur de vo dame a garder,
 « Si me venés a regarder ;
 « Si vous combaterés a moy.
 18240 « Se peu en y a, par ma foy,
 « D'un ; j'en voel .II. ou .III. ou .IIII.,
 « Et se tous ne les puis abatre
 « Je soie vostres prisonniers. »
 Ensi disoit li chevaliers
 18245 Qui Buïns estoit appellés.
 Encores a il dit : « Alés,
 « Alés querre vo champion.
 « Ne sçai comment il a a nom,
 « Mais tantos combatus sera.
 18250 « Mes corps au sien s'esprouvera,
 « Ançois que jamais m'en retourne. »
 Ensi le chevalier s'aourne
 Devant la porte en rampronant
 Chiaus de Valerne, et en disant
 18255 Qu'il est de combatre tous près. *f. 134 d*
 Ces nouvelles, par mos exprès,
 S'en vinrent a Melyador
 Et a la dame qui encor
 Dedens la cambre se tenoit,
 18260 Ou elle la menet l'avoit.

ET quant Melyador oÿ
 De ce Buïn parler ensi,
 Qui s'ahatissoit de combatre

- 18265 A .ii., ou a .iii. ou a quatre
 Et ne demandoit aultre cose,
 Incontinent plus ne repose
 Et dist qu'il s'en voelt hors issir,
 Ne point ne l'en poet rastenir
 La dame par nesune voie.
 18270 Car jamais, ce dist, n'aroit joie
 Se on li pooit reprocier
 Que la eüst .i. chevalier
 Qui les armes li demandast,
 Et tantost contre li n'alast.
 18275 Sa brongne viest incontinent ;
 Bien s'est armés a son talent.
 En la court vint, que plus n'arreste :
 Sa lance li fu toute preste.
 Sitost c'ou cheval montés fu,
 18280 Lansonnés li mist son escu
 A son devoir bien et a point,
 Et puis li lace et se li joint
 Li hÿaume pres de la teste.
 Cil de laiens en font grant feste,
 18285 Quant en si grant desir le voient ;
 Jusc'a la porte le convoient,
 Qui fu incontinent ouverte.
 Au dehors fu a la couverte
 Messires Buïns qui l'attent,
 18290 Et si tost que venu le sent,
 Ensi comme bons chevaliers
 Tres oultrageus, hardis et fiers,
 Sa lance met a son devoir
 Et dist que il vodra savoir
 18295 Comment la dame est pourveüe
 De chevalier. Adont argüe
 Le cheval pour aler avant.
 Melyador, qui au¹ devant
 De li se met par ordenance,

f. 135 a

- 18300 Point ossi et baisse la lance.
 Ja y ara jouste moult belle.
 Cescuns vient dessus la praelle,
 Acourant par moult grant randon,
 Et se fierent en abandon
- 18305 Des lances dessus les escus.
 Li plus fors des .ii. est fendus,
 Car li fier furent acéré.
 Melyador a encontré
 Monsigneur Buïn par tel voie
- 18310 Que jus a terre le convoie.
 Li chevaus fuit ; Buïn demeure,
 Qui lors est relevés en l'eure
 Et trait l'espée incontinent.
 Melyador, qui son tour prent,
- 18315 Perçoit ensi qu'il se retourne
 Ledit chevalier qui s'atourne
 Pour venir a piet, contre li.
 Lors se doubta, je vous affi,
 Melyador de son cheval
- 18320 Que cilz ne li porta grant mal ;
 Si descendi tantost a terre.
 L'espée trette vint requerre
 Le chevalier qui grant samblant *f. 135 b*
 Fait que de la venir avant.
- 18325 **O**R sont tout doi li chevalier
 Devant le porte en mi l'erbier
 Et tiennent les espées nues.
 Evous de premieres venues
 Qu'il se donnent grans horions.
- 18330 Cilz Buïns estoit grans et lons
 Et chevaliers de bonne taille ;
 Mais plus savoit de la bataille
 Melyador que tel quarante.

- La dame de Valerne chante
 18335 Et fait ses priieres a Dieu
 De coer devot, et humle et pieu,
 Afin que ses chevaliers ait
 Victore ; car pour li se met
 En ce parti bien perilleus.
 18340 Melyador, qui amoureux
 Estoit et plain de grant avis,
 Li jette .i. cop, ce m'est avis,
 Par dessus le hÿaume amont.
 Tel cop, se Diex m'aÿt, bien sont
 18345 Grandement a recommander,
 Car li espée ala entrer
 Ou hÿaume et le pourfendi,
 La quaffe et la teste autressi ;
 Merveilles fu qu'il ne fu mors.
 18350 Melyador, qui fu moult fors
 De ses bras, de ce cop l'empaint,
 Ce veïrent maintes et maint,
 Et jus a terre le reverse.
 Buïns cheÿ la teste enverse
 18355 Et Melyador dessus li,
 Qui dit li a tantost ensi :
 « Chevaliers, se tu ne te rens *f. 135 c*
 « Et jure ci devant ses gens
 « Foy et hommage a ceste dame,
 18360 « La tieste te todrai, par m'ame,
 « Car il est bien en ma puissance. »
 Li chevaliers, qui en doubtañce
 Se voit et en tres grant peril,
 Dist : « Sire, je ferai, oïl,
 18365 « Tout ce que faire vous vodrés.
 « Je vous pri que vous vos ostés
 « De moy, car je sanne trop fort
 « Et bien croi que vous m'avés mort.
 « Ostés moy, pour Dieu, mon hÿaume. »

- 18370 Melyador ot celle psaume;
 Adont le hÿaume li oste,
 Et le met bellement d'encoste
 Le chevalier, qui senglens fu
 Et qui li dist : « J'ai trop beü
- 18375 « De mon sanc. Metés moy arriere,
 « Tant que je soie en la barriere
 « Dou dit chastiel dont vous issiés. »
 Et Melyador, qui tous liés
 Est de ce que cilz li recorde,
- 18380 A ceste ordenance s'acorde.
 Adonques l'aide il a lever.
 Qui adont veïst avaler
 Gens dou chastiel et la venir,
 Assés s'en peuïst resjoïr.
- 18385 La damoiselle proprement
 Est la venue incontinent
 Et si demande des nouvelles :
 « Dame, » dist Melyador, « belles
 « Sont les nouvelles hui pour vous.
- 18390 « Cilz chevaliers est vostres tous,
 « Pour entrer en vostre ordenance; *f. 135 d*
 « Venus est a obeïssance.
 « Il m'a dit et tenir li faut,
 « Car se point y a de defaut
- 18395 « Je l'ocirai ains mon depart,
 « Qu'il vous jurra en quelque part
 « Que vous vodrés loyal service,
 « Et vous prie que s'aucun visce
 « Sont en li que li pardonnés.
- 18400 « Par ensi vous est il donnés. »
 Ce dist la dame de Valerne :
 « Sire, il fault que je me gouverne
 « Par vous et par vostre ordenance.
 « J'en ferai dou tout sans doubtaunce
- 18405 « Qu'il vous souffira par raison. »

Lors entrèrent en le maison
 Et y misent le chevalier,
 Le quel tiennent a prisonnier.

18410 **E**NSI messires Buins fu
 Desconfis, vous savés bien u,
 Devant le chastiel de Valerne.
 Ce jour estoit par la Saverne
 Venus et avoit la pris terre :
 Or trouva, et par bonne guerre,
 18415 Qui vaillamment le combati,
 Et qui la tieste li fendi
 Jusques au tiès et plus avant.
 Melyador, ou couvenant
 Que je vous ay devant compté,
 18420 En a le chevalier mené
 Ou chastiel, et par gentillece
 Li fist en ce jour grant adrece,
 Car il meïsmes li cousi
 Sa tieste, et se li recloÿ,
 18425 Et bendela et mist a point.
 Et a la dame, sus tel point
 Que vous avés oÿ devant,
 Le delivra par couvenant
 Qu'elle le doit a merci prendre ;
 18430 Et celle, qui bien volt comprendre
 A ce que Melyador fait,
 Li acorde de coer parfait.
 Tantost fu heure de souper ;
 De ce ne couvient point parler.
 18435 Bien fu Melyador servis :
 La dame y met tout son avis
 A festiier outre mesure.
 Or nous compte li escripture
 Que Melyador, au matin,

f. 136 a

- 18440 De recief se mist ou chemin
 Entre li et son escuier,
 Et commencierent a puier
 Devers Galles une montagne
 En pays divers et estragnes.
- 18445 Au chevalier vint en presense
 Un rondelès a quoi il pense,
 Et dist : « C'est bien cose certaine.
 « Pour l'amour de ma souverainne,
 « La fille au gentil roy d'Escoce
- 18450 « Amours voelt que droit ci j'approce
 « A faire .i. rondelet joli,
 « Et je voir, pour l'amour de li,
 « Li ferai tout presentement
 « Et canterai de sentement. »
- 18455 Adont Melyador le fist
 Et le chanta, et ensi dist :

Rondel.

JE voel avoir tres bon confort,
 Ma douce dame, et estre en joie.

f. 136 b

- 18460 **P**OUR vous, cui j'aime de cuer fort,
 Je voel avoir, etc.

CAR de vous me vient mon deport
 Et tout mon bien, ou que je soie.
 Je voel avoir, etc.

- 18465 **N**ous lairons de Melyador
 A parler voires, tant c'a or,
 Car temprement en parlerons

- Et au chevalier revenrons
 Que sa serour, cui Diex doinst joie,
 A mis en ceste année en voie
 18470 Pour oïr nouvelles de li.
 Le chevalier friche et joli,
 Monsigneur Lyone on l'appelle,
 Tous seulz chevaucioit sus sa selle,
 Sans varlet et sans escuier ;
 18475 Nous dirons le Blanc Chevalier,
 Car ensi se faisoit nōmmer.
 Cilz s'ala en soi aviser,
 Pour le tournoi de Signandon
 Ou veü ot donner le don
 18480 Dou pris, l'espée, au mieulz faisant,
 Que, vers sa dame au corps plaisant,
 A Tarbonne retourneroit,
 Et bellement li conteroit
 L'aventure de la journée
 18485 Et ossi tout ce qu'en l'anée
 Avoit veü, puis qu'il parti.
 Li chevaliers, sus ce parti,
 S'est prestement mis au retour.
 Tant fist et tant ala c'un jour
 18490 E[s]t a Tarbonne revenus.
 Il fu grandement bien venus
 De sa dame, ce fu raison. *f. 136 c*
 Lors qu'il entra en la maison,
 Ce fu .i. venredi moult main,
 18495 Sa dame le prist par la main
 Et li demanda des nouvelles :
 « Ma dame, s'en sçai moult de belles,
 « Mais que de toutes me souviagne.
 « Et, afin que mieux y aviegne,
 18500 « Vous savés bien sur quel parti
 « Une fois de vous me parti,
 « Pour aler en cesti voiage,

- « Voires, ma douce dame sage,
 « Que je chevaucal .i. tempore
 18505 « Sans trouver riens dont ja hystore
 « Puist ne [vous] doie estre ensonniie.
 « Et toutes fois sus une fie
 « Je trouvai le bleu chevalier,
 « Au quel je me veus assaiier.
 18510 « A li joustai et il a moy,
 « Mais, par la foy que je vous doi,
 « Je brisai contre li ma lance,
 « Et tant y eut bonne ordenance
 « Qu'il m'abati tres durement;
 18515 « Au ceoir, je fui malement
 « Blechiés par dedens mon costé.
 « De puis me vint par amisté
 « Veoir, ilz et ses escuiers,
 « Et quant bien sceut li chevaliers
 18520 « Que j'estoie a la dame blanche,
 « Et que je li euch l'ordenance
 « Recordé de tout mon voiage,
 « Si doulz le trouvai, et si sage
 « Et de si arrée raison
 18525 « Que de puis, par nulle façon,
 « Il n'eüst jousté contre mi, *f. 136 d*
 « Mais me dist ensi : « Mon ami,
 « Pour l'amour de la vostre dame
 « Qui vous met sus, saciés, par m'ame,
 18530 « Tous services je vous feroie. »
 « De ce parler eut trop grant joie,
 « Car je cuidai avoir trouvé
 « Vostre frere, pour verité.
 « Si ne sçai jou pas se c'est il;
 18535 « Car onques oïl ne nennil
 « Ne m'en dist par nulle maniere.
 « De moy parti a lie chiere
 « Et jou ossi sus cel estat;

- « Plus n'i eut fait de ce debat.
 18540 « Tantost nous fumes eslongié.
 « Ce propre jour, par vo congié,
 « Dame, mes que le puisse dire,
 « Chevaucoie sans avoir ire,
 « Parmi .i. bois sus une lande
 18545 « Ou pays de Norchombrelande,
 « Et ensi c'arrestés estoie
 « Moult priès d'une fourcie voie,
 « Et que je pensoie au chemin,
 « Moult bien montés sus .i. roncin
 18550 « Vint uns varlès d'encoste mi,
 « Ne pour ennemi ne ami,
 « Ne sçai le quel me fu en l'eure.
 « Mais tantost me vint courir seure
 « Ses mestres, uns frans chevaliers,
 18555 « Et me dist ensi de premiers :
 « Compains, qui vous fait ma devise
 « Porter; il faut, quant je m'avise,
 « Que vous m'en moustrés la raison,
 « Ou a l'espée et au baston
 18560 « Le calengeraï maintenant. » *f. 137 a*
 « Et je respondi en riant :
 « Certes, sire, je jousteroie
 « A vous, s'une lance j'avoie ;
 « Et croi bien, que pour ce que vous
 18565 « Veés que j'en sui a rebous,
 « Me quoités vous de tel façon. »
 « Lors s'arresta sus son blason
 « Li chevaliers qui m'eut oÿ
 « Et si jetta sa lance en mi
 18570 « L'erbier, et dist que droit avoie.
 « Si m'assaia d'une aultre voie
 « Et tant que le voir li comptai ;
 « Et, quant il m'ot oÿ, bien sçai
 « Que il m'entendi volentiers.

- 18575 « Adont me dist li chevaliers
 « Que c'estoit cilz certainement
 « Pour qui vous avés proprement
 « Ceste blanche dame encargie.
 « Lors li priaï par courtoisie
- 18580 « Qu'il me volsist dire le voir,
 « Se c'estoit cilz, par estavoir,
 « Qui fu au tournoy de Tarbonne,
 « Et qui ot fortune si bonne
 « Que le pris et l'onneur ce jour.
- 18585 « Il me respondi sans demour :
 « Oïl, certes, cilz sui pour vrai. »
 « Et adonques li demandai,
 « Par moult gratieuses materes,
 « Se c'estoit li vostres biaus freres.
- 18590 « Il respondi incontinent :
 « Ses freres ne sui nullement,
 « Mais je sui tous ses chevaliers,
 « Et me recommandés, tres chiers
 « Amis, a lui, je vous en prie;
- 18595 « Et li dittes que courtoisie *f. 137 b*
 « Me fait en tous estas tres grande,
 « Et que moult je l'en recommande
 « De ce que ma devise porte. »
 « Chiere dame, je me deporte
- 18600 « A vous dire en estat deü
 « Ce que j'ay oï et veü.
 « De che chevalier me parti
 « Moult telement sus le parti
 « Que je vous ay devant conté.
- 18605 « Depuis le vi, pour verité,
 « Et des aultres plus de .cc.
 « Tres amoureux, friches et gens,
 « Tournoïier devant Signandon.
 « De tous n'i cognois voir nul nom,
- 18610 « Mais la fu li bleus chevaliers

- « Dont je vous ay parlé premiers,
 « Qui se brise dou soleil d'or.
 « Onques Acilles ne Hector
 « Ne fisent en leurs temps tant d'armes
 18615 « Qu'il en fist la devant les dames.
 « Otretant bien, ma dame chiere,
 « Li chevaliers qui la maniere
 « A de porter vostre devise,
 « Qui d'une blanche dame brise
 18620 « Sa rouge brongne et son escu,
 « En bonne ordenance la fu
 « Et tournoia tres vaillamment.
 « Sus ces .ii. fu tout vraiment
 « Li pris dou tournoy acordés,
 18625 « Mais par hiraus bien recordés,
 « Et de droit ossi et calenge,
 « Li bleus si en ot la loenge ;
 « L'espée eut au mieulz tournoiant. *f. 137 c*
 « De ces .ii. ne sçai plus avant,
 18630 « Car je me parti au tierc jour
 « Pour faire viers vous mon retour
 « Et recorder men aventure.
 « Ma chiere dame, je vous jure
 « Que cil doi chevalier tout sont
 18635 « En vo commandement, et ont
 « Grant desir qu'il vous puissent faire
 « Services qui vous puissent plaie. »

- O R a Phenonée a penser
 Plus c'onques mes et a viser
 18640 Comment maintenir se pora.
 Grans nouvelles oÿes a ;
 Point ne s'en scet sus consillier.

18620 escu, B escri.

- « Freres, » dist elle au chevalier,
 « Dou chevalier au soleil d'or,
 18645 « Je vous pri, parlés moy encor.
 « Quelz homs est il, ne de quel taille? »
 Et Lyones errant li baille
 Telz responses et dist : « Ma dame,
 « Tres biaux chevaliers est, par m'ame,
 18650 « De tous membres et de bon corps.
 « Mais onques je ne le vi hors
 « Dou hÿaume ne de sa selle ;
 « Mais bien le vi, desous l'asselle,
 « Tenir sa lance frichement,
 18655 « Et assambla moult vaillamment
 « A moy et me porta par terre.
 « Quant je veuch de son nom enquerre,
 « Je vous recorde pour certain,
 « De moy se parti en soudain ;
 18660 « Mais il dist au departement :
 « Chevaliers, saciés vraiment
 « Que je sui tous en l'ordenance *f. 137 d*
 « Et me mach de la dame blanche. »
 « Dou rouge chevalier après
 18665 « Vous conterai par mos exprès.
 « Puis c'aler volés a le taille,
 « Certes, il est biaux homs sans faille,
 « Et ossi le vi je a cheval
 « Tout armé par especial.
 18670 « Le hÿaume avoit en la teste
 « Et est des chevaliers de queste.
 « Ne sçai comment il est nommés,
 « Mais grandement est renommés
 « Par tous les lieux ou il converse,
 18675 « Et plus cilz a la brongne perse.
 « Saciés, ma dame, il sont tout doi
 « Tres bon chevalier, par ma foy ;
 « Mais en tant que de cognissance,

- 18680 « Par viaire ne par samblance,
 « Ne par membres grans ou moiïens,
 « Je ne vous en saroïe en riens
 « Certifier; de ce me crés. »
 Phenonée entent ces secrés
 Que ses chevaliers li recorde,
 18685 Adonques ses coers se descorde
 A s'entention premerainne,
 Et dist : « Je ne sui pas certaine
 « De mon frere, je le voi bien.
 « Se je folie par l'engien
 18690 « D'Amours, certes, je n'en puis mains ;
 « Mais mon coer est bien si certains,
 « De tout ce me fay je assés forte,
 « Que, pour cose c'on me raporte,
 « Je ne poroïe autrui amer,
 18695 « Ne ne me vodroïe entamer,
 « Fors que de l'amour de mon frere. *f. 138 a*
 « Or ay je donc cause et matere
 « De laissier ceste çose en pais,
 « Et je li lairai voir huïmais,
 18700 « Et demain et mes de semainne.
 « Je n'ai pensée qui me mainne
 « Plus avant en ceste ordenance,
 « Puis que je fail a m'esperance.
- 18705 « **L**YONEL, » ce dist Phenonée,
 « Pour moy avés vous ceste année
 « Eü grant painne et grant travel,
 « Et vous estes de mon conseil
 « Et uns chevaliers pour mon corps.
 « Si vous pri : point ne metés hors
 18710 « Ceste aventure aucunement. »
 Et Lyones, tout erranment,
 Respondi et li dist : « Je, dame,

- « Je me feroie plus grant blasme
 « Cent fois que ne feroie a vous.
 18715 « Vous savés que je sui voir tous
 « Nouris de la vostre substance;
 « Si doi tres bonne obeïssance
 « A vous, et si le voel devoir
 « D'ent[ent]ion et de voloir,
 18720 « Pour morir, s'il le besongnoit.
 « Maudis soit qui ressongneroit
 « Pour vous mort, painne ne perilz. »
 Et celle respont : « Grans mercis;
 « Pour tel vous tieng. Vous demorrés
 18725 « Dalés moy et aprenderés
 « Tous les jours aucunes nouvelles.
 « Toutes voies je tieng a belles
 « Les vostres, selonch mon pourpos. »
 A tant misent la en repos
 18730 Lors parolles, si com, pour l'eure. *f. 138 b*
 Li chevaliers ensi demeure
 Avoecques sa dame en Tarbonne,
 Et moult courtoisement s'ordonne
 A tout ce que elle voelt faire.
 18735 Nous cesserons de cest affaire
 A parlars, voire, .i. petit,
 Car j'ai droitement apetit
 A parler de Melyador,
 Qui mies n'est venus encor
 18740 A l'ent[ent]ion qu'il demande.
 Cilz livres forment recommande
 Ses proeces, et c'est bien drois;
 Car il fu hardis et courtois,
 Doulz, amoureux, frices, et gens,
 18745 Et bien amés de toutes gens.

18736 petit, B petite.

- U^N jour jetta au lonc ses yex
 Melyador, li tres gentieulz ;
 Regarde et voit vers li venant,
 En moult simple et bas couvenant
 18750 .I. escuier moult mal monté,
 Li quelz menoit pour verité
 D'encoste li une litiere.
 Melyador onques la chiere
 N'en osta, ne les yex ossi.
 18755 Si fu venus jusqu'a cesti,
 Le quel moult bel il salua ;
 Et en apriès li demanda
 Ou il aloit et dont venoit,
 Et quel cose estoit qu'il tenoit.
 18760 Et cilz, qui faisoit mate ciere,
 Li dist : « Sire, en ceste litiere
 « Gist mon signeur tres fort navrés.
 « Jamais ne sera recouvrés
 « Pour ses amis cilz grant meschiés, *f. 138 c*
 18765 « Et vous di que vous appociés
 « Durement chiaus qui ce ont fait. »
 Adont li recorde le fait
 De point en point; comment il va
 De son signeur qui arriva
 18770 Sus les Irois a povre estrine.
 Et li dist moult bien qu'il chemine
 Ou cil sont qui ont en leur garde
 Le passage c'on dist la Garde,
 Sur la riviere de Clarence.
 18775 Quant Melyador l'ot, si pense
 .I. petit, et puis li demande
 S'on entre par la en Irlande,
 Et cilz respont : « Oïl, sans doubte ;
 « Mais au passage c'on redoubte
 18780 « Sont doi chevalier grant et fort,

- « Et pourveü de grant confort,
 « Et se nomment en leurs escriis
 « Messires Housagre et Panfris.
 « Sire, » ce dist li escuiers,
 18785 « On doit vous enfourmer premiers.
 « Se Diex vous avoit tant donné
 « D'eür et a ce ordonné
 « Que vous les peüssiés conquerre
 « Et par la entrer en leur terre,
 18790 « Ce seroit pour vous honneur haute. »
 Melyador respont sans faute :
 « Amis, j'en ferai mon pooir,
 « Car j'en voel cognissance avoir.
 « J'ai ja par .ii. fois ou par .iii.
 18795 « Oÿ parler de ces Irois,
 « Et dist on que si rude sont
 « Que nul compte de nous ne font,
 « Mais, a men espée et ma lance, *f. 138 d*
 « J'en vodrai avoir cognissance,
 18800 « Ou je demorrai en la painne,
 « Ou leur nature tres villainne
 « Ferai je muer en honneur.
 « Moult m'anoie de ten signeur,
 « Quant je le voi en ce parti. »
 18805 A ces mos, d'illuec se parti
 Melyador sans plus attendre,
 Qui voelt d'ore en avant entendre
 A chevaucer devers Irlande.
 Ce soir jut il sus une lende
 18810 Et desous .i. biau vert buisson.
 Je ne sçai mies la muison
 Comprendre, mes moult estoit biaux,
 Et entent le chant des oisiaus
 Qui chantoient toute la nuit;

- 18815 En ce prennent il grant deduit,
Plaisance, solas et deport.
Ja estoit assés priès d'un port
Sus la riviere de Clarensé;
La li revienent en presense
- 18820 Li doulz souvenirs de sa dame,
A la quele il a jusc'a l'ame
Tout donné sans rien retollir.
Pour ses pensées mieulz pollir
Commença la .i. rondelet
- 18825 A faire, et ançois que fait l'et
Eut mainte imagination.
Toutes fois en l'impression
Dou rondelet prist tel plaisance,
Qu'il le fist par bonne ordenance
- 18830 Et le chanta tout en basset.
Si com il fu, c'est droit c'on l'et.

Rondel.

MA dame, a vous me complaindrai
De ma tres amere dolour.

f. 139 a

- 18835 LE plus tost que je vous verrai,
Ma dame, etc.


AILLEURS complaindre ne me sçai
C'a vous, ou sont tout mi retour.
Ma dame, etc.

- 18840 CESTE nuit passa liement
Melyador certainement.
Au matin s'arma biel et bien,

- Tant que sur li ne falli rien,
 De ce dont on s'armoït adont ;
 Les armeüres ores sont
 18845 Plus chieres et de grignour pris.
 Puis ont errant lor chemin pris
 Li sires et ses escuiers
 Pour venir vers les passagiers
 De la riviere de Clarence ;
 18850 Pas ne mettent en negligense
 Des chevaliers que trouver doivent.
 Un tierne par devant yaus voient :
 Tout le monterent a cheval
 Et puis ont regardé aval
 18855 Et voient le pas de la Garde.
 Adont Lansonnès le regarde ;
 A son signeur dist : « Or metés
 « Vo hÿaume et vous remetés
 « A point, car il vous fault combatre
 18860 « Et a .ii. chevaliers debatre
 « Le passage ; soiiés en fis. »
 Dist Melyador : « Je l'ai mis. »
 Adont le lace incontinent
 Et approche moult vistement
 18865 Le passage, ou il doit passer. *f. 139 b*
 Cil qui le virent avaler
 L'envoient incontinent querre .
 D'un passagier a l'autre terre
 N'i avoit, selonc la maniere,
 18870 Fors a trescopper la riviere ;
 Ensi sont entré en Irlande.
 Li chevalier ont joie grande
 Quant vers yaus il voient venu
 Le chevalier au bleu escu :
 18875 Bien voient que joster les fault.
 Melyador, sans nul default,
 Est lors ou cheval remontés.

- 18880 Dedens son escu est plantés ;
 La lance apuigne qui fu roide,
 A la pointe acerée et froide.
 Messire Housagre et Panfris
 Ont errant leurs .ii. lances pris,
 Et se mettent en bon arroi.
 Lors esporonnent tout li troi,
 18885 Li uns sur les .ii., ce me samble.
 Tantost se trouverent ensamble,
 Car il viennent de grant randon.
 Melyador en abandon
 Se met, pour l'un d'yaus consieuir ;
 18890 De plains eslais s'en peut venir
 Sus monsieur Panfris adont.
 Je vous di bien que si cop font
 Moult grandement a ressongnier.
 Encores pour mieulz besongnier,
 18895 Afin que li secons s'avise,
 Melyador dont je devise
 Le consieui de tel façon,
 Droit ens, ou mi leu dou blason,
 Qu'il li fendi comme une osiere. *f. 139 c*
 18900 Le fier li fist passer derriere
 Le dos, bien une grant puignie.
 Il l'empaint par chevalerie ;
 Jus le reverse, il chiet la mors.
 Melyador li trait dou corps
 18905 La lance qui estoit sanglente.
 Or en fait chiere moult dolente,
 Et moult bien en a les materes
 Housagres qui estoit ses freres.

18881 Housagre, *B* Honsagre.



- 18910 **Q**UANT messires Housagres voit,
 Qui la combatre se devoit,
 Que ses biaux freres gisoit mors,
 Se li falli force et confors.
 Il ne scet qu'il die ne face
 Et, a fin qu'il ne se mesface
 18915 A le joust, il descent a terre.
 L'espée ou poing s'en vient requerre
 Melyador moult asprement.
 Cilz, qui le voit apertement
 Venir, est descendus ossi
 18920 Et puis s'est mis encontre li.
 Tost y ara bonne meslée.
 Housagres, qui tenoit l'espée
 Grande et longe et de bonne taille,
 Au chevalier de Cornuaille
 18925 Le jette pour porter damage.
 Melyador a l'avantage
 Est trais, quant voit le cop venant ;
 De sa targe par couvenant
 S'est couvers par bonne façon :
 18930 Se fiert Housagre ens ou moilon
 Dou hÿaume moult roidement.
 De ce cop l'eüst malement
 Appareilliet, il n'est pas doubte ; *f. 139 d*
 Mais l'espée, qui estoit toute
 18935 D'acier, li tourna ens ou poing.
 Or a Housagres moult grant soing
 Que il se puist contrevengier
 Et le passage calengier
 Que Melyador leur devée.
 18940 .I. cop a jetté de l'espée
 Sus Melyador tout amont ;
 Mais cilz si se targa adont
 De l'escu. L'espée y entra,

- Qui une nervure encontra,
 18945 Par quoi elle ne peut riens faire,
 Damage porter ne contraire
 Au chevalier au soleil d'or.
 Et quant ce voit Melyador
 Que ses ennemis si le quoite,
 18950 Jeuer le voelt d'une aultre emploite,
 Sus le costé s'est trais vers li,
 Et Housagres se descouvri
 Quant il le vit vers soi venant.
 Melyador ou couvenant
 18955 Bel et bien l'ala embracier
 Parmi le col, sans espargnier ;
 La y ara luite moult forte,
 Car jus a la terre le porte.
 Les las dou hÿaume li trence.
 18960 Ne li voelt faire longe crence ;
 Il dist qu'il li todra la teste
 S'il n'obeïst a sa requeste.
 Messires Housagres se voit
 En peril, et si ne savoit
 18965 Que Melyador li voelt faire ;
 Siques pour eschiewer contraire,
 Il dist : « Chevaliers, je me rens *f. 140 a*
 Et vous jure dessus ces rens
 « A tenir ce que vous dirés. »
 18970 Adont est arrier retirés
 Melyador, qui prent l'espée
 Dou chevalier sans demorée
 Et dist : « Chevaliers, je t'ordonne
 « A ci demorer en ta gonne,
 18975 « Sans armeüres, ne cheval,
 « A garder ce passage aval
 « Pour tous chevaliers qui venront
 « Et qui par ci passer vorront.
 « Tu leur seras apparilliés

- 18980 « Et les recueillera tous liés,
 « Et leur fera feste et honneur,
 « Ne jamais painne ne douleur
 « Ne leur consentiras a faire. »
 Et Housagres, par bon afaire,
- 18985 Li acorde tout son voloir
 Et li dist : « Sire, jamais voir
 « Ne contredirai chevalier,
 « Qui se vodra apparillier
 « Pour entrer dedens no contrée ;
- 18990 « Et ensi, par foi creantée,
 « Le vous creante com preudons.
 « Mais saciés, sire, vaillans homs,
 « Que se ce pas avés conquis
 « Ce vous est uns petis deduis ;
- 18995 « Car vous arés trop plus a faire,
 « Voires, se vous volés parfaire
 « Vostre emprise ditte devant.
 « Car vous trouverés chi avant,
 « Et sus ceste propre riviere,
- 19000 « Mainte grant aventure fiere
 « De chevaliers preus et hardis, *f. 140 b*
 « Qui demoret y ont toutdis,
 « Car pas ne sont tout desconfis
 « Li chevalier, je vous affi.
- 19005 « Encor en y a quatre vins
 « Qui gardent les divers chemins,
 « A cui bien vous faudra parler,
 « Se jusc'a yaus volés aler. »
 — « Oil, » respont Melyador,
- 19010 « Je l'ay empris que jusqu'au cor
 « De la contrée passerai,
 « Ou en la painne demorrai.
 « Si vous di, sire chevaliers,
 « Ens ou cas que je sui premiers,
- 19015 « Je le vous ordonne et commande

- « Que, se nulz de moy vous demande,
 « Si dittes que je sui passés
 « Et pour yaus vous ferés assés,
 « Car autre chevalier venront,
 19020 « Qui nos routes poursieueront,
 « Qui se sont mis o nous en queste.
 « N'en faites point plenté d'enqueste. »
 Dist Housagres : « Je le ferai,
 « Ne ja jour ne me parjurrai
 19025 « De tout ce que vous ay prommis ;
 « Car je voel estre vos amis,
 « Vos chevaliers et vos servans
 « Pour obeïr a vos commans.
 « Car vous le valés, ce m'est vis,
 19030 « De sens, de proece et d'avis. »
 A ces mos d'iluec se parti
 Melyador sus ce parti,
 Et puis se prent a chevaucier
 Le droit chemin au Brun Rocier,
 19035 Le quel pas .iiii. chevalier gardent, *f. 140 c*
 Et saciés que pas ne retardent
 Qu'il n'en soient tres bien sogneus.
 Melyador comme amoureux,
 Lors qu'il fu partis de Housagre,
 19040 De coer resjoÿ et halagre
 Commança .i. doulz rondelet
 A canter ; c'est raisons c'on l'et,
 Car il fu amoureux et gens.
 Si doit bien plaïre a toutes gens,
 19045 Qui ont les biens d'Amours senti.
 Le dit rondelet veleci.

Rondel.

JE ne desir nulle riens tant
Que de veoir ma douce dame.

19050 **A** liece et a joie grant
Je ne desir, etc.

POUR ce pri Dieu que bien briefment
Ce puist estre, car, par m'ame,
Je ne desir, etc.

19055 **E**NSI s'esbat Melyador
Au canter. Il n'a pas encor
Veü le pas dou Brun Rocier,
Mais il le prent a approcier.
Il chevauce parmi bruieres,
Et traverse landes moult fieres
19060 Et pays durement estragne,
Trop plus qu'il ne soit en Bretagne.
Celle nuit jut sus une lande
Ou il n'a pas ce qu'il demande,
Mais passe trestout liement.
19065 Au matinet certainement
S'est il armés et mis a point.
Ou cheval monte et si se joint
Sus ses estriers, par mignotise ;
Ensi chevauce il a sa guise.
19070 Assés tost .i. hault mont monterent ;
Ou fons desous il encontrerent
.I. irois qui au bois aloit,
Qui s'enfuit sitos qu'il les voit.
Mais Lansonnés ala après.

f. 140 d

- 19075 Et li pria par mos exprès
 Que il les vosist adrecier,
 Pour aler a ce Brun Rocier ;
 Et cilz leur ensengna errant
 Et ala avoech yaus courant
- 19080 Plus d'une grant liewe pleniere.
 Si leur moustra de la bruiere
 Le Brun Rocier et le passage.
 Bien leur dist : « Vous n'estes pas sage,
 « Qui volés ceste part aler. »
- 19085 On le laissa assés parler.
 Pour ce ne s'en abstinrent mie
 Li doi ; mais ont a ceste fie
 Tant chevauciet qu'il sont venu,
 Ou le dit passage ont veü
- 19090 Et la loge ou li chevalier
 Pooient tout le jour logier,
 Qui ne desiroient riens el,
 Fors de trouver en camp mortel
 .I. chevalier ou .ii. ou trois,
- 19095 Pour yaus combatre a ceste fois.
 Tele estoit li affection
 D'yaus tous, selonch m'entention.

- B** IEN avoient ja oÿ dire,
 Dont il estoient en grant ire,
 19100 C'uns chevaliers estoit passés,
 Qui estoit corageus assés
 Et avoit le pas de la Garde
 Conquis, et occis de sa darde
 Monsigneur Panfris le vaillant ;
 19105 De quoy yaus en esmervillant
 L'attendoient tout ce matin,
 Et estoient prest leur ronchin
 Et tout armé devant leur tente,

f. 141 a

- Quant cilz vint qui grans desirs tempte,
 19110 Qu'il se peüst a yaus combatre
 Et leur mauvais usage abatre,
 Car il ne vault voiremens riens.
 Li premiers ot nom Mansiiens,
 Et li secons Frotaus li Gris
 19115 Et li tiers Trabors des Lairis ;
 Cescuns ot possession grande,
 Selonch la coustume d'Irlande.
 Tout troi ont regardé sus destre
 Et voyent Melyador nestre,
 19120 Qui descendoit de la bruiere
 Et son escuier par derriere.
 Il l'ont tantost recognëü,
 Car il estoient pourveü
 Qu'il devoit venir ce matin.
 19125 Cescuns monte lors ou roncin,
 Et prent sa targe et puis sa lance,
 Et se mettent en ordenance
 Pour joster tout troi d'un randon.
 Melyador le sabelon
 19130 Chevaucioit tous apparilliés.
 Il ne s'est pas esmervilliés
 Des .iii., quant il les voit venir.
 Noient ne se volt abstenir,
 Mais se joint dedens son escu,
 19135 Et la lance au bon fer agu
 Met en arrest desous l'aisselle. *f. 141 b*
 Ja y ara joste moult belle,
 Car il viennent l'un contre l'aultre
 En portant les lances sus fautre.
 19140 Melyador des esporons
 Fiert le cheval qui fu moult bons.
 Entre yaus se fiert a plains eslais.
 L'un consiui qui fu moult gais
 Et chevaliers de grant afaire ;

- 19145 Mais, qui qu'il doie ores desplaire,
Telement le porta a terre
Que ses hÿaumes si fort serre
Ou pré, et est si mal menés
Que dou cop est si estonnés
- 19150 Que point ne se poet redrecier.
Melyador, pour adrecier
Son cop, s'en est outre passés,
Et n'est pas encor si lassés
Que les aultres .ii. n'envaisse.
- 19155 La fait d'armes le droit offisse,
Ensi que li preu scevent faire,
Et se garde de trop mesfaire
Et d'entrer en yaus, fors a point.
Li uns de ces .ii. si le point
- 19160 De son glave dessus sa targe,
Mais cilz cops noient ne le charge;
Tantost en fu dessonniés
Et dessus cesti avoiés,
Qui le cop li avoit donné.
- 19165 Il l'a telement estonné
Que jus a terre le reverse
A ce qu'il cheï teste enverse;
Li espaule li desnoa.
Cilz fais grandement agrea
- 19170 A Lansonnet, bien le saciés. *f. 141 c*
Melyador a bras hauciés,
S'en vient dessus Frotaus li Gris;
Par le col l'a telement pris
Que Frotaus ne s'en poet ravoïr.
- 19175 Melyador, sans remanoir,
Par force de bras tel le mainne
Que jusques a le grosse alainne.
S'espée li chiet en l'erbier.
Melyador au chevalier
- 19180 Dist ensi : « Il te couvient rendre,

- « Voires, s'a merci te voel prendre. »
 — « Sires, » dist Frotaus, « je me rens
 « Et vous jurrai devant ces gens
 « A faire ce que vous vodrés ;
 19185 « Et vous pri que vous me prendés
 « A merci et ces deus ossi,
 « Qui la sont cheü par ensi,
 « Que nous ferons vostre voloir. »
 Dist Melyador : « Tu dis voir.
 19190 « Voirement le vous couvient faire. »
 Melyador, sus cest afaire,
 Li fait son hÿaume roster.
 A nu chief li fait la jurer
 Qu'il gardera le dit passage,
 19195 Sans villonnie et sans l'usage
 Tenir qu'il ont tenu devant.
 Encores dist il plus avant,
 Et une cosè moult estragne,
 Que contre nullui de Bretagne
 19200 Ne se poent jamais armer.
 Tous ces poins leur a fait jurer
 Melyador li damoisiaus,
 Et puissedi s'est partis d'yaus,
 Et chevauce sur la riviere *f. 141 d*
 19205 De Clarence, qui est moult fiere :
 La ou il est, a cel endroit,
 .II. liewes a au plus estroit.

- O**^R revenons a Phenonée,
 19210 Qui fort estoit enamourée
 Dou chevalier bien tournoiant.
 Souvent va merencoliant
 Sus ces .ii. dont elle a nouvelles,
 Et quoi qu'elle ait des damoiselles,
 A nulle son cuer ne descuevre.

- 19215 Elle a empris une forte oevre,
 Car elle voelt ses maulz celer.
 Elle en a laissiet le parler
 A Lyonniel son chevalier,
 Et dist que pour son coer brisier,
- 19220 Autrement ne poet avoir pais,
 Qu'elle n'i pensera jamais.
 Mais en cel estat ne demeure,
 Entre jour et nuit, pas une heure,
 Que elle y pense, ou voelle ou non.
- 19225 « A ! » dist elle, « se je le nom
 « De ce bleu chevalier savoie,
 « Trop grandement mieulz en vaurroie.
 « Lyonnel m'a dit qu'il est telz,
 « Si frices et si confortés,
- 19230 « Que c'est de ses fais grans merveilles.
 « Et cilz a ces armes vermeilles
 « Me samble .i. chevalier de bien ;
 « Car, en arroi et en maintien,
 « Je le vi si bien tournier
- 19235 « Et sen espée manier,
 « C'onques puis ne m'issi dou coer.
 « Or ne sui je mies sa suer,
 « Ce que je cuidoie avant hier, *f. 142 a*
 « Car il dist a mon chevalier,
- 19240 « A cui il parla voirement,
 « Que tous en mon commandement
 « Estoit, mais riens ne m'atenoit,
 « Et que pour mi se maintenoit
 « Frichement, quérant aventures.
- 19245 « Las ! ces nouvelles me sont dures,
 « Car je cuidoie avoir assis
 « Mon coer, dou tout donné et mis,
 « A Melyador, mon chier frere.
 « Mais diverse m'est la matere :
- 19250 « Non ai, selonch ce que je voy.

- « S'en ay tristece et grant anoy,
 « Quant ne le puis a mon talent
 « Retraire a ce commencement.
 « C'est cose faée et nouvelle. »
- 19255 Phenonée en tele estincelle
 D'amours, qui est vive et certaine
 Est demorée une sepmainne.
 Telement nuit et jour y pense
 Que toutdis li est en presense
- 19260 Li souvenirs dou chevalier,
 Qui conquist par bien tournier
 Le faucon, par devant Tarbonne;
 Elle telement s'i adonne
 Que nullement n'en poet partir.
- 19265 A Narcissus, le vrai martir,
 Le nous couvenra comparer,
 Ou a Hero qui en le mer
 Moru pour l'enfant Leander;
 Car quoi qu'elle se nomme suer
- 19270 A Melyador, bien saciés,
 Ses cuers est si fort ataciés
 A bonne amour, que toute en art. *f. 142 b*
 Or en a la belle sa part,
 Qui onques mais n'avoit senti
- 19275 Le dart amoureux dedens li.
 Se s'en voelt elle delivrer,
 Mais le chemin n'i scet trouver.
 Elle s'asseule ce que poet,
 Pour ce que celer ses maulz voet;
- 19280 Com plus le fait, plus s'en enflame.
 A damoiselle ne a femme
 Ne dist riens de sa maladie :
 Ensi en perilleuse vie,
 Pour sa santé est elle entrée.
- 19285 Sa mere, qui moult est senée,
 Se perçoit moult bien que la belle

N'est pas en bon point, ce dist elle ;
 S'en est triste, c'est bien raison.
 Adont l'a mis a question
 19290 Pour savoir de li le certain,
 Mais celle ne li conte grain
 La verité dont li maulz vient,
 Qui entours son joli coer tient ;
 Mais li dist tout a la reverse.
 19295 N'a femme qui o lui converse
 A cui elle en die noient.
 Si se mourdris certainement,
 Mais saciés que elle aultre cose
 Pour sen honneur faire n'en ose.

19300 **C**E n'est pas cose moult courtoise
 Au dit duc et a la duchoise,
 Quant elles voient en tel point
 Leur fille, qui les nuis nul point
 Ne poet dormir ne reposer ;
 19305 Et se ne scevent sus gloser,
 Ne dont li vient ceste matere.
 Saciés, au pere et a la mere
 Desplaist forment li ordenance,
 Car leur fille tendrete et blanche
 19310 Voient amenrir de santé.
 A celles qui plus l'ont hanté
 Demandent tout secretement
 De sa vie, mais nullement
 Elles n'en scevent mais que dire,
 19315 Fors tant qu'elles l'ont veü rire
 A le fois et tant dire encore :
 « Ha, biau frere Melyador,
 « Pour vous reçois grant penitance!
 « Trop mieulz me vausist l'esperance
 19320 « A avoir c'avantier avoie,

f. 142 c

- « Quant je mis Lyonnaïel a voie,
 « Que celle que j'ay maintenant. »
 — « De li ne savons plus avant.
 « Demandés ent a Lyonnaïel. »
- 19325 Ce parler tinrent a moult biel
 Li dus et la duchoise ossi.
 Adont fu mandés sans detri
 Lyonnaïus; il vint la en l'eure.
 Son signeur et sa dame honneure,
- 19330 Quant il les voit; c'est bien raisons.
 Li dus, qui fu moult sages homs,
 Li demande de la besongne,
 Et cilz, qui trop fort le ressongne
 A courecier et a bon droit,
- 19335 Leur dist quant ce vint au destroit
 Commencement, moïen et fin,
 Et comment fu mis au chemin
 De leur fille et sur quel parti.
 Liement de li se parti.
- 19340 Qu'il trouva et c'a rapporté, *f. 142 d*
 Tout leur a Lyonnaïus compté,
 Qui n'osa nullement mentir.
 Et quant li dus peut ce sentir,
 Si en fu demi confortés.
- 19345 A sa femme dist : « Or souffrés
 « Et n'en soïés en nulle doubte.
 « Ma fille sera briefment toute
 « Reconfortée et alegie,
 « Puis que je sçai sa maladie. »
- 19350 **L**i dus cuida moult bien adont,
 Par les parlers que oÿ ont
 Mon signeur Lyon recorder,
 Que, pour parfaitement amer
 Son chier frere Melyador,

- 19355 Phenonée de chief en cor
 Euist compris sa maladie.
 Adont s'en vint a chiere lie
 Viers sa fille et li dist ensi :
- « Ma bielle fille, je vous di
- 19360 « Que Melyador vous salue.
 « J'en ay vraie nouvelle eüe
 « Par .i. bon chevalier de queste,
 « De la quele je fac grant feste.
 « A nous tous, il se recommande
- 19365 « Et s'est dedens Norchombrelande ;
 « Celle part le poet on trouver
 « Et se vous me voliés prester
 « Lyonnuel, vostre chevalier,
 « La je le vodroie envoier.
- 19370 « Si nous raporterait nouvelles
 « De li moult vraies et moult belles,
 « Dont vous seriés reconfortée. »
 — « Monsieur, » ce dist Phenonée,
 « Oïl, quoi dont ! Il est tout près, *f. 143 a*
- 19375 « Et li dittes par mos exprès
 « Que jamais de ça ne reviegne,
 « Pour cose que il li aviegne,
 « Si ara trouvé mon biau frere. »
 — « Ma fille, telle est ma matere.
- 19380 « Voirement li dirai je bien,
 « Et enjoindrai sur toute rien
 « Que jamais vers nous ne retourne,
 « Tant lonc termine qu'il sejourne,
 « Si l'ara veü et esté
- 19385 « Avoecques li et arresté,
 « Et par quoi ossi, au retour,
 « Vraies ensengnes dou sejour
 « Et de li il le nous raporte. »

19383 Tant lonc, *B* Con lonc.

Phenonée .i. pau se conforte
 19390 Sus ces raisons, tant que pour l'eure ;
 Et adonques plus ne demeure
 Li dus, mes la Lyonnienel mande
 Et tout ensi li recommande :

« LYONNIEL, je vous ay nourri
 19395 « L Dalés ma fille et dalés mi,
 « Et je vous tieng bon et fiable,
 « Et de corps assés preu et able
 « Pour bien porter une besongne.
 « Savoir devés qu'il nous besongne
 19400 « Que vous vos metés au chemin
 « Et chevauchiés tant, a tel fin
 « Que point ne revenés vers nous,
 « Pour demorer les termes tous
 « De la queste que vous savés,
 19405 « Se vraies nouvelles n'avés
 « De Melyador, mon biau fil.
 « A ce que j'ay entendu, il
 « Se tient devers Norchombrelande. *f. 143 b*
 « Dittes li que je li commande
 19410 « Qu'il viegne veoir sa suer,
 « Qui l'aime de tres loyal cuer.
 « Vous savés bien sa maladie ;
 « Il ne fault pas que le vous di.
 « Or exploitiés, biaux filz, si bien,
 19415 « Par tel art et par tel engien
 « C'au retour vous en sace gré. »
 — « Sire, » dist cilz, « pour verité.
 « J'en ferai dou tout mon pooir. »
 A ces ordenances pour voir
 19420 Estoit la ossi Phenonée.
 Ce propre jour, a relevée,
 Parti Lyonnienel, de Tarbonne,

- Bien armés et en blanche gonne,
Ensi qu'il ot alé devant.
- 19425 Phenonée en ce couvenant
Le vit trop volentiers partir,
Et cuida moult bien son desir
Rafrener, et mettre en bon point
Dou mal qui l'argüe et le point,
- 19430 A son depart. Mes non fera,
Ançois plus malade sera
Temprement que elle n'ait esté,
Coi qu'on regarde a sa santé.
- 19435 **O**R s'en va messires Lyones,
Qui est chevaliers bien ydones,
Pour faire ce qu'il a empris.
A son depart li dus Patris
Se tient pour tous reconfortés
De sa fille, et est moult bien telz
- 19440 Qu'il cuide qu'elle ait la douleur
Pour la pensée et pour l'amour
Qu'elle a apriès Melyador;
Mais il n'est pas au fons encor
De la racine qu'elle porte.
- 19445 Ce premiers elle se deporté
.I. peu mieulz assés que devant,
Et puis li revient au devant
Li chevaliers as rouges armes,
Qui li fait plorer pluseurs larmes
- 19450 Et faire lamentations.
Mais point de ces ententions
A ses femmes ne se descuevre,
Et Amours toutdis avant oevre]
Qui ne le voelt mies laiier.
- 19455 Comment qu'on ait .i. chevalier
Envoiiet pour li sus les landes,

f. 143 c

- Se li sont fortes et pesandes
 Les pensées de fine amour ;
 Souvent dist, entre nuit et jour,
 19460 Quant les pensées vont au cor :
 « Ha, biau frere Melyador,
 « Mar vous vi si bien tournoier,
 « Ne vostre espée menoier ! »
 Tout ce record' on a son pere
 19465 Et a la ducoise sa mere,
 Et il sallent tantost avant
 Qui li remettent au devant :
 « Ma bielle fille, apaisiés vous.
 « Vous savés comment entre nous
 19470 « Est or une ordenance prise,
 « La quele grandement je prise,
 « Car temprement orons nouvelles
 « Qui nous seront bonnes et belles. »
 — « Diex y ait part ! » dist Phenonée.
 19475 La demeure en celle pensée,
 Qui est moult merancolieuse *f. 143 d*
 Et trop durement perilleuse.
 Ce dient tout cil qui le voient,
 Qui encores pas ne savoient
 19480 Les dolours qui sont dedentraines ;
 Mais il voient bien les foraines,
 Comment Phenonée amagrist
 Et de sa couleur amenrist,
 Qui soloit estre de bon taint,
 19485 Et maintenant elle s'estaint.
 Ce sont choses moult desplaisans
 A signeur qui aiment enfant
 Et qui n'ont o yaus c'une fille
 Jone, gratieuse et gentille,
 19490 Dont tout resjoÿ estre doivent,
 Quant ensi amenrir le voient
 Et languir en si dure painne

19495 Que souvent li fault li alainne,
Et n'est nulz qui aidier le face,
Ne qui bien se cognoisse a ce.

OR s'avisa li dus ensi
Que il metteroit dalés li
Une sienne sage parente,
Fille d'un conte, jone et gente.
19500 Cilz contes ses neveux estoit
Et .i. grant pays gouvrenoit
Sus les isles de Cornuaille.
Lussiens eut nom cis, sans faille,
Et sa fille eut nom Lussienne.
19505 Moulte estoit bonne crestienne,
Belle, et sage et de douch afaire.
Tantost manda ce qu'il voet faire
A son cousin, cesti des isles,
Et comment il voelt ces .ii. filles
19510 Mettre ensamble en .i. biau manoir *f. 144 a*
Dehors Tarbonne et la manoir.
Cilz contes, c'on dist Lucien,
A tout ce s'acorda moulte bien
Et envoya a l'eure bonne
19515 Lucienne devant Tarbonne.
On fu moulte liet de sa venue.
La maisons estoit pourveüe
En .i. biau bois vert et joli,
Ou Phenonée et celle o li,
19520 Qui est sa cousine nommée,
Feront .i. temps lor demorée.
Cilz manoirs seoit proprement
Ens ou bois ou premierement
Melyador ses armeüres
19525 Prist pour cerchier les aventures.
Pour ce le fist en ceste istance

- Li dus, et par bonne ordenance,
 Que sa fille a le fois disoit,
 Quant assés lamenté avoit :
- 19530 « Melyador, Melyador,
 « Biau frere, je n'ai point encor
 « Esté ou bois ou vous venistes,
 « Quant de ce pays partesistes.
 « Mar vous vi tournoier si bien! »
- 19535 Sus cel art et sus cel engien
 Fu la Phenonée envoiie,
 Avoecques li toute mesnie
 Apparillie pour servir.
 Tous les jours le viennent veïr,
- 19540 Par affection tres courtoise,
 Li dus Patris et la ducoise.
 Et Luciiene sa cousine,
 Comme gracieuse et benigne
 Li aministre doucement
- 19545 Ce qu'il li fault certainement,
 Et bien perchoit, c'est ci consaulz,
 Que Phenonée a ces assaus
 Par bien amer outre mesure.
 Et adonques la li mesure
- 19550 Luciienne trestout son tamps,
 Et dist : « Voir j'ay esté sentans
 « Tel mal que vous avés, cousine.
 « Si n'en soiies noient estrine
 « De moy dire dont il vous vient,
- 19555 « Car je sçai moult bien qu'il vous tient
 « Au coer, et ja n'en garirés
 « Jusc'a tant que dit le m'arés.
 « Dittes, dittes, hardiement,
 « Et je vous prommech loyaument
- 19560 « Que ja, a pere ne a mere
 « Que vous aiiés, c'est cose clere,
 « Je n'en parlerai sans vo gré.

f. 144 b

- « Bien me poés tout vo secré
 « Dire chi en confession ;
 19565 « Car je n'ay aultre affection,
 « Fors que de l'oïr et d'entendre
 « Pour vostre joie et santé rendre,
 « Dont vous estes .i. pau arriere.
 « Je cognois bien a vo maniere
 19570 « Que vous estes sur l'ain dou dire.
 « Pas ne me devés escondire
 « Telz coses que je vous demande;
 « Ce vous sera joie trop grande
 « Mille fois apriès que devant. »
 19575 Phenonée le couvenant
 Voit et entent de sa cousine,
 Et comment elle l'endocrine
 Et s'i asseüre dou tout. *f. 144 c*
 Et adont jusques au debout
 19580 Li recorde sans riens celer
 Et, quant elle lait le parler,
 Si dist : « Cousine, or vous taisiés
 « Et vo coer .i. peu miex aisiés
 « Qu'il n'a été jusques a ci.
 19585 « Car puis c'Amours, par sa merci,
 « Vous a lachiet de sa chainture,
 « J'en prise trop mieulz l'aventure
 « Que je ne faisoie en avant.
 « Moi et vous ferons, je m'en vant,
 19590 « Des rondelès, et des cançons
 « Et des jolies pareçons
 « Pour nous resjoïr et esbatre.
 « Encores en sai jou tels .iiii.
 « Des rondelès biaux et jolis
 19595 « C'anten amoureusement fis. »
 Et Phenonée lors respont,
 Qui moult doucement le semont,
 Que elle en voelle la .i. dire;

- Et Lucienne, qui desire
 19600 A faire cose qui li plaise,
 Li respont : « C'est tres bien men aise
 « Que je le die, ma cousine. »
 Et adonques la tres benigne
 19605 Commença .i. douls rondelet,
 Femininement dit et fet.

Rondel.

SOUVENIR me fait avoir joie,
 Plaisance me fait avoir bien ;
 Dont mon anui n'oublierai.

- 19610 PAR ma foy, en quel lieu que soie,
 Car bien sçai qu'il est tres tout mien,
 Souvenirs, etc.

f. 144 d

- 19615 IL soit certain, point ne m'anoie,
 Que ferme loyauté li tien
 Et ferai tant com [je] vivrai.
 Souvenirs, etc.

- « QUE vous en semble il, ma cousine,
 « Q Se poet il, selonch la racine,
 « Dou joli mal que vous portés,
 « Passer? Dittes, c'est chi secrés. »
 19620 — « Oil, voir », ce dist Phenonée.
 « Vous estes moult bien ordonnée.
 « Mais comment savés vous ce faire?

19612 Il, B il.

- « Jamais ne vous deveriés taire,
 « Mais toutdis dire telz paroles
 19625 « Ou a dances ou a caroles.
 « Or m'en dittes chi encor un. »
 Et ceste qui n'est pas en jun
 D'estre en solas et en leece,
 Afin que la belle y adrece,
 19630 Qui d'estre aidie a grant mestier,
 Commence .i. peu a busiier
 Et s'en vient sus une fenestre.
 Phenonée li est sus destre,
 Qui joieusement le regarde.
 19635 Lucienne point ne se tarde
 C'un rondelet ne mette avant,
 Qui revenus li est devant.
 Le rondelet, je le dirai
 Au mieulz que porai ne sarai.

Rondel.

- 19640 **P**LAISSANCE en toute douçour
 A mon coer en sa baillie ;
 C'est pour la tres grant valour
 Que cils a a cui m'otrie.

- 19645 **O**R m'i tenrai nuit et jour ;
 Repentir ne m'en voeil mie.
 Plaisance, etc.

f. 145 a

- 19650 **J**E ne puis faire demour
 Mieulz qu'en li, quoi que nulz die.
 Si s'affie de m'amour
 Qu'il ara toute ma vie.
 Plaisance, etc.

- O^R se resjoÿ Phenonée
 Et dist : « Cousine, cilz m'agrée
 « Assés mieus que cilz de devant.
 19655 « J'en prise mieulz le couvenant,
 « Les paroles et la façon. »
 — « Cousine, vous avés raison,
 « Car il est trop plus amoureux,
 « Trop mieus fais et plus gratieus.
 19660 « En telz et en aultres assés.
 « Ançois que li ans soit passés,
 « Nous esbaterons vous et moy.
 « Ostés vo cuer de tout anoy
 « Et de grosse merancolie.
 19665 « Vous devés estre gaie et lie,
 « Nulle aultre riens ne vous besongne,
 « Et lorsque vous arés besongne
 « De confort, si parlés a mi;
 « Vous l'arés tout prest, ce vous di. »
 19670 — « Grans mercis », respont Phenonée.
 Ensi se tient reconfortée
 La fille au duc de Cornuaille.
 Non obstant tout ce se li baille
 Amours pluseurs de ses assaus,
 19675 Mais ses retours et ses consauls
 Est dou tout devers Lucienne,
 Qui doucement li amoiienne
 Les pensées qui le visetent, *f. 145 b*
 Et qui en dur parti le mettent
 19680 Entre nuit et jour bien .v. fois.
 Nous lairons Phenonée ou bois,
 Ens ou manoir, avoech ses gens,
 Et parlerons, il en est temps,
 D'Agamanor le bon vassal,

19667 arés, B avés. — 19683, Et parlerons, B Ot parlerons.

- 19685 Qui chevauce amont et aval
 Le pays de Norchombrelande.
 .I. soir, par aventure grande,
 De Phenonée oÿ nouvelles.
 Les raisons si en sont moult belles
- 19690 A oïr comment ce avint,
 Et pour quoi savoir li couvint.

- I**L est voirs que li chevaliers
 Et Bertoulès, ses escuiers,
 Avoient chevauciet .i. jour.
- 19695 Si prisent au soir leur sejour
 Chiés .i. forestier en .i. bois.
 Li forestiers fu moult courtois,
 Car il les coucha en .ii. lis,
 De quoi li uns fu moult petis.
- 19700 Agamanor volt la jesir ;
 Bertoulès li fist son plaisir,
 Li forestiers n'en avoit plus.
 Quant couchiet furent, d'yaus ensus
 Se traist li forestiers par soy
- 19705 Et dist : « Seigneur, ce poise moy,
 « Que je ne vous puis mieus aidier. »
 Et cil disent sans atargier :
 « Nous sommes bien, biaux doulz compains.
 « Moult bonne est ta char et tes pains,
 19710 « Et la chiere que fais nous as,
 « Ne tu ne le perderas pas ;
 « Encores te sera rendu. » *f. 145 c*
 A ces mos evous descendu
 Monsigneur Lyonniel a l'uis
- 19715 Qui dist : « Forestier, se la puis
 « Que tu me herberges meshui ? »
 — « Sire, » respont cilz, « voir je sui
 « Cargiés d'un chevalier errant,

- « Et n'a cheens, je vous creant,
 19720 « Que .ii. lis, les quels il ont pris. »
 Ce dist Lyones : « Biaux amis,
 « Or demandés au chevalier
 « Se ci me laira herbegier. »
 Et li forestiers li demande.
 19725 Agamanor a la demande
 Respont : « Oïl, compains, par foy.
 « Fait le cha venir dalés moy ;
 « Il gira o mon escuier. »
 Evous venu le forestier
 19730 A l'uis, qui dist : « Entrés, entrés ;
 « Car c'est li plaisirs et li grés
 « Dou chevalier qui ceens loge,
 « C'avoech lui soiiés en sa loge. »
 Adont Lyonnaus ens entra,
 19735 Qui son cheval bien ostela
 Et .i. petit menga et but,
 Et puis ala la ou cilz jut
 Qui estoit Bertoulès nommés,
 Qui se voloit, c'est verités,
 19740 Relever et laisser le lit.
 Mais messires Lyons a dit
 Que non fera aucunement :
 Puis qu'il l'a pris premierement,
 C'est bien raisons qu'il y demeure.
 19745 Messires Lyones en l'eure
 Se coucha, car ja estoit tart. *f. 145 d*
 Bertoulès y fist bonne part
 Dou dit lit, qui point n'estoit grans.
 Trop ne dormi li mieulz dormant,
 19750 Car li linçuel estoient gros
 Et li lis ossi si peu mos
 Que sus gisoient en grant painne.

19737 ala la, B a la la.

- Cilz, le quel aventure mainne
 Par le pays, si com savés,
 19755 S'est en travaillant avisés
 Qu'il demandera au varlet,
 Qui dalés lui gist, tout le fet
 De son mestre, et quelz homs se dist.
 Adont en parole le mist
 19760 .I. petit apriès mienuit :
 « Compains, » dist il, « ne vous anuit
 « S'un petiot a vous je bourde?
 « Voirs est que volentiers m'alourde
 « A toutes choses de nouviel.
 19765 « J'ai veü, sachiés, maint reviel,
 « Mainte feste et maint esbanoy ;
 « Mais, par ce pays, ores voy
 « Pour oïr et savoir nouvelles.
 « Et se nulles en savés belles,
 19770 « Si les dittes, je vous en pri. »
 Et lors Bertoulès respondi,
 Qui dist : « Sire, se vous me dittes
 « Sur quoi vos voies sont escriptes,
 « Tant vous en puis je bien prommettre.
 19775 « Espoir me porés vous bien mettre
 « En matere que de vous dire
 « Tout ce que vostre coer desire ;
 « Car monsieur premierement,
 « Et je avoech li vraiment,
 19780 « En plusieurs lieux nous embatons, *f. 146 a*
 « De quoy des nouvelles savons
 « Plusieurs fois, alant et venant. »
 Lyones ot le couvenant
 De Bertoulet et sa parolle ;
 19785 Si dist ensi quant il parolle :
 « Certes, compains, vous dittes bien,
 « Et je vous voel, sans mal enghien,
 « Dire tout ce que je requier ;

- « Car pour ce me fist chevalier
 19790 « Ma dame, et sus ytel parti.
 « L'autre jour de li me parti. »

- A** DONT Lyoniaus li recorde,
 Ossi droit c'on ligne une corde,
 L'entention de son pourpos
 19795 Et ne le compte pas en gros,
 Mais tout par poins moult sagement,
 Comment sa dame vraiment,
 La fille au duch de Cornuaille,
 S'enamoura premiers, sans faille,
 19800 Dou chevalier as rouges armes,
 Qui si bien par devant les dames
 Tournia et se combati,
 Et tant c'on ordonna a li
 Le faucon, le pris dou tournoy.
 19805 « Mais, compains, pour cel esbanoy
 « Qui fu fais par devant Tarbonne,
 « La dame dont je vous ordonne
 « En est depuis en dur parti ;
 « Car quant de li je me parti
 19810 « La premiere fois, ce sachiés,
 « Ses coers, comme pris et laciés
 « En bonne amour, c'est cose clere,
 « Li fist entendant que son frere
 « Avoit veü et que c'estoit
 19815 « Cilz, au quel li pris s'arrestoit
 « Et li vois dou tournoy le jour.
 « Dont de puis a peu de sejour
 « Travillai amont et aval,
 « Par che pays, sus mon cheval,
 19820 « Pour enquerir la verité
 « Dou rouge chevalier armé ;
 « Se c'estoit ses freres ou non.

f. 146 b

- « Je chevaucâ tant en ce nom
 « Que je trouvai le chevalier.
 19825 « Je m'alay de li acointier
 « Moul't belement, et se li dis
 « M'entention, et se li fis
 « Cognoistre voir moul't liement ;
 « Car il me dist tout qu'oïement
 19830 « Que mies ce n'estoît li freres
 « De ma dame. Sur ces materes
 « Je chevaucâ encor avant,
 « Car trouvé avoie en devant,
 « Par dedens .i. grant bois ramé,
 19835 « .i. chevalier de bleu armé,
 « Au quel ossi jousté avoie ;
 « Mais il m'abati sus la voie
 « Et me bleça au cheoir jus.
 « Depuis a moy ne se prist plus
 19840 « Qu'il sceut que j'estoie a la fille
 « Dou duch Patris, jone et gentille,
 « Et adont je li demandai
 « Son nom, mes mies je ne l'ay ;
 « Soudainnement parti de moy.
 19845 « De puis le vi jou au tournoy,
 « Qui fu fais devant Signandon,
 « En arroy si grant et si bon
 « Qu'il conquist le pris et l'onnoir. *f. 146 c*
 « Adonques me mis au retour
 19850 « Et, quant revenus fui arriere,
 « Je recordai a lie chiere
 « A ma dame tout mon voiage.
 « Elle y entendî commé sage
 « Et me rechut moul't volentiers ;
 19855 « Et bien sachiés c'a ce premiers,
 « Par samblant, elle n'en fist compte.
 « Mais de puis, si com je vous compte,
 « Est entrés en abusions

- « Et en imaginations,
 19860 « Sus son frere et sus mes paroles,
 « Que pour reviaus ne pour caroles,
 « Pour danses ne pour esbanois,
 « C'on fist devant li bien .i. mois,
 « Elle ne se pooit partir
 19865 « De ce pourpos, sans nul mentir;
 « Mais fu en peril d'estre morte,
 « Et est encor, pas n'est trop forte
 « Qu'elle ne soit toute pesans.
 « Ses peres, qui n'a plus d'enfans
 19870 « Dalés li et qui forment l'aimme,
 « Car sa belle fille le claime,
 « En est durement esbahis.
 « Par conseil, ma dame on a mis
 « En .i. manoir, dehors Tarbonne,
 19875 « Avoecques li une tres bonne
 « Damoiselle de son parage,
 « Qui est de plus meür eage
 « Qu'elle ne soit, qui le conseille,
 « Et qui l'ordonne et appareille
 19880 « Moult doucement en tous estas.
 « Siques, chiers compains, sur ce cas
 « Que vous m'oés chi recorder, *f. 146 d*
 « Puis ensi venir et aler,
 « Et irai aval et amont,
 19885 « Car ensi fait jurer le m'ont
 « Li dus et ses consaulz ossi,
 « Que retourner ne doi vers li
 « Se li raporterai nouvelles
 « Toutes vraies, bonnes et belles,
 19890 « De son frere Melyador.
 « Remoustré le vous ay desor
 « Pour savoir s'en aucune adrece
 « Vous m'en feriés. » Et lors se drece
 Bertoulès, et si jure s'ame

- 19895 Que, moult volentiers pour la dame
 Conforter, se riens en savoit,
 Incontinent il li diroit.
 Mais, nennil, il n'en scet riensnée.
 Ceste response point n'agrée
- 19900 A Lyonnell, bien le sachiés,
 Et dist : « Amis, or vous couciés
 « Et me dittes a tout le mains
 « Par ou chi venistes orains,
 « Et me nommés le chevalier
- 19905 « Qui la gist ; je le vous requier. »
 — « Certes, sire », dist Bertoulès,
 Qui dit ne li eüst jamès,
 « C'est uns chevaliers de Norgales,
 « Qui saroit trop mieus dire gales,
- 19910 « Que porter espée ne lance.
 « Son nom, par nesune ordenance,
 « Ne puis jou nommer, ne je n'ose,
 « Et otant bien a la parclose
 « Dou savoir n'avés vous que faire,
- 19915 « Car il est hors de vostre affaire.
 « Je li di, et se me di blasme, *f. 147 a*
 « Mais je ne sçai pour quoi, par m'ame,
 « Onques il se mist sus les camps.
 « Or dormons .i. peu, il est tamps,
- 19920 « Car tantos venrons sus le jour. »
 Messires Lyones qui, pour
 Bertoulet en parolles traire,
 Avoit volü ses recors faire,
 Respont qu'il ne poroit dormir
- 19925 Et qu'il avoit plus grand desir
 Au lever et au chevaucier,
 Que sus .i. tiel lit travillier.
 Le forestier errant appelle ;
 Cilz saut sus, qui ot le nouvelle,
- 19930 Et alume le feu errant.

- Lyones, en ce couvenant,
 S'est levés et apparilliés ;
 Ses chevaus fu tost estrilliés,
 Car li forestier li aida.
- 19935 Ançois que li solaus leva
 Parti Lyone[s] dou manoir.
 Encor peurent la remanoir
 Agamanor et ses varlès,
 Et sachiés bien que Bertoulès
- 19940 Eut bien noté et retenu
 Tout le recort tel que tenu
 Li a li chevaliers la nuit.
 Aucunement y prist deduit,
 Car il scet bien c'a ce premiers
- 19945 Ses mestres l'ora volentiers.

- O**R se sont parti dou manoir
 Le forestier, sans remanoir,
 Agamanor et Bertoulès,
 Quant leurs affaires fu tous près,
- 19950 Et si prennent a cevaucier *f. 147 b*
 En costiant .i. bois plénier.
 Ce dist Bertoulès a son mestre,
 Qui s'en vint sus le lés senestre :
- 19955 « Sire, dittes moy se savés
 « Comment la nuit dormi avés. »
 Et cilz li respondi : « Moulz bien.
 « Toute la nuit n'ai villiet rien,
 « Mais en dormant m'estoit avis
 « C'on recordoit aucun devis ;
- 19960 « Nompourquant, dont merveilles ay,
 « Onques je ne m'en resvillai.
 « Entre toi et ce chevalier
 « Quel cose aviés a consillier ?
 « Maintenant je le te demande. »

- 19965 Et Bertoulès, qui a moult grande
 Retient voirement l'aventure,
 Com il l'euist en escripture,
 Li recorde de point en point,
 Sans ce que falli y ait point,
- 19970 Tout ce que Lyones eut dit,
 Entrues qu'il furent en leur lit.
 Et cilz a la targe vermeille
 Trop durement s'en esmerveille ;
 A painnes le voet ne poet croire.
- 19975 Toutes fois, par parolle voire,
 Bertoulès si bien le recorde
 Que finablement il l'acorde
 Et dist que ce poet trop bien estre,
 Car Amours font bien souvent nestre
- 19980 Plus fortes choses que ne soient
 Celles qu'en leur present il voient.
 Adont s'arreste Agamanor
 Et dist : « Or me recorde encor
 Ceste cose, si com tu l'as
- 19985 Recordé, et si n'en fault pas. *f. 147 c*
 Je preng a l'oïr grant plaisance,
 Car je voel aucune ordenance
 Mettre sus, quant oÿ l'arai ;
 Vis m'est que mieulz le sentirai
- 19990 A celle fois c'a la premiere.
 Et Bertoulès, en tel maniere
 Que recordé devant li ot,
 Li dist ; onques n'en falli mot.
 Tout retint bien li chevaliers.
- 19995 « Or, » dist il, « ce m'est chi uns fiers
 « Encontres et uns durs recors,
 « Quant la damoiselle au gent corps,
 « Pour qui enamourés je sui,
 « Sueffre et endure tel anui,
- 20000 « Et se m'est dure la matere,

- « Quant elle dist que pour son frere
 « Elle est de l'ardant dart atainte.
 « J'ay oÿ parolle tamainte,
 « Mais onques n'oÿ la parelle
 20005 « Et fault bien que je me conseille
 « Comment je m'en porai chevir ;
 « Car a ce que je puis veïr
 « Ce n'est pas pour l'amour de moy,
 « Quoi que preus je fuisse au tournoy,
 20010 « Qu'elle est entrée en tel matere ;
 « Ce n'est que pour l'amour son frere
 « Qu'elle cuida adont veoir ;
 « En moy ne puis apercevoir
 « Nulle raison qui m'esjoïsse,
 20015 « Car se j'entendoie et veïsse
 « Que Phenonée, pour m'amour,
 « Euist tel painne et tel dolour,
 « J'en seroie moult courouciés *f. 147 d*
 « Et aucunement radreciés,
 20020 « Car je viveroie en espoir
 « Que ce me poroit moult valoir ;
 « Siques briefment sus cest afaire,
 « Bertoulès, je n'en sçai que faire.
 « Se tu y vois de moy plus cler,
 20025 « Se le me voelles remoustrer. »

- A**DONT s'avisa Bertoulès
 Et respondi, par mos exprès :
 « Mon signeur, par saint Symeon,
 « Vous y metés assés raison,
 20030 « Et se vous faisiés une cose
 « Voires, se dire le vous ose. »
 — « Quel cose? oïl, hardiement,
 « Ne m'espargne nesunement
 « Que tu ne me dies tout voir. »

- 20035 — « Sire, que vous l'alés veoir,
 « Et vous metés en tel parti
 « Que vous puissiés parler a li. »
 — « A li parler, et par quel voie ?
 « Se nullement je le savoie
- 20040 « Faire, trouver ne aviser,
 « Pour tout profondement viser,
 « Je le feroie trop volentiers. »
 Lors respondi li escuiers :
- 20045 « Nous y viserons, vous et moy,
 « Et regarderons, par ma foy,
 « Comment tout ce se pora faire ;
 « Car il ne fault en vostre afaire,
 « Ce me samble, nulle aultre cose.
 « Fols est li homs qui moustrer n'ose
- 20050 « A sa dame tout son penser.
 « Or, prendés en vous a penser,
 « Car je pense, saciés pour voir,
 « Et cilz qui en voet son devoir,
 « Faire dou penser grandement,
- 20055 « Pense et s'ordonne telement
 « Qu'il ne met ailleurs s'estudie. »
 Saciés, mainte merancolie
 Penserent ce jour entre yaus .ii.
 Agamanor comme amoureux
- 20060 Pensoit a coses moult hautainnes,
 Et ne ressongnoit nulles painnes,
 Ne nulz perilz, que pour la dame
 Il peuist recevoir, par m'ame.
 Et quant il avoit ce pensé,
- 20065 Il descouvroit tout son pensé
 A Bertoulet son escuier,
 Et cilz, pour li esbanoier,
 L'arguoit et le corrigoit
 Et puis doucement li disoit :
- 20070 « Sire, ce n'est point li chemins

f. 148 a

- « Que vous alés, coi que tres fins
 « Amans et chevaliers soiiés.
 « Il fault que vous vous avoiiés
 « Par aultre adrece au dit manoir;
 20075 « Plus grant sens y couvient avoir
 « De premiers que chevalerie. »
 Et lors en sa merancolie
 Aghamanor si se reboute,
 Et y met sen entente toute
 20080 D'estudiier pour le millour
 Comment, par pais et par honnour,
 Il puist parler a Phenonée.
 Tant a sa besongne ordonnée
 Et tant visé par mos exprès
 20085 Que briefment il en est moult près.
 Et quant a son varlet l'a dit, *f. 148 b*
 De noient ne li contredit,
 Mais dist : « Vous estes en la voie
 « Et, se mieulz dire vous savoie,
 20090 « Je le feroie volentiers. »
 Che que li rouges chevaliers
 Avisa, je le vous dirai,
 Ne ja mot je n'en mentirai.
- 20095 **I**L est bien voirs c'Agamanors,
 Qui en grant pensée estoit lors,
 Vous savés bien sur quel adrece,
 Avoit eü en sa jonece
 Imagination moult grande,
 Vous l'orés, s'on le me demande,
 20100 A pourtraire et faire figures,
 Si bien, si belle[s], et si pures
 Et de si tres bonne façon,
 Que on n'i seuist par raison
 Apriès li noient c'amender.

- 20105 De ce le voel recommander
 Plus que chevalier de son temps.
 Quoi qu'il fust gratieus et gens,
 Fiers et hardis oultre mesure,
 S'estoit il enclins par nature
- 20110 Au pourtraire, et imaginer
 Tout ce qu'on peüst deviser ;
 Et ne li coustoit ce plus rien
 Tant avoit il en li de bien,
 Que dont qu'il fesist une lettre,
- 20115 La ou cas qu'il si vosist mettre.
 Mais il l'avoit entrelaiiet
 Puis le temps qu'il ot chevauciet
 En la queste que vous savés,
 Et se merveilles en avés
- 20120 C'est uns argus tous pourveüs. *f. 148 c*
 J'ai bien des chevaliers veüs,
 Frans, gentilz, et vaillans, et preus
 Et as armes moult corageus,
 Qui estoient en tel ouvrage
- 20125 Enclin de sens et de corage,
 Et en grant chierté le tenoient,
 Et vraiment bon droit avoient,
 Car c'est une science noble
 Et en poet de Constantinoble
- 20130 Le filz de l'empereur ouvrer,
 Sans li ja noient reprouver.

- A** GAMANOR, sus cel estat,
 Mist son avis et son restat :
- 20135 « Compains, » dist il a Bertoulet,
 « Je t'ai dit et moustré de fet
 « Plusieurs coses sus nostre avis
 « Et de toutes il t'est avis
 « Qu'elles ne facent point a prendre.

- « Tu me poes moustrer et reprendre,
 20140 « A ton voloir, si com tu voes,
 « Car toutdis consillier me sues.
 « Briefment g'irai vers Phenonée
 « Sus une maniere ordenée,
 « Que je te dirai maintenant.
 20145 « J'ai l'engien et le couvenant,
 « Ensi que tu scés, de pourtraire.
 « Se vodrai une cose faire
 « De cel art, tel que je dirai :
 « En une toile pourtrairai,
 20150 « De blanc et de noir assé[s] bien,
 « L'ordenance et tout le maintien
 « Dou tournoy, qui fu biaux et gens,
 « Et ou moult ot de vaillans gens,
 « Devant Tarbonne, sus la place, *f. 148 d*
 20155 « Et, tout ensi c'on se solace
 « Et solaça ossi le nuit,
 « L'esbatement et le deduit
 « Que les dames ou chastiel fissent,
 « Et des cançons que elles disent
 20160 « Dont j'ai bien retenu aucunes,
 « Et ossi comment les fortunes
 « Furent pour le chevalier rouge,
 « Et que sans faire le harouge
 « Il ala dedens le chastiel
 20165 « Et vei donner bien et biel
 « Le pris dou faucon qui fu la;
 « Mais a nulle ame ne parla,
 « Ançois retourna sagement.
 « Encore ferai certainement
 20170 « Comment il chevauce ens ou bois,
 « Et ou poursieut pour une fois
 « Le chevalier as armes blances.
 « Ce seront bonnes ordenances
 « Et qui donront moult a penser

- 20175 « A Phenonée, il est tout cler.
 « Quant fait l'arai, je t'ai couvent,
 « Je li porterai bellement
 « Et li dirai tout de premiers
 « Que dou faire ay esté ouvriers.
- 20180 « Tost vrai a sa contenance
 « Se point y prendera plaisance.
 « S'elle le prent, c'est bon pour moy,
 « Car, avant que parte de soy,
 « Je li compterai men entente. »
- 20185 — « Certes, ceste ordenance est gente, »
 Ce li dist Bertoulès en l'eure.
 Ensi Agamanor demore
 Sur ce pourpos, sans point partir, *f. 149 a*
 Ne nulz ne li peuist tollir,
- 20190 Tant li est entrés ens ou cuer.
 Adonques chevaucent sur ce fuer
 Que pour venir devers Tarbonne.
 En ce chemin trop bien s'ordonne
 Bertoulès sus cesti afaire,
- 20195 Et dist : « Voir, je n'ai la que faire
 « D'aler a Tarbonne avoech vous,
 « Siques avisons entre nous
 « La ou je porai demorer
 « Et ou vous me porés trouver. »
- 20200 **E**^N chevaucant tout leur chemin
 Ont tant viset qu'il ont fait fin
 A une journée petite
 De Tarbonne, plus n'est escripte.
 En .i. bois avoit .i. manoir
- 20205 Ou une veve dame, voir,
 Demoroit avoech ses mesnies.
 La avoit belles prairies,
 Estans et esbanois assés.

- Oultre est Agamanor passés,
 20210 Mais ses harnois droit la demeure
 Et Bertoulès, qui a toute heure,
 Le vodroit a point consillier.
 La dame le peut recueillir
 Moult liement et doucement,
 20215 Et mist a son commandement
 L'ordenance de son hostel.
 Messire Agamanor fist el,
 Car onques ou manoir n'entra :
 Homme ne femme n'encontra
 20220 Qui recognoistre le peussent,
 Ne qui de son estat sceussent.
 Venus s'en est dedens Tarbonne *f. 149 b*
 Et la moult sagement s'ordonne,
 Et fait a .i. preudomme a croire
 20225 Qui li livre et mengier et boire,
 Que c'est uns ouvriers trespasans
 Et qu'il y a plus de .v. ans
 Qu'il ne fu dedens son pays.
 Li preudons li dist : « Biaus amis,
 20230 « Vous estes li tres bien venus. »
 En cel estat s'est la tenus
 Melyador couvertement
 Et fait querir tout bellement
 Ce qu'il li fault, par le preudomme,
 20235 Couleurs et a oile et a gomme
 Et ce c'au mestier apertient.
 Agamanor droit la se tient,
 Tant qu'il ot plainnement ouvré
 En .i. drap non mies trop lé,
 20240 Mais environ de .v. quartiers,
 Comment li rouges chevaliers
 Tournia par devers Tarbonne.

20233 querir, B cuerir.

- Le tournoy bellement ordonne
 Et tout ensi qu'il se porta
 20245 Et comment le pris enporta
 Par tres bonne chevalerie,
 Et comment il vint la nuitie
 Veoir les dames ou chastiel.
 Tout oevre si bien et si biel
 20250 Que c'est plaisance au regarder,
 Et puis le va enrondeler
 Moult bellement en .i. baston.
 Au preudomme dist en bas ton :
 « Biaus hostes, g'irai au manoir
 20255 « Veoir Phenonée et savoir
 « S'acater vodroit mon ouvrage. *f. 149 c*
 « Au retour arés bon buvrage,
 « Car j'aporteraï des deniers. »
 Et li hostes dist : « Biaus ouvriers,
 20260 « Alés par tout ou il vous plest,
 « Car moy et mes hostelz si est
 « Dou tout a la vostre ordenance. »
 Adont Agamanor s'avance,
 Qui en l'ostel plus ne demeure,
 20265 Et se part de Tarbonne en l'eure,
 Car pas n'estoit lonch de le porte ;
 Son ouvrage avoech li emporte.
 Tant a alé qu'il est venus
 La ou li hostelz fu tenus
 20270 De Phenonée, ens ou biau bois,
 Ou jeuer aloit a le fois
 O Lucienne, sa cousine.
 Encores a la bonne estrine
 Y estoit elle, quant la vint
 20275 Agamanor, qui quois se tint
 Tant qu'il en ot oÿ nouvelles.

20260 et mes hostelz, *B* et vos hostelz.



MELIADOR

- Phenonée o ses damoiselles
Estoit entrée en .i. vregié
D'esglantiers et rosiers vergié ;
20280 La faisoit bel et deduisant.
Agamanor, qui moult plaisant
Avoit le corps et la personne,
Pour parler sagement s'ordonne
A la belle quant vera l'eure,
20285 La quele gaires ne demeure,
Car elle est dou vregiet issue
En une gonnielle tissue
De soies de plusieurs couleurs.
Agamanor, qui les douleurs
20290 De bonne amour prent et encarge, *f. 149 d*
S'en vient, et noient ne s'atarge
Et par devant li s'agenelle
Et puis .i. petit appareille
Le role ou les pointures sont.
20295 .I. peu le desploie et adont
Dist ensi : « Ma tres chiere dame,
« J'ai ordonné et fait par m'ame
« Ce biel ouvrage ou nom de vous. »
Phenonée, qui en genous
20300 Voit l'ouvrier, si dist : « Levés sus
« Et ne vous traiiés point en sus,
« Car nous le volons regarder. »
Lors le prent a desvoleper
Agamanor par petis plois,
20305 Et la belle l'atouce as dois,
Qui grandement prise l'ouvrage,
Et dist : « Haro! en mon eage,
« Point n'ai veü cose si bonne.
« Ou fu ce fait? » — « Dame, a Tarbonne. »
20310 — « En Tarbonne! » — « Voire, ma dame
« La l'ai jou ordené, par m'ame,
« Ma chiere dame, au nom de vous. »

- « Pour moy ? » — « Voires. » — « Biaux mestres dous,
 « Si vous en doi bon gré savoir
 20315 « Et bien la cognissance avoir
 « Que vous avés moult fait pour mi.
 « Or le remetés, mon ami,
 « Nous le verrons ja a loisir. »
 Lucienne, qui grant desir
 20320 Avoit de lire .i. rondelet
 Qui la estoit, dist : « Or le let
 « Encor .i. petit a reclore.
 « C'est une bien nouvelle hystore:
 « Elle est avenue en cel an. *f. 150 a*
 20325 « Foy que tu dois a saint Jehan,
 « Or me lait ce rondelet lire
 « Que je voi celle dame dire.
 « Esce une dame qui le tient ? »
 Adont Lucienne s'en vient
 20330 Sus l'ouvrage, et si le regarde
 Et le list que point ne retarde.
 Li rondelès fu feminins
 Et dis au soir, quant li chemins
 D'Agamanor fu la tenus
 20335 Ou chastiel de Tarbonne, ou nulz
 Ne l'avoit pouït reconnoistre.
 Encores pour mon livre acroistre,
 En tous solas et tous reviaus,
 Ens ou cas que cilz est novviaux,
 20340 Je le dirai sans nul detri.
 Or l'entendés, je vous en pri.

Rondel.

AMIS, or gardés loyaument
 Mon coer que je vous ay donné
 En vo garde, de bon talent.

20345 IL est tout vostre entirement
De tres parfaite volenté;
Amis, etc.

20350 A tous jours mes certainement
Estre en poés asseuré,
Que ja ne sera aultrement.
Amis, etc.

« OR repleiiés, » dist Luciienne
« O Ceste parole n'est pas mienne,
« Car onques n'amai par tel art.
20355 « Et me dittes, se Diex vous gart,
« Biaux mestres, se ce vous feïstes,
« Ou se la feste vous veïstes, *f. 150 b*
« Qui fu ens ou chastiel adont,
« Ou cil qui y furent vous ont
20360 « Recordé comment elle ala. »
Onques .i. seul mot ne parla
Agamanor a celle fois,
Mais remist sa cose ens es plois,
Ensi comme elle estoit devant.
20365 Or vous dirai le couvenant
De Phenonée la pucelle.
Le mestre doucement appelle
En retournant vers le manoir
Et dist : « Mestres, cognissiés voir ;
20370 « Avés vous ouvré cel ouvrage? »
— « Certes, ma douce dame sage.
« Oil, je l'ay fait voirement
« Et, s'il y fault amendement,
« Je le vodroie corrigier,
20375 « Ou encontre tous calengier
« Que la besongne fu ensi. »

- « Or, me dittes donc, je vous pri,
 « Mestres, se je sui la premiere
 « Qui l'a veü. » — « Ma dame chiere,
 20380 « Oïl, et si l'ai fait pour vous. »
 — « Par ensi le retenons nous,
 « Mestres, et voel qu'il nous demeure. »
 Phenonée le fait en l'eure
 Prendre par une aultre pucelle,
 20385 Et puis Agamanor appelle,
 En disant : « Vo cose est vendue.
 « Sieués ceste, par sen ayewe
 « Arés vous toute delivrance. »
 Agamanor en l'ordenance
 20390 De Phenonée si s'arreste,
 Et s'en va tout baissant la tieste *f. 150 c*
 Ensi que merancolieus
 Et trop grandement anoieus,
 Quant il vit c'on entre en le porte
 20395 Et la besongne ensi se porte,
 Que sa tres douce dame chiere
 S'en va, et une camberiere
 Li dist : « Mestres, venés, venés,
 « Et tantost serés delivrés. »
 20400 Or est courouciés outre bort
 Et se repent, ce dist, trop fort,
 Quant sus cel estat est venus
 Jusqu'a la et si maintenus
 C'on ne sara quel cose il voelt.
 20405 A painnes ordener se poet
 Pour sieuir ceste damoiselle,
 Qui va devant et si l'appelle
 A le fois, et dist : « Mon biau mestre,
 « Venés avant. Vous devés estre
 20410 « Moult liés de vostre delivrance.
 « Ma dame a pris trop grant plaisance
 « A tel ouvrage, ce saciés.

- « Ne vous tenés pour escaciés
 « De ceens ; mes y revenés
 20415 « Encor, et de moy retenés
 « Que vous en devenrés tous riches.
 « Vous estes uns jones homs riches
 « De bon corps et de bonne taille,
 « Pour estre au duch de Cornuaille,
 20420 « Ses poinderes et ses ouvriers. »
 Certes li rouges chevaliers
 Estoit si mas de ces paroles
 Et les retenoit pour si folles
 Contre li, et non aultrement,
 20425 Qu'il vosist bien certainement *f. 150 d*
 Qu'il lui eüst cousté grant cose
 Et il n'eüst ce qu'il suppose
 A avoir perdu onques fait.
 La damoiselle errant le met
 20430 En une cambre belle et cointe,
 Seant dou manoir en le pointe,
 Et li dist : « Droit ci demorés,
 « Car saciés vous n'en partirés,
 « Si serés dinés et servis
 20435 « De quanqu'il vous fault, ce m'est vis ;
 « Car tout ensi le voelt ma dame
 « Qui le m'a commandé, par m'ame. »

- P**OUR cose que ceste li die,
 Point ne pert sa merancolie
 20440 Agamanor li damoisiaus.
 Quoi qu'il aime chiens et oisiaus,
 Et qu'il soit d'armes pourveü,
 Si se tient il pour deceüs,
 Et bien le sent ses coers qui art
 20445 En mautalent. Adont se part
 La camberiere incontinent,

- Qui veoit bien qu'en mautalent
 Estoit cilz que mestre elle nomme.
 Au partir dist : « Ne sçay quel somme
 20450 « De florins vous raporterai,
 « Mais pour voir je vous paierai ;
 « J'en ay ja veü la maniere. »
 Adont se part la camberiere
 Et s'en vient ou sa dame estoit,
 20455 Qui devant sa dame arrestoit,
 Car elle l'avoit pour disner.
 A la fille ala demander :
 « Quel cose as tu fait de ton homme ? »
 — « Ma dame, » dist celle, « quel somme *f. 151 a*
 20460 « Volés vous que je li delivre ?
 « Il muse aultre part qu'en .i. livre.
 « Je ne sçai quel cose il li fault.
 « Une heure puis bas, et dont haut,
 « Tient la tieste comme uns buinars. »
 20465 — « Delivre li quarante mars,
 « Et li di au departement
 « Qu'il reviegne proçainement
 « Et qu'il m'apporte aucune cose,
 « Et que vraiment je propose :
 20470 « Je parlerai a monsigneur
 « Mon pere et a tres haute honneur
 « Sera mis dedens brief termine. »
 La camberiere rachemine
 Et s'en vient au mestre d'ostel
 20475 Et dist : « Garoul, il ne faut el
 « Fors que vous aportés viande,
 « Car ma dame le vous commande. »
 — « Pour qui ? » Garoulz li respondi.
 — « Pour .i. homme que j'ai o mi,
 20480 « Que ma dame voelt festoier. »
 — « Belle, or ne vous voelle anoiier.
 « Alés et faites bonne chiere,

- « Il sera bien a vo maniere
 « Servis, et de ce n'aiiés soing. »
 20485 Et ceste, qui pas n'estoit loing
 De sa cambre, y est lors rentrée.
 Cestui trueve, a qui pas n'agrée
 Li ordenance que la voit,
 Et disoit que point ne savoit
 20490 Quel cose il doit de cela faire.
 Il le reprueve a grant contraire.
 Bien dist qu'il n'en sara issir.
 La camberiere a grant desir
 20495 Servir le fait sur toute rien
 De tout le bien c'on poet avoir,
 Et li a dit ensi, pour voir :
 « Maistres, vous revenrés briefment.
 « Ouvrés, ouvrés hardiement,
 20500 « Car ma dame m'a dit ensi
 « Que quant monsigneur devers li,
 « Ses peres, le venra veoir,
 « Elle fera bien son devoir
 « Et tant, car la gist ses argus,
 20505 « Que de li serés retenus,
 « Et averés sa pension
 « Et retour en celle maison. »
 Et Agamanor le regarde,
 Qui a trop grant dur se retarde
 20510 De li descouvrir sa pensée;
 Mais toutes fois en sa visée
 Point n'i voit de bonne ordenance.
 Ce li fait avoir attemprance,
 Voelle ou non; mais c'est a malaise;
 20515 Car il ne voit riens qui li plaise.

f. 151 b

- QUANT Aghamanor ot disné
 .I. petit et a petit gré,
 Car il se veoit la envis,
 La camberiere, ce m'est vis,
 20520 Li aporta son paiement
 Et li dist sans delaiement :
 « Maistres, prendés quarante mars
 « Que ma dame, dont li regars
 « Vault mieulz ne fait li dons d'une aultre,
 20525 « Vous envoie lance sus fautre. »
 Agamanor se resjoÿ
 D'une parolle qu'il oÿ : *f. 151 c*
 Ce fu du regart seulement
 Que ceste mist la en present
 20530 Et rompi sa merancolie.
 Dont respondi a chiere lie :
 « Pucelle, tant c'a ceste fois,
 « Je n'en manierai ja crois.
 « Vous dittes que je revenrai
 20535 « Et c'a vostre dame ouverai.
 « Ce ferai voir, j'en ay desir.
 « Or laissiés la les mars jesir
 « Ou vous les retenés pour vous,
 « Car nulz n'en retenrons pour nous. »
 20540 La camberiere fu lors toute
 Esbahie, et dist : « Je n'oy goute.
 « Il vous en fault l'argent porter. »
 — « Belle, » dist cilz, « au retourner
 « Le prenderai; chi le laissiés.
 20545 « Dieu merci! je sui bien aisiés
 D'encores paiier mon escot. »
 Et adont se lieve en ce mot
 Agamanor tout a .i. fais.
 La camberiere dist : « Pais, pais,
 20550 « Certes, l'argent vous fault avoir;

- « Autrement ma dame, pour voir,
 « S'en tenroit a trop mal paiie. »
 — « Point n'en arai a ceste fie, »
 Respont Agamanor briefment.
- 20555 « Je revenrai proçainnement,
 « Si serai paiiés tout ensamble. »
 La camberiere, ce me samble,
 Ne le voelt adont plus presser ;
 Bellement le laia aler
- 20560 Et l'aconvoia hors de l'uis.
 Agamanor revint de puis *f. 151 d*
 Tout a piet par devers Tarbonne,
 Et saciés que bien il s'ordonne
 Qu'il revenra une aultre fois.
- 20565 De la camberiere, c'est drois,
 Et des dames nous parlerons.
 Quant Agamanor, cilz frans homs,
 Fu partis, que point ne cognoissent,
 Les .ii. damoiselles s'aquoisent,
- 20570 Phenonée, ossi Lucienne,
 Sans avoir moiien ne moiienne.
 En une cambre sont encloses ;
 Cascune ot .i. capiel de roses
 Sus son chief moult liement mis.
- 20575 La fu li draps, dont je devis,
 Desploiiés et bien regardés.
 Lucienne, c'or m'entendés,
 L'imaginoit d'aultre façon
 De Phenonée, et en quel non
- 20580 On l'avoit apporté droit la.
 Lucienne adont en parla
 A sa cousine et dist ensi :
- « Certes, cousine, cilz draps chi
 « Est gentement fais et ouvrés ;
- 20585 « Mais je vous pri, considerés
 « Les afaires de vo gent corps.

- « Je vous di que lonch va recors :
 « J'espoir ci une grant nouvelle
 « A oïr. » Et adont la belle
 20590 Tressaut et en bas li demande :
 « Cousine, je me sench pesande
 « Pour les parolles que vous dittes.
 « Je voi chi des choses escriptes
 « Voirement ou je pense fort.
 20595 « Je ne sçai se j'ai droit ou tort, *f. 152 a*
 « Mais or me dittes vostre avis. »
 Respont Luciienne : « Il m'est vis,
 « Par l'ordenance que je voi,
 « Que cilz qui fu a ce tournoy
 20600 « Dont fait mention ceste hystore,
 « Et qui eut le pris et le gloire
 « De ce tournoy pour la journée,
 « C'est cose trop bien ordenée,
 « A bien oï parler de vous,
 20605 « Que vos coers qui est frans et doulz
 « S'enclina a lui pour ce jour,
 « Et s'a bien oï de l'amour
 « Parler et par quele matere
 « Vous l'envoïastes a vo frere
 20610 « Par regard, non par aultre cose.
 « Certes, cousine, je suppose
 « Que cils chevaliers ait trouvé
 « Aucun ouvrier bien esprouvé;
 « Si l'a fait par deça venir,
 20615 « Pour vous remoustrer et offrir
 « De sa vie une grant partie,
 « A le fin qu'en vo maladie
 « Vous en soiés reconfortée.
 « Siques, tres douce Phenonée,
 20620 « Mandons droit ci vo camberiere,
 « Et li une de nous enquire
 « Comment il va de cest afaire,

- « Ne quel samblant cilz homs peut faire,
 « Quant on li delivra deniers. »
 20625 Et ceste respont volentiers :
 « Mandée soit. » Lors fu mandée
 La camberiere, qui senée
 Fu de respondre a ses .ii. dames,
 Car la ne li touchoit nulz blasmes. *f. 152 b*
- 20630 **L**UCIENNE moult doucement
 Le mist a parolle en present
 Et dist : « Valienne, entendés.
 « Cilz mestres, qui s'en est ralés,
 « Quel cose dist il au partir?
 20635 « Par samblant li peut bien souffrir
 « Ce c'on li donna a l'estrine. »
 — « Ma dame, » diste ceste, « .i. grant signe
 « Vi en li que, dedens brief jour,
 « Il se mettera au retour,
 20640 « Car de vos deniers ne fist compte. »
 Et quant Lucienne ot ce compte,
 Si respondi sus : « Et comment?
 « Ne prist il donques point d'argent? »
 — « Par Dieu, non », respont Valienne.
 20645 — « Or me dittes, » respont Lucienne,
 « Quel samblant il faisoit a l'eure
 « C'avoecques vous fist son demeure? »
 — « Certes, ma dame, il estoit mas
 « Et regardoit dont hault, puis bas,
 20650 « Ensi qu'une personne fole.
 « Ja n'en euisse eü parole
 « Se vers li me volsisse taire,
 « Et disoit qu'il n'avoit que faire
 « Ne de boire, ne de mangier.
 20655 « En cel estat sans li bougier
 « Li vi jou bien heure et demie. »

- « Or me dittes, tres douce amie,
 « Disoit il riens, quant il estoit
 « En ce point ou il s'arrestoit ? »
- 20660 — « Certes, nennil, tant qu'il fu la,
 « Moult petit, sachiés, il parla.
 « Et toutes voies, au partir,
 « Je n'en vodroie point mentir, *f. 152 c*
 « Il voloit que je retenisse
- 20665 « Les deniers et que les euisse
 « A mon pourfit; c'estoit s'entente. »
 Lucienne assés se contente
 De cel estat, et dist en l'eure
 A sa cousine : « Je saveure
- 20670 « Plusieurs imaginations
 « Sus ces fais et sus ces raisons.
 « Et vous di que c'est mon pourpos :
 « Ou il est gentilz homs ou folz.
 « Si le faudra a son retour
- 20675 « Aviser de nuit ou de jour,
 « Et telement examiner
 « C'on sace a quoi il voet penser. »
 Plus n'i eut la ne dit ne fait,
 Aresté se sont sus ce fait.
- 20680 Mais Phenonée forment prise
 Le drap, c'est drois que j'en escrise.
 Priès que tout le jour le regarde;
 En regardant vis est qu'elle arde,
 Tant est d'amours enamourée.
- 20685 Pas ne dist toute sa pensée
 Ses coers, qui est d'amours laciés,
 A sa cousine, ce sachiés,
 Quoi qu'elle li die a le fie
 Ses secrés, car bien s'i confie.

- 20690 O R vous dirons d'Agamanor.
 Il s'en est retournés des lor
 Qu'il se fut partis dou dit bois
 A son hostel a ceste fois.
 En sa cambre s'est enfermés ;
- 20695 La s'est longement demenés
 En plusieurs lamentations,
 Et dist : « C'est men ententions. *f. 152 d*
 « J'ai tout perdu par ma folie
 « Et desciré chevalerie
- 20700 « Laidement, de quoi je vail mains.,
 « A painnes que je n'ars les mains
 « Qui scevent telz coses ouvrer,
 « Qui me font ensi abuser
 « Et penser c'une tele dame
- 20705 « Comme est Phenonée, par m'ame,
 « S'enamourast pour mon ouvrage.
 « Elle a bien plus hautain corage
 « Que de mettre en .i. menestrel,
 « Et s'a bien dedens son hostel
- 20710 « Grant conseil, il n'est mies doubte.
 « A ! Bertoulet, ma painne est toute
 « Perdue, a ce que je puis veoir.
 « Je deuisse bien au mouvoir
 « Estre avisés, par tel maniere,
- 20715 « Comment a une camberiere
 « Je seroie recommendés.
 « Je cuidoie bien estre telz
 « Que Phenonée me deuist
 « Conjoïr, et qu'elle volsist
- 20720 « Savoir de moy mieulz le certain,
 « Et quelle m'euist par le main
 « Pris et menet par tout esbatre ;
 « Et adonques, sans rien rabatre,
 « Quant j'euisse veü le temps,

- 20725 « Ensi com cilz qui sui sentans
 « Pour s'amour mainte cose amere,
 « Je li euisse ma matere
 « Dit et moustré tout quoieient
 « Par douce parole, et comment
- 20730 « J'avoie erret et travilliet,
 « Et nuit et jour a ce villiet; *f. 153 a*
 « Que laiens ne savoie entrer
 « Pour mes besongnes remoustrer.
 « Fors par l'estat que fait avoie
- 20735 « Et que voirement je savoie
 « Bien ouvrer ensi de jonece,
 « Et pour plus la secrée adrece
 « J'avoie cel avis eü.
 « Tantost j'euisse en li veü
- 20740 « S'a moy a nulle affection,
 « Quant ensi men entention
 « Li euisse moustré et dit.
 « Or m'a on dou tout contredit,
 « Car laiens je ne sui nommés
- 20745 « Fors uns pointres bien renommés.
 « Ce me desplaist trop fort, par m'ame!
 « Quant entrés y sui a tel blasme,
 « C'est bon que plus ci ne sejourne,
 « Mais vers Bertoulet m'en retourne
- 20750 « Si reprende nouvel conseil. »
 Agamanor en ce frefeil
 Compte a son hoste et si le paie,
 Et dist ensi : « C'est cose vraie.
 « Au matin je me partirai,
- 20755 « Biaus hostes, et si m'en irai.
 « Je me lo moult de vostre hostel. »
 Mais Agamanor fera el,
 Car quant il fu le soir couciés,
 Il s'est grandement empeciés
- 20760 A penser apriès Phenonée,

Et toute la cose ordenée
 Qu'il avoit ditte par devant
 Remet en nouviel couvenant,
 La quele ordenance mieulz prise
 20765 Que ceste de devant qu'il brise. *f. 153 b*

« **P**AR ma foy, » dist Agamanor
 « Se j'ay perdu le temps, encor
 « Le voel je par aventurer.
 « Car je me vodrai figurer
 20770 « En une toilette petite,
 « Devant moy Phenonée escripte,
 « .I. faucon tenant sus mon poing;
 « Encores a ce grant besoing
 « En l'autre main .i. rondelet
 20775 « Vodrai tenir en .i. rolet.
 « Et quant j'arai ensi ouvré,
 « Se je n'ay le temps recouvré
 « Que j'ay perdu, je m'en irai
 « Tous desconfis, et se dirai
 20780 « Que j'ai failli a mon espoir
 « Et que cuidier ne sont point voir. »
 Agamanor, sus ce propos,
 Ne mist ne terme ne repos;
 Si com il le dist, il le fist,
 20785 Environ .iiii. jours y mist.
 .I. ymage bel et propisce,
 Fait au samblant et en l'espisce
 De Phenonée pourtraiy,
 Et puis si se fist devant li
 20790 Au mieulz qu'il peut certainement;
 Et s'enclinoit moult humlement
 Devant Phenonée en figure.
 Moult gente fu li pourtraiture,
 Car sus une main il tenoit

- 20795 .I. faucon qui li avenoit
 Gratieusement a tenir;
 En l'autre main sans point mentir
 Tenoit en .i. petit roliel
 .I. moult tres amoureux rondiel, *f. 153 c*
 20800 Le quel rondel je vous lirai,
 Car moult grant plaisance y arai.

Rondelet

EN pensant a vous me conforte,
 Ma tres douce dame, toutdis.

- 20805 **D**E ma douleur qui est trop forte
 En pensant, etc.

CE doulz penser si me deporte
 De tout anui, et pour ce dis :
 En pensant à vous, etc.

- 20810 **L**ORS c'assouvi ot son ouvrage,
 Agamanor prist son voiage
 Pour aler devers le manoir.
 Ou bois s'en vint sans remanoir;
 Si ne s'arreste ça ne la,
 Ne a personne ne parla
 20815 Jusques a tant qu'il vint a l'uis
 Dont il estoit partis; de puis
 Ne fu il en celle maison,
 Ou Valiienne, a grant raison
 L'avoit mis, qui fu camberiere.
 20820 Agamanor a la barriere
 De l'uis s'en vint, et d'aventure

- Regarde ens par une crevure;
 Si voit Valienne seoir.
 .I. petit busce, et celle voir
 20825 Se lieve et si s'est trette avant;
 L'uis oeuvre. Agamanor devant
 Li s'est mis, et dist : « Damoiselle,
 « Diex vous doinst hui bon jour! » Et celle
 Li respondi : « Et vos, biau sire! »
 20830 Lors prist Agamanor a dire :
 « Damoiselle, chi sui venus,
 « Et si ne me scet ceens nulz *f. 153 d*
 « Ne nulle quel cose je cace.
 « Si voel jou moult bien c'on le sace,
 20835 « Voires vous et la vostre dame,
 « Et nulle aultre fors vous, par m'ame.
 « J'ay aporté moult belle cose,
 « Mais ensi que je vous propose,
 « A nullui ne le moustrerai,
 20840 « Ne ja ne le desploierai,
 « Fors a seul vostre dame chiere. »
 Dont respondi la camberiere :
 « Je vous entens bien, sire ouvriers.
 « A ma dame irai volentiers
 20845 « Et li dirai ce que vous dittes;
 « Le[s] voies y sont moult petites,
 « Car elle est assés priès de chi. »
 Adont Valienne parti
 Et en une cambre s'en vint
 20850 Ou sa damoiselle se tint
 Et Lucienne, sa cousine;
 A Phenonée fist .i. signe
 Qu'elle voloit parler a li.
 La pucelle di : « Vemeci.
 20855 « Que voes tu dire, Valienne? »
 Ce fu ensus de Lucienne :
 « Dame, ceens est revenus

- « Li pointres, et se dist que nulz
 « Ne nulle, tant soit de parage,
 20860 « Ne vera fors vous son ouvrage.
 « Se dist il que c'est bonne cose. »
 Et Phenonée, qui point n'ose
 Tenir la parole en secré,
 Pour servir sa cousine a gré,
 20865 Dist ensi : « Or va, et l'amainne. »
 Celle se part, et sa germainne *f. 154 a*
 Fait Phenonée a brief parler
 Dedens une gourdine aler,
 Et li dist : « Tenés vous droit la,
 20870 « Car cilz de l'autrier revenra;
 « Ja est il en ceste maison. »
 Adont li dist sus quel raison
 Sa camberiere estoit venue.
 Lucienne qui se remue
 20875 De son pas, sans point de response,
 En une gourdine s'esconse.
 Evous Agamanor qui vient
 Et ce qu'il porte en sa main tient.
 Si salue biel Phenonée
 20880 Et celle, com bien ordenée,
 Son salut li rent doucement.
 A Valienne dist : « Va t'ent.
 « Laisse nous ci, moy et ce mestre. »
 Elle se part; au lés senestre
 20885 S'est trais. Aghamanor, en l'eure,
 En parlant grandement honneure
 Phenonée la et l'encline
 Et dist : « Ma dame, a bonne estrine,
 « Je vous rapporte .i. peu d'ouvrage,
 20890 « Le quel j'ai fait de bon corage,
 « Car voir il me touche moult fort. »
 Phenonée, qui oultre bort
 Estoit courtoise et gratieuse,

- Tourna ce parler a huiseuse,
 20895 Car point ne sentoit la matere,
 Et dist ensi : « Or ça, biau frere,
 « Vous serés paiiés largement
 « Pour l'un et l'autre vraiment,
 « Car je sçai moult bien c'on vous doie. »
 20900 Lors tent la main et cilz, qui voit *f. 154 b*
 De Phenonée l'ordenance,
 Doucement en le main li lance,
 Et celle erranment le desploie.
 Si le regarde et a grant joie
 20905 Des .ii. images qui ens sont
 Et des contenances que font.
 Si dist : « Mestres, c'est bien ouvré ;
 « Mais voelliés me dire en secré :
 « Cognissiés vous ce chevalier,
 20910 « Pour qui droit ci et avant hier,
 « Sus son estat et son afaire,
 « Vous avés peüt tout ce faire ? »
 — « Oil, ma dame, pour certain.
 « Otretant que mon corps je l'aim. »
 20915 Et quant Phenonée ot ce mot,
 .I. peu d'esbahissement ot,
 Et li souvint de sa cousine
 Qui li ot dit par grant doctrine,
 En considerant les raisons,
 20920 Que cilz estoit folz ou frans homs,
 Qui avoit pourtrait cel ouvrage.
 Adonques la douce et la sage,
 Pour mieulz Agamanor attraire,
 Dist ensi : « Et que voet cilz faire,
 20925 « Qui telement se represente
 « Par ceste figure presente.
 « Bien sçai qu'il vainqui le tournoy,
 « Et cuidai de puis, par ma foy,
 « Qu'il fust Melyador, mon frere ;

- 20930 « Mais non est, car bien la matere
 « En ay de puis sceü sans doubte. »
 Agamanor, qui se redoubte
 A avancier et a parler,
 Commença .i. peu a penser *f. 154 c*
- 20935 Et a transmuer sa coulour.
 Phenonée, en qui toute honnour
 Estoit, dist : « Mestres, que vous fault ?
 « Avés vous trop froit ne trop chaut ?
 « Je vous voi .i. peu fourvoier. »
- 20940 Adont se prist a ravoier
 Agamanor par la parole
 De Phenonée, qui parolle
 Et qui doucement li demande :
- 20945 « Cilz chevaliers est il d'Irlande,
 « Qui conquist le pris dou tournoy ?
 « Biaux doulz mestres, nommés le moy,
 « Et je vous en sarai grant gré
 « Et si le tenrai en secré.
 « Tout ce vous ay jou en couvent. »
- 20950 Agamanor moult matement
 Respondi et dist : « Chiere dame,
 « Je ne l'ose nommer, par m'ame,
 « Mais je sui de lui cargiés tant
 « Que je vous die maintenant
- 20955 « En quel painne il est nuit et jour,
 « Pour avenir a vostre amour.
 « C'est li plus grans desirs qu'il ait ;
 « Car, s'il pooit par droit souhait
 « Avoir tous biens a son cuidier,
- 20960 « Il ne vodroit mieulz souhaidier
 « Que d'avoir la vostre amour, dame,
 « Et tout ce retieng jou, sur m'ame. »

- M**oult fu Phenonée esbahie,
 Et si se tenist pour trahie,
 20965 S'en la cambre ne sentesist
 Sa cousine ou liu ou le mist.
 C'est uns poins qui le reconforte,
 Et qui le fait et sage et forte *f. 154 d*
 En responses et en parler.
 20970 Adont, pour mieulz examiner
 Cesti, qui la parolle a li,
 Li dist : « Biaux mestres, je vous pri
 « Que vous nommés che chevalier,
 « Qui ensi se poet travillier
 20975 « Pour men amour, ce dittes vous.
 « Je croi bien qu'il soit frans et doulz,
 « De biau corps et de bonne taille.
 « Vous l'avés moult bien mis, sans faille
 « En ces figures gentement;
 20980 « Mais savoir devés vraiment
 « Que jamais ne m'assentiroie,
 « Par parler ne par nulle voie,
 « A amer nul homme vivant,
 « Se ne le cognissoie avant.
 20985 « Nommés le moy, s'en vaudra mieulz. »
 Adonques rabaissa ses yex
 Agamanor et dist : « Par m'ame,
 « Je ne l'ose nommer, ma dame,
 « Car il est chevaliers de queste;
 20990 « Mais, se vous voliés sa requeste
 « Obeir en tele maniere,
 « Que vous fussiés sa dame ciere
 « Et desur toutes souverainne,
 « Je vous en feroie certainne,
 20995 « De tant en ose jou bien dire. »
 Et Phenoné[e], qui desire
 A savoir encore plus avant,

- Respont par trop bon couvenant :
- « Certes, mestres, pas n'estes fols.
- 21000 « Bien voet mon coer estre si mols
 « Que il vous ora volentiers,
 « Afin que li dis chevaliers *f. 155 a*
 « Nous soit .i. petit esclarcis,
 « Et si en dirai grans mercis
- 21005 « Envers vous et a desservir. »
 Adonques s'ala pourveïr
 Agamanor de biel parler
 Et ala tout eventurer.
- A .i. genoul la s'engenelle,
- 21010 Et dist : « Dame, j'ay grant merveille
 « Comment tant me sui astenus,
 « Quant si avant je sui venus
 « Et si ne me suis descouvers,
 « Ne a vous encores ouvers.
- 21015 « Saciés, ma douce dame chiere,
 « Que vous veés devant vo chiere
 « Li chevalier qui ot le pris
 « Dou tournoy ; et si me renc pris
 « A vous, comme vostre prison.
- 21020 « Vous me tenés en vo prison ;
 « Si poés de moy vo bon faire,
 « Mais je vous sens si deboinaire,
 « Si courtoise, et si gratieuse
 « Et si grandement amoureuse,
- 21025 « Que vous arés pitié de moy.
 « Et je vous jur, en bonne foy,
 « Et de ce vous ferai certainne,
 « Que traveil, ne peril ne painne
 « Que endurer pora mes corps
- 21030 « En toutes places, ens ou hors,
 « Nulles n'en vodray ressongnier,
 « Mais que pour vostre chevalier,
 « Ma dame, vous me retenés.

- « Certes, dame, ci me tenés
 21035 « Ensi c'un oiselet en gage.
 « Si ne me laissiés mon langage *f. 155 b*
 « Perdre, car tous li cuers y est
 « Et, se plus avant il vous plest
 « Ces paroles prouver en voir,
 21040 « Vous devés, ma dame, savoir
 « Que, soit ou a .i. ou a .ii.
 « Chevaliers bien enventureus,
 « Je moustrerai ce que sçai faire. »
 Lors s'ala Agamanor taire,
 21045 Et Phenonée le regarde,
 Qui ossi .i. peu se retarde.

- C**E n'est mies trop grant merveille
 Se Phenonée s'esmerveille,
 Quant elle ensi se voit priie
 21050 En signe de grant courtoisie
 Pour s'amour avoir, et d'un homme.
 Tout ce li samble .i. grant fantomme,
 Et ne scet mies que respondre.
 Toutes fois sens l'ala semondre
 21055 Pour parler; si dist en basset :
 « Vostre parole voir me met
 « En doubance, et ne sçai pour quoi.
 « Vous partirés .i. peu de moy
 « Et irés en la cambre arriere,
 21060 « Par devers nostre camberiere ;
 « Sempres vous ferai rappeler. »
 Cilz n'osa dire, c'est tout cler,
 Dou non; mais dist : « Ma chiere dame,
 « A vo commandement, par m'ame. »
 21065 A ces parolles s'est retrais
 Et ot la camberiere trais,
 Qui moult bellement le recueille.

- Or esçou raison que je voelle
 Perseverer de Phenonée.
- 21070 Sa cousine, toute ordenée, *f. 155 c*
 Est hors de le courtine issue
 Et a la fenestre venue
 Ou Phenonée s'apoiit,
 Qui li dist ensi quant le voit :
- 21075 « Cousine, vous avés oÿ,
 « Ensi que j'ay, cest homme ci,
 « Qui dist que c'est li chevaliers
 « Que je veï si volentiers
 « Tournoïier par devant Tarbonne,
- 21080 « Et adonques a l'eure bonne
 « Je cuidai que ce fust mes freres.
 « Mais non fu, car puis les materes
 « En seuch moult bien par Lyonnïel,
 « Mon chevalier au corps isnïel,
- 21085 « Qui m'en raporta le certain.
 « Qu'en dittes vous ? M'i puis jou grain
 « Apoiier, que ce soit li rouges,
 « Chevaliers, qui n'est mies harouges,
 « A che que je sui enfourmée,
- 21090 « Mais homs de tres grant renommée,
 « De hardiement et de proece ?
 « J'ai moult bien mestier c'on m'adrece
 « Ou chemin de moy consillier. »
 Adont s'ala apparillier
- 21095 Lucienne de dire ensi :
 « Certes, cousine, j'en sui si
 « Esmervillie, au dire voir,
 « C'a painnes m'en puis jou ravoir.
 « Et toutes fois, je mac en place :
- 21100 « Il n'est cose qui ne se face.
 « Cilz chevaliers poroit moult bien,
 « Par son sens et son grant engien,
 « Avoech Amours qui le conseille,

- f. 155 d*
- 21105 « Fait ceste cose non pareille
 « A nulle autre dont parler doie.
 « S'il est ensi, il a pris voie
 « Moult soubtieue pour vous veoir ;
 « Et que, pour vous faire a savoir
 « Comment li est de vostre amour,
- 21110 « Je suppose ensi c'a nul jour
 « Nulz povres homs de bas afaire
 « N'eüst osé tel cose faire.
 « Toutes fois encor le verons
 « Et si bien examinerons
- 21115 « Que nous en serons a segur.
 « Se je le trueve ossi meür
 « C'on doit trouver .i. chevalier,
 « Qui ensi se voet avancier
 « Comme il le moustre maintenant,
- 21120 « Ma cousine, je' vous creant
 « Qu'il ne fait pas a refuser
 « Et foy y vodrai adjouster.
 « Je vous dirai qu'il faurra faire,
 « Pour la besongne en bien parfaire.
- 21125 « Je l'irai querre, ou nom de vous,
 « Et puis li dirés par mos doulz,
 « Present moy, sans estre seulete,
 « Que vous estes encor jonete
 « De savoir, d'avis et d'eage
- 21130 « Pour entrer en pelerinage
 « D'Amours, sans avoir .i. moiien.
 « De tout ce vous crera il bien
 « Et vous me lairés dou sourplus
 « Couvenir, ains qu'il traie ensus.
- 21135 « Je sarai sen entention
 « Par bonne imagination. »

21104 Fait; *le sens voudrait* Avoir fait. — 21135 sen intention,
 B se entention.

Et ceste respont sans detri :
« Chiere cousine, je l'otri. »

f. 156 a

- 21140 **A** tant Lucienne se part
Et si s'en vient a celle part
La ou li dis chevalier fu.
Se li dist : « Venés, venés. » — « U
« Volés vous, dame, que je voie ? »
Celle respont : « Sieués ma voie.
21145 « La vous menrai ou vos cuers tent. »
Et quant Agamanor entent
Que c'est en la cambre sa dame,
S'en est tous resjoïs, par m'ame.
De la se part, plus ne demeure :
21150 En la cambre viennent en l'eure.
Or est Agamanor venus,
Qui s'est la en present tenus,
Sans parolle mouvoir ne dire.
Phenonée prist a sourire
21155 En regardant vers sa cousine,
Et celle qui fu moult benigne
Commença ensi a parler :
« Se vous me voliés enfourmer,
« Biau sire, de vostre querelle,
21160 « Vostre cose en seroit plus belle ;
« Car ma cousine qui ci est
« Ne fera riens, s'il ne me plest.
« Elle est mise en ma gouvrenance. »
Agamanor ot l'ordenance
21165 Des dames et voit la maniere ;
Lors parolle et dist : « Ma tres chiere
« Damoiselle, pour Dieu merci,
« Se je sui venus jusqu'a ci,
« Saciés loyauté m'i amainne,
21170 « Pour l'amour de vostre germainne,

- « Dont je sui espris telement
 « Que je ne m'en puis nullement, *f. 156 b*
 « Ne ne sçai certes, consillier.
 « On ne se doit esmervillier
 21175 « Se je me sui mis en tel ploy
 « Pour lui veoir; car, par ma foy,
 « Penser nuit et jour me travellent
 « Pour s'amour, qui si me resvellent
 « Que je ne puis a el entendre
 21180 « Et telz painnes mon coer engendre
 « C'onques teles ne souffri nulz. »
 — « Encor en soufferés vous plus, »
 Ce li respondi Lucienne.
 — « Ça pour quoi? » — « Saciés que la mienne
 21185 « Cousine se doie entremettre
 « De tost donner son coer et mettre
 « En lieu que elle ne cognoist.
 « Il fault que la besongne voist
 « Par ordenance et par avis.
 21190 « Chi estes venus, ce m'est vis,
 « Comme uns pointres et uns ouvriers,
 « Et puis vous nommés chevaliers.
 « Ne savons se c'est voir ou non.
 « Or prendons que aiiés le nom
 21195 « Et l'estat de chevalerie;
 « S'en vous n'est la bachelerie,
 « De ce nom ne donroie pas
 « Le jeu c'on nomme des escas.
 « Et ce trop fort nous esmerveille
 21200 « Comment, qui la cote vermeille
 « Portés, si com li chevaliers
 « Portoit qui fu preus et legiers
 « Au tournoy par devant Tarbonne,

- « Vous estes com une personne
 21205 « Poinderes ceens embatus.
 « Ne le creroit nulle ne nulz, *f. 156 c*
 « Ne le vorroit oïr ne croire
 « Que ceste parolle fust voire.
 « Si seroit fole ma cousine,
 21210 « Quant ceste ordenance imagine,
 « S'elle asseoit si bas son coer,
 « Qui est a Melyador suer,
 « Le fille au duch de Cornuaille.
 « Ne sçai nul chevalier qui vaille
 21215 « Pour li, de ce soiïés certains.
 « Si vous prie, biaux chiers compains,
 « Se vous estes mal enfourmés,
 « Que bellement vous retournés
 « Et en pais hors de ce manoir;
 21220 « Car s'on pooit tout ce savoir,
 « En Tarbonne, que ci fussiés,
 « Que decevoir nous vosissiés,
 « Sans ordenance retarder
 « Nous ne vos porions garder
 21225 « Que vous ne fuissiés pris et mors,
 « A qui que fust, ne droit ne tors.

O R est Agamanor tous mas,
 Quant il se voit jeter si bas
 Et rebouter par tel parolle.
 21230 Adont moult doucement parolle,
 Et dist : « Dame, je vous creant,
 « Je n'arai le corps recreant
 « Que je n'esprueve bien en voir
 « Tout ce que je vous fai savoir.

21222 decevoir, *B* de cévoir.

- 21235 « Je ne di mies que je soie
 « Tous li mieudres qui voist sur voie ;
 « Mais je sui li uns de la queste
 « Qui feroie .i. moult biau conquete,
 « Se par proece et bien servir
- 21240 « A l'amour pooie avenir *f. 156 d*
 « De Phenonée, qui ci est.
 « Et, ma tres chiere, s'il vous plect
 « A entendre et oïr raison,
 « Quoi que je soie en vo maison,
- 21245 « Je vous conterai mot a mot
 « Mon estat. » Et celle qui l'ot
 Respont : « Oïl, moult volentiers. »
 Lors commence li chevaliers :
- 21250 « **D**AME, je sui d'estragnes terres,
 « Poursieuan et tournois et gerres,
 « Si com la queste nous ensengne,
 « Ne mies de la Grant Bretagne
 « Dont tout li bon chevalier sont,
 « Mais d'un pays pour quoi cil vont,
- 21255 « Qui en sont hors, aventurer
 « Pour leur gentillece amonter.
 « Vous n'en poés plus savoir ores,
 « Mais remoustrer vous voel encores
 « Que mes peres qui est frans homs,
- 21260 « Chevaliers, et fu ses taions
 « Et ossi tout nostre ancisseur ;
 « Revenir voel a mon signeur
 « De pere, et vous en parlerai.
 « En ma jonece, com bien sçai,
- 21265 « Il avoit dedens son manoir,
 « Ou moult plaisant faisoit manoir
 « Cambres belles et galleries.
 « La faisoit les baceleries

- «
- 21270 «
- « Des preus chevaliers de jadis,
 « Des Troiens preus et hardis,
 « De Hector et de tous ses freres,
 « Et des Grius faire les materes;
- 21275 « Comment vaillamment il regnerent,
 « Et comment sus yaus s'espruverent *f. 157 a*
 « Li Grigois et cil de leur sortes,
 « Les batailles grandes et fortes
 « Qui furent en ce temps entre yaulz.
- 21280 « Et j'estoie uns jones tousiaus,
 « En l'eage espoir de .ix. ans,
 « Se enclins et si entendans
 « A ce que leur veoie faire,
 « Tous les jours ouvrer et pourtraire,
- 21285 « Que je ne voloie ailleurs estre,
 « Fors tout dis ou clos ou en l'estre
 « Ou il ouvroient en mi yaus;
 « Et, si preudoie leurs pinciaus,
 « Si en pourtraioie a par mi.
- 21290 « Tant y fui, tant y pourtraÿ
 « Et tant y pris jou de plaisance,
 « Voires, avoecques l'ordenance
 « Des ouvriers qui m'i ajettoient
 « Et qui de cuer le m'ensegnoient,
- 21295 « C'onques puis je n'en peus issir.
 « Moulz y preudoient grant plaisir
 « Mon pere et ma dame de mere.
 « Tant poursieui ceste matere,
 « Dont .iii. ans je fui a l'escole,

¹ 21269-21271. *Ily a ici quelques mots oubliés, formant sans doute deux vers et exprimant que le père d'Agamanor employait alors des peintres à représenter des scènes chevaleresques sur les murs intérieurs de son manoir.*

- 21300 « Que je pourtraioie en .i. role
 « De toutes couleurs, ossi bien
 « Et par ossi tres grant engien,
 « Si com li ouvrier le disoient,
 « Que li propres mestre faisoient.
- 21305 « Ensi me demora d'enfance,
 « Chiere dame, ceste ordenance
 « Que je ne tieng pas a villainne,
 « Non se vous et ma souverainne
 « Ne le me tournés a reproce.
- 21310 « Ensi, dame, je vous approce *f. 157 b*
 « La matere dont parler voel,
 « Comment il n'en poet a mon voel
 « Aler, fors a vostre plaisir.
 « Quant je peus de jonece issir
- 21315 « Je me commençai a armer,
 « A jouter, et a behourder,
 « Et a faire toutes antises
 « D'armes et grandes apertises
 « Pour mon corps mieulz bouter avant.
- 21320 « Chiere dame, en ce couvenant,
 « Poursieui ou .v. ans ou .vi.
 « .I. jour estoit en mon pays
 « Et dalés mon signeur mon pere,
 « Si oÿ la, c'est cose clere,
- 21325 « Recorder comment une dame,
 « Qui haute honneur le coer entame,
 « Avoit une queste mis sus.
 « De puis ne m'eüst tenu nulz
 « Que brief je ne m'i fuisse mis.
- 21330 « Si me parti de mon pays
 « Secretement, sans congiet prendre,
 « Ne sçai se j'en fay a reprendre
 « A pere et a mere que j'aye,

21329 je ne m'i, B je ne me.

- « En esperance bonne et gaie
 21335 « D'avenir a ceste Hermondine,
 « Pour qui mains chevaliers chemine.
 « S'ay poursieui a mon pooir
 « Tout le temps les armes, pour voir,
 « Et fui au tournoy de la Garde.
 21340 « Mais, ma dame, quant je regarde
 « As mieulz faisans, il y ot la
 « .I. chevalier qui s'esprouva
 « A moy, et jou a li, .iii. fois ;
 « Dont par chiaus de qui le tournois *f. 157 c*
 21345 « Fu veüs, savoir vous poés
 « De nos apertises assés.
 « Mais je falli la a l'onneur
 « De l'esprivier pour le milleur ;
 « Cilz l'ot qui le soleil d'or porte,
 21350 « En qui proece se deporté
 « Et, qui demander m'en vodroit,
 « Il le conquist certes de droit.
 « De puis ce tournoy de la Garde,
 « Ma dame, a mon temps je regarde
 21355 « Et comment je l'ay alewé,
 « Mais pas ne l'ay si empriemé
 « Que de tout me puist souvenir.
 « De puis peuimes nous venir,
 « Moi et cilz dont ores parloie,
 21360 « Tout d'encontre et sus une voie,
 « Et jou qui avoie en mon cuer
 « Le mautalent, qui a nul fuer
 « N'en estoit encores partis,
 « De ce qu'il m'ot tolus le pris,
 21365 « L'envaï d'un cours de la lance,
 « Et la fumes a l'ordenance
 « De jouste et de bataille assés,
 « Et euist voir estés outrés
 « Li uns de nous, il n'est pas doubte.

- 21370 « La estoit nostre entente toute,
 « Quant no doy varlet s'en meslerent,
 « Qui maugré nous nos desseverent
 « Et nous donnerent la grant tort,
 « Disans : « Vous volés vous a mort
- 21375 « Chi mettre, par vo vasselage ?
 « Et vous savés, sus vo voiage,
 « Gist une journée tres bonne;
 « Car il doit par devant Tarbonne *f. 157 d*
 « Temprement .i. tournoy avoir. »
- 21380 « Dame, ceste parolle voir
 « Nous apaisa de plus combatre.
 « La nous departesins tout .iiii.
 « Au tournoy fui, il n'i fu pas;
 « Je ne sçai mies quelz li cas
- 21385 « Fu ou est, qu'il en defalli.
 « Le jour dou tournoy m'assalli
 « Amours, je le vous jur, par m'ame,
 « Damoiselle, pour vostre dame,
 « Et tant c'au soir veoir l'alay,
- 21390 « Mais onques a li ne parlay.
 « Si l'avisai je bien de priès,
 « Et se vous di, par mos exprès,
 « Que par imagination
 « Si m'entra li impression
- 21395 « De sa douce phisonomie
 « Ou cuer, que n'en partira mie,
 « Tant que l'ame me soit au corps.
 « Et, a fin que justes recors
 « Soit ci de moy comptés et fès,
- 21400 « J'oÿ la pluseurs rondelès
 « Chanter moult gratieusement;
 « Mais, vis m'est especialment,
 « Phenonée en canta la .ii.
 « Moult plaisans et moult amoureux,
- 21405 « Les quels je retins en chantant,

« Et que ce soit voirs, je m'en vant,
 « Que bien vous dirai quels il sont. »
 Et Lucienne dist adont :
 « Oil, nous les volons oïr
 21410 « Pour vos parolles averir. »
 Adont cil, par bonne science,
 Le premier rondelet commence. *f. 158 a*

Rondel.

LE jour de l'an, par ce bon jour,
 En estrine vous voel donner
 21415 Mon coer, ma pensée et m'amour,
 Tres doulz amis, sans ja roster.

SOIÉS certains que, sans faulz tour,
 Tout men vivant vous voel amer.
 Le jour de l'an, etc.

21420 CAR j'en reçoï tele douçour,
 Seulement par le doulz penser,
 Qu'il n'est ne painne ne dolour
 Qu'en mon coer puisse demorer.
 Le jour, etc.

21425 « S IQUES, ma douce dame ciere,
 « Quant je regardoïe en la ciere
 « Celle a la quele amour tendoïe
 « Et si doulz parlens entendoïe,
 « Qui issoient hors de son cuer,
 21430 « Comment que pas ne fust ma suer
 « Et qu'elle tenist pour son frere
 « Le chevalier, c'est cose clere,

- « Qui le pris avoit dou tournoy,
 « Tele fortune avoit en moy
 21435 « Et esperance si jolie,
 « Puis qu'il faut que je le vous die,
 « Qu'il me couvenoit a lui tendre,
 « Car espoir me faisoit entendre
 « C'un temps venroit qu'elle saroit
 21440 « Celi qui conquesté avoit
 « Le pris dou tournoy, pour ce jour.
 « Ensi, damoiselle, ou sejour
 « Que je fis a aler vers li,
 « Pris fui, mais mies ne failli,
 21445 « Car je ne sçai voir en ce monde, *f. 158 b*
 « Si grans qu'il est a la reonde,
 « Dame pour qui avoir vodroie
 « Pais, souffisance, honneur et joie,
 « Fors que de li tant seulement;
 21450 « Mais je sçai bien que folement
 « Ay mis mon coer a ce que voi,
 « Car nul compte ne fait de moy. »
 — « Vous ne savés, » dist Luciienne,
 « Vous estes vos, et elle est sienne.
 21455 « Et se nous nous esmervillons
 « De ce que vous estes uns homs
 « Aventureus, a vo samblance,
 « Qui portés une dame blanche,
 « La devise que cilz portoit,
 21460 « Qui si bons chevaliers estoit
 « Au tournoy par devant Tarbonne,
 « Et li quelz ce jour en sa gonne
 « Eut le pris pour le mieulz faisant,
 « Et nous vous oons ce disant
 21465 « Et nommer le dit chevalier,
 « Ne vous devés esmervillier.
 « Au tournoy, se Diex me doinst joie,
 « Ne au dit souper pas n'estoie;

- 21470 « Si n'en sçai dire, de ma part,
 « Se cilz rondelès, qui se part
 « De vo bouche, fu la chantés. »
 Respont Phenonée : « Entendés.
 « Oil, cousine, il a raison,
 « Car je l'avoie en la saison
 21475 « Devant apris, si m'äyt Diex. »
 Ce dist Lucienne : « Or vault mieulz. »
 Adont moult bellement regarde
 Sus le chevalier, qui la darde
 D'amours dedens le coer portoit; *f. 158 c*
 21480 Si dist : « Biau sire, et se c'estoit
 « Vostre aise et la vostre ordenance,
 « Nous vodrions a vo plaisance
 « Oir le rondelet second,
 « Car saciés que telz coses sont
 21485 « Moult plaisans, tant c'a l'escouter,
 « Et poeent forment pourfiter. »
 Lors respondi li chevaliers :
 « Certes, dame, moult volentiers
 « Le dirai, car bien le retins
 21490 « Et assés tost apriès revins
 « Ens ou bois, ou logiés estoie. »
 Adont Agamanor en joie
 Recorda la le rondelet.
 Telz qu'il est, c'est raisons c'on l'et.

Rondel.

- 21495 **P**OUR quoi avés vous nulle doubté
 De moy, mon chier ami tres doulz?

J'AY mis en vous m'entente toute,
 Pour quoi, etc.

21500 CERTES en mer ne sera gouste,
Quant j'amerai aultre de vous.
Pour quoi, etc.

« J ou qui estoie en bon parti,
« J Sus ces doulz mos je me parti,
« Damoiselle, et revins arriere
21505 « Et rapassai par la barriere
« Par ou laiens estoie entrés.
« De puis me sui aventurés
« Par le monde, comme amoureux,
« Une heure liés, l'autre anoieus,
21510 « Ensi c'uns amans a le fois
« Porte liece et puis anois.
« Bien est voirs que sus mon chemin *f. 158 d*
« .I. jour trouvai a un recin
« .I. chevalier, qui ma devise
21515 « Portoit, et quant a cesti vise
« Je vous en conterai le voir.
« Je voel apertement savoir
« Pour quoi il le portoit ensi,
« Ou jus le mesist sans detri,
21520 « Ou a moy aroit la bataille.
« Adont me respondi, sans faille,
« Paroles ou je pris plaisance,
« Car adont n'avoit point de lance,
« Et me dist : « Se j'avoie espoir
21525 « Une lance pour mon devoir
« Faire a vous, vous seriés en pais. »
« Je ne cremoie pas le fais,
« Mais respondi : « Raison avés. »
« Damoiselle, savoir devés

21501 Pour quoi, B Pour coi.

- 21530 « Que je jettai ma lance jus,
 « Et renouvelay au sourplus
 « Les parolles dites devant :
 « Chevaliers, en ce couvenant,
 « Fault que vous moustrés a l'espée,
- 21535 « Pour quoi ne sur quele pensée,
 « Vous portés ceste blanche dame,
 « Ou je ou vous y arons blasme. »
 « Et cilz me respondi en l'eure,
 « Quant ses parolles je saveure,
- 21540 « Qu'il le me diroit volentiers,
 « Non com recreans chevaliers,
 « Mais si com cargiés en estoit.
 « Adonc me conta la endroit
 « Comment ma dame, qui ci est
- 21545 « Et de qui toute honneur me nest,
 « L'avoit mis sus en ceste istance. *f. 159 a*
 « Briefment il m'en dist l'ordenance
 « Si tres bien et si sagement
 « Que n'i seuisse amendement
- 21550 « Mettre, ne ne saröie encor,
 « Et, quant il fu venus au cor
 « De son conte, je fui moult liés
 « Et de respondre appareilliés.
 « Se li dis : « Chevaliers tres doulz,
- 21555 « Honneur tres haute porte a nous
 « Vostre dame et vous autressi
 « Qui portés ma devise ci ;
 « Gré vous en sçai et li trop plus.
 « Or ne le metés jamais jus
- 21560 « Pour homme nul qui le calenge,
 « Et si m'en rendés grant loenge
 « A vo dame, quant le verés ;
 « Et par tout ou la vous serés
 « Et serai, saciés pour certain,
- 21565 « Soit lance ou espée en ma main

- « Je vous serai bons champions. »
 « Ensi la nous departions.
 « Onques ne le vi puissedi ;
 « Mais n'a pas .ii. mois qu'il cheï
 21570 « Que j'estoie chiés .i. manoir
 « Logiés pour la nuit remanoir,
 « Par d'encoste moy mon varlet.
 « Cilz chevaliers vint la de fet,
 « Sans ce que de nous presist garde ;
 21575 « Et me samble quant g'i regarde,
 « Que de nuit, com par escripture,
 « Il nous compta quele aventure
 « Le menoit parmi la contrée.
 « Quant ce vint a la matinée,
 21580 « Il se parti le bon matin ; *f. 159 b*
 « Devant nous se mist au chemin
 « Et jou³apriès environ prime.
 « Chiere dame, je vous exprime
 « L'ordenance ensi qu'elle va,
 21585 « Selonch les parolles que la
 « Nous conta li dis chevaliers.
 « Je chevaucâi .ii. jours entiers
 « Et estoie si fors pensieus,
 « Que mes varlès qui n'est pas viulz
 21590 « En estoit durement irés,
 « Et tant fu de lui detirés
 « Que je li contai mon pourpos.
 « De puis euc .i. peu de repos,
 « Car nous nous mesimes a voie
 21595 « Pour venir, se Diex me doinst joie,
 « En ce propre lieu ou je sui.
 « Mais saciés que pas je ne fui
 « Si trestos avisé adont,
 « Le premier jour ne le secont,
 21600 « Comment je poroie venir
 « Ceens, ne a vous avenir

- « Qui estes tout ce que jou ains,
 « Damoiselle, par ces .ii. mains.
 « Des pourpos y eut plus de .xx. ;
 21605 « Finablement il me souvint
 « De mon art et de l'ordenance
 « Que je avoie appris d'enfance.
 « Si m'avisai que sus cesti
 « J'ouveroie, et l'ai fait ensi
 21610 « Que vous savés, c'est cose clere.
 « Je vous ay conté la matere,
 « Tout ensi qu'elle se demainne. »
 Lucienne lors li ramainne
 .I. pourpos, et dist : « Voire, voire. *f. 159 c*
 21615 « Et comment porions nous croire
 « Que vous feussiés li chevalier
 « Si preus, si hardis et si fiers
 « Qui desconfi le dit conroi?
 « Ne le crerai ja, se ne voy
 21620 « En vous la matere parelle ;
 « Mais je voel c'on vous appareille
 « Des armes aucune ordenance,
 « Par quoi hors soions de doubtaunce. »
 Dist Agamanor : « Je le voel,
 21625 « Car il me couvient sus vo voel
 « Ordener, et le voel ossi. »
 — « Or vous partés donques de ci, »
 Dist Lucienne, « et si rentrés
 « En la cambre ; c'est bien nos grés.
 21630 « Assés tost vous irai requerre. »
 Agamanor ajamba terre
 Et dedens la cambre revint,
 La ou Valienne se tint.

21635 **O**R est partis Agamanor
 Et les .ii. dames sont au cor

- De leur cambre, en tres grant conseil.
 « Ma cousine, je me conseil
 « Tout par vous », ce dist Phenonée.
 « Or soiés si bien ordenée
 21640 « Que nous rendons bonne raisons
 « A ce damoisiel qui est homs,
 « Ce me samble, de bonne afaire,
 « Car il nous fault response faire,
 « Sur ce qu'il nous a chi bailliet,
 21645 « Et ensi li avés tailliet;
 « Partir ne s'en poet sans response. »
 Lucienne se voit semonse
 De sa cousine; si respont *f. 159 d*
 Et dist : « Ma cousine, amours vont
 21650 « Par pluseurs manieres avant.
 « Pour ce le vous ay mis devant.
 « De cest homme que vous en samble?
 « Il nous a ci remis ensamble
 « Pluseurs choses faites et nées.
 21655 « Comment s'en portent vos pensées?
 « Quel chose en vodriés vous jugier?
 « Le tenriés vous a chevalier,
 « S'il en aloit par vostre avis? »
 Respont Phenonée : « Il m'est vis
 21660 « Qu'il soit chevaliers voirement,
 « Car il a de grant sentement
 « Parlé, et si voet c'on l'esproeve.
 « De tout ce qu'il dit et qu'il rueve
 « La nous poons bien affier.
 21665 « Encor, pour vous certifier,
 « Lyoniaus me dist tout ensi,
 « Le jour qu'il revint devers mi,
 « Comme il nous a ci recordé.
 « Ne le vi en riens descordé
 21670 « Que compté ne nous ait tout voir.
 « Cousine, vous devés savoir

- « Que nous le poons couroucier.
 « On ne doit pas .i. chevalier
 « Ensi mener que le menons.
 21675 « Je vous pri que le rappellons
 « Et li disons en verité
 « Que s'il a chevaliers esté,
 « Bons et preus, qu'il le soit encores,
 « A ceste fin que les memores
 21680 « En puissent venir devant nous. »
 — « Phenonée et fins coers tres doulz, »
 Ce dist Lucienne, « attendés *f. 160 a*
 « Et mies si tost n'estendés
 « Vos grasces ; ce seroit folie.
 21685 « Saciés que je sui consillie
 « Comment je li responderai,
 « Et sur ce querir je l'irai. »
 — « Or alés. » Lucienne part
 Et si s'en vient de celle part
 21690 Ou Agamanor se tenoit.
 Si l'acene et, quant cilz le voit,
 Il est tantost sallis avant,
 Ou point ou il estoit devant.

- 21695 **A** GAMANOR EST REVENUS
 Entre les dames, dont tenus
 Est longement, bien le veés ;
 Mais c'est trop grandement ses grés,
 Car il ne vosist ailleurs estre.
 Lucienne au costé senestre
 21700 Se tient et li parole ensi :
 « Biau sire, vous serés pour mi
 « Hui ce jour nommés chevaliers,
 « Et aultres jours se li mestiers
 « Est trouvés de chevalerie,
 21705 « En vous, de ce ne doubtés mie,

- « Et a fin que veons en voir
 « Ce que vous faites a savoir,
 « Que, soit ou a .i. ou a deus
 « Chevaliers bien chevalereus,
 21710 « Vous vodrés vo corps esprouver,
 « A fin c'on vous puist tel trouver
 « Que ci nous avés mis avant,
 « Nous retenons ce couvenant :
 « Ma cousine premierement
 21715 « Et jou apriès secondement,
 « Vous ferés ce que nous dirons. *f. 160 b*
 « Dedens .vi. jours nous pourverons
 « De .ii. chevaliers par samblance ;
 « Cescuns ara espée et lance
 21720 « Et sera armés a cheval,
 « Comme on doit armer .i. vassal
 « Qui se voelt armer en bataille,
 « Et droitement devant la baille
 « De ce manoir les trouverés,
 21725 « Au jour que droit ci revenrés.
 « Et se ce vous ne volés faire,
 « Il vous couvient en avant traire
 « A jamais retourner vers nous. »
 Agamanor lors en genouls
 21730 Se jetta devant Lucienne
 Et dist : « Ha ! tres bonne moiienne,
 « Vous m'avés a gré bien servi.
 « Onques mieus dire je ne vi,
 « Et je revenrai volentiers
 21735 « Et mousterai que chevaliers
 « Sui je voirement, a l'espée. »
 — « Or alés, » ce dist Phenonée,
 « Et si vous souviegne dou jour,
 « Car nous ferons ci no sejour ;

21727 traire, *B* taire.

- 21740 « Vous nous retrouverés droit ci. »
 Agamanor atant parti,
 Qui prist congiet moult bellement,
 Et les dames moult doucement
 Li donnerent entre elles .ii.
- 21745 Li chevaliers revint tous seulz,
 Au manoir ou Bertoulès fu,
 Qui demande : « Monsigneur, u
 « Avés vous esté tel termin?
 « A painnes me sui je au chemin
- 21750 « Mis pour encontre vous aler. » *f. 160 c*
 Adont commença a parler
 Agamanor sans detriance,
 Et li recorde l'ordenance
 De li et des dames ossi;
- 21755 De cief en cor li dist ensi
 Que portée estoit la besongne :
 « Or fault il, compains, que je songne
 « Que je soie la au dit jour,
 « Se jamais voel avoir honnour. »
- 21760 — « Vous y serés, » dist Bertoulès,
 « Sus vo cheval, armés tous près,
 « Pour a .ii. chevaliers combatre.
 « Se vous ne les poés abatre
 « Sus le camp, par devant les dames,
- 21765 « Ce vous sera uns trop grans blasmes. »
 Et cilz respont, a longe alainne :
 « Je m'en meterai voir en painne. »

21770 **O**R vous dirons des damoiselles
 Qui sont jones, frices et belles,
 De Lucienne et Phenonée,
 Qui ont ceste cose ordenée
 Qu'il faut c'Agamanor s'esprueve
 A yaus .ii., c'est assés esprueve.

- Ce propre jour que partis fu
 21775 Li chevaliers, bien savés d'u,
 Dou manoir c'on appelle au Bois,
 Phenonée a bassete vois
 Dist ensi : « Or ça, ma cousine,
 « Vous avés ordonné .i. signe.
 21780 « Il fault ce rouge chevalier
 « Temprement si appareillier
 « Qu'a yaus .ii. se combatera.
 « Je croi moult bien qu'il revenra;
 « Il ne le lairoit nullement.
 21785 « Mais or me dittes loyaument
 « Ou .ii. chevaliers prenderons
 « En qui affier nous porons.
 « Point ne sera en ceste terre;
 « Peu en y a qui sachent guerre.
 21790 « Ossi jamais ne le feroie,
 « Car trop fort blasmée en seroie
 « De mon signeur et de ma dame.
 « Ensi donc receverons blasme,
 « Ou de l'un costet ou de l'autre,
 21795 « Voires, se ne mettons sus fautre
 « Aucune ordenance nouvelle. »
 Ce dist Lucienne : « Ma belle
 « Cousine et ma tres chiere amie,
 « De ce ne me soussiés mie,
 21800 « Car je les ay tous pourveüs,
 « De moy grandement cogneüs
 « Bons chevaliers, preus et hardis,
 « Et qui me vodroient toutdis
 « Chi et ailleurs servir a gré.
 21805 « Je les ay ja tout en secré,
 « Chiere cousine, envoiés querre;
 « Il ne sont point de ceste terre
 « Ne ossi de vo cognissance,
 « Ne cuidiés ja qu'en ignorance

f. 160 d

- 21810 « Je doie la journée mettre.
« Trop mal me vodroie entremettre
« Que de vous consillier a point,
« Se je defalloie dou point
« Que j'ay ordené et empris.
- 21815 « .II. chevaliers verés de pris
« Chi venir au jour que dit ay;
« De ce segure je vous fay,
« Ensi sera que je parole. »
- Phenonée ceste parole
- 21820 Ne releva onques de puis.
Toutes fois moult de ses deduis
Prendoit as .ii. draps regarder
C'Agamanor li peut donner.
En sa cambre les avoit mis
- 21825 Et contre une paroit assis;
La les regardoit a le fois
Et mettoit encontre ses dois,
Et disoit qu'il estoient bien
Fait, par sens, et par grant engien
- 21830 Et par moult jolie ordenance,
Et qu'elle y prenoit grant plaisance.

f. 161 a







APPENDICE

Page 207. — Le premier fragment de A débute par un vers :

Contre tous ses.

auquel succède cette strophe, relative à l'épisode contenu dans les vers 16407-16451 de notre édition et où l'on ne retrouve que quatre des vers donnés par B (les vers chiffrés ici 11 à 13 et 18).

Moult fu Agham[anor].....

Qui cuida moult.

Que on ne le peüst.....

Or vodra il au bien,

5 Ce dist, contrevengier son honte.

Sus son cheval tantost remonte,

Car point ne parti de le priesse

L'espée ou poing, l'entente espresse

Qu'il puist faire aukun bon exploit.

10 Un chevalier devant lui voit,

Le blanch a une noire bende;

Sus lui son mautalent amende,

Car telement le porte a terre

Qu'il le couvint venir requerre

15 Son escuier, ens ou tournoy,

Près que mort, dont il ot anoy.

Après resbati le secont,

Ens ou regart dou roy Hermont

Qui le prise moult grandement

20 Et dist que de grant hardement
 Est il et de haute entreprise.
 Mais encores trop mieus il prise
 Le chevalier de bleu armé :
 Autrement il ne l'a clamé
 25 En chevauchant de chief en cor,
 Fors le bleu au cler soleil d'or.
 Bien est son entension toute
 Que il passera d'iaus le route
 Et ara le pris dou tournoy.
 30 Il n'est mies seus, par ma foy,
 Qui le prisent et recoumandent
 [an]dent
 ient
 ent
 35llier
 illier
 Entre lui et Aghamanor :
 Il n'est nus qui les passe encor
 De faire la trop plus que nus.
 40 Messires Feughins et Caulus,
 Desramez et Dreomedès,
 Et li vaillans Pollicenès,
 Par desous la baniere blanche
 Se tiennent en bonne ordenanche ;
 45 Mais chil de le bleue baniere
 Les reboutent de forche arriere,
 Et conquerent et metent jus
 Par l'emprise et les grans viertus
 De Melyador le vassal.
 50 N'en i a nul especial,
 Deseure lui, sachiés pour voir,
 Ne qui si bien se sache avoir
 En l'estour et en la mellée,
 Ou on voit mainte clere espée
 55 Ensonniie de ferir.
 On doit bien tel tournoy cerir.

Page 209. — Les dix vers 16462-16471 de notre texte sont représentés dans A par les vingt-huit vers que nous repro-

duisons ci-après, en les faisant précéder du vers initial de la première phrase, répondant au vers 16461 de la présente édition :

Tant dura chils fort capleïs,
 Que li pluseur telement furent
 Lasset de faire ce qu'il dubrent,
 60 Qu'il estoient si affoibli
 Que leur cop a mains c'au demi
 De forche estoient revenu.
 Adont li hiraut sont venu
 Sus les elles dou dit tournoy,
 65 Et dient en haut cel envoy
 En chevauchant près tout autour :
 « Or sus, chevalier, au retour !
 « Moult bien a esté la journée
 « Hui par vo fait continuée. »
 70 Ensi se depart li tournois.
 Mais Melyador li courtois
 Demora darainiers de tous,
 Qui ce jour a les siens rescous
 Et fait honneur oultre l'ensengne.
 75 On le moustre au doi et ensagne.
 Des chevaliers mors et estains
 En y a vint et deus dou mains,
 Et de navrés et de blechiés
 Moult grant fuison, bien le sachiés.
 80 Encores ne sont point ostées
 Les banieres ne raportées.
 On les lait ester sus le plache.
 Melyador n'a qui le cache,
 Ne qui le poursiue au retour,
 85 Car tous sont parti de l'estour.....

Page 218. — Les six vers 16769-16774 de notre texte sont remplacés, dans A, par dix vers différents que nous reproduisons en les accompagnant des cinq qui les précèdent et qui sont ici nécessaires au sens :

« Damoiselle, je vous suppli
 « Que dou chevalier vous souvigne,

« Qu'il est enssi c'a tour il vigne,
 « Qui se combati l'autre fois
 90 « Encontre Camel de Camois
 « Pour vous et pour vostre cousine
 « Qui chi est, ma dame Hermondine. »
 Florée respondi en l'eure,
 Qui point la granment ne demeure,
 95 Car mies ne sçavoit encor
 Que ce fust la Melyador,
 Ne jamais pensé ne l'eust,
 Ne croire adont ne le peust,
 Et dist : « Moult volentiers, par m'ame.
 100 « Au gré dou roy et de ma dame.....

Page 219. — Les quarante-sept vers numérotés 16779-16825 en notre édition sont remplacés, dans A, par les trois vers suivants (et non sept, comme nous l'avons dit plus haut, par erreur) :

Et Florée adont le regarde,
 Et Melyador se retarde,
 Qui se remet dedens la presse.



Publications de la SOCIÉTÉ DES ANCIENS TEXTES FRANÇAIS
(En vente à la librairie FIRMIN DIDOT ET C^{ie}, 56, rue
Jacob, à Paris.)

- Bulletin de la Société des Anciens Textes français* (années 1875 à 1896).
 N'est vendu qu'aux membres de la Société au prix de 3 fr. par année, en
 papier de Hollande, et de 6 fr. en papier Whatman.
- Chansons françaises du xv^e siècle* publiées d'après le manuscrit de la Biblio-
 thèque nationale de Paris par Gaston PARIS, et accompagnées de la musi-
 que transcrite en notation moderne par Auguste GEVAERT (1875). *Epuisé.*
- Les plus anciens Monuments de la langue française* (ix^e, x^e siècles) pu-
 bliés par Gaston PARIS. Album de neuf planches exécutées par la photo-
 gravure (1875). 30 fr.
- Brün de la Montaigne*, roman d'aventure publié pour la première fois, d'a-
 près le manuscrit unique de Paris, par Paul MEYER (1875) 5 fr.
- Miracles de Notre Dame par personnages* publiés d'après le manuscrit de
 la Bibliothèque nationale par Gaston PARIS et Ulysse ROBERT; texte com-
 plet t. I à VII (1876, 1877, 1878, 1879, 1880, 1881, 1883), le vol. 10 fr.
 Le t. VIII, dû à M. François BONNARDOT, comprend le vocabulaire, la
 table des noms et celle des citations bibliques (1893). 15 fr.
 Le t. IX et dernier contiendra l'introduction et les notes.
- Guillaume de Palerne* publié d'après le manuscrit de la bibliothèque de l'Ar-
 senal à Paris, par Henri MICHELANT (1876). 10 fr.
- Deux Rédactions du Roman des Sept Sages de Rome* publiées par Gaston
 PARIS (1876). 8 fr.
- Aiol*, chanson de geste publiée d'après le manuscrit unique de Paris par
 Jacques NORMAND et Gaston RAYNAUD (1877). 12 fr.
- Le Débat des Hérauts de France et d'Angleterre*, suivi de *The Debate be-*
tween the Heralds of England and France, by John COKE, édition commen-
 cée par L. PANNIER et achevée par Paul MEYER (1877). 10 fr.
- Œuvres complètes d'Eustache Deschamps* publiées d'après le manuscrit de
 la Bibliothèque nationale par le marquis DE QUEUX DE SAINT-HILAIRE,
 t. I à VI, et par Gaston RAYNAUD, t. VII à IX (1878, 1880, 1882, 1884,
 1887, 1889, 1891, 1893, 1894), le vol. 12 fr.
- Le Saint Voyage de Jherusalem du seigneur d'Anglure* publié par François
 BONNARDOT et Auguste LONGNON (1878). 10 fr.
- Chronique du Mont-Saint-Michel* (1343-1468) publiée avec notes et pièces
 diverses par Siméon LUCE, t. I et II (1879, 1883), le vol. 12 fr.
- Elie de Saint-Gille*, chanson de geste publiée avec introduction, glossaire
 et index, par Gaston RAYNAUD, accompagnée de la rédaction norvégienne
 traduite par Eugène KOELBING (1879). 8 fr.

- Daurel et Beton*, chanson de geste provençale publiée pour la première fois d'après le manuscrit unique appartenant à M. F. Didot par Paul MEYER (1880). 8 fr.
- La Vie de saint Gilles*, par Guillaume de Berneville, poème du XIII^e siècle publié d'après le manuscrit unique de Florence par Gaston PARIS et Alphonse Bos (1881) 10 fr.
- L'Amant rendu cordelier à l'observance d'amour*, poème attribué à MARTIAL D'Auvergne, publié d'après les mss. et les anciennes éditions par A. DE MONTAIGLON (1881). 10 fr.
- Raoul de Cambrai*, chanson de geste publiée par Paul MEYER et Auguste LONGNON (1882). 15 fr.
- Le Dit de la Panthère d'Amours*, par Nicole DE MARGIVAL, poème du XIII^e siècle publié par Henry A. TODD (1883) 6 fr.
- Les Œuvres poétiques de Philippe de Remi, sire de Beaumanoir*, publiées par H. SUCHIER, t. I et II (1884-85). 25 fr.
Le premier volume ne se vend pas séparément; le second volume seul 15 fr.
- La Mort Aymeri de Narbonne*, chanson de geste publiée par J. COURAYE DU PARC (1884). 10 fr.
- Trois Versions rimées de l'Évangile de Nicodème* publiées par G. PARIS et A. Bos (1885) 8 fr.
- Fragments d'une Vie de saint Thomas de Cantorbéry* publiés pour la première fois d'après les feuillets appartenant à la collection Goethals Vercruysse, avec fac-similé en héliogravure de l'original, par Paul MEYER (1885). 10 fr.
- Œuvres poétiques de Christine de Pisan* publiées par Maurice Roy, t. I et II (1886, 1891), le vol. 10 fr.
- Merlin*, roman en prose du XIII^e siècle publié d'après le ms. appartenant à M. A. Huth, par G. PARIS et J. ULRICH, t. I et II (1886). 20 fr.
- Aymeri de Narbonne*, chanson de geste publiée par Louis DEMAISON, t. I et II (1887). 20 fr.
- Le Mystère de saint Bernard de Menthon* publié d'après le ms. unique appartenant à M. le comte de Menthon par A. LECOY DE LA MARCHE (1888). 8 fr.
- Les quatre Ages de l'homme*, traité moral de Philippe DE NAVARRE publié par Marcel DE FRÉVILLE (1888) 7 fr.
- Le Couronnement de Louis*, chanson de geste publiée par E. LANGLOIS, (1888). 15 fr.
- Les Contes moralisés de Nicole Bozon* publiés par Miss L. Toulmin SMITH et M. Paul MEYER (1889). 15 fr.
- Rondeaux et autres Poésies du XV^e siècle* publiés d'après le manuscrit de la Bibliothèque nationale, par Gaston RAYNAUD (1889). 8 fr.
- Le Roman de Thèbes*, édition critique d'après tous les manuscrits connus, par Léopold CONSTANS, t. I et II (1890). 30 fr.
Ces deux volumes ne se vendent pas séparément.
- Le Chansonnier français de Saint-Germain-des-Prés* (Bibl. nat. fr. 20050), reproduction phototypique avec transcription, par Paul MEYER et Gaston RAYNAUD, t. I (1892). 40 fr.
- Le Roman de la Rose ou de Guillaume de Dole*, publié d'après le manuscrit du Vatican par G. SERVOIS (1893). 10 fr.
- L'Escoufle*, roman d'aventure, publié pour la première fois d'après le manuscrit unique de l'Arsenal, par H. MICHELANT et P. MEYER (1894). 15 fr.
- Guillaume de la Barre*, roman d'aventures, par ARNAUT VIDAL DE CASTELNAUDARI, publié par Paul MEYER (1895). 10 fr.
- Meliador*, par Jean FROISSART, publié par A. LONGNON, t. I et II (1895), le vol. 10 fr.
-

Le Mystère du viel Testament publié avec introduction, notes et glossaire, par le baron James DE ROTHSCHILD, t. I-VI (1878-1891), ouvrage terminé, le vol. 10 fr.

(Ouvrage imprimé aux frais du baron James de Rothschild et offert aux membres de la Société.)


Tous ces ouvrages sont in-8°, excepté *Les plus anciens Monuments de la langue française*, album grand in-folio.

Il a été fait de chaque ouvrage un tirage à petit nombre sur papier Whatman. Le prix des exemplaires sur ce papier est double de celui des exemplaires en papier ordinaire.

Les membres de la Société ont droit à une remise de 25 p. 100 sur tous les prix indiqués ci-dessus.

La Société des Anciens Textes français a obtenu pour ses publications le prix Archon-Despérouse, à l'Académie française, en 1882, et le prix La Grange, à l'Académie des Inscriptions et Belles-Lettres, en 1883 et 1895.







8692

vol. 2

THE INSTITUTE OF MEDIAEVAL STUDIES
10 ELMSLEY PLACE
TORONTO 5, CANADA.

8692

